

妙法蓮華經解

顯明大師法集

代五十四第觀教台天持傳



相法師大法念明顯

自序

國運、教運注定我的命運，生來孤苦，與佛有緣。十二歲出家，就讀哈爾濱極樂寺佛學養成所，民國二十年，時年十五歲，於營口楞嚴寺，禪定老和尚座下受具足戒。遂至寧波觀宗講寺親近寶靜法師，於觀宗寺弘法研究社畢業後，擔任輔講、主講。並於香港弘法精舍輔講任內，蒙寶公傳授天臺宗正法，為傳持天臺教觀第四十五代。余受觀宗法乳，得佛隴真傳，生平以教觀總持，說默蓄於二六時中。至於稍盡棉力，護國衛教等事，樂觀長老著『中國佛教近代史論集』——法侶評傳，稱『白山黑水一奇僧』，暨廣嚴法師撰，中國佛教會出版『高山仰止』，予以披露，當之有愧。

來到臺灣，先後於汐止慈航佛學院、中壢佛學院、南光女眾佛學院、三藏佛學院、東山佛學書院、法光寺佛學研習會、中華佛學院、菩提佛學院等教授佛學。現仍任臺北華嚴專宗學院、中國內學院、能仁佛學院、福嚴佛學院教席，暨妙清佛學院導師、主講。其間所講課業及在各大專院校佛學社部分講錄及開示等，由學員筆記，彙編十一種，計教觀綱宗講記、天臺四教儀要釋、始終心要略釋、楞伽經要解、勝鬘經要解、四十二章經要解，心經、彌陀經、盂蘭盆經等講記，大乘起信論義疏、八識規矩頌講記等，商予付印流通，藉報四恩。非屬著作，豈圖傳聞，願求不違心、不違生、不違佛耳。

四明觀宗講寺臺北別院顯明念法識 民國六十八年三月二十日

序品第一	五
方便品第二	四〇
譬喻品第三	七三
信解品第四	一一七
藥草喻品第五	一四一
授記品第六	一五六
化城喻品第七	一六六
五百弟子授記品第八	一九八
授學無學人記品第九	二一一
法師品第十	二一七
見寶塔品第十一	二三一
提婆達多品第十二	二四三
勸持品第十三	二五三
安樂行品第十四	二五九
從地涌出品第十五	二八六
如來壽量品第十六	三〇二
分別功德品第十七	三三〇
隨喜功德品第十八	三三五
法師功德品第十九	三四二
常不輕菩薩品第二十	三五五
如來神力品第二十一	三六五
囑累品第二十二	三七二
藥王菩薩本事品第二十三	三七五
妙音菩薩本事品第二十四	三八八
觀世音菩薩普門品第二十五	三九七
陀羅尼品第二十六	四一一
妙莊嚴王本事品第二十七	四一七
普賢菩薩勸發品第二十八	四二四
跋語	四三二
法華經讚(七卷)	四三三

妙法蓮華經解

姚秦三藏法師鳩摩羅什譯
天臺佛隴後裔顯明念法解

天臺別立五重玄義（釋名、顯體、明宗、論用、判教）解題。再以七義（標章、引證、生起、開合、料簡、觀心、會異）共解五章。並以四義（因緣、約教、本迹、觀心）釋經。

五重玄義

一、釋名

此經以法喻爲名（妙法是法，蓮華是喻。），序品云：『我見燈明佛，本光瑞如此，以是知今佛，欲說法華經。』『法』有十界十如權實本迹之法。南嶽思大師舉三種法（佛、衆生、心），衆生爲根，潤以慈悲心，抽枝發芽開華結果。華嚴所謂心、佛、衆生三無差別，是爲『妙』。

圓融三諦絕待論妙，隔離三諦相待論開。本經七卷二十八品，前十四品，明迹門十妙（境、智、行、位、三法、感應、神通、說法、眷屬、利益），三周（法說、譬說、因緣）度聲聞。後十四品本門十妙（因、果、國土、感應、神通、說法、眷屬、涅槃、壽命、利益），藥王導歸極樂，觀音冥加顯感，勸發三陀羅尼，均示中道實相。

『蓮華』：妙法難解，假喻易彰，蓮華譬妙法。

權實三譬：爲蓮故華譬爲實施權。

華敷譬開權，蓮現譬顯實。

華落譬廢權，蓮成譬立實。

本迹三譬：蓮譬本，華譬迹。

華敷譬開迹，蓮現譬顯本。

華落譬廢迹，蓮成譬立本。

『經』：梵語修多羅，此云契經，有歷法明經等義。

二、顯體

此經以實相為體。序品云：『今佛放光明，助發實相義。』又云：『諸法實相義，已為汝等說。』方便品云：『無量衆所尊，為說實相印。』又云：『唯佛與佛乃能究竟諸法實相。』偈云：『諸佛法久後，要當說真實。』又云：『我以相嚴身，為說實相印。』法師品云：『開方便門，示真實相。』安樂行品云：『觀諸法實相。』壽量品云：『如來如實知見。』實相者，卽善惡染淨性相等對法，住於平等不二的法位，徹法底源。

三、明宗

此經會衆善之小行，歸廣大之一乘，以化他立權，自行顯實，一乘因果為宗。序品云：『佛當雨法雨，充足求道者。』體含因果非二，宗致因果非一，以宗顯體，由體明宗，非一二也。普賢觀云：『大乘因者諸法實相，大乘果者亦諸法實相。』本經前十四品，破廢方便，開顯真實，明迹因迹果。後十四品，發迹顯本，廢方便近壽，明長遠實果，明本因本果。

四、論用

此經以自行化他權實二智為用。序品云：『諸求三乘人，若有疑惑者，佛當為除斷，令盡無有餘。』方便品云：『諸佛法久後，要當說真實。』如來以權實二智為妙能，此經廢草庵之滯情，蕩化城之執教，以斷疑生信為勝用。

五、教相

此經發衆善之權巧，顯本地之幽微，一期化導，事理俱圓。以無上醍醐，純圓獨妙為教相。先說華嚴益菩薩，小根不聞。次在鹿苑為聲聞，大根不用。方等般若雖大小赴緣取益，均隨他意語，兼但對帶非佛本懷，乃至涅槃名為

平等，法華開顯，即粗成妙，功用無二。

七義共解

前標五章，引經證義，生起有次第。（方便品云：為大事因緣——名，佛之知見——體，開示悟入——宗，為令眾生——用，此異餘經——教。）五章開合釋一經（釋名通說、顯體專論、宗默，用說、教相分別）。七譬（譬喻品——火宅。信解品——窮子。藥草喻品——藥草。化城喻品——化城。五百弟子授記品——醉酒繫珠。安樂行品——頂珠。壽量品——醫子。）料簡權實。妙心可軌，稱之為法。佛說依四悉，今解五章與彼同（世界對釋名，第一義對顯體，為人對明宗，對治對論用，分別對教相。）。

四義釋經

（一）因緣釋：因緣即感應，以眾生無機雖近不見，慈善根力遠而自通。

例『如是』為一經事實，聞之欣喜——世界因緣釋。

例『如是』為信順義，舉阿難之信，起人之善——為人因緣釋。

例『如是』異外道經首冠阿漚——對治因緣釋。

例『如是』為真如離非——第一義因緣釋。

（二）約教釋：法無大小，因機有異。

例『一心』為意識——約藏教釋。

例『一心』為阿賴耶識——約通教義。

例『一心』為如來藏——約別教釋。

例『一心』為三千性相百界千如——約圓教釋。

（三）約本迹釋：本為迹家之本，迹為本家之迹。

例『佛出釋氏宮』——約迹釋。

例『如來壽量本無生滅，成佛於塵點劫前』——約本釋。

(四)約觀心釋：隨所見聞，於信心中得見三寶。

例『佛在某處』——處唯心現釋。

例『佛住』——生心無住釋。

例『佛說法』——寄衆生心，觀實相釋。能禮所禮性空寂，能觀所觀唯一心。

始從如是，終於而退，皆以四意消文，其間或用三三一，貴在得意。

姚秦三藏法師鳩摩羅什譯

鳩摩羅什，譯曰童壽，龜茲國（新疆）人，父鳩摩羅炎、印度人、母耆婆乃龜茲王妹、七歲出家，季方二十業已爲王講般若經。秦王苻堅建元十九年，西元三八三年、命呂光伐龜茲，請什師還，至涼州（甘肅）聞苻堅敗，呂光自立，後秦姚興伐涼，什師始入長安，時爲西元四〇一年，十二月、鳩摩羅什五十八歲，住西明閣逍遙園譯經，凡三百八十四卷，秦弘始五年四月二十三日譯大品竟，至八年夏於草堂寺譯妙法蓮華。秦弘始十一年八月二十一日七十歲寂於長安，時晉熙五年也。雖帶妻而居，常說採蓮勿取泥，並吞針以阻僧效，臨終誓言，所譯無謬，焚身後舌不焦爛果驗。姚秦着，簡非周之嬴秦，南北朝之符秦。三藏法師，博通經律論三藏之法，以之自師師人。

此經有三譯本，西晉惠帝永康年中，長安青門敦煌菩薩竺法護，初譯此經，名正法華。

東晉安帝隆安年中，後秦弘始龜茲沙門鳩摩羅什次譯此經，名妙法蓮華。

隋氏仁壽，大興善寺，北天竺沙門闍那笈多，後所譯者，同名妙法。三譯文旨互陳，時所宗尚，皆弘秦本。

序品第一

方便品云：『諸佛興出世，懸遠值遇難，正使出於世，說是法復難，無量無數劫，聞是法亦難，能聽是法者，斯人亦復難』。天臺立教，唯尚法華，法華稱妙，本一開三，迹三顯一，權實一致，本迹同源，轉法華，法華轉，只真俗迷悟耳。經中二十八品俱是妙法，品品之內咸顯實相，教行人理，彼此相攝。猶其方便安樂壽量普門並是本迹之根源，斯經之樞機。

如是等六種成就，冠於經首，眉光六瑞，起於發端，出定揚德、問答釋疑，暢佛慧之宏略，具此三義，故稱爲『序』。

『品』者，梵云跋渠，義類相同，聚在一段。有佛自唱，如梵網經心地品。結集者所置，如大論將大品（序、魔事、囑累）述爲一部。譯人所添，如羅什將大品三品、依人（樓那）義（觀空）法（三假）事（魔事）成九用品。今經除藥王菩薩本事品是佛唱，餘品以無聞品益，故多是結集者置。

諸品之始，故言第一。

從序品至安樂行品，約迹開權顯實，從湧出品至普賢勸發品，約本開權顯實。晉道安以序正流通三科分經。

天臺智者以法華本迹二門，各分序正流通，唯本門不安經首六種成就，如初品爲序分，方便品至第九授學無學人記品爲正宗分，第十法師品至第十四安樂行品爲流通分，爲迹門的序正流通。第十五從地湧出品，他土菩薩疑問段，『爾時諸佛各告侍者，諸善男子，且待須臾，有菩薩摩訶薩，名曰彌勒，釋迦牟尼佛之所授記，次後作佛，已問斯事，佛今答之。』半品，爲序分，此下至第十七分別功德品偈：『佛名聞十方，廣饒益衆生，一切具善根，以助無上心。』爲正宗分。此後均爲流通分，爲本門序正流通。

序有通別，通序者，通諸經。別序者，別一經。如經首列衆，『各禮佛足，退坐一面』爲通序，亦卽六種成就。從『爾時世尊，四衆圍繞，供養尊重讚歎，爲諸菩薩說大乘經，名無量義。』以下至序品文末爲別序。

如是我聞，一時，佛住王舍城，耆闍崛山中，與大比丘衆萬二千人俱，皆是阿羅漢，諸漏已盡，無復煩惱，逮得己利，盡諸有結，心得自在。

『如是』：指一經法體。諸佛道同，經首皆安如是二字，與世無諍，世界悉檀歡喜益。爲佛陀四種遺囑（以戒爲師、惡性默擯、四念處住、經首安如是）之一，令人生信，爲人悉檀生善益。對外道經首阿歐（無有）二字的不如是，對治悉檀破惡益。信理順師，第一義悉檀入理益。方便品云：『十方諸佛爲一大事因緣出現於世』，約因緣感應釋如是。機感設教，教有權實深淺，化儀判，化法釋，四時兼但對帶，文不如，理不是，非本經純圓獨妙之如是。例，因俗文會真理，真諦在事相以外，藏教如是。空色不異，卽事而真，通教如是。生死、涅槃、中道互有出入，別教如是。生死卽涅槃亦卽中道，圓教如是。方便品云：『以種種法，宣示於佛道。』大經云：『粗言及細語，皆歸第一義。』約教解釋如是。非本無以垂迹，非迹無以顯本，應亡迹尋本，約釋尊塵點劫前成道說經爲本，中間作佛說經，及今日說經皆迹也，且本迹一如皆是，壽量品云：『皆謂我少出家……得三菩提，然我實成佛以來，無量無邊阿僧祇劫。』

五百弟子授記品云：『內秘菩薩行，外現是聲聞，實自淨佛土，示衆有三毒』，約本迹釋如是。迹廣本高，唯觀心能窮，例觀前因緣約教本迹等諸如是義，緣起生滅，從假入空，從空出假，雙照二諦，譬喻品云：『若人信汝所說，卽爲見我，亦見於汝，及比丘僧，並諸菩薩。』約觀心釋如是。

『我聞』：舉能持之人。我是耳主，能攝衆緣，世界悉檀，阿難稱我聞，衆皆悲感憶佛，爲人悉檀，阿難相好如佛，短佛三指（一指二寸），衆疑釋尊重出，或他方佛來，或阿難成佛，登高稱我聞，三疑頓遣，對治悉檀，若云：『我聞如是』，則第一義中無我無聞入理益，此約因緣釋我聞。大論云：『凡夫三種我（見、慢、名字）』，阿難學人，無邪我、伏慢我、隨世稱我，藏教。卽我無我，不必析破，通教。知我無我，雙分別我無我，別教。我無我不二，圓教。正法念經云：『阿難一人具四德名（歡喜、賢、典藏、海），

傳持四法藏（小乘、禪、菩薩、佛）』此約教釋我。『空王佛所與釋迦同時發心，示為侍者。』約本迹釋我。因緣假我，即空假中，我為主宰永恆其義屬心，聞為持心戒，發定力，啟慧聞，約觀心釋也。阿難於佛得道夜生，侍佛二十餘年，並未悉聞，但經首均安『如是我聞』者，大論云：『展轉聞』，報恩經云：『阿難求四願（不受故衣、不受別請、不同諸諸比丘須見即見佛、二十年中佛所說法重為我說）。』

『一時』：聞持和合，非異時也，西乾東土天上人間，時差不一，為息諍端，故標因緣和合，稱機歡喜生善破惡入理之時。藏教十六心見道，超凡入聖，三十四心，一時進入無學，通教三人以無言說道，體法入空，同人第一義之時，別教捨三賢登歡喜地之時，圓教六根清淨，入住成佛之時。藏通無學，別圓伏斷見思皆名迹一時，別地圓住名本一時。此經觀與境合，為觀心一時。

『佛』：覺也，有自覺覺他覺滿。智也，有一切智（空）、道種智（假）、一切種智（中）。應身佛，約緣說，有始有終，報身佛，約智說，有始無終，法身佛，約理說，無始無終。佛種從緣起，因緣釋。三十四心正習俱盡，藏佛。斷餘殘習，通佛。現尊特坐蓮華臺，受佛職，別佛。開前三教果頭佛，即法身，圓佛，約教釋。迹中體用俱迹，本中體用俱本，本迹釋。偏覺、真空、次第觀、圓覺，加以六即判之，觀心釋佛也。

『住』：無住而住，住世度生，世界也。天住（十善）梵住（四禪），生善也。聖住（三果已去）對治，佛住寂光入理。藏佛住有餘涅槃，通佛住無餘涅槃，別佛住大般涅槃，圓佛住秘密藏。應佛垂迹，法佛顯本。境智相待觀心是粗，諦觀絕待一心稱妙。

『王舍城』：聞持之所。國名摩伽陀，此云不害，無刑殺。亦名摩竭提，國王即駁足之父。

大論述普明王持不妄語戒之因緣，並說四非常偈：『劫燒終訖，乾坤洞然，須彌巨海，都為灰颺，天龍福盡，於中凋喪，二儀尚殞，國有何常（無常），生老病死，輪轉無際，事與願違，憂悲為害，欲深惑重，瘡疣無外，

三界皆苦，國有何賴（苦）本自非有，因緣成諸，盛者必衰，實者必虛，眾生蠢蠢，都如幻居，聲響皆空，國土亦如（空），神識無形，假成四蛇，無明保養，以爲樂車，形無常主，神無常家，形神尚離，豈有國耶（無我）。』

此城周一百五十里，北門是調達放醉象處，東北是身子遇馬勝比丘得初果處，距東北十四、五里至鷲峰山，佛說法華等經處。王卽心王，舍卽五陰，若析體五陰空，爲藏通二教，滅色獲常色，五陰卽法性爲別圓二教。

『耆闍崛山中』：此翻靈鷲。山南有尸陀林，鷲食屍竟棲其山。前佛今佛皆居此山，佛滅羅漢住，法滅支佛住，無支佛鬼神住，故稱『靈』。中字表中道。『大比丘衆』：明聞持之伴也。大具大（空）多（假）勝（中）義，爲人天所敬故大，徧知內外典故多，超九十五種外道故勝。比丘爲除饑男，含有乞士、破惡、怖魔三義，以中道觀，活法身命，名乞士（爲人），觀五住惑卽菩提，名破惡（對治），邊邪皆中道，卽怖魔（世界），無住無著而出家（第一義），四人以上名和合眾。大論明四種僧：不依中道觀慧名破十戒僧，不解究竟波羅密名愚癡僧，五品六根名懺悔僧，初住以去名真實僧。法華列衆爲真實僧。

『萬二千人俱』：一心具十界，界界互具成百界，每界有相性等十如是，成百界千如，再觀十二入，成萬二千法門。本爲菩薩，迹現聲聞。

『皆是阿羅漢』：含應供（堪爲福田）、殺賊（斷盡見思）、無生（不受後有）三義，與比丘爲因果關係，此權教義，若福九道，殺無明，不著二邊，以佛道聲令一切聞，爲本經之聲聞眾。『諸漏已盡，無復煩惱，逮得己利，盡諸有結，心得自在。』：此五句爲歎德，前二句歎殺賊，諸漏，卽欲漏，欲界煩惱，有漏，上二界煩惱，無明漏，卽三界無明。第三句歎應供，三界因果爲他，智斷功德爲己利。後二句歎不生，諸有，卽三界二十五有（四洲四惡趣、六欲並梵天、四禪四空處、無想五那含），結，卽生因。心得自在，卽俱解脫羅漢，又名心解脫。鈍根但依慧力離煩惱障，未得滅盡定者，名慧解脫羅漢，利根兼離一切禪定之障，而得滅盡定者，名俱解脫羅漢。

其名曰阿若憍陳如，摩訶迦葉，優樓頻螺迦葉，伽耶迦葉，那提迦葉，舍利弗，大目犍連，摩訶迦旃延，阿菟樓駄，劫賓那，憍梵波提，離婆多，畢陵伽婆蹉，薄拘羅，摩訶拘絺羅，難陀，孫陀羅難陀，富樓那彌多羅尼子，須菩提，阿難，羅睺羅，如是衆所知識，大阿羅漢等。

列名，略舉二十一尊者，皆備衆行，例作四釋（因緣、約教、本迹、觀心）。其中如舍利佛（智慧）、須菩提（解空）、目犍連（神通）、迦旃延（論議）、迦葉（苦行）、富樓那（說法）、阿難（多聞）、羅睺羅（秘行）、阿那律（天眼）、優婆離（戒律），通稱十大弟子，隱其圓能，各從一德標名。

『阿若憍陳如』：憍陳如是姓，翻火器，含照與燒二義，照則闇不生，燒則物不生，阿若是名，翻已知，阿毘曇婆沙論，皆稱了本際，或翻得道，增一阿含云，我佛法中，初受法味者，拘鄰如比丘第一。

佛昔於饑世，化爲赤目大魚救世，有木工五人，以斧斫魚肉分給饑民，佛時誓言，於當來世先度此等。又佛爲太子棄國捐王入山學道，父王思念遣五人追侍，其中二人以欲爲淨，太子勤苦遂捨之去，三人以苦行爲淨，太子捨苦行受飲食，亦捨之去，後太子得道先度此五人，卽鹿苑五比丘。

經論釋名不同，列後參考：

一、憍陳如，譯火器。（本行集經名憍陳如。中起本經名拘鄰。最勝王經名阿若憍陳如。賢劫經名居倫。毘耶婆問經及增一阿含名阿若居鄰。玄義釋籤名釋摩男。普曜經名俱鄰。大哀經名俱輪。）

二、頽鞞，譯調馬、馬勝、馬師。（中本起經名頽陞，本行集經名阿奢踰時，四分律名阿濕鞞，最勝王經名阿說恃多阿鞞，文句名阿說示。）前二人爲母族。

三、拔提，譯小賢。（中本起經名跋提，最勝王經名婆帝利迦，四分律

名婆提，本行業經名跋提梨迦，文句名摩訶男。）

四、十力迦葉，譯起氣。（中本起經名十力迦葉，本行集經名婆沙波，四分律名婆敷，五分律名婆頗，最勝王經名波濕波。）

五、摩訶拘利，譯大名。（法華義疏名摩訶拘利，五分律名摩訶男，本行業經及最勝王經名摩訶那摩，四分律名摩訶摩男，善見律名釋摩男，十二遊經名摩訶納，中本起經名摩南拘利，玄贊名摩訶男俱利。）前三人爲父族。

十二遊經云，佛初成道第一年度五人，第二年度三迦葉，第五年度身子目連。

『摩訶迦葉』：翻大龜氏，取靈龜負仙圖而生。或云飲光，其身光能映物。初從佛聞增上戒定慧卽得無漏，受乞食法，行十二頭陀，抖擻諸過，逾老不捨（糞掃衣、但三衣、乞食、節量食、一鉢食、不飲漿、樹下、塚間、露地、常坐）。

『優樓頻螺迦葉（翻木瓜林）、伽耶迦葉（翻城）、那提迦葉（翻河）』：兄弟三人共率千人歸佛。因緣出瑞應經，住解脫林、般若城、法性水，約本迹釋。觀心不動如城，防敵不動而動如水，雙照枯榮如林。『舍利弗』：翻身子。姓拘栗陀，婆羅門種，爲長爪梵志拘絺羅之外甥，於道見頰鞞，威儀具足，因問師法，答云：『諸法從緣生，是故說因緣，是法緣及盡，我師如是說。』一聞卽得初果。至佛所十五日得四果，爲羅雲和尚。增一阿含云：『我佛法中智慧無窮，決了諸疑者，舍利弗第一。』

『大目犍連』：姓也，翻讚誦。大論云：『舍利弗，才明見貴，目連豪爽取重。』

增一阿含云：『我弟子中，神通輕舉，飛到十方者，大目犍連第一。』

增一阿含云：『身子與目連師事沙然梵志，求道無尅，誓言他日若得甘露，必與共嘗。』

外道師徒五百，用咒移山，目連於山頂結跏趺坐，山不能動。

難陀、跋難陀二龍王，瞋佛常於其頂飛空上忉利天說法，欲加害之，目

連先以極大身恐怯，次以極小身鑽齧，然後以常身降之。

調達引五百比丘爲己徒眾，目連厭之，令眠不寤，身子說法，回五百人心，僧得和合。

目連欲窮佛聲，以神力飛過西方恒河沙土，落彼城上休息，實爲彼土鉢緣，彼人誤爲人形蟲。餘如救母等，均爲目連神跡。

『摩訶迦旃延』：翻文飾。長阿舍中十番問答，破外道斷常二見。增一阿含云：『善分別義，敷演道教者，迦旃延最爲第一。』

『阿菟樓駄』：佛之堂弟，亦云阿那律，亦云阿尼盧豆，此翻無貧，昔於飢世贈辟支佛稗飯，獲九十一劫果報充足，因七日夜精進不眠失明，得天眼。增一阿含云：『我佛法中天眼徹視者阿那律比丘第一。』

『劫賓那』：翻房宿。父母禱房星而生。爲覓佛，夜宿陶師房，後又來一比丘，亦寄宿陶師房，前比丘推草與之，自己在地而坐，後比丘爲說法，後比丘者，卽是佛，與佛共宿，故名房宿。增一阿含云：『我佛法中善知星宿日月者，劫賓那比丘是。』

『憍梵波提』：翻牛呵。增一云：『昔五百世曾爲牛王，牛若食後，恒事虛嚼，餘報未夷。』佛陀受阿耆達王請，五百比丘皆噉馬麥，獨憍梵波提在天上尸利沙園受天王供養。增一阿含云：『樂在天上，不樂人間者，牛跡比丘第一。』

『離婆多』：翻假和合。大論云：『於空亭中宿，見二鬼爭屍，請其見證，據實答之，大鬼拔其手足，小鬼取屍補之。』增一阿含云：『坐禪入定，心不倒亂者，離越比丘第一。』

『畢陵伽婆蹉』：翻餘習。過恒水，呼小婢斷流。增一阿含云：『樹下苦坐，不避風雨者，婆蹉比丘第一。』

『薄拘羅』：翻美容，年一百六十歲無病，有五不死報，後母置熬槃、釜中、水中、魚食、刀破，皆不死。昔持不殺戒，故九十一劫命不中夭。過去毘婆尸佛時，施一病僧訶黎果，故身常無病。增一阿含云：『壽命極長，

終不中夭，常樂閒居，不處衆中，薄拘羅第一。』

『摩訶拘絺羅』：翻大膝。舍利弗舅，爲勝姊子往南天竺讀十八經，無暇剪爪，時人呼爲長爪梵志，學訖與佛辯，立一切不受，佛問還受是見否，遂低頭得法眼淨。增一阿含云：『得四辯才，觸難能答，拘絺羅第一。』

『難陀』：亦云放牛難陀，從慕道得名，翻善歡喜。大論云：『頻婆娑羅王，請佛及僧安居，令放牛人，每日送乳酪酥等，有機會見佛，以放牛事難佛，佛爲說放牛十一事，因發心出家成無學果。』

『孫陀羅難陀』：翻好愛，佛之親弟，其婦卽孫陀羅，食息不離，佛與阿難，到其門乞食，令難陀送食至精舍，遂卽命剃頭，每思婦欲逃回，均遇佛擋之，佛將之遊天堂地獄。

『富樓那（翻滿願）彌多樓（翻慈）尼（女也）子』：增一阿含云：『善能廣說，分別義理說法人中，滿願子最爲第一。』

『須菩提』：翻空生，住無睜三昧，因空而生，又言善吉，佛語蓮華比丘尼所禮者色身，須菩提所見法身。

『阿難』：翻歡喜。佛之堂弟，四月八日佛成道日生，侍佛二十五年，推此佛年五十五，阿難年二十五歲。增一阿含云：『知時明物，所至無疑，所憶不忘，多聞廣達，堪任奉持，阿難第一。』

『羅睺羅』：由昔塞鼠穴六日，及太子指妃腹欲後六年，汝當生男，故翻覆障。太子出家後，耶輸有娠，諸釋非議，因抱子投火坑，坑變爲池，蓮華捧體，始釋疑。

俟佛還國，耶輸命羅睺羅奉歡喜丸，逕持上佛，耶輸由此息謗。佛索羅睺令出家，父王不許，耶輸將上高樓，目連飛空來取，付舍利弗爲弟子。

『如是衆所知識大阿羅漢等』：上列二十一位尊者皆大阿羅漢，各人本事卽因緣釋。就其各證無生，依涅槃經德王品俱泯四諦解，生生不可說

（藏）、生生不可說（通）、不生不生不可說（別）、不生不生不可說

（圓），約教釋。內秘菩薩行外現是聲聞，約本迹釋。人行理等，善識觀察，

約觀心釋。

復有學無學二千人。摩訶波闍波提比丘尼，與眷屬六千人俱，羅睺羅母，耶輸陀羅比丘尼，亦與眷屬俱。

學位明數不歎德。研真斷惑名學人，真窮惑盡名無學。

藏教中學人有十八（『四果向』。『三果』。憑教生解之『信行』，依觀入道之『法行』，此為須陀洹十五心見道，十六心斷見之向果。憑信入修道，斷欲思五品名『信解』，此論『家家』，由法行轉入修道，斷欲六品思名『見得』，此為斯陀含之向果。『身證』滅盡定，斷欲思八品名『一種子』，為向三果，斷欲思盡，為阿那含果。）第三果名一來，其一生間隔有五種那含，謂中般（欲界沒未到色界而般涅槃）、生般（欲界沒生色界涅槃）、行般（生色界進斷上界七十一品思惑盡而般涅槃）、不行般（生色界自然涅槃）、上流般（次第上流色界而般涅槃）。無學九人（退、思、護、住、達、不動、不退、慧解脫、俱解脫），即九種羅漢。通教前六地名學人，七已辦地名無學，別教三賢位名學人，登地名無學，圓教五品六根名學人，入住名無學。又就功用無功用分學無學。總之，降佛已還，皆名學人，唯佛稱無學，又觀中道，不緣二邊名學人，境智一心名無學。

百界千如，百如千界，界如互論成二千數。

列尼眾中，但標主名，僅言六千，及亦與眷屬俱，隱德無結文，例前如云：『為眾所知識』等語，故不宜與比丘併稱二眾也。

『摩訶波闍波提比丘尼』：翻大愛道。佛之姨母，尼者天竺女人通名。本住佐度法門，迹育導師。中觀名大，無緣慈益他名愛，能通自他名道。尼眾於三周得記，六根聖位，具六千功德。

『羅睺羅母耶輸陀羅』：翻名聞。在家為菩薩妻，出家為尼眾主，位居無學，為天人知識。以子標母，十二遊經出三夫人（瞿夷、耶輸、鹿野），未曾有經及瑞應經皆云羅睺是瞿夷子，涅槃、法華則云係耶輸陀羅子。但大論說瞿毗陀（瞿夷）是寶女不孕，故知羅睺定是耶輸陀羅之子。觀空一切智

以鹿野不生表妻，觀假道種智以耶輸陀羅生子表妻，觀中一切種智以瞿夷位大表妻。

菩薩摩訶薩八萬人，皆於阿耨多羅三藐三菩提不退轉，皆得陀羅尼樂說辯才，轉不退轉法輪，供養無量百千諸佛，於諸佛所植衆德本，常爲諸佛之所稱歎，以慈修身，善入佛慧，通達大智，到於彼岸，名稱普聞無量世界，能度無數百千衆生。

『菩薩摩訶薩』：具云菩提薩埵，摩訶薩埵。菩提翻『道』，薩埵翻『心』，摩訶翻『大』。卽大道心之衆。

二乘雖稱菩提，非佛功德，故不名薩埵。凡夫雜血，調成百劫淨乳，伏惑利生，以道諦爲初門、爲藏教菩薩。大品明菩薩發心與薩婆若相應者，欲調乳入酪，扶習潤生，道觀雙流，以界內滅諦爲初門、爲通教菩薩。大品明菩薩發心，遊戲神通，淨佛國土，淨名謂得不思議解脫，是調酪爲生熟酥，以界外道諦爲初門，別教獨菩薩法。大品明菩薩發心，卽坐道樹，成正覺，轉法輪，度衆生，是調酥爲醍醐，以界外滅諦爲初門，圓教菩薩也。

『八萬人』：約一心具十法界，互具成百界，每界有相性等十如，別成千數，歷十善成萬法，約八正道，卽八萬法門矣。

『阿耨多羅三藐三菩提』：阿耨翻無上道。三菩提，卽方便、實智、實相。

『不退轉』：梵語阿鞞跋致。藏教僧祇通至百劫上忍位時，離五障有三不退，不生三惡道卽位不退，不生邊地，諸根完具，不受女身，卽行不退，常斷宿命卽念不退。俱舍頌曰：『煖必至涅槃，頂終不斷善，忍不墮惡道，第一人離生。』通教六地以前名輕毛菩薩，信根未立、若第六離欲地斷欲界思惑盡，不退爲凡夫，名位不退，第七已辦地爲行不退，至八支佛地，道觀雙流，名念不退。別教十住名位不退，十行十回向名行不退，十地卽念不退。圓教初信卽位不退，二至十信爲行不退，初住以上卽念不退。法華初住已具三德，名三不退，般若離二死是位不退，解脫具諸行是行不退，法身證實境

是念不退。又空觀卽位不退，假觀卽行不退，中觀卽念不退。

『皆得陀羅尼，樂說辯才，轉不退轉法輪，供養無量百千諸佛，於諸佛所植衆德本，常爲諸佛之所稱歎，以慈修身，善入佛慧，通達大智，到於彼岸，名稱普聞，無量世界，能度無數百千衆生。』：此十二句爲歎德，初三句歎現德（初句歎自行，次二句歎化他。），次三句歎往行（供養佛、植德本、佛所歎、爲福慧兩足），次四句歎內體（慈悲歎應身、佛慧，大智歎報身，彼岸歎法身。）後二句歎外名（名稱普聞而度生）。歎德文，義通本迹，意唯在圓，故亡迹存本，去初取後。

旋陀羅尼是空觀，但有名字，卽辭無礙辯。百千旋陀羅尼是假觀，具十界法，卽法無礙辯。法音方便陀羅尼是中觀，皆入實相，卽義無礙辯。三觀一心，一境三諦，卽樂說無礙辯。

破五住惑，是供養法，三諦理和，是供養僧，解行相資是供養佛。

歷空假中三觀，說法緣慈、生緣慈、無緣慈。

到一切智彼岸，道種智彼岸，一切種智彼岸。通別圓三佛慧，比例可知。總之，圓教初住已去，位位相攝，句句圓融。

其名曰文殊師利菩薩，觀世音菩薩，得大勢菩薩，常精進菩薩，不休息菩薩，寶掌菩薩，藥王菩薩，勇施菩薩，寶月菩薩，月光菩薩，滿月菩薩，大力菩薩，無量力菩薩，越三界菩薩，跋陀婆羅菩薩，彌勒菩薩，寶積菩薩，導師菩薩，如是等菩薩摩訶薩八萬人俱。

列十八大士，從德、從願、從行、立名不同，但均備無量義。

『文殊師利』：翻妙德。三德秘藏不縱橫，從德立名。現仍在北方歡喜世界作佛，號歡喜藏摩尼寶積佛。楞嚴經云：『過去無量阿僧祇劫有佛號龍種上尊王佛，亦是文殊。』非但於法華釋彌勒疑，曾於二萬佛所爲衆啓疑。放鉢經說『文殊爲諸佛之師』。菩薩事跡隱顯眞俗主伴不同。

『觀世音』：梵語婆婁吉低稅。爲過去正法明如來。悲華經云：『若有衆生受苦，稱我名者……不得免苦，不取正覺。』三智名觀，常智無緣，三諦名世，常境無相，三觀爲語本，故名音。補阿彌陀成佛，號一切光明功德山王。

『得大勢』：思益經云：『我投足之處，震動三千大千世界及魔宮殿。』約觀心，三止爲足，投三諦地，動十法界見愛之處。補功德山王如來成佛，名善住珍寶山王。

『常精進』：大寶積經云：『是菩薩爲一衆生經無量劫隨逐不捨。』

『不休息』：無間趣人名爲精進，長時無廢名不休息。約觀心釋，卽觀空不滯空，觀假不住假，雙照二諦。

『寶掌』：普超經云：『被上德鎧，身堅掌固，以實心釋大乘如寶。』約觀心釋，不思議三諦爲寶，一心三觀爲掌。

『藥王』：悲華經云：『願賢劫一千四佛初成道，我皆供養，諸佛入滅，我皆起塔，劫盡苦惱，我皆救護，刀兵疾疫，作大醫王，然後作佛。』藥王在後作佛，卽樓至如來。

『勇施』：出世法寶徧施衆生而無疲厭。『寶月』：所證三諦可貴如寶，能證三智圓照如月。『月光』：圓妙三智能除昏煩熱惱。『滿月』：三智圓明無有缺減。『大力』：智境冥合有大力用。『無量力』：大力用徧應衆緣，徧拔衆苦。『越三界』：以一心三觀超越分段變易二種三界。

『跋陀婆羅』：翻『善守』。在般舟經中名『賢護』。中道正觀於諸善中最爲上首。『彌勒』：此云慈氏。又慈乃姓，名阿逸多，翻無勝。『寶積』：財法二寶，積累兼施。

『導師』：思益云：『導邪入正，不求恩報。』『如是等菩薩摩訶薩八萬人俱』：是結句。

爾時釋提洹因，與其眷屬二萬天子俱，復有明月天子，普香天子，寶光天子，四大天王，與其眷屬萬天子俱。自在天子，大自在天

子，與其眷屬三萬天子俱，娑婆世界主梵天王，尸棄大梵光明大梵等，與其眷屬萬二千天子俱。

此下列雜衆有八番，卽欲天、色天、龍、乾闥婆、緊那羅、阿修羅、迦樓羅、人。以其戒乘緩急不同，報形雜果有異，如下述八龍王多是八地菩薩，乃至華嚴中並得不思議解脫，及龍女成佛等。

『釋提洹因』：翻『能作』。能作忉利天主。忉利翻『三十三』天，四面各八城，中喜見城共三十三，居須彌山頂，爲地居天。雜阿含出多名，釋提洹因（作主）、富蘭陀羅（施）、摩伽婆（爲人時之名）、娑婆羅（爲人時以衣布施）、僑尸迦（爲人時之姓）、舍脂鉢低（婦、夫）、千眼（能思千義稱量觀察）、因提利（三十二天主）。瓔珞經云，拘翼。華嚴經云，帝釋，在第二地。般若說：『過賢劫二千二十四劫作佛，號無著世尊。』住行向爲三十，十地爲一，等覺爲二，妙覺爲主，同居第一義天，服實相甘露（大經四依品云：『如三十三天有妙甘露不死之藥。』）圓初住以上位也。

『明月天子、普香天子、寶光天子』：卽三光天子，爲內臣，約本迹釋，按正法華說，卽大勢至、虛空藏、觀世音。觀心釋，三諦境爲第一義天，境生智如子，三智卽三光。

『四大天王』：居須彌山腰，爲帝釋武將。東提頭賴吒，此云持國，領犍闥婆（香陰，不噉酒肉鬼）、富單那（嗅餓鬼中勝者）。南毗留勒叉，此云增長，領薜荔多（餓鬼最劣者）、鳩槃荼（噉人精氣鬼，陰囊如冬瓜）。西毗留博叉，此云廣月，領毒龍、毗舍闍（餓鬼中勝者，食肉）。北毗沙門，此云多聞，領羅刹（暴惡鬼）、夜叉（捷疾鬼），不令惱人，故稱護世四王。約本迹，則爲常樂我淨四德。觀心，卽護四諦智，不令見愛煩惱侵犯。王卽心王，或云王三昧。

『自在天子、大自在天子』：從四王天，忉利天上，三百三十六萬里有欲摩天（善時），再有兜率天（知足），自在，卽欲界第五化樂天。大自在，卽欲界第六他化自在天。觀心，入空是自在，入中是大自在。『娑婆世界主，梵天王，尸棄大梵』：娑婆翻忍，安於三毒不肯出離。梵天，翻離欲，

卽色界。尸棄，翻頂髻，卽初禪大梵天主，另有梵衆梵輔二天。

『光明大梵等』：卽二禪天，有少光、無量光、光音。等者，有三禪三天（少淨、無量淨、徧淨）、四禪九天（福生、無雲、廣果、無想、無煩、無熱、善現、善見、色究竟）。

有八龍王：難陀龍王、跋難陀龍王、娑伽羅龍王、和修吉龍王、德叉迦龍王、阿那婆達多龍王、摩那斯龍王、優鉢羅龍王等各與若干百千眷屬俱。

『難陀』：翻歡喜。『跋』：翻善。卽目連所降之二龍，常護摩揭提國，本住歡喜地。『娑伽羅』：從居海受名，住智度空觀大海。『和修吉』：翻多頭，居水中，本住色身三昧，迹現多頭假觀。『德叉迦』：翻多舌。本住樂說無礙辯法門。『阿那婆達多』：翻無熱，住阿耨達池，此龍無三患（熱風沙著身，暴風吹宮殿，金翅鳥搏食。）本住常樂我淨，迹處清涼處。觀心，淨五住煩惱，免二死熱沙。『摩那斯』：翻大身，修羅排河淹喜見城，此龍阻遏海水，本住無邊身法門，迹現大體，中道正觀其性廣博。『優鉢羅』：翻青色蓮華池，從池得名，本住法華三昧，迹居此池。正法念經云：『龍爲諸天保境，修羅興兵，先與龍鬪。』故知爲天所管。約理爲第一義天，約事則有天龍八部。

有四緊那羅王，法緊那羅王，妙法緊那羅王，大法緊那羅王，持法緊那羅王，各與若干百千眷屬俱。

『緊那羅』：翻疑神，似人而有一角，又曰人非人，天帝法樂神。列四緊那羅，卽分別奏四諦、十二因緣、六度及奏前三者，或奏四教法門。本住不起滅定，卽初住以上境界，迹中歌四教。

有四乾闥婆王，樂乾闥婆王，樂音乾闥婆王，美乾闥婆王，美音乾闥婆王，各與若干百千眷屬俱。

『乾闥婆』：翻嗅香，以香爲食，又云香陰，爲天帝俗樂之神。樂音者，

鼓節弦管。美音者，弦管中勝者。四乾闥婆所奏，即俗而真，對四教生滅無生無量無作，隨義可釋。

有四阿修羅王，婆稚阿修羅王，佉羅騫馱阿修羅王，毗摩質多阿修羅王，羅睺阿修羅王，各與若干百千眷屬俱。

『阿修羅』：翻無酒，以海水不能變味誓不飲酒。女美男醜，亦云無天，無天德故，鬼道攝者居海邊，畜生道攝者居海底。『婆稚』：翻被縛，為帝釋所縛。以三觀智縛五住惑為觀心釋。『佉羅騫馱』：翻廣肩胛，涌海水者。以三觀鼓二死海為觀心釋。『毗摩質多』：翻淨心，波海水出聲者，即舍脂父。正觀中道即淨心。『羅睺』：翻障持，能障持日月者，約教，則藏教具三界五住縛，通教觀稍廣，如廣肩，別教，初知真淨，圓教障惑持理。

有四迦樓羅王，大威德迦樓羅王，大身迦樓羅王，大滿迦樓羅王，如意迦樓羅王，各與若干百千眷屬俱。

『迦樓羅』：翻金翅鳥，兩翅相去三百三十六萬里，噉龍。約教釋，大威德，勝羣輩，過諸外道，藏教義，大身，即大乘之始，通教義，大滿，出假滿足，別教義，如意，如理意圓，圓教義。

韋提希子，阿闍世王，與若干百千眷屬俱。各禮佛足，退坐一面。

『韋提希』：是闍王母，翻思惟，其父為頻婆娑羅。『阿闍世』：翻未生怨，或云無指。普超經云：『阿闍世從文殊懺悔，得柔順忍（別三賢），命終入寶吒羅地獄，即入即出，生上方佛土，得無生忍（別登地），彌勒出世時，復來此界名不動菩薩，後當作佛，號淨界如來。』無明父貪愛母，逆即順，行於非道，通達佛道。『各禮佛足，退坐一面。』：總結眾集。以上為通序。

爾時世尊，四眾圍繞，供養恭敬，尊重讚歎。為諸菩薩說大乘經，名無量義，教菩薩法，佛所護念，佛說此經已，結跏趺坐，入於

無量義處三昧，身心不動，是時天雨曼陀羅華，摩訶曼陀羅華，曼殊沙華，摩訶曼殊沙華，而散佛上，及諸大眾，普佛世界，六種震動，爾時會中比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那樓、摩睺羅伽、人非人，及諸小王，轉輪聖王，是諸大眾，得未曾有，歡喜合掌，一心觀佛。

此下至序品終，名別序。文分爲五；一衆集，序人一。二現瑞（入定、說法、雨華、地動、衆喜、放光），序理一。三疑念，序行一。四發問，五答問，序教一。今初。

一經所顯不出四悉四一，人一和合是世界，理一現瑞表中道，是第一義，行一爲生物善，教一問答除疑。且集衆等各具四一，例因衆現瑞顯理除疑，由現瑞說經入定放光。總之，天表第一義天，地表實相理地，中間表兆，衆莫能測，故待文殊引導，生疑爲立行，引古教同，令衆成一乘人也。約教釋，有施開廢會，此乃序於圓教，約廢權說，若開顯已，無非經王。約本迹，序壽量四一本也，此序仍表迹門四一。觀心釋者，一心三諦理一，一心三觀行一，作是觀者人一，能詮觀境敬一。又法身理一，般若教一，解脫行一，三法和合人一。

『爾時世尊四衆圍繞供養恭敬尊重讚歎』：別序第一集衆。圍繞顯威儀，供養分三業，讚歎稱美德。四衆，通稱出家在家各二，今約一衆俱四，所謂發起當機影響結緣。『爲諸菩薩說大乘經，名無量義。』，訖『以佛舍利起七寶塔』爲別序第二現瑞。此爲第一說法瑞。善戒經有七大爲大乘經，法大（十二部）、心大（菩提心）、解大（菩薩藏）、淨大（別地圓住見道淨心）、莊嚴大（福慧）、時大（三祇）、具足大（相好嚴身）。無量義，卽法華異名，無相（無生死相）不相（不涅槃相）名爲實相（中道），取從實相生無量法，所謂二法（頓漸）三道（三乘）四果（羅漢支佛菩薩佛）。

『教菩薩法，佛所護念。』：實相諦理，爲佛自證，故云，佛自住大乘，且久默斯要，不務速說，故言護念。

『佛說此經已，結跏趺坐，入於無量義處三昧，身心不動。』：別序中

現瑞之二，入定瑞。說已入定，顯無智不禪，非禪不智，慧定相成，先後入出，無有隔礙。無量義處，寂照同時，持於身心，故身若金剛不動轉，心如虛空無分別。

『是時天雨曼陀羅華，摩訶曼陀羅華，曼殊沙華，摩訶曼殊沙華，而散佛上，及諸大眾。』：明別序中現瑞之三，雨華瑞。天表中道，華表因位，因能趣果，故而散佛上。小白華表銅輪，十住習種性，開佛知見。大白華表銀輪，十行性種性，示佛知見。小紅華表金輪，十回向道種性，悟性知見。大紅華表琉璃輪，十地聖種性，入佛知見。瓔珞四輪，雖是別義，但借別顯圓，名別義圓也。

『普佛世界六種震動』：別序中現瑞之四，地動瑞。天雨四華從因，地有六動兼果，六種震動，表圓教住行向地等妙二覺六番破無明。又表動六根，心地淨六用俱淨。六種者，動起涌震吼覺，各有動（直動）、偏動（四天下）、等偏動（大千界）三種（表根塵識），餘五亦然，合十八種動，表淨十八界。

『爾時會中比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩訶羅伽、人非人，及諸小王，轉輪聖王，是諸大眾，得未曾有，歡喜合掌，一心觀佛。』：明別序中現瑞之五，眾喜瑞。出家二眾除饑男女，在家二眾進住男女。八部見前解。摩睺羅伽，此云大腹行。人非人，指八部性有善惡，形分八類。轉輪聖王，於增劫人壽兩萬歲，或減劫人壽八萬歲時出世，身具三十二相，有金銀銅鐵四種輪寶，分別統領四三二一大洲。天華悅眼，地動震心，故曰『歡喜』。約教釋，藏教喜動五陰心，通教喜動從假入空心，別教喜動從空出假心，圓教喜動啟發實相心，今取鈍一實喜。本住不動三昧，迹以地動表發。

爾時佛放眉間白毫相光，照東方萬八千世界，靡不周徧，下至阿鼻地獄，上至阿迦尼吒天，於此世界，盡見彼土六趣眾生，又見彼土現在諸佛，及聞諸佛所說經法，並見彼諸比丘比丘尼，優婆

塞優婆夷，諸修行得道者，復見諸菩薩摩訶薩，種種因緣，種種信解，種種相貌，行菩薩道，復見諸佛般涅槃者，復見諸佛般涅槃後，以佛舍利起七寶塔

本節文為別序中現瑞之六，放光瑞。表應機設教，破惑除疑。

『眉間』：表中道。『白毫』：卷舒自在表我，白表淨，放光破暗表中道生智慧，照此土他方表自覺覺他。大品足下乃至頂髻放光，大經面門放光，此經白毫放光，緣宜不同也。『照東方』：東是方始，表十住為位始，開佛知見，故云：『靡不周徧』。『萬八千』：約百界千如，歷十八界，則為一萬八千。『阿鼻地獄』：此云無間，縱廣八萬由旬，乃造五逆者受苦之處，成論有五無間（趣果、受苦、時、命、形）。

『阿迦尼吒天』：色界十八天之最上，名色究竟天，又名有頂天，為有形體之天處頂端，過此僅有識而無形體矣。

『盡見彼土六趣衆生』：本土放光一瑞照現他土六瑞之一，明下凡，與此土五濁同。『又見彼土現在諸佛』：明他土上聖，與此土開權說法華，息化說涅槃同。『聞佛所說經法』：明他土說頓法瑞，與此土初說華嚴同。『四眾得道』：『明他土集衆瑞，與此土次說阿含同。』『種種因緣行菩薩道』：明他土修因瑞，與此土三藏後說方等般若同。『佛般涅槃』：明他土證果瑞，與此土般若後，收無量法為一，開顯唱滅分舍利同。彼土六瑞凡聖一雙，人法一雙，始終一雙，足見佛佛道同。『種種因緣，種種信解，種種相貌。』：因緣為感應差別，信解即能感不同，相貌謂信後行異。三門相生，總說是一，例由發心因緣故信解，由信解故行。別說般若中帶通別說圓實，教教皆有四門信解，四悉因緣。且大論明共不共相貌等為種種。

別序集衆現瑞文，含迹門十妙：地表境妙，放光表智妙，三昧表行妙，兩華表位妙，所說經法表說法妙，供養表感應妙，六動表神通妙，無量義表法妙，衆喜表眷屬妙，得道表利益妙。

爾時彌勒菩薩作是念，今者世尊現神變相，以何因緣而有此瑞，今佛世尊入於三昧，是不可思議現希有事，當以問誰，誰能答者，復作此念，是文殊師利法王之子，已曾親近供養過去無量諸佛，必應見此希有之相，我今當問，爾時比丘比丘尼，優婆塞優婆夷及諸天龍鬼神等，咸作此念，是佛光明神通之相，今當問誰。

本節文為別序中之第三疑念序。彌勒與大眾兩疑。

『神變相』：即六瑞外彰（集眾、現瑞、雨華、地動、眾喜、放光）。彌勒補處權言不知，非初地不知二地事，況圓人受法，圓見事理也。又彌勒名慈。為眾須問，文殊名妙德，德應須答。

爾時彌勒菩薩欲自決疑，又觀四眾比丘比丘尼，優婆塞優婆夷，及諸天龍鬼神等眾會之心，而問文殊師利言，以何因緣而有此瑞，神通之相，放大光明，照於東方萬八千土，悉見彼佛，國界莊嚴。

本節文及下偈頌，為別序中第四發問序。文顯可知。

於是彌勒菩薩欲重宣此義，以偈問曰。

龍樹毗婆沙云：『長行後出偈頌者，隨國土、隨樂欲、隨生解、隨利鈍、又佛憫重說，為眾集前後故也。』

文殊師利。導師何故。眉間白毫。大光普照。
雨曼陀羅。曼殊沙華。栴檀香風。悅可眾心。
以是因緣。地皆嚴淨，而此世界。六種震動。
時四部眾。咸皆歡喜。身意快然。得未曾有。

此頌此土六瑞。偈有香風地淨，無說法入定，既云『導師』，必含慧性說法，天心入定。

眉間光明。照於東方。萬八千土。皆如金色。
從阿鼻獄。上至有頂。諸世界中。六道衆生。
生死所趣。善惡業緣。受報好醜。於此悉見。

此頌釋迦於眉間白毫光中現他土六瑞，初頌六趣。

又覩諸佛。聖主師子。演說經典。微妙第一。
其聲清淨。出柔輦音。教諸菩薩。無數億萬。
梵音深妙。令人樂聞。各於世界。講說正法。
種種因緣。以無量喻。照明佛法。開悟衆生。

此頌於白毫光中，見他土見佛說法兩瑞。聖主師子，卽如此土盧舍那佛，教菩薩法，如此土華嚴無聲聞，因緣譬喻開悟衆生，如此土始見佛身，入如來慧。

若人遭苦。厭老病死。爲說涅槃。盡諸苦際。
若人有福。曾供養佛。志求勝法。爲說緣覺。
若有佛子。修種種行。求無上慧。爲說淨道。

此頌於白毫光中，見他土聲聞、緣覺、菩薩三乘得道瑞。聲聞厭苦修行，支佛求道修行，菩薩紹佛種運慈悲。結前生後故判此文爲三藏。

文殊師利。我住於此。見聞若斯。及千億事。如是衆多。今當略說。

『見聞若斯』是結前，『如是衆多』是開後。

我見彼土。恒沙菩薩。種種因緣。而求佛道。

此頌於白毫光中見彼土菩薩衆。既云『求佛道』，應爲方等般若時也。

恒河外人稱爲福河，入洗滅罪，佛亦隨俗說，沙細喻多。

或有行施。金銀珊瑚。眞珠摩尼。碑磔碼瑙。
金剛諸珍。奴婢車乘。寶飾輦輿。歡喜布施。
回向佛道。願得是乘。三界第一。諸佛所歎。
或有菩薩。駟馬寶車。欄楯華蓋。軒飾布施。
復見菩薩。身肉手足。及妻子施。求無上道。
又見菩薩。頭目身體。欣樂施與。求佛智慧。

此頌於白毫光中見彼土菩薩行布施，捨財、捨身、捨命。

文殊師利。我見諸王。往詣佛所。問無上道。
便捨樂土。宮殿臣妾。剃除鬚髮。而被法服。

此頌於白毫光中見彼土菩薩持戒。在家施易戒難，出家施難戒易，故約剃髮著袈裟之比丘明戒。瓔珞經云：『若天龍八部鬪爭，念此袈裟，生慈悲心意，令比丘安忍，亦令俗衆生慕樂。』故龍得袈裟一縷，免金翅鳥難，牛角一觸袈裟免畜身。莫謂袈裟容易披，皆因宿世種菩提。

或有菩薩。而作比丘。獨處閒靜。樂誦經典。

此頌於白毫光中見彼土菩薩行忍。而作比丘，卽苦行忍，獨處閒靜，卽生忍，樂誦經典，卽第一義忍。

又見菩薩。勇猛精進。入於深山。思惟佛道。

此頌於白毫光中見彼土菩薩精進。

又見離欲。常處空閒。深修禪定。得五神通。

又見菩薩。安禪合掌。以千萬偈。讚諸法王。

此頌於白毫光中見彼土菩薩修禪。前偈明修三藏根本禪，後偈明修出世（通教）上上（別圓）禪。凡夫但五通，二乘具六，別教菩薩分有漏、無漏，圓教初後皆具六通。又世間禪，有根本味禪，即十二門禪（四禪、四空、四等），根本淨禪，即六妙特勝通明。出世間禪有觀（九想、八背、十一切處）練（九次第定）熏（師子奮迅三昧）修（超越三昧），出世上上禪即九種大禪，不起滅定現諸威儀，故能『安禪讚佛』。

復見菩薩。智深志固。能問諸佛。聞悉受持。

此頌於白毫光中見彼土菩薩行智慧。『智深』是理本，『志固』是願廣。戒定為慧之基，德行為戒，離欲為定，理智為慧。佛法以人為本，重解行（知行）為修治身心的德用。

又見佛子。定慧具足。以無量喻。為眾講說。

欣樂說法。化諸菩薩。破魔兵眾。而擊法鼓。

此頌於白毫光中見菩薩化他。二乘定多，菩薩慧多，佛則定慧均等。又空觀定多，假觀慧多，中觀則等。無量喻方便，助顯第一義。

藏通極果，修從假入空觀，破四魔（煩惱、陰、死、天子）但兩教聲聞止破三魔，不破天子魔。別教修從空入假觀，十住已破界內四魔，登地次地破八魔（煩惱等四魔加無常、無樂、無我、無淨），圓教修中觀，初住圓破八魔十魔（陰、煩惱、業、心、死、天、善根、三昧、善知識、菩提法智）。四佛各有降魔相而說法，今取圓住擊真妙法鼓。

又見菩薩。寂然宴默。天龍恭敬。不以為喜。

此頌於白毫光中見彼土菩薩修捨禪（四禪）。

又見菩薩。處林放光。濟地獄苦。令人佛道。

此頌於白毫光中見彼土菩薩修悲禪（初禪）。婆沙云：『初禪修悲易，二禪修喜易，三禪修慈易，四禪修捨易。』

初禪五支成就（覺、觀、喜、樂、一心），二禪四支成就（內淨、喜、樂、一心）三禪五支成就（捨、念、智、樂、一心）四禪四支成就（不苦不樂、捨、念清淨、一心）。

偈云：『離欲及惡法，有覺並有觀，離生及喜樂，是人入初禪。』初禪與覺觀俱發。『知二法（覺觀）亂心，雖善而應離，是故除覺觀，得人一識處。』二禪內淨與喜俱發。『攝心第一定，寂然無所見，患苦欲棄之，亦如捨覺觀。』三禪不依內淨與覺觀，與樂俱發。『聖人得能捨，餘人捨為難，若能知樂患（三禪），見不動大安（得四禪），憂喜（二禪）先已除，苦樂（三禪）今已斷，捨念清淨心，入第四禪中。』四禪與捨俱發。

大經云：『菩薩住禪得堪忍地（初地），地能持能生，一一禪中皆有慈悲誓願道品六度諸行無不具足。』

又見佛子。未嘗睡眠。經行林中。勤求佛道。

此頌於白毫光中見彼土菩薩修精進。般舟佛立三昧，以九十日常行，除睡最好。

摩訶止觀說四種三昧，一常坐三昧，出文殊問，文殊說兩般若經，亦名一行三昧，專念法界，以九十日為一期。二常行三昧，出般舟三昧經，成時見十方佛在空中立，以九十日為一期。三半行坐三昧，出法華方等二經、法華三七為一期，方等不限時節。四非行坐三昧，出請觀音經，及諸大乘經，亦名隨自意，意起即觀。方法皆是身開遮，口說默意止觀。

又見具戒。威儀無缺。淨如寶珠。以求佛道。

此頌於白毫中見彼土菩薩持戒。

大論有十戒（不缺、不破、不穿、不雜、隨道、無著、自在、智所讚、隨定、具足），『威儀無缺』，即初不缺戒，『淨如寶珠』，即第十具足戒。

悉是菩薩所持，故皆求佛道。

瓔珞本業經說，『初入三寶以信爲本，住在佛家以戒爲本。』南傳聲聞解脫戒，是新得，七衆別受，（發厭離心）以避譏嫌爲主，大經云，持經毀戒是魔眷屬。北傳菩薩三聚淨戒（攝律儀，攝善法饒益有情）是熏發，七衆通受，（發菩提心）以護性爲主，梵網經說十重四十八輕，優婆塞經有六重二十八輕，瑜伽戒本說四重五十一輕。

又見佛子。住忍辱力。增上慢人。惡罵捶打。皆悉能忍。以求佛道。

此頌於白毫光中見彼土菩薩行忍。本偈有能忍之人，所忍之境，通生法二忍。阿含云：力有六種（小兒啼、女人瞋、國王憍、羅漢進、諸佛悲、比丘忍）。

又見菩薩。離諸戲笑。及癡眷屬，親近智者。
一心除亂。攝念山林。億千萬歲。以求佛道。

此頌於白毫光中見彼土菩薩離五蓋。『離戲笑』是卻掉悔蓋。『離癡眷屬』是除瞋恚蓋。『近智者』是除疑蓋。『一心除亂』是卻貪欲蓋。『攝念山林』是除睡眠蓋。又如寶積經迦葉云：『有四法急走捨離百由旬外，一利養、二惡友、三惡衆、四同住多戲笑。』

或見菩薩。肴膳飲食。百種湯藥。施佛及僧。
名衣上服。價值千萬。或無價衣。施佛及僧。
千萬億種。栴檀寶舍。衆妙臥具。施佛及僧。
清淨園林。華果茂盛。流泉浴池。施佛及僧。
如是等施。種種微妙。歡喜無厭。求無上道。

此頌於白毫光中見彼土菩薩以四事，（飲食、湯藥、衣服、臥具）供佛及僧。『肴』音搖，乃豐肥的葷菜。大乘斷肉，楞伽前後皆制，光中所見豈能未制斷肉，或指五淨肉，勿於字句生疑也。

或有菩薩。說寂滅法。種種教詔。無數衆生。
或見菩薩。觀諸法性。無有二相。猶如虛空。
又見佛子。心無所著。以此妙慧。求無上道。

此頌於白毫光中見彼土菩薩行般若。初偈明不可說而說般若，次偈明不可觀而觀般若，三偈明言語道斷，心行處滅論般若。

文殊師利。又有菩薩。佛滅度後。供養舍利。
又見佛子。造諸塔廟。無數恆沙。嚴飾國界。
寶塔高妙。五千由旬。縱廣正等。二千由旬。
一一塔廟。各千幢幡。珠交露幔。寶鈴和鳴。
諸天龍神。人及非人。香華伎樂。常以供養。
文殊師利。諸佛子等。爲供舍利。嚴飾塔廟。
國界自然。殊特妙好。如天樹王。其華開敷。

此頌於白毫光中見彼土菩薩於佛涅槃後起塔供養。初偈總標佛滅起塔，次偈明塔數，三偈明寶塔高度，四偈明塔相，五偈明供養，六七兩偈結。

『舍利』：卽骨身。金光明經捨身品云：『是舍利者，卽是無量六波羅密功德所重。』又曰：『舍利是戒定慧所薰修，甚難可得，最上福田。』有全身舍利，如多寶佛及諸肉身菩薩，碎身舍利，如釋迦滅度得八斛四斗舍利。大論曰：『經卷是法身舍利』。『天樹王』：卽忉利天波利質多樹。

佛放一光。我及衆會。見此國界。種種殊妙。

諸佛神力。智慧希有。放一淨光。照無量國。我等見此。得未曾有。佛子文殊。願決衆疑。四衆欣仰。瞻仁及我。世尊何故。放斯光明。佛子時答。決疑令喜。何所饒益。演斯光明。佛坐道場。所得妙法。爲欲說此。爲當授記。示諸佛土。衆寶嚴淨。及見諸佛。此非小緣。文殊當知。四衆龍神。瞻察仁者。爲說何等。

此八偈係彌勒述疑請答。初一偈舉見此土事。第二偈舉由光見他土事。第三偈請答。第四、五、六、七各偈正伏疑。第八偈結請。『瞻仁及我』：及我，欲令我問，瞻仁，欲得仁答。『時答』：令其卽答。

文殊初伏難，既云『衆疑』，但衆未問我何所答，故彌勒遂答以『瞻仁及我』。

文殊第二伏難，衆既有疑，待佛出定，然後決之，彌勒則云：『佛子時答』。

文殊第三伏難，我與仁者同居學地，因何獨令我答，彌勒卽以猶豫之心云：『爲說妙法爲當授記。』

文殊第四伏難，你既釋疑，何須我答，彌勒云：『示諸佛土此非小緣。』

爾時文殊師利，語彌勒菩薩摩訶薩，及諸大士。善男子等，如我惟忖，今佛世尊，欲說大法，雨大法雨，吹大法螺，擊大法鼓，演大法義。

此下及偈、係別序中之第五答問序（別序集衆、現瑞、疑念、發問、答問）。長行文爲四：（一）從語彌勒下，惟忖答。（二）從善男子我於過去下，名略曾見答。（三）

從諸善男子如過去下，名廣曾見答。（四）從今見此瑞與本無異下，名分別判答。今初。

『惟忖』：以下測上，不可頓決，故以惟忖五義（少入定一瑞）對六瑞，瑞後三周說法，答此土問。以曾略見他土六瑞以光為總，答他土問。以廣曾見燈明六瑞及光所照，如今所見，乃至定起說經，答此土他土問。

最後判答此土他土問。『欲說大法』：忖今類昔，說無量義後，開權顯實，收無量歸一，答說法瑞。『雨大法雨』：雨四華開示悟入，普入圓因住行向地，答雨華瑞。『吹大法螺』：障除機動，人教行理改權成妙，答大眾心喜瑞。『擊大法鼓』：六番破無明，答地動瑞。『演大法義』：廣明五佛道同，答放光瑞。雖缺入定一瑞，但四瑞在定故。

諸善男子，我於過去諸佛，曾見此瑞，放斯光已，即說大法，是故當知，今佛現光，亦復如是，欲令眾生，咸得聞知一切世間難信之法，故現斯瑞。

此為長行文第二，文殊曾見他土六瑞，舉一光瑞略曾見答。因彌勒因光見東方為問也。

『善』：開七方便權人（藏教三乘，加人天為五，再加通教二乘為七。）
『男』：堪聞妙法。

諸善男子，如過去無量無邊不可思議阿僧祇劫。爾時有佛，號日月燈明如來、應供、正徧知、明行足、善逝、世間解、無上士、調御丈夫、天人師、佛、世尊。演說正法，初善、中善、後善，其義深遠，其語巧妙，純一無雜，具足清白梵行之相，為求聲聞者，說應四諦法，度生老病死，究竟涅槃，為求辟支佛者，說應十二因緣法，為諸菩薩，說應六波羅密，令得阿耨多羅三藐三菩提，成一切種智。次復有佛，亦名日月燈明，次復有佛，亦名日月燈明，如是二萬佛皆同一字，號日月燈明，又同一姓，姓婆羅

墮。彌勒當知，初佛後佛皆同一字，名日月燈明，十號具足，所可說法，初中後善。

此節文爲長行第三，文殊約廣曾見答。

『日月燈明』：日表慧，月表定，是自行德（寂默），燈明是化他德（能仁），別名與今佛同，應身之十種通號亦不異。大經云：『色身（解脫）法門身（般若）實相身（法身）同歸三德秘藏。』『如來』：成實論云，乘如實道來成正覺——應身。轉法輪經云，第一義名如，正覺名來——報身。金剛經云，無所從來亦無所去——法身。『應供』：應受人天供養。『正徧知』：正徧知一切法。『明行足』：三明（宿命天眼漏盡）之行具，佛曰三達，羅漢曰三明。『善逝』：以一切種智爲大車，行八正道而入涅槃。『世間解』：能解世間有情無情事。『無上士』：諸法中涅槃無上，衆生中以佛無上。『調御丈夫』：威愛兼抱。『天人師』：佛爲人天導師，教以應做不應做。『佛世尊』：知者覺者，爲世所尊重。『演說正法』：文殊引古佛先頓後漸與今佛同。『初中後善』：頓教七善（時節、名義、語、獨一、圓滿、調柔、無緣慈）之時節善。『其義深遠』：是名義善。『其語巧妙』：是語善。『純一無雜』：是獨一善。『具足』：是圓滿善。『清白』：是調柔善。『梵行』：是無緣慈善。小乘以戒、定、慧爲三善。大乘以初中後心爲三善，如方等部之金光明經云：『前心（住前理未顯）如來不可思議，中心（登住分證定慧）如來種種莊嚴，後心（妙覺感盡）如來不可破壞。』此答彌勒偈問『聖主師子演說正法』等句。

『爲求聲聞者，說應四諦法』：知苦斷集慕滅修道，世出世間兩重因果，有生滅、無生、無量、無作四種四諦。引古佛次頓之後說漸，答彌勒偈問『若人遭苦爲說涅槃』等句。『爲求辟支佛者說應十二因緣法』：十二因緣，實卽惑業苦的廣說，所謂無明、愛、取三煩惱，行、有二支屬業道，從識至受并生死，七支同名一苦道。亦通四教（思議生滅、思議不生滅、不思議生滅、不思議不生滅）。答彌勒偈問『若人有福志求勝法』等句。『爲諸菩薩說應六波羅密』：六度分事理，以慧導福，答彌勒偈問『若有佛子修種種

行』等句。『得三菩提（方便實智實相）成一切種智』：明古佛先頓後漸入實，答彌勒偈問『見他方佛般涅槃起塔』等句。

『頗羅墮』：翻利根。真諦譯為婆羅門中之一姓，名從己德，姓從上代，故今古不必會同。

其最後佛，未出家時，有八王子：一名有意，二名善意，三名無量意，四名寶意，五名增意，六名除疑意，七名響意，八名法意。是八王子，威德自在，各領四天下，是諸王子，聞父出家，得阿耨多羅三藐三菩提，悉捨王位，亦隨出家，發大乘意，常修梵行，皆為法師，已於千萬佛所，植諸善本。

此節文，為長行第三，文殊約廣曾見答。

昔日月燈明佛有八子，表八正道，今釋迦佛生一子。表一道清淨。又八子表八識，故同名為意。并出同居，示同有子，現迹故一子居小乘果，發本，則八子發大乘意。『善本』：同善根，善為菩提之本。

是時日月燈明佛，說大乘經，名無量義，教菩薩法，佛所護念，說是經已，即於大眾中，結跏趺坐，入於無量義處三昧，身心不動，是時天雨曼陀羅華、摩訶曼陀羅華、曼殊沙華、摩訶曼殊沙華，而散佛上，及諸大眾，普佛世界，六種震動，爾時會中比丘比丘尼，優婆塞優婆夷，天龍夜叉，乾闥婆，阿修羅，迦樓那，緊那羅，摩睺羅伽，人非人，及諸小王，轉輪聖王等，是諸大眾，得未曾有，歡喜合掌，一心觀佛，爾時如來放眉間白毫相光，照東方萬八千佛土，靡不周徧，如今所見，是諸佛土。

本節文，仍為長行第三，文殊約廣曾見答。

文殊引昔日月燈明佛六瑞（說法、入定、雨華、六動、眾喜、放光）悉與今釋迦佛白毫光中所見相同。

彌勒當知，爾時會中有二十億菩薩樂欲聽法，是諸菩薩，見此光明普照佛土，得未曾有，欲知此光所爲因緣。時有菩薩名曰妙光，有八百弟子，是時日月燈明佛從三昧起，因妙光菩薩說大乘經，名妙法蓮華，教菩薩法，佛所護念，六十小劫，不起於座，時會聽者，亦坐一處，六十小劫，身心不動，聽佛所說，謂如食頃，是時衆中無有一人。若身若心而生懈倦，日月燈明佛於六十小劫說是經已，卽於梵魔沙門婆羅門，及天人阿修羅衆中，而宣此言，如來於今日中夜，當人無餘涅槃。

此節文，仍爲長行第三，文殊約廣曾見答。

『二十億菩薩』：是集衆。『時有菩薩名曰妙光』：日月燈明佛因妙光說法，今釋迦佛由舍利弗三請。昔佛八子師妙光，今佛一子師身子。『說大乘經名妙法蓮華』：說法同。『六十小劫如食頃』：此經云五十小劫如半日，時同也。『如來於中夜當人無餘涅槃』：日月燈明佛說法華卽唱滅，今釋迦佛於寶塔品明不久當人涅槃，在穢土說扶律贖常住命。唱滅同。『梵』：卽色界主，亦爲三界主。『魔』：爲欲界主。『沙門』：翻勤息。『婆羅門』：翻淨行，爲外道中出家。

時有菩薩，名曰德藏，日月燈明佛，卽授其記，告諸比丘，是德藏菩薩，次當作佛，號曰淨身。多陀阿伽度，阿羅訶，三藐三佛陀。佛授記已，便於中夜，人無餘涅槃，佛滅度後，妙光菩薩持妙法蓮華經，滿八十小劫爲人演說。日月燈明佛八子，皆師妙光，妙光教化，令其堅固阿耨多羅三藐三菩提，是諸王子，供養無量百千萬億佛已，皆成佛道，其最後成佛者，名曰然燈，八百弟子中有一人號曰求名，貪著利養，雖復讀誦衆經，而不通利，多所忘失，故曰求名，是人亦以種種善根因緣故，得值無量千萬億諸

佛，供養恭敬，尊重讚歎。彌勒當知，爾時妙光菩薩豈異人乎，我身是也，求名菩薩，汝身是也。

此節文，仍為長行第三，文殊約廣曾見答。

『授記』：今昔授記同，昔授德藏，今記聲聞。如法說周記舍利弗為華光如來。譬說周，記迦葉為光明如來，目連為多摩羅跋梅檀香如來，記須菩提為名相如來，記迦旃延為閻浮那提金光如來。因緣周記阿難為山海慧自在如來，羅雲為蹈七寶華如來。乃至記提婆達多為天王如來，佛姨母為一切眾生喜見如來，耶輸陀羅為具足千萬光明如來等。『多陀阿伽度』：翻如來。『阿羅訶』：翻應供。『三藐三佛陀』：翻正徧知。妙光是文殊，求名是彌勒，是結會古今。

日月燈明佛之八王子皆師妙光（文殊），而八子中最後成佛者是然燈，彌勒又為妙光所化之八百弟子中之一，足證文殊本迹不可思議。

今見此瑞，與本無異，是故惟忖，今日如來，當說大乘經，名妙法蓮華，教菩薩法，佛所護念。

此節文為長行第四，文殊判答。

今昔六端既同，惟忖決定不謬。

爾時文殊師利，於大眾中，欲重宣此義，而說偈言。

我念過去世。無量無數劫。有佛人中尊。號日月燈明。
世尊演說法。度無量眾生。無數億菩薩。令人佛智慧。

此下共四十五偈，只頌長行廣曾見文的中間部分。

此兩偈，頌長行廣曾見之時節名號說法等同。

佛未出家時。所生八王子。見大聖出家。亦隨修梵行。

此偈頌日月燈明曾與今佛同。

時佛說大乘。經名無益義。於諸大眾中。而爲廣分別。佛說此經已。卽於法座上。跏趺坐三昧。名無量義處。天雨曼陀華。天鼓自然鳴。諸天龍鬼神。供養人中尊。一切諸佛土。卽時大震動。佛放眉間光。現諸希有事。

此四偈，頌昔時日月燈明佛所現六瑞，與此土所見六瑞同。

初偈頌說法，次偈頌入定，第三偈頌雨華衆喜，第四偈頌地動放光。
『天鼓自鳴』：表無問自說。

此光照東方。萬八千佛土。示一切衆生。生死業報處。有見諸佛土。以衆寶莊嚴。琉璃玻璃色。斯由佛光照。及見諸天人。龍神夜叉衆。乾闥緊那羅。各供養其佛。又見諸如來。自然成佛道。身色如金山。端嚴甚微妙。如淨瑠璃中。內現真金像。世尊在大衆。敷演深法義。一一諸佛土。聲聞衆無數。因佛光所照。悉見彼大眾。或有諸比丘。在於山林中。精進持淨戒。猶如護明珠。又見諸菩薩。行施忍辱等。其數如恆沙。斯由佛光照。又見諸菩薩。深入諸禪定。身心寂不動。以求無上道。又見諸菩薩。知法寂滅相。各於其國土。說法求佛道。

此十偈廣頌他土，此土於光中所現同。

初三偈頌見六道衆生同，第四偈及第五偈上半頌見佛同，第五偈下半頌佛說頓法同，第六、七、八三偈頌頓後開漸教三乘，第九、十兩偈頌方等般

若教。『生死業報處』：業爲生死之因，報爲生死之果，處卽二十五有。『自然成佛道』：證道約理屬自然，教道按事則漸晉。『端嚴甚微妙』：是報身。『如淨琉璃中』：是法身。『內現真金像』：是應身。

爾時四部衆。見日月燈佛。現大神通力。其心皆歡喜。各各自相問。是事何因緣。天人所奉尊。適從三昧起。讚妙光菩薩。汝爲世間眼。一切所歸信。能奉持法藏。如我所說法。唯汝能證知。世尊旣讚歎。令妙光歡喜。

初一偈半頌昔佛四衆疑念。次兩偈半頌因人同。

說是法華經。滿六十小劫。不起於此座。所說上妙法。是妙光法師。悉皆能受持。佛說是法華。令衆歡喜已。尋卽於是日。告於天人衆。諸法實相義。已爲汝等說。我今於中夜。當入於涅槃。汝一心精進。當離於放逸。諸佛甚難值。億劫時一遇。世尊諸子等。聞佛入涅槃。各各懷悲惱。佛滅一何速。聖主法之王。安慰無量衆。我若滅度時。汝等勿憂怖。是德藏法師。於無漏實相。心已得通達。其次當作佛。號曰爲淨身。亦度無量衆。

第一偈第一句『說是法華經』：頌說法同。『滿六十小劫』至『悉皆能受持』，頌時節同。『佛說是法華』至『汝等勿憂怖』，頌唱滅同。『諸法實相義已爲汝等說』句，顯經體。『是德藏法師』至『亦度無量衆』，頌授記同。

佛此夜滅度。如薪盡火滅。分布諸舍利。而起無量塔。比丘比丘尼。其數如恒沙。倍復加精進。以求無上道。

此兩偈頌佛滅後四眾得益。『薪盡火滅』：小乘以果報為身，如薪，智慧如火，身滅智亡。大乘以機為薪，逗機如火，機盡形滅。『倍加精進』：以滅度得度。

是妙光菩薩，奉持佛法藏，八十小劫中，廣宣法華經。

此偈前二句頌能宏經之人。下兩句頌時節。

是諸八王子。妙光所開化。堅固無上道。當見無數佛。供養諸佛已。隨順行大道。相繼得成佛。轉次而授記。最後天中天。號曰燃燈佛。諸仙之導師。度脫無量眾。

此三偈頌已成弟子。

是妙光法師。時有一弟子。心常懷懈怠。貪著於名利。求名利無厭。多遊族姓家。棄捨所習誦。廢忘不通利。以是因緣故。號之為求名。亦行眾善業。得見無數佛。供養於諸佛。隨順行大道。具六波羅密。今見釋師子。其後當作佛。號名曰彌勒。廣度諸眾生。其數無有量。

此五偈，頌當成弟子。

彼佛滅度後。懈怠者汝是。妙光法師者。今則我身是。

此偈頌上結會古今。

我見燈明佛。本光瑞如此。以是知今佛。欲說法華經。

今相如本瑞。是諸佛方便。今佛放光明。助發實相義。
諸人今當知。合掌一心待。佛當雨法雨。充足求道者。
諸求三乘人。若有疑悔者。佛當爲除斷。令盡無有餘。

第一偈出經名，第二偈顯經體，第三偈明經宗，第四偈論經用。

第一偈，文殊斷彌勒伏疑經名之問，所謂古佛今佛同說法華經。第二偈，文殊斷彌勒伏疑經體之問。所謂同名實相。第三偈，文殊斷彌勒伏疑經宗之問，所謂實相無相。第四偈，文殊斷彌勒伏疑經用之問，所謂佛雨法雨不止。洽菩薩亦潤二乘。

方便品第二

亦稱善權品，三權卽一實，卽實之權也。方者法也，便者用也。法有方圓，用有差會，三權是矩是方，一實是規是圓。方者秘也（唯我知是相，十方佛亦然。），便者妙也（於昔成秘，被開成妙。）方便者門也（開方便門示真實相）。

四十年前所說諸經皆爲今經之方便，故云『雖示種種道，其實爲佛乘』。卽今入定放光現瑞亦爲開顯會歸之方便，故云『今佛放光明，助顯實相義』。就是舉手低頭聚沙畫像散心稱名供養塔廟，無非爲一大事因緣之方便，故云『更以異方便助顯第一義』。非但釋迦開方便顯真實，卽三世諸佛莫不以『無量無數方便種種因緣譬喻言辭而爲衆生演說諸法，是法皆爲一佛乘故』。約義顯文曰方便，七卷經文無非方便，約文顯義，應名實相。

爾時世尊從三昧安詳而起，告舍利弗。諸佛智慧甚深無量，其智慧門難解難入，一切聲聞辟支佛，所不能知，所以者何，佛曾親近百千萬億無數諸佛，盡行諸佛無量道法，勇猛精進，名稱普聞，成就甚深未曾有法，隨宜所說，意趣難解。

『爾時』：卽序品中之文殊答已竟之時。『從三昧安詳而起』：入定緣理，安心實相，寂照說法曰起。『告舍利弗』：身子小乘中智慧第一，欲其破小慧顯大智，故方等斥，般若加，法華開均云告。『諸佛智慧甚深無量』：佛智乃卽權之實智，非兼但對帶之權實，其體卽一心三智。豎窮故甚深，橫遍故無量。『其智慧門難解難入』：智慧門卽實之權智，非七方便人能測，十住始解，十地爲入。開示悟入皆名智慧門。亦卽圓因爲方便品之義。『一切聲聞辟支佛所不能知』：華嚴聾啞，方等彈斥，般若轉教，故言不知。今經放光動地雨華入定，彼此古今諸佛道同等瑞懷疑，故云不知。

『所以者何下至無量道法』：是釋諸佛實智。外值佛多，稟承道法，故實智深，內行純厚盡行其道，則實智無量。『勇猛精進名稱普聞』：是釋諸佛權智。由勇猛精進能入難入之門，入門則名稱普聞矣。『成就甚深未曾有

法』：稱理究竟而到彼岸，此結成實智。又可結為自行權實，以自行不專於實，化他何獨為權，因自行化他俱有權實也，不過自行權實俱實，化他權實俱權耳。『隨宜所說意趣難解』：稱機設教，非七方便人所知，此結成權智。又可結化他權實。又法華前隨情翳理，故難解，今經了義入實，故易知。

舍利弗，吾從成佛以來，種種因緣，種種譬喻，廣演言教，無數方便引導衆生，令離諸著，所以者何，如來方便知見波羅密，皆已具足。舍利弗，如來知見，廣大深遠，無量無礙，力無所畏，禪定解脫三昧，深入無際，成就一切未曾有法。舍利弗，如來能種種分別，巧說諸法，言詞柔軟，悅可衆心。舍利弗，取要言之，無量無邊未曾有法，佛悉成就。

『吾從成佛以來』：是歎釋迦實智。『種種因緣』：是歎權智。『種種譬喻』：小乘以芭蕉水沫為譬，大乘以乾城鏡幻為喻。乳譬十二部經，酪喻九部修多羅等。『廣演言教』，於一法出無量義。『無數方便』：指七方便。『引導衆生令離諸著』：說三藏離見思著，說菩薩法，離涅槃著等。

『如來方便知見波羅密』：如來，釋實智。方便，釋權智。知見波羅密，釋權實知見均究竟。『廣大』明橫，『深遠』明豎，結實智。『無量』即佛四等，『無礙』即佛四辯，『力』即佛十力，『無所畏』四無畏，『禪』即實相禪『定』是首楞嚴定，禪定『解脫』至初住時，破二十五有，名王『三昧』。『深入無際』：結成豎深。『成就一切未曾有法』：結成橫廣。

『種種分別巧說諸法』：舉權。『言詞柔軟悅可衆心』：舉實。以衆心得實為悅也。『取要言之』：要乃實境。『無量無邊未曾有法』：指權境。『佛悉成就』：權實二法佛悉成就。

止，舍利弗，不須復說，所以者何，佛所成就第一希有難解之法，唯佛與佛，乃能究盡，諸法實相，所謂諸法如是相、如是性、如

是體、如是力、如是作、如是因、如是緣、如是果、如是報、如是本末究竟等。

『止』：言語道斷，體不可說故止。倘爲說之聞不能解，傷其善根故止。文云：『我若讚佛乘，衆生沒在苦，謗法不信故，墮於三惡道。』

『第一希有難解之法，唯佛與佛乃能究盡』：正釋不可說所以，佛爲人上人，天中天，其所成就第一義法，是甚深境界不可思議，尚非不退菩薩入證二乘所知，況人天羣萌之類，因佛佛道同，故云，獨佛與佛究竟邊底。

『諸法實相』：標示權實不思議境，此爲迷悟之根源，衆生之依止，法華之理本。諸法不出四聖六凡十法界，每界皆具相性十如本末等，無有缺減。

『佛所成就第一希有難解之法』，乃約佛法界釋諸法。相爲緣因，性爲了因，體爲正因，善根力，無功用作，四十一位因，菩提道緣，妙覺果，涅槃報，卽實而權言本末，卽權而實爲等。

『止不須復說』：約開合釋諸法，文雖屬合，難思能徧逗，義兼於開，隨他則開，隨自則合，橫豎周遍，開合自在。

『唯佛與佛乃能究盡』，約位釋諸法。如來藏相，性德理體，信力作賢，入地名因，緣至佛果名報，初三是本，後二是末，同是三德，故言究竟等。實相者，卽法住法位（善惡二相住於本性成不二相）相之實也。

『所謂諸法如是相、如是性、如是體、如是力、如是作、如是因、如是緣、如是果、如是報、如是本末究竟等。』：相以據外覽而可別，性以據內自分不改，主質曰體，功能爲力，構造爲作，習因爲因，助因爲緣，習果爲果，報果爲報，初相爲本，後報爲末，所歸實相爲究竟等。

南岳依讀文便，如偈云：『如是大果報種種性相義。』故呼十如。智者依義讀文（是相如是性乃至是報如，卽空義。如是相如是性乃至如是報，是假義。相如是性如是乃至報如是，爲中義。）成三觀智，觀三諦境。如是相性體力作因緣果報爲權，本來究竟等爲實，名不可思議。因凡夫雙盲，絕理情迷，二乘眇目，捨離求脫，菩薩矇矓，照則不周，此諸法實相，唯佛與

佛乃能洞覽權實，橫豎具足，故止而不說。

爾時世尊，欲重宣此義，而說偈言。

世雄不可量。諸天及世人。一切衆生類。無能知佛者。

此偈頌諸佛智慧。第一句頌上諸佛實智不可量，次三句頌上諸佛權智。『一切衆生類』：包括二乘不知。

佛力無所畏。解脫諸三昧。及佛諸餘法。無能測量者。

此偈頌釋迦三智，『佛』，正頌實智。『力無所畏』，頌權智諸功德。『餘法』，指上種種因緣，化他之權，爲實智餘助。

本從無數佛。具足行諸道。甚深微妙法。難見難可了。
於無量億劫。行此諸道已。道場得成果。我已悉知見。

此二偈分頌諸佛與釋迦權實二智。

意謂甚深微妙之權實二法，最爲難見難了，由我與諸佛本從無數佛所，具足盡行無量道法，於無量劫行此道已（權智滿），乃坐道場成佛（實智滿），故能悉知悉見此權實微妙法。

如是大果報。種種性相義。我及十方佛。乃能知是事。

此頌十如不思議境。略舉後二果報，初二相性，兼頌本末究竟等。『種種』：指百界千如。『義』：指究竟平等，下二句追頌『取要言之無量無邊未曾有法，佛悉成就。』

是法不可示。言詞相寂滅。餘諸衆生類。無有能得解。

此正頌『止不須說』之旨。實相非方所，故不可示，非言語道，故言辭相寂滅。『餘諸衆生類』：指七方便人不知。

除諸菩薩衆。信力堅固者。諸佛弟子衆。曾供養諸佛。

一切漏已盡。住是最後身。如是諸人等。其力所不堪。假使滿世間。皆如舍利弗。盡思共度量。不能測佛智。正使滿十方。皆如舍利弗。及餘諸弟子。亦滿十方剎。盡思共度量。亦復不能知。辟支佛利智。無漏最後身。亦滿十方界。其數如竹林。斯等共一心。於億無量劫。欲思佛實智。莫能知少分。新發意菩薩。供養無數佛。了達諸義趣。又能善說法。如稻麻竹葦。充滿十方剎。一心以妙智。於恒河沙劫。咸皆共思量。不能知佛智。不退諸菩薩。其數如恒沙。一心共思求。亦復不能知。

此十偈正明不知之人，但除信力堅固的菩薩能解，圓教十信位，六根清淨斷見思，出三界，所謂十善菩薩發大心，長別三界苦輪海。『諸佛弟子等至其心所不堪』六句，頌聲聞衆不知。『假使滿世間至亦復不能』十句，頌舍利弗等輩小智不知。『辟支佛利智至莫能知多少』八句，頌緣覺不知。『新發意菩薩至不能知佛智』十句，頌新發心菩薩不知。『不退諸菩薩至亦復不能知』四句，頌不退菩薩不知。

藏教菩薩於忍位行六度而三祇未斷惑者，但能超世間發四宏願，稱『妙智』。通教菩薩於初二地，雖仍伏惑，但能了達即空，稱『妙智』。

別教菩薩於三賢位，即仰信中道，稱『妙智』。藏教忍位離五障時，雖論位行念三種不退，但仍屬悠悠凡夫。通教六地斷欲界九品思惑盡，名位不退，七已辦地斷三界正使盡名行不退，八支佛地更侵習氣名念不退，雖能斷界內惑，但不知中道別理。別教十住得位不退，十向證行不退，不知中道具一切法，即一切法。總之，別教登地（念不退）分知中道實相，圓人受法無法不圓，信位（初信位不退，八至十信行不退。）能解，入住（念不退）真

知。

又告舍利弗。無漏不思議。甚深微妙法。我今已具得。

唯我知是相。十方佛亦然。

『無漏不思議』：指心行處滅言語道斷權實之境。

『甚深微妙法』：於前十如文，約十界凡聖理性不漏釋，因該果徹的佛法釋，卽權而實，卽實而權的開合釋，『唯我知是相十方佛亦然』卽『唯佛與佛乃能究竟』諸法實相的本末究竟等不思議位釋。

舍利弗當知。諸佛語無異。於佛所說法。當生大信力。

世尊法久後。要當說真實。

『諸佛語無異』：顯佛佛道同。『當生大信力』：佛是真語實語不異語者，勸生信心。『世尊法久後要當說真實』：顯真動疑，由此二句，引身子說將非魔作佛擾亂我心耶之執疑，恐因疑起謗，故先勸信。

告諸聲聞衆。及求緣覺乘。我令脫苦縛。逮得涅槃者。

佛以方便力。示以三乘教。衆生處處著。引之令得出。

初偈明昔日所施三乘，聲聞爲小乘，緣覺爲中乘，三祇六度脫諸苦縛涅槃者爲大乘。次偈前兩句正斥皆是方便，假說非實，後兩句明施三之意，引令出著不得已耳。

爾時大衆中，有諸聲聞漏盡阿羅漢，阿若憍陳如等千二百人。及發聲聞辟支佛心，比丘比丘尼，優婆塞優婆夷。各作是念。

上斥三乘皆是方便，今敘二乘四衆獨疑，義亦兼菩薩，故下文陳疑中云：『求佛諸菩薩大數有八萬。』

今者世尊。何故殷勤稱歎方便，而作是言。佛所得法，甚深難解。有所言說。意趣難知。一切聲聞辟支佛所不能及。佛說一解脫義。我等亦得此法，到於涅槃。而今不知是義所趣。

『何故殷勤稱歎方便』，是總疑權實二智。『佛所得法甚深難解』，是疑實智。『有所言說意趣難知』，是疑權智。佛昔說三乘智慧同證不差，但餘習有盡不盡者，故今忽聞稱歎如來二智非我所及。『一解脫義』等句，是自疑三乘共得聖道，依之修行已得涅槃，而今忽言皆是方便，未知何者為真實，故云『不知是義所趣。』

爾時舍利弗知四眾心疑，自亦未了，而白佛言，世尊何因何緣，殷勤稱歎諸佛第一方便，甚深微妙難解之法。我自昔來，未曾從佛聞如是說。今者四眾，咸皆有疑。惟願世尊敷演斯事。世尊何故殷勤稱歎，甚深微妙難解之法。

此下請決文中有三請二止，並前文『止不須復說』為三止。初止為理深難解，初請為自他求法。次止為驚疑不信，次請為久植必解。後止為謗必墮，後請為利根得益。

或佛豫知三周得益：

法說周（方便品，法體直說，身子得記。）

譬說周（譬喻品——火宅，信解品——窮子，藥草喻品——三草二木，授記品——迦葉目連迦旃延須菩提四大弟子得記。）

因緣說周（化城喻品、五百弟子受記品——富樓那憍陳如三迦葉迦留陀夷離婆多阿菟樓駄薄俱羅等得記。授學無學人記品——阿難羅云得記。）

爾時舍利弗欲重宣此義，而說偈言。

慧日大聖尊。久乃說是法。自說得如是。力無畏三昧。

禪定解脫等。不可思議法。道場所得法。無能發問者。我意難可測。亦無能問者。無問而自說。稱歎所行道。智慧甚微妙。諸佛之所得。

『是法』，指實智。『力無畏』等，指權智。『道場所得法』，指自行權實。『我意難可測』，指化他權實。『所行道』，結自行權。『諸佛之所得』，結自行實。『無問而自說』，結成化他意。

無漏諸羅漢。及求涅槃者。今皆墮疑網。佛何故說是。其求緣覺者。比丘比丘尼。諸天龍鬼神。及乾闥婆等。相視懷猶豫。瞻仰兩足尊。是事爲云何。願佛爲解說。

此明漏盡羅漢，求涅槃的菩薩，求中乘的緣覺，及四衆八部有疑。

於諸聲聞衆。佛說我第一。我今自於智。疑惑不能了。爲是究竟法。爲是所行道。

此明身子有疑。『究竟法』是果。『所行道』是因。三乘修證皆有因果，既云三乘是方便非真實，不知是果非真耶，抑或因非真耶。

佛口所生子。合掌瞻仰待。願出微妙音。時爲如實說。

此明通別二教菩薩有疑。

諸天龍神等。其數如恒沙。求佛諸菩薩。大數有八萬。又諸萬億國。轉輪聖王至。合掌以敬心。欲聞具足道。

總明同疑請。

爾時佛告舍利弗。止、止，不須復說。若說是事。一切世間諸天及人，皆當驚疑。

第二止，恐懷疑故。

舍利弗重白佛言。世尊。惟願說之。惟願說之。所以者何。是會無數百千萬億阿僧祇衆生。曾見諸佛。諸根猛利。智慧明了。聞佛所說，則能敬信。爾時舍利弗欲重宣此義，而說偈言。

法王無上尊。惟說願勿慮。是會無量衆。有能敬信者。

會衆宿根力，久植必解，故身子更請。

佛復止舍利弗。若說是事。一切世間天人阿修羅，皆當驚疑。增上慢比丘，將墮於大坑。爾時世尊重說偈言。

止止不須說。我法妙難思。諸增上慢者。聞必不敬信。

第三止，爲護增上慢者。

爾時舍利弗重白佛言。世尊。惟願說之。惟願說之。今此會中如我等比，百千萬億。世世已曾從佛受化。如此人等，必能敬信。長夜安隱。多所饒益。爾時舍利弗欲重宣此義，而說偈言。

無上兩足尊。願說第一法。我爲佛長子。惟垂分別說。是會無量衆。能敬信此法。佛已曾世世。教化如是等。皆一心合掌。欲聽受佛語。我等千二百。及餘求佛者。願爲此衆故。惟垂分別說。是等聞此法。則生大歡喜。

此節文爲身子牒疑更請。以上爲略開三顯一動執生疑竟。

以下爲廣開三顯一，斷疑生信，三根得益。

法說周爲上根人說，此文以下至第二卷中偈頌『盡回向佛道』。譬說周爲中根人說，有譬喻品、信解品、藥草喻品、授記品。因緣周爲下根人說，有化城品，五百弟子授記品，授學無學人記品。

爲三根而三周說法，文句有十義料簡（有通有別，有聲聞無聲聞，惑有厚薄，根轉不轉，根有悟不悟，領解無領解，得記不得記，悟有淺深，益有權實，待時不待時。）需者往檢不錄。

初法說周爲五，初正法說，二身子領解，三如來述成，四與授記，五四衆歡喜。初又二，初長文、二偈頌。初又三，初許、二受旨、三正說。初又三，順許、二誠許、三諫許。

爾時世尊告舍利弗。汝已殷勤三請。豈得不說。汝今諦聽，善思念之。吾當爲汝分別解說。

此節文爲順誠許說，汝已殷勤是順許，善思念之是誠許。諦聽是聞慧，善思是思慧，念之是修慧，大經四善法（親近善友卽如來，聽正法卽諦聽，思惟其義卽善思，如說修行卽念之。）爲涅槃近因緣。

說此語時，會中有比丘比丘尼，優婆塞優婆夷五千人等，卽從座起，禮佛而退，所以者何，此輩罪根深重，及增上慢，未得謂得，未證謂證，有如此失，是以不住，世尊默然，而不制止。爾時佛告舍利弗，我今此衆，無復枝葉，純有貞實，舍利弗，如是增上慢人，退亦佳矣，汝今善聽，當爲汝說。

此節文爲揀衆許說。五千在座如來三正，威神遣去故許說。

『罪根深重』：五濁障多，執小翳大。『未得謂得』：未得三果謂得三果。『未證謂證』：未證四果謂證四果，甚至以四禪爲四果。『無復枝葉』：大品云：攀枝附葉，棄於根本。此輩執方便之方便，小乘四果已是方便。更於煖頂執爲真極。『退亦佳矣』：無謗法之愆，無障他之過。昔師子音王佛

時，喜根菩薩以慈故強說，不讚少欲知足，不讚戒行頭陀，但說諸法實相。今佛以悲發遣，故云退亦佳矣。華嚴二乘聾啞，欲頓後開漸，今正開顯，令未熟者退席，留待涅槃拈捨。佛說瓔珞經譬喻品時，有五千菩薩聞法身功德，沸血流面，起座而去，以其著想修六度。昔大通智勝佛時，亦有無量衆生心生疑惑，今皆得度。說大經時，有八萬五千億人，於是經中不生信心，於未來世，亦當得信。結緣衆，置毒（種善根）乳（法乳）中，歷五味均可發作（種熟脫）。當機衆，聞毒鼓（無緣慈悲、法身平等）而死（破惑近死）。

舍利弗言，唯然世尊，願樂欲聞。

此爲受旨。前已三請，併此爲四請。

此下爲正法說。分二，初明四佛章顯諸佛權實，二明釋迦章，顯釋迦權實。初又二，初總明諸佛，次列三世佛。初又四，一歎法希有（令生尊重），二說無虛妄（止其誹謗），三開方便（使莫執小），四示真實（使其悟大），尚有舉五濁釋權，揀偽敦實，但義存六。今初歎法希有。

佛告舍利弗，如是妙法，諸佛如來，時乃說之，如優曇鉢華，時一現耳。

『時乃說之』：人已堪，時已至，五千已遣，故決定說大乘。『優曇鉢華』：此云靈瑞，三千年一現，表三乘調熟以後，方說妙法，授法王記，又當分跨節通別五時，於酪二酥後乃說醍醐。

二、說無虛妄。

舍利弗，汝等當信佛之所說言不虛妄。

教實、行普、人勝、理深，教行人理皆稱妙。

三、開方便。

舍利弗，諸佛隨宜說法，意趣難解。

佛意在實，人莫能解，玄文云：爲實施權，意於實，開權顯實，意在於權。未開顯前，非但不說顯實，亦無施權之語。

所以者何，我以無數方便種種因緣譬喻言辭，演說諸法。

舉今佛之權能，釋諸佛之方便。

此結成開權，或正顯真實。

是法非思量分別之所能解，唯有諸佛，乃能知之。

法無分別，唯用無分別智能解，所謂以三智一心契無分別諦理。

所以者何，諸佛世尊，唯以一大事因緣故，出現於世。

此標出世意。一者，非三五六七九（藏三乘爲三，加人天爲五，加通教二乘爲七，加通別菩薩爲九）。大者，性博、事、爲諸佛出世之儀式，衆生機感爲因，如來乘機而應爲緣，雖說種種道，其實爲一乘。

舍利弗，云何名諸佛世尊，唯以一大事因緣出現於世故。

此大事佛所尊重，故重徵。

諸佛世尊，欲令衆生開佛知見，使得清淨故，出現於世，欲示衆生佛之知見故，出現於世，欲令衆生悟佛知見故，出現於世，欲令衆生入佛知見道故，出現於世，舍利弗，是爲諸佛以一大事因緣故出現於世。

此節文明四一（理、人、行、教）中之理一。復約四意（四位、四智、四門、觀心）釋此理一。

一、位釋：約位顯理，乘四位因華以趣佛果。但妙位互具，二心無別，旣明四位應有明晦淺深之別，如圓月有朔望之殊。

『開』，卽圓教十住，初破無明，開如來藏，見實相理，仁王云：入理般若名爲住。初心雖能圓信（名字）圓受（五品）圓伏（十信）而無明未斷，不名爲開。『示』，卽圓教十行位，惑障旣除，萬德體顯。『悟』卽圓教十廻向位，障除體顯，事理融通。『入』，卽圓教十地位，事理旣融，自在無

礙，入薩婆若海。

二、智釋：約圓教四智對四位，不同般若中通教釋四智也。慧爲因稱種、智爲果曰一切。

『開』，卽道慧，如理見道之實性。『示』，卽道種慧，如量知十法界諸道種別解惑之相。『悟』，卽一切智，理量不二，知一切法一相。『入』，卽一切種智，理量雙照，知一切法寂滅，及種種行類相貌。

二、門釋：約圓教四門橫釋，前位、智、多、約豎釋，後觀心乃非橫豎釋。

『開』，卽空門，一空一切空。『示』，卽有門，一有一切有。『悟』，卽亦空亦有門，一切亦空亦有。『入』，卽非空非有門，一切非空非有。

四、觀心釋：以上四釋，逆順生起而顯一，見理由位，位立由智，智發由門，門通由觀。觀故則門通，門通故智成，智成故位立，位立故見理，見理故名理一。

『開』，以明淨之心，觀三諦理不可思議。『示』，能分別空假中，宛然不濫。『悟』，卽三而一，卽一而三。『入』，非空假中而齊照空假中。

權教亦得義論開示悟入，而非佛知見，今明佛知見是實，實卽理一也，倘云佛知見者，僅限其當教果頭佛耳。例別教初地爲開，二至六地爲示，七八地爲悟，第十地爲入，若帶地前三賢則非佛知見。通教見地開，薄地示，離欲地悟，已辦地入。藏教二乘初果開，二果示，三果悟，四果入，菩薩初祇爲開，二祇爲示，三祇爲悟，兼聖位則三十四心斷結爲入。藏通二教始終不明佛知見。

此明人一，據佛意說也。

佛告舍利弗，諸佛如來，但教化菩薩。

此明行一。

諸有所作，常爲一事，唯以佛之知見，示悟衆生。

三乘趣佛知見。就教主言，亦可為教一。

此明教一。

舍利弗，如來但以一佛乘故，為衆生說法，無有餘乘，若二若三。舍利弗，一切十方諸佛，法亦如是。

自別教以去皆名有餘之法，即不了義，非佛一乘，『無二』，無般若帶通別二。『無三』，無方等所對之三。『無餘乘』，無別教方便有餘之說。末句總結。

舍利弗，過去諸佛以無量無數方便，種種因緣譬喻言辭，而為衆生演說諸法，是法皆為一佛乘故，是諸衆生從諸佛聞法，究竟皆得一切種智。舍利弗。未來諸佛當出於世，亦以無量無數方便，種種因緣譬喻言辭，而為衆生演說諸法，是法皆為一佛乘故，是諸衆生從佛聞法，究竟皆得一切種智。舍利弗，現在十方無量百千萬億佛土中諸佛世尊，多所饒益，安樂衆生，是諸佛亦以無量無數方便，種種因緣譬喻言辭，而為衆生演說諸法，是法皆為一佛乘故，是諸衆生從佛聞法，究竟皆得一切種智，舍利弗，是諸佛但教化菩薩，欲以佛之知見示衆生故，欲以佛之知見悟衆生故，欲令衆生入佛之知見故。

前文諸佛章，本文三世佛章（瓔珞經十一明九世佛，華嚴三種三世加平等明十世佛。），下文釋迦章，共五佛章，皆應具六義（歎法希有、說無虛妄、開方便、示真實、舉五濁、揀偽），但諸佛章僅具前四義，缺後二，釋迦章唯缺第一，本三世佛章，各有其二（開方便、顯真實）文顯可見，亦即權實之義，且各明教一行一，總結語，屬人一理一，雖不及諸佛章明顯，於文亦可得見，如三世佛章各文均云：『是法皆為一佛乘故』是教一，『是諸衆生從佛聞法究竟皆得一切種智』是行一，總結云：『是諸佛但教化菩薩』

是人一，『欲以佛之知見』等，是理一。

此下釋迦佛章，於六義中無歎法希有，本文爲第一開方便示權。

舍利弗，我亦如是，知諸衆生有種種欲，深心所著，隨其本性，以種種因緣譬喻言辭方便力，而爲說法。

『我』：卽釋迦。『種種欲』：卽五乘根性欲（根能生成現欲，習欲成性。）『深心所著』：宿種難轉，隨習不捨。『方便』：隨宜開三乘權法。

第二示眞顯實。

舍利弗，如此皆爲得一佛乘，一切種智故。

『佛乘』是教一，『一切』是行一，『一切種智』是理一。

第三將舉五濁釋隱實施權。

舍利弗，十方世界中，尚無二乘，何況有三。

一實中尚無般若帶二，方等對三，豈有鹿苑之單三乘，單五乘（加人天）耶。或云無別教及別人通之二，無通教及別圓人通之三。

此明佛出穢土隱實施三，舉五濁以示權。

舍利弗，諸佛出於五濁惡世，所謂劫濁、煩惱濁、衆生濁、見濁、命濁。

『劫』：時也，時無實法，依於色心分位假立，謂四濁增盛聚在此時，故名劫濁。『煩惱濁』：通稱三惑五住，今指界內五利使（身、邊、戒、見、邪）。『命濁』：依識種上之連持色心不斷，假立爲命，以惡異熟業所感名濁。

如是舍利弗，劫濁亂時，衆生垢重，慳貪嫉妬，成就諸不善根故，諸佛以方便力，於一佛乘分別說三。

初句是劫濁，次句卽衆生濁，『慳貪嫉妬』卽煩惱濁及見濁，『不善根』

爲命濁，第二舉五濁釋方便竟。

四、揀僞敦真分二，初揀真僞，二開除釋疑。初又二：一若不聞不知非真弟子。二若聞不信受是增上慢。

舍利弗，若我弟子，自謂阿羅漢辟支佛等，不聞不知諸佛如來但教化菩薩事，此非佛弟子，非羅漢，非辟支佛。

『不聞』卽不聞教一。『不知』是不知行一。『非真』非理一。『非弟子』非人一。

二若聞不信受是增上慢。

又舍利弗，是諸比丘、比丘尼，自謂已得阿羅漢，是最後身，究竟涅槃，便不復志求阿耨多羅三藐三菩提，當知此輩，皆是增上慢人，所以者何，若有比丘，實得阿羅漢，若不信此法，無有是處。

羅漢斷見思，出分段，行三百由旬，止化城，認爲我生已盡，梵行已立，所作已辦，不受後有，是究竟涅槃，不知尚有無明未斷，變易生死未了，距二百由旬始到寶所，若真阿羅漢，經除糞彈斥轉教訖聞圓實，應予信受，除五千慢人根未熟者。

二、開除釋疑。

除佛滅度後，現前無佛，所以者何，佛滅度後，如是等經，受持讀誦解義者，是人難得。若遇餘佛，於此法中，便得決了。

除佛滅後，雖有此經，解義者難得，不求無上菩提之羅漢，不名增上慢。『餘佛』：羅漢作滅度想入于涅槃，而生方便有餘土，仍得遇佛爲說此法，故經云：『有羅漢若不聞法華，自謂得滅度，我於餘國爲說是事，汝當作佛也。』又設於此土得遇受持讀誦解義之人，亦得決了，故南岳大師釋餘佛卽四依（法四依：依法不依人、依了義經不依不了義經、依義不依語、依智不

依識。人四依：圓教五品六根爲初依、十住爲二依、十行十迴向爲三依、十地等覺爲四依。又別教三賢爲初依、初地至五地爲二依，六七地爲三依、八九十地爲四依。又藏四善根通二地爲初依、藏初二果通三至五地爲二依、藏三果通六地爲三依、藏四果通七地爲四依。行四依：糞掃衣、常乞食、樹下坐、腐爛藥，爲人道之緣。說四依：平等，別時——如念佛得往生，別義——事理，衆生樂欲。雖通凡聖大小，意在稱餘佛，說圓實法者，上列四種四依，錄作參考。以上第四義揀僞敦信一實竟。

此結成釋迦章第五義，明無虛妄。

舍利弗，汝等當一心信解受持佛語，諸佛如來言無虛妄，無有餘乘唯一佛乘。

此下有一百二十一頌，本節爲頌許答。

爾時世尊欲重宣此義而說偈言。

比丘比丘尼。有懷增上慢。優婆塞我慢。優婆夷不信。
如是四衆等。其數有五千。不自見其過，於戒有缺漏。
護惜其瑕疵。是小智已出。衆中之糟糠。佛威德故去。
斯人尠福德。不堪受是法。此衆無枝葉。唯有諸真實。
舍利弗善聽。

上慢我慢不信，四衆通有，出家二衆暗禪者易起上慢，在俗時恃已凌他易起我慢，世智辯聰者起信心難。依俱舍論十九，有七慢，慢（稱境心高）、過慢（於等謂已勝）、慢過慢（他勝已更勝）、我慢（執我我所）、增上慢（未證得謂已證得）、卑慢（見勝者謂己少劣）、邪慢（恃惡高舉）。『於戒有缺漏』：律儀有失名缺，定共道共有失名漏。『護惜瑕疵』：無道定內起惡覺如玉含瑕，無律儀外動身口如玉露疵，覆罪自得名護惜。『小智』：妄計有漏爲無漏，四果已小，四禪更小，小中之小智。『糟糠』：未有無漏

禪定滋潤，但有世間味禪，故如糟，未有出世理慧，但有文字薄解，封文失旨，故如糠。『枝葉』：譬非好器。

此下頌正說、分二，初頌四佛章。次聽釋迦章，初文四：一、頌諸佛，二、頌過去佛，三、頌未來佛，四、頌現在佛。頌諸佛文爲五，初頌施權，二頌顯實，三頌勸信，四頌舉五濁，五頌不虛，今初。

諸佛所得法。無量方便力。而爲衆生說。衆生心所念。
種種所行道。若干諸欲性。先世善惡業。佛悉知是已。
以諸緣譬喻。言辭方便力。令一切歡喜。或說修多羅。
伽陀及本事。本生未曾有。亦說於因緣。譬喻並祇夜。
優婆提舍經，鈍根樂小法。貪著於生死。於諸無量佛。
不行深妙道。衆苦所惱亂。爲是說涅槃。

『諸佛所得法』：自行因滿，從根本智，起後得權法。照九界機，說七方便。『修多羅』：長行、契經。『伽陀』：孤起頌。『本事』：梵云，伊利目多。『本生』：梵云，闍伽多。『未曾有』：梵云，阿浮達摩。『因緣』：梵云，尼陀羅。『譬喻』：梵云，阿波陀羅。『祇夜』：重頌。『優婆提舍經』。論議。此爲小乘九部，再加『和伽羅』：授記。『優陀那』：無問自說。『毘佛略』：方廣。成十二部經。

前世根鈍，今世無機，不堪聞大，故言『不行深妙道』。前世貪著障重，今世衆苦所惱，唯可聞小，故言『爲是說涅槃』。

二頌顯實分四：一頌理一，二頌人一，三頌教一，四頌行一。今初。

我設是方便。令得人佛慧。未曾說汝等。當得成佛道。
所以未曾說。說時未至故。今正是其時。決定說大乘。
我此九部法。隨順衆生說。入大乘爲本。以故說是經。

『佛慧』：卽是一大事因緣理一。『決定說大乘』：總頌開示悟入佛知見。『人大乘爲本』：頌入佛知見。

有佛子心淨。柔輒亦利根。無量諸佛所。而行深妙道。
爲此諸佛子。說是大乘經。我記如是人。來世成佛道。
以深心念佛。修持淨戒故。此等聞得佛。大喜充徧身。
佛知彼心行。故爲說大乘。聲聞若菩薩。聞我所說法。
乃至於一偈。皆成佛無疑。

此頌人一。

正頌上諸佛如來但教化菩薩，顯七方便人皆成實人。有佛子心淨，卽別教人。爲此佛子說大乘經，得記心喜，卽成圓教真實人。『聲聞若菩薩』：聲聞兼得緣覺，卽是二教二乘，菩薩兼得藏通大士，皆成佛無疑，則七方便無非佛子矣。

十方佛土中。唯有一乘法。無二亦無三。除佛方便說。
但以假名字。引導於衆生。說佛智慧故。

此頌教一。

正頌上長行如來但以一佛乘故，爲衆生說法，無有餘乘若二若三。

『無二』：無通教中半滿相對之一。『無三』：無三藏中之三。

諸佛出於世。唯此一事實。餘二則非眞。終不以小乘。
濟度於衆生。佛自住大乘。如其所得法。定慧力莊嚴。
以此度衆生。自證無上道。大乘平等法。若以小乘化。
乃至於一人。我則墮慳貪。此事爲不可。

此頌行一。

『唯此一事實』等，頌上長文諸有所作常爲一大事。『佛自住大乘』等，頌長文唯以佛之知見示悟衆生。後偈釋成不以小度之意。

前頌施權顯實已竟，本文爲第三勸信，分二：初舉果勸信，二舉因勸信，今初。

若人信歸佛。如來不欺誑。亦無貪嫉意。斷諸法中惡。
故佛於十方。而獨無所畏。我以相嚴身。光明照世間。
無量衆所尊。爲說實相印。

初偈明佛心清淨，衆惡斷盡，無畏說法，內德可信，次偈明佛妙相莊嚴，光明炳著，爲衆所尊，說大乘印，外德可信。

二舉因勸信。

舍利弗當知。我本立誓願。欲令一切衆。如我等無異。
如我昔所願。今者已滿足。化一切衆生。皆令人佛道。

昔誓與衆生同入菩提，今則機熟已入。勸信文竟。

此頌四佛章中之頌諸佛第四舉五濁。

若我遇衆生。盡教以佛道。無智者錯亂。迷惑不受教。
我知此衆生。未曾修善本。堅著於五欲。癡愛故生惱。
以諸欲因緣。墜墮三惡道。輪迴六趣中。備受諸苦毒。
受胎之微形。世世常增長。薄德少福人。衆苦所逼迫。
入邪見稠林。若有若無等。依止此諸見。具足六十二。
深著虛妄法。堅受不可捨。我慢自矜高。諂曲心不實。

於千萬億劫。不聞佛名字。亦不聞正法。如是人難度。是故舍利弗。我爲設方便。說諸盡苦道。示之以涅槃。我雖說涅槃。是亦非真滅。諸法從本來。常自寂滅相。佛子行道已。來世得作佛。

初偈總明五濁障大。次六偈別明五濁障三。第八偈明爲五濁故說小。最後一偈半明爲大施小，小治五濁，大願得興。

衆生以苦惱自煎，諸佛以大悲濟物，悲與苦相對，曰『遇』。又佛如衆生如一如無二如，天性相關，曰『遇』。盡教以佛道，是佛本懷，無智迷惑而不受教，五濁障大也。

第二、三兩偈別明衆生濁。『善本』：卽眞如實相。五欲爲諸惡本，從癡有愛，別衆惱競生。衆陰而有假名，隨業受生。

第四偈別開命濁。『受胎之微形』：卽十二因緣。『世世長增長』：處胎經云：『從初七日乃至三十八個七日，漸漸增長之相。觀心者，一念心起，作業（胎）無窮，世世不斷，卽是增長。』

第五偈別開見濁。五見交加，如茂林稠密，若有是常見，若無是斷見，依於斷常成六十二見，外道計我有四句，『色卽是我，離色是我，色大我小，我住色中，我大色小，色住我中。』餘四陰亦爾，是爲二十，歷三世爲六十，並根本斷常爲六十二見。

第六偈別明煩惱濁。略舉根本煩惱（貪瞋癡慢疑不正見）中貪慢，及小隨煩惱，（忿恨覆惱誑諂僞害嫉慳）中諂，以攝其餘。

第七偈別明劫濁。長時無佛法，卽是劫濁，又上來四濁集在時中故名劫濁。『如是人難度』：五濁所障，不信一乘。觀心者，念念惡覺，此心難度。

第八偈明爲五濁故說小。『盡苦道』：卽四諦十二因緣之觀行，以斷盡生死苦之道。

最後有一偈半文，卽是終令人入大。析三界妄盡，滅色取空，則非真滅，以無明別惑尚在，所感界外變易生死正熾，若體達無明本空，諸法何有，乃名真滅，法雖本寂，若不修道，無由契會，如空華雖寂，若不除翳，無由覩淨空也。

此頌諸佛章第五義，不虛。

我有方便力。開示三乘法。一切諸世尊。皆說一乘道。
今此諸大衆。皆應除疑惑。諸佛語無異。唯一無二乘。

第一偈初二句先明釋迦開三，次兩句明諸佛後顯實互現，前權後實，誠言不虛，勿生疑也。以上頌諸佛章竟。

頌五佛章第二頌過去佛。

過去無數劫。無量滅度佛。百千萬億種。其數不可量。
如是諸世尊。種種緣譬喻。無數方便力。演說諸法相。
是諸世尊等。皆說一乘法。化無量衆生。令人於佛道。

初二偈明施三，後一偈明開顯。總之，說三說一均爲方便，以是法不可示，言詞相寂滅故。

總明方便助顯。

又諸大聖主。知一切世間。天人羣生類。深心之所欲。
更以異方便。助顯第一義。

『異方便』：卽五乘七方便等，以藏人不同衍門，故成永異。

別示開顯之相，分二，初約衆善顯緣因功德，次約聞經顯了因功德，初又七：(一)約菩薩六度明開顯。(二)約二乘戀慕心明開顯。(三)約人天供舍利明開顯。(四)約造佛像明開顯。(五)約畫佛像明開顯。(六)約供塔像明開顯。(七)約稱佛名明開顯。今初約菩薩六度明開顯。

若有衆生類。值諸過去佛。若聞法布施。或持戒忍辱。

精進禪智等。種種修福慧。如是諸人等。皆已成佛道。

相心行六度卽三藏菩薩，無相卽通教，次第行六度卽別教。『皆已成佛道』是證理一。『如是諸人等』是人一。『種種修福慧』卽行一。『聞法』是教一。

二約戀慕心明開顯：

諸佛滅度後。若人善軟心。如是諸衆生。皆已成佛道。

捨惡從善，化剛爲軟，開聲聞緣覺皆入一乘。大品歎羅漢心調柔軟，淨名云：住調伏心是賢聖行。

三約供舍利明人天乘開顯佛道。

諸佛滅度已。供養舍利者。起萬億種塔。金銀及玻璃。碑礫與瑪瑙。玫瑰瑠璃珠。清淨廣嚴飾。莊校於諸塔。或有起石廟。栴檀及沉水。木栴並餘材。甄瓦泥土等。若於曠野中。積土成佛廟。乃至童子戲。聚沙爲佛塔。如是諸人等。皆已成佛道。

按經中造塔之法，如來十三級，辟支佛五級，阿羅漢四級，阿那含三級，斯陀含二級，須陀洹一級，輪王無級，不可濫聖。供舍利起寶塔，乃至起石廟、土廟及童子戲爲沙塔，其功德皆可成佛。

按釋迦示滅，荼毗已竟，大迦葉云：如來舍利自有國王大臣長者居士樂福田者，廣修供養，我等宜應結集三藏，勿令正法速滅。因迦葉傳佛心印，先務爲急，人天樂種福田，則供養爲先。

『木栴』：長安有香木名栴，亦任造佛像。

四約造佛像明開顯。

若人爲佛故。建立諸形像。刻雕成衆相。皆已成佛道。
或以七寶成。鍤鈛赤白銅。白鐵及鉛錫。鐵木及與泥。
或以膠漆布。嚴飾作佛像。如是諸人等。皆已成佛道。

按造像功德經略明十一功德：一者世世眼目清潔，二者生處無惡，三者常生貴家，四者身如紫磨金色，五者豐饒珍寶，六者生賢善家，七者生得爲王，八者作金輪王，九者生梵天壽命一劫，十者不墮惡道，十一者後生還能敬重三寶。又云：若人臨終發言造像，乃至如麥麩（音礦，大麥），能除三世八十億劫生死之罪。此爲華報，果報皆成佛道。

優婆塞戒經，造像不許用膠，得失意罪，而此經許用者，古師解云外國用樹膠耳。又戒經不許造半身像，得失意罪，畫像不得雜乳膠雞子，供養像時不得酥油塗身及乳洗。地持不許用雌黃臭物。不淨錢不任造像。又戒經，弟子於立佛像前不得坐，坐佛像前不得臥，若王難等隨時斟酌。

五約畫佛像明開顯。

彩畫作佛像。百福莊嚴相。自作若使人。皆已成佛道。
乃至童子戲。若草木及筆。或以指爪甲。而畫作佛像。
如是諸人等。漸漸積功德。具足大悲心。皆已成佛道。
但化諸菩薩。度脫無量衆。

最後兩句，明彼成佛後以四一度生。

佛像非天工能作，阿含云：『佛升忉利，以神力制諸弟子不令知處，二王憶佛，因成大患，大臣白王，造像供養，優填王以栴檀香作，匿王以紫磨金作，悉高五尺，初召工匠與重寶賞，無能作者，毘首羯摩（天家巧匠）化爲人來，爲王造像，下斧之聲，上至忉利，聞者解脫，據此二王，雖感天工，但能作於似佛之像，足輪最下尚不能作，況復能作餘真相耶。』

六約供塔像明開顯。

若人於塔廟。寶像及畫像。以華香旛蓋。敬心而供養。若使人作樂。擊鼓吹角貝。簫笛琴箏篪。琵琶鐺銅鈸。如是衆妙音。盡持以供養。或以歡喜心。歌頌頌佛德。乃至一小音。皆已成佛道。若人散亂心。乃至以一華。供養於畫像。漸見無數佛。或有人禮拜。或復但合掌。乃至舉一手。或復小低頭。以此供養像。漸見無量佛。自成無上道。廣度無數衆。入無餘涅槃。如薪盡火滅。若人散亂心。入於塔廟中。一稱南無佛。皆已成佛道。

最後一偈約稱佛名明開顯。

承上文，起塔起廟，造像畫像者，皆已成佛道，今云隨於何等塔廟、寶像、畫像之前修諸供養者，皆得成佛道。供養不出五塵；『華香旛蓋』色塵，『妙音、歌頌』聲塵，『香』：卽香塵，『禮拜』卽觸塵，又供養須論三業；『敬心』是意業，『頌佛德』是口業，『禮拜、合掌、舉手、低頭』是身業。最後三惑『薪盡』，二死『火滅』，人無住處大般涅槃。

『使人作樂』；指四衆弟子，國王大臣長者居士、使人音樂供養佛。『歌頌頌佛德』：梵音和雅僧俗咸宜，若濫同詞曲，則律所不許。

以散亂心用五塵三業供養經像，及一稱佛名，已得成佛。『南無』：翻歸命、亦翻度我、亦翻敬從。調達臨終稱南無，未得稱佛，便生身陷入地獄，佛記其從地獄出當作辟支佛，名曰南無。『銅鈸』：卽露盤。以上約衆善緣因功德開顯之相竟。

次約聞經顯了因功德。

於諸過去佛。在世或滅後。若有聞是法。皆已成佛道。

『是法』：卽妙法蓮華經，開權顯實之法也。上來六度及像教供養，乃至稱名，並是諸佛以異方便助顯真實，尚得開之成妙緣因，況復此經正顯真實，若有聞者，卽了因種，寧不成佛，所謂一歷耳根永成道種。以上頌過去佛竟。

第三頌未來佛。

未來諸世尊。其數無有量。是諸如來等。亦方便說法。
一切諸如來。以無量方便。度脫諸衆生。入佛無漏智。
若有聞法者。無一不成佛。諸佛本誓願。我所行佛道。
普欲令衆生。亦同得此道。未來世諸佛。雖說百千億。
無數諸法門。其實爲一乘。諸佛兩足尊。知法常無性。
佛種從緣起。是故說一乘。是法住法位。世間相常住。
於道場知己。導師方便說。

初一偈半頌施權。後五偈頌顯實。『知法常無性』：實相常住，一實理上，性相二空，無自性、無他性、無共性、無無因性（一念亦無，是性空）無性亦無性（無念亦無，是相空）。法不常，成斷滅，實有性，則三乘不得作佛，故云常而無性，涅槃云：無性之性卽是佛性。

『佛種從緣起』：中道無性，卽是佛種，迷此理者，由無明爲緣，則有衆生起，解此理者，由教行爲緣，則有正覺起，欲起佛種須一乘教，緣起通染淨，理非染淨。又無性，是正因。緣起，是緣了相資。『是法住法位，世間相常住。』：衆生，正覺是能住法，染淨一如是所住位，波與水同一濕性，其相雖殊，其性是一，陰人皆如故云常住。

第四頌現在佛。

天人所供養。現在十方佛。其數如恒沙。出現於世間。安隱衆生故。亦說如是法。知第一寂滅。以方便力故。雖示種種道。其實爲佛乘。知衆生諸行。深心之所念。過去所習業。欲性精進力。及諸根利鈍。以種種因緣。譬喻亦言辭。隨應方便故。

先兩偈半顯實，次兩偈開權，先證寂滅法，後以方便說三乘。『如是法』：雙指權實。『第一寂滅』：頌理一。『其實爲佛乘』：頌教一。

此下爲正說文，第二頌釋迦章，分二，初略頌上權實，爲下文總譬大義作本，二廣頌上六義，爲下文別譬作本，今初。

今我亦如是。安隱衆生故。以種種法門。宣示於佛道。我以智慧力。知衆生性欲。方便說諸法。皆令得歡喜。

初偈頌顯實，次偈頌施權。一、『今我亦如是』，我卽釋迦，是一化之主，爲下有大長者譬作本。二、『安隱』，涅槃秘藏是安隱處，對顯三界五濁不安隱，爲下火宅譬作本。三、『衆生』，卽五道受化之徒，爲下五百人譬作本。四、『安隱』法，還對五濁不安隱法，爲下火起譬作本。五、『種種法門』，對不種種，爲下唯有一門譬作本。六、『知衆生性欲』，卽同業中的別業，五道中有三乘根性差別，爲下三十子譬作本。

廣頌上六義，爲下文別譬作本，分六：一、頌五濁爲下見火譬作本。二、頌施方便化爲下捨几用車譬作本。三、頌顯實爲下等賜大車譬作本。四、頌歎法希有。五、頌不虛。六、頌揀衆敦信，總爲下無虛妄作本。今初。

舍利弗當知。我以佛眼觀。見六道衆生。貧窮無福慧。入生死險道。相續苦不斷。深著於五欲。如犛牛愛尾。以貪愛自蔽。盲瞶無所見。不求大勢佛。及與斷苦法。

深入諸邪見。以苦欲捨苦。爲是衆生故。而起大悲心。

『佛眼觀』：四眼入佛眼皆名佛眼，舉勝兼劣也。『貧窮無福慧』：頌衆生濁。『相續苦不斷』：頌命濁。『深著於五欲』：頌煩惱濁。『不求大勢佛』：頌劫濁。『深入諸邪見』：頌見濁。『犛（離）牛』：尾毛很長的牛。『以苦欲捨苦』：欲望捨苦，反得苦報，以諸見卽是受，有受卽苦。

三頌施方便化。分二，初明念用大乘化不得，次明念同諸佛用三乘化，稱宜可得。初又三：初用大擬宜。二明衆生無機。三明欲息大化。今初。

我始坐道場。觀樹亦經行。於三七日中。思惟如是事。

我所得智慧。微妙最第一。

『始坐道場』：理無始終，假時化物，爲化之初，故曰始，意指華嚴，地論云，佛成道後第二七日說華嚴。四分律薩婆多皆云六七，興起行經等七七，五分律八七，大論五十七，機見不同。在此處修治得道，故曰道場，此道場在摩竭提國西南，去尼連河不遠，周五百餘步，正中有金剛座，此迹中化佛之道場。『觀樹亦經行』：坐此樹下得三菩提，感樹恩故觀樹，念地德故經行。觀心，卽觀十二因緣樹，行三十七道品。『於三七日中思惟如是事』：過去因果經云，佛成道初一七日思惟我法妙，無能受者，二七日思惟衆生上中下根，三七日思惟誰應先聞法。（至波羅奈爲五人說四諦，陳如得法眼淨，頰鞞拔提十力迦葉摩訶男拘利未得道，佛重說四諦，四人得法眼淨，佛又說五陰無常苦空無我，五人得阿羅漢。佛爲佛寶，四諦爲法寶，五人及佛是僧寶。）『法眼淨』：小乘初果，大乘初地。今明佛在法身地，寂而常照，三七表佛三周說法，初七思法說周，次七思譬說周，後七思因緣說周。觀心者，初七欲明中道觀，但中道妙而難觀，次七欲明卽假觀，但卽假觀分別智難生，後七欲明卽空觀，卽空巧度不得，乃明方便析法觀也。『如是事』：偏指華嚴法界，泛指法華實相，若以佛慧爲法華，則始終俱說，若以會歸爲法華，則終有始無。

二明衆生無機。

衆生諸根鈍。著樂癡所迷。如斯之等類。云何而可度。

法妙根鈍難解，下文云：『諸子無知，雖聞父誨，猶故樂著嬉戲不已。』

三明欲息化。

爾時諸梵王。及諸天帝釋。護世四天王。及大自在天。
并餘諸天衆。眷屬百千萬。恭敬合掌禮。請我轉法輪。
我卽自思惟。若但讚佛乘。衆生沒在苦。不能信是法。
破法不信故。墜於三惡道。我寧不說法。疾入於涅槃。

梵釋雖請，佛知無機，故欲息化，下文云：『諸子幼稚，未有所識，或當墮落，爲火所燒。』以上擬用大化不得竟。

此下明念同諸佛用三乘化，稱宜可得。頌上『於一佛乘方便說三』。分二，初明化得。二釋疑。初又四：初明三乘擬宜。二明有小機。三明施化。四明受行悟入。今初。

尋思過去佛。所行方便力。我今所得道。亦應說三乘。

念彼雖無大機，豈可不度，須以方便而誘濟之，意欲引同諸佛，故曰『尋念』。

二明有小機。分二，初諸佛歎，二釋迦酬，今初。

作是思惟時。十方佛皆現。梵音慰喻我。善哉釋迦文。
第一之導師。得是無上法。隨諸一切佛。而用方便力。
我等亦皆得。最妙第一法。爲諸衆生類。分別說三乘。
少智樂小法。不自信作佛。是故以方便。分別說諸果。
雖復說三乘。但爲教菩薩。

初三句釋迦自敘三七思惟時。『佛現』者，契法契機也。次五句是諸佛

稱歎釋迦。『善哉』：能為實施權。『導師』：為一施三，引入佛慧。『得是無上法』：證微妙第一實智。『用方便力』：隨一切佛隱實施權。『我等亦皆得』下四句，諸佛自明我等亦隱實施權。『少智樂小法』下四句，雙釋隱實之義。最後兩句，雙結二義。

二明釋迦酬順。

舍利弗當知。我聞聖師子。深淨微妙音。稱南無諸佛。
復作如是念。我出濁惡世。如諸佛所說。我亦隨順行。

初一偈發言酬順。『南無』：此云敬從。後一偈念順物機。二明有小機竟。

三明施化。

思惟是事已。即越波羅奈。諸法寂滅相。不可以言宣。
以方便力故。為五比丘說。

『波羅奈』：鹿苑之國號。『諸法寂滅相』：即中道無性佛種之理。

權實、事理、小大、生無生、等對法相簡，則實、理、大、無生不可說，嚴格講，凡對法皆屬方便，絕對者乃『不可以言宣』。『五比丘』：解在序品。

四明受行悟入。（機會名受，煖法去名行，世第一名悟，初果名人。）

是名轉法輪。便有涅槃音。及以阿羅漢。法僧差別名。

『轉法輪』：轉佛心中化他之法，度入他心。有三輪四諦法輪。示轉：此是苦逼迫性、此是集招感性、此是滅可證性、此是道可修性。勸轉：汝應知、汝應斷、汝應證、汝應修。證轉：我已知、我已斷、我已證、我已修。『涅槃音』：陳如初得見諦，即斷見惑，分得有餘涅槃（子縛斷，果縛在），由此晉斷三界見思盡，得阿羅漢的無餘涅槃（灰身泯智）。約跨節，佛通四教，法有四種四諦，僧論四處見諦（藏初果，通八人見地，別初住，圓初

信。○別地圓住見道。今約當分漸初說。初明化得竟。

二釋疑。

從久遠劫來。讚示涅槃法。生死苦永盡。我常如是說。

『從久遠劫來』：師非始念方知，子非一世暫聞。指大通結緣之後，故下文云：『父知諸子，先心各有所好。』以上頌施方便化，為下寢大施小譬作本竟。

三頌顯實。

舍利弗當知。我見佛子等。志求佛道者。無量千萬億。
咸以恭敬心。皆來至佛所。曾從諸佛聞。方便所說法。
我卽作是念。如來所以出。為說佛慧故。今正是其時。
舍利弗當知。鈍根小智人。著相憍慢者。不能信是法。
今我喜無畏。於諸菩薩中。正直捨方便。但說無上道。
菩薩聞是法。疑網皆已除。千二百羅漢。悉亦當作佛。

本文為下等賜大車譬作本。

三乘皆稱『佛子』是人一。『為說佛慧』是理一，卽上一切種智佛知見。『但說無上道』：是教一。最後一偈菩薩除疑，羅漢作佛，是行一。

『志求佛道者』：卽索大之意。『皆來至佛所』：經方等般若調熟，恥小慕大，障除機發感佛。『今我喜無畏』：昔障重無機不得卽說佛慧，中間障雖除，但機未發，今機已發正是說時也。『於諸菩薩中，正直捨方便，但說無上道。』：五乘是曲非直，別通偏傍而非正，今皆捨彼偏曲，但說正直一道。不惟羅漢除疑，而三教菩薩無不除疑，不惟菩薩作佛，而羅漢悉亦作佛。

四頌嘆法希有。

如三世諸佛。說法之儀式。我今亦如是。說無分別法。
諸佛興出世。懸遠值遇難。正使出於世。說是法復難。
無量無數劫。聞是法亦難。能聽是法者。斯人亦復難。
譬如優曇華。一切皆愛樂。天人所希有。時時乃一出。
聞法歡喜讚。乃至發一言。則爲已供養。一切三世佛。
是人甚希有。過於優曇華。

此正頌妙法如來適時乃說，如優曇華時一現耳。『儀式』：引物之權。
『無分別法』：所顯之實。佛出世難，說妙法難，聞法者難，能信受難，舉
曇華譬上四難堅其信。

五頌上六虛。

汝等勿有疑。我爲諸法王。普告諸大衆。但以一乘道。
教化諸菩薩。無聲聞弟子。汝等舍利弗。聲聞及菩薩。
當知是妙法。諸佛之秘要。

本文爲下虛妄譬作本。

初六句誠勿於可信人生疑，次四句誠勿於可信法生疑。佛爲『法王』於
法自在，權說除濁，況秘要妙法，寧非真實耶。

六頌揀衆敦信，分二：初揀衆，次敦信。今初。

以五濁惡世。但樂著諸欲。如是等衆生。終不求佛道。
當來世惡人。聞佛說一乘。迷惑不信受。破法墮惡道。
有慚愧清淨。志求佛道者。當爲如是等。廣讚一乘道。

初偈頌上『此非佛弟子』，上文著涅槃尚非佛子，況樂著諸欲之魔業者。

『終不求佛道』：兼頌上『皆是增上慢人』。第二偈，頌上『如來滅後受持讀誦解義者是人難得』。第三偈頌上『若遇餘佛便得決了』。

次頌敦信。

舍利弗當知。諸佛法如是。以萬億方便。隨宜而說法。
其不習學者。不能曉了此。汝等既已知。諸佛世之師。
隨宜方便事。無復諸疑惑。心生大歡喜。自知當作佛。

此頌上『實得阿羅漢，不信此法無有是處。』

初六句敦信於權，後六句敦信於實。初法說周中有五段文（初正法說，二身子領解，三如來述成，四與授記，五四衆歡喜。），初正法說竟。釋方便品竟。次釋譬喻品。

譬喻品第三

前長文偈頌廣明五佛權實開三顯一，上根利智圓聞獲悟，中下之流，抱迷未遣，大悲巧智，令法領喻解，先許三車，而後等賜，正顯今日廢權立實之意，所謂動樹訓風，舉扇喻月，使其悟入，故曰譬喻，諸有智者以譬喻得解。通冠因緣約教本迹觀心等，釋譬喻。因緣釋譬喻者，以世間父子譬出世師弟，聞說成佛真子，天性不殊，得未曾有，踴躍歡喜，世界益。以世間資生三車珍玩之具，譬出世三乘，蒙佛音教，不失大乘，汝等所行是菩薩道，生善益。以世法離宅內眾災，譬出世滅惑得無漏，對治益。以世法等賜大車，譬出世安住實相，乘是寶乘直至道場，第一義益。佛以一音唯實，巧譬兼權，故譬義含因緣等四。

約教釋譬喻者，佛意本讚佛乘，眾生不堪，尋念先佛大悲方便，趣於鹿苑稱讚三車，二乘自濟，菩薩駕牛運出火宅，三藏教中譬喻。又三人同畏燒煮，聲聞如麀直去不回，緣覺如鹿母並馳並顧，菩薩如大象全羣而出，通教中譬喻。又三乘智弱理淺，斷通惑非波羅密，菩薩智強理深，斷別惑，窮源盡性，小品云：『二乘如螢火，菩薩如日光。』別教中譬喻。又華嚴利根，法華上周，二處化事始終理一，皆不須譬喻，為未入者，更以異方便助顯第一義，今日靈山決定說大乘，普令一切開示悟入佛之智慧，不令一人獨得滅度，故以大車名圓教中譬喻。

本迹釋譬喻者，迹中既用四教譬喻，以迹例本，本初成道亦應用諸譬喻成熟眾生，所謂千枝萬葉同宗一根。具如蓮華本迹三譬。

觀心釋譬喻者，空如白牛，假如三獸具度，中如車體。

法說周文，五段未竟，此品應在諸天說偈之後，火宅譬喻之前，今置身子領解之初者，出經者調卷，文義不割也。

法說周中第二段身子領解，分二，初經家敘，二身子自陳，今初。

爾時舍利弗踴躍歡喜。卽起合掌。瞻仰尊顏。

『踴躍歡喜』：敘內解。『合掌瞻仰』：敘外儀。

約四悉檀因緣釋歡喜者，從妙人聞妙法得妙解，內外和合而歡喜，世界益。回小向大，棄草菴，受家業，文云：『今日乃知真是佛子』故喜，爲人益。遣方等被斥之憂，除般若住小之悔，文云：『我已得漏盡』故喜，對治益。佛子所應得者今已得，文云『安住實智中，我定當作佛。』故喜，入理益。

約教釋歡喜者，身子已入無學位，世間之喜已除，藏通二喜久已得，不復重喜，若過二邊惡，得大歡喜，證道同圓，卽發心住，亦得名歡喜住，初行名歡喜行，初地名歡喜地，身子利智，超人卽行向地之喜，縱不超人亦必是歡喜住也。

約本迹釋歡喜者，身子久已成佛，號金龍陀，迹輔釋迦爲智慧弟子，初喜從外道拔邪歸正，再喜轉凡成聖，歷二酥今喜醍醐入佛知見，皆迹中歡喜。

觀心釋歡喜者，修從假入空觀，爲別十信，圓五品，觀行善。修從空出假觀，爲別三賢圓十信，相似喜。修中道觀，爲別地圓住，分證喜，乃至圓妙覺究竟喜。

『合掌』：昔權實爲二，表掌未合，今解權卽實，如二掌合。『瞻仰尊顏』：合掌表身，瞻仰表意，身心向佛，無他念，表尊顏實境。

二身子自陳，分二，初長文，二偈頌。初又三：初標三喜，二釋，三結成，今初。

而白佛言。今從世尊聞此法音，心懷踴躍。得未曾有。

『今從世尊』標身喜，『聞此法音』依佛口聞，標口喜。『得未曾有』標意喜，顯無得而得。

二釋。

所以者何。我昔從佛聞如是法。見諸菩薩受記作佛。而我等不預斯事。甚自感傷。失於如來無量知見。世尊。我常獨處山林樹下。若坐若行。每作是念。我等同人法性。云何如來以小乘法而見濟度。是我等咎。非世尊也。所以者何。若我等待說所因成就阿耨

多羅三藐三菩提者。必以大乘而得度脫。然我等不解方便隨宜所說。初聞佛法。遇便信受。思惟取證。世尊。我從昔來。終日竟夜每自剋責。

明昔失顯今得。從所以者何至無量知見，明昔不見佛爲失。從世尊至非世尊也，明昔不聞法失。從所以者何至每自剋責，明意無解之失。

『我昔從佛聞如是法』：預華嚴法界如聾啞，聞方等實慧，與不聞等。『見菩薩授記作佛』：阿含雖曾授彌勒記，而未明佛知見，意指方等中與菩薩記，二乘雖預會而未預受記事，尚遭淨名彈斥，故云『感傷』。『山林樹下』：是思念之所。『若行若坐』：是思念之儀。『同入法性』：藏通皆以偏眞爲法性，菩薩依大乘中道法性，方有受記成佛，認佛有偏，今日始知貪小失大。獨處坐行，身遠于佛，故無身喜，以小乘法而見濟度，無口喜。妄計同入法性不解權理，無意喜。『待說所因』：二乘急欲取證，不受高山於前，不待佛說眞實於後，雙失菩提正因，然所證又非眞滅，故『每自剋責』。不得說因，無實解，不識方便無權解。

三結成三喜。

而今從佛。聞所未聞未曾有法。斷諸疑悔。身意泰然。快得安隱。今日乃知眞是佛子。從佛口生。從法化生。得佛法分。

『從佛』——是結身喜。『聞法』——結口喜。『斷諸疑悔』——結意喜。『聞所未聞未曾有法』：華嚴先照如聾似啞故未聞，阿含除冀權說，不聞中理，方等彈斥無分，般若轉教，但爲菩薩，所以未聞。又三藏但聞偏眞，通教僅聞卽眞，別教離邊名中，未聞方便卽眞實，故名『未曾有法』。『眞佛子』：身子初證阿羅漢時，亦云爲佛長子，從佛口生，從法化生，乃約權說，不名爲眞，方等般若時，謂菩薩爲佛子，聲聞無佛法分，今日乃知眞是佛子，約開顯說。『得佛法分』：卽別地圓住分證位。由昔日之剋責、感傷、疑悔，結成今日之踴躍、歡喜、安穩。初長文竟。

二、偈頌分三：初頌標三喜，二頌釋，三頌結成。今初。

爾時舍利弗欲重宣此義。而說偈言。

我聞是法音。得所未曾有。心懷大歡喜。疑網皆已除。

『我聞』：從佛所聞，雙標身口。『得未曾有』：標意。餘可知。

二頌釋，分二：初補頌不失，二正頌昔失。今初。

昔來蒙佛教。不失於大乘。佛音甚希有。能除衆生惱。

我已得漏盡。聞亦除憂惱。

『不失大乘』：釋身喜。長文明失知見，頌中明不失大乘，其理不異。昔並未失，迷妄調失。

『佛音希有』：釋口喜。『漏盡……聞亦除憂惱。』：釋意喜。

二、正頌昔失，意指於方等聞彈斥密得通益。

我處於山谷。或在林樹下。若坐若經行。常思惟是事。

嗚呼深自責。云何而自欺。我等亦佛子。同入無漏法。

不能於未來。演說無上道。金色三十二。十力諸解脫。

同共一法中。而不得此事。八十種妙好。十八不共法。

如是等功德。而我皆已失。我獨經行時。見佛在大衆。

名聞滿十方。廣饒益衆生。自惟失此利。我爲自欺誑。

『無漏法』：卽長文所稱法性，謂偏眞涅槃不漏落生死。

三十二相、八十種好、十力、十八不共法等，爲佛果功德，名見法數，需者往檢不錄。又智論云：『小乘生身不說八十種好，大乘法身不說十八不共法，顯大小皆失。又舉三十二相爲外德，十力爲內德，明內外皆失。』

我嘗於日夜。每思惟是事。欲以問世尊。爲失爲不失。

我常見世尊。稱讚諸菩薩。以是於日夜。籌量如是事。
今聞佛音聲。隨宜而說法。無漏難思議。令衆至道場。

此頌聞般若轉教密得別益。

『日夜』，表法，日即涅槃，夜即生死，又凡夫生死，二乘涅槃同名爲夜，中道法性乃名爲日。『無漏不思議』：中道法性不漏二邊。

我本著邪見。爲諸梵志師。世尊知我心。拔邪說涅槃。
我悉除邪見。於空法得證。爾時心自謂。得至於滅度。

此頌『初聞佛說，遇便信受，思惟取證。』

『爲諸梵志師』：外道刪闍夜去世，以二百五十門徒付囑身子爲諸梵志師。

三頌結成，分二：初頌結，次頌成。初又三，初正頌結，二追疑悔，三敍今領解。今初。

而今乃自覺。非是實滅度。若得作佛時。具三十二相。
天人夜叉衆。龍神等恭敬。是時乃可謂。永盡滅無餘。
佛於大衆中。說我當作佛。聞如是法音。疑悔悉已除。

『具相三十二』：顯法身妙色，結身喜。『說我當作佛』：結口喜。

『疑悔皆已除』：結意喜。『自覺非實滅度』：但斷見思出分段，未能五住究竟二死永亡。

二、追敍疑悔。

初聞佛所說。心中大驚疑。將非魔作佛。惱亂我心耶。

此明非但於方等時生疑，般若中生悔，即今初聞開三顯一時，尚自驚疑，所以三請。

三、敍今領解。

佛以種種緣。譬喻巧言說。其心安如海。我聞疑網斷。
佛說過去世。無量滅度佛。安住方便中。亦皆說是法。
現在未來佛。其數無有量。亦以諸方便。演說如是法。
如今者世尊。從生及出家。得道轉法輪。亦以方便說。
世尊說實道。波旬無此事。以是我定知。非是魔作佛。
我墮疑網故。謂是魔所爲。聞佛柔軟音。深遠甚微妙。
演暢清淨法。我心大歡喜。疑悔永已盡。安住實智中。

此正具領五佛開顯之旨，以結身口意三喜。

次頌成。

我定當作佛。爲天人所敬。轉無上法輪。教化諸菩薩。

『爲天人所敬』卽身成。『轉無上法輪』卽口成。『教化諸菩薩』卽意成。法說周中第二段身子領解竟。

法說周第三段如來述成，分三：初昔曾教大，二中忘取小，三還爲說大。今初，昔曾教大，述其見佛之緣。

爾時佛告舍利弗。吾今於天人沙門婆羅門等大衆中說。我昔曾於二萬億佛所爲無上道故。常教化汝。汝亦長夜隨我受學。我以方便引導汝故。生我法中。

『二萬億佛所』：明昔因顯今緣，卽常不輕在二萬億威音佛時，亦卽大通爲王子時。『無上道』：十住毘婆沙明七種無上，身無上，謂相好。受持無上，謂自利利他（身口意）。具足無上，謂命見戒（大乘六和）。智慧無上，謂四無礙。不思議無上，謂六波羅密（福慧）。解脫無上能壞二障

（證）。行無上，謂聖行梵行（天行是果證，病嬰是果用。）後六句爲因，前一句爲果。又身無上名大丈夫，受持無上名大慈悲，具足無上名到彼岸，智慧無上名一切智，不思議無上名阿羅訶（應供）解脫無上名大涅槃，行無上名三藐三佛陀（正徧知）此七句皆從果立。今經引瓔珞以圓通爲無上道也。『長夜』：昔雖大化，未破無明。『方便引導生我法中』：初意昔以大化，今生大解。次意令免惡道權以小引。

二中忘取小，

舍利弗。我昔教汝志願佛道。汝今悉忘。而便自謂已得滅度。

述其感傷疑悔之由。

三還爲說大，

我今還欲令汝憶念本願所行道故。爲諸聲聞。說是大乘經。名妙法蓮華。教菩薩法。佛所護念。

述今日得解不虛。法說周中第三段如來述成竟。

法說周中第四段與授記，分二：初長行，次偈頌。初又十，初記時節乃至第十記法住久近。今初。

舍利弗。汝於無量無邊不可思議劫。

龍女雖畜，因乘急，先習方便，故成佛速。身子初周領解，雖開佛知見，發圓初住，但成應佛須緣，且諸聲聞從未淨佛國土，今雖蒙記，故尚須多劫成熟衆生。

二、記因行。

供養若干千萬億佛。奉持正法。具足菩薩所行之道。

供佛是修福，持法是修慧，福慧二嚴乃能具足菩薩道。

三、記得果。

當得作佛。號曰華光如來。應供。正徧知。明行足。善逝。世間解。無上士。調御丈夫。天人師。佛。世尊。

『如來』：梵語多陀阿伽度，亦云怛闍阿竭。『應供』：梵語阿羅訶。『正徧知』：或云等正覺，梵語三藐三佛陀。『明行足』：梵語鞞修遮羅那。『善逝』：或云好去，梵語修伽陀。『世間解』：梵語路伽憊。『無上士』：梵語阿耨多羅。『調御丈夫』：梵語富樓沙曇藐婆羅提。『天人師』：梵語舍多提婆摩菟舍喃。『佛陀』：此云覺者知者。『世尊』：梵語路迦那他。華梵十種通號：通釋者，無虛妄名如來，良福田名應供，知法界名正徧知，具三明名解行足，不還來名善逝，知衆生國土名世間解，無與等名無上士，調他心名丈夫，爲衆生眼名天人師，知三聚名佛，壞波旬名世尊。

『華光』：觀佛放光說法最先得記，故獲斯名。又華者福德，緣因佛性，光者智慧，了因佛性，今唯二嚴圓理，故曰如來。又觀心卽假名華，卽空名光，卽中名如來。

四、記國土。

國名離垢。其土平正。清淨嚴飾。安隱豐樂。天人熾盛。瑠璃爲地。有八交道。黃金爲繩。以界其側。其傍各有七寶行樹。常有華果。

出土名、土相與衆生作增上緣。

五、記說法。

華光如來。亦以三乘教化衆生。舍利弗。彼佛出時。雖非惡世。以本願故。說三乘法。

『本願』：據大悲空藏經云：『舍利佛，曾於六十劫行菩薩道，因婆羅門乞眼，退時願成佛日，開三乘法。』總之，凡聖同居土中，不論是淨是穢，施三者多，純一者少。

六、記劫名。

其劫名大寶莊嚴。何故名曰大寶莊嚴。其國中以菩薩為大寶故。

例釋迦出賢劫，以千佛化主為名，今從所化菩薩受稱，以賢哲為寶。

七、記眾數。

彼諸菩薩無量無邊不可思議。算數譬喻所不能及。非佛智力無能知者。若欲行時。寶華承足。此諸菩薩。非初發意。皆久植德本。於無量百千萬億佛所淨修梵行。恒為諸佛之所稱歎。常修佛慧。具大神通。善知一切諸法之門。質直無偽。志念堅固。如是菩薩充滿其國。

八、記壽量。

舍利弗。華光佛壽。十二小劫。除為王子未作佛時。其國人民。壽八小劫。

例釋迦俗壽八十，佛壽則五十，今亦然。『劫』：時分，以淨土無饑、病、刀三災，僅比照此土一增一減論劫也。

九、記補處。

華光如來。過十二小劫。授堅滿菩薩阿耨多羅三藐三菩提記。告諸比丘。是堅滿菩薩。次當作佛。號曰華足安行。多陀阿伽度（如來）。阿羅訶（應供）。三藐三佛陀（正徧知）。其佛國土，亦復如是。

法華妙道：本於燈明，傳於妙光，繼於然燈，證於釋迦，身子得之曰華光，堅滿記之曰華足安行。寶華承足，借因趣果，華足安行，帶果行因，因果互為權實，展轉授之補處。所處國土亦如華光之國土，故曰『亦復如是』。

十、記法住久遠。

舍利弗。是華光佛滅度之後。正法住世。三十二小劫。像法住世。亦三十二小劫。

『正法』：教理行證具備。『像法』：存三寶像貌，有教理行而果證則希，但以舍利普作佛事。『末法』：雖有教理，鮮聞真行實證者。初長文竟。爾時世尊欲重宣此義。而說偈言。

舍利弗來世。成佛普智尊。號名曰華光。當度無量衆。（超頌得果）

供養無數佛。具足菩薩行。十力等功德。證於無上道。（追頌行因）

過無量劫已。劫名大寶嚴。（頌時節並劫名）

世界名離垢。清淨無瑕穢。以瑠璃爲地。金繩界其道。七寶雜色樹。常有華果實。（頌國土）

彼國諸菩薩。志念常堅固。神通波羅密。皆已悉具足。於無數佛所。善學菩薩道。（頌衆數）

如是等大數。華光佛所化。（頌說法）

佛爲王子時。棄國捨世榮。於最末後身。出家成佛道。

華光佛住世。壽十二小劫。其國人民衆。壽命八小劫。（頌壽量）

佛滅度之後。正法住於世。三十二小劫。廣度諸衆生。

正法滅盡已。像法三十二，舍利廣流布。天人普供養。（頌華光法住久近）

華光佛所爲。其事皆如是。其兩足聖尊。最勝無倫匹。

彼卽是汝身。宜應自欣慶。（結歎）

次偈頌，分二：初頌長行，二結歎。略不頌補處。法說周中第四段與授記竟。

法說周中第五段身子得記，四衆歡喜，所謂見一華而知天下皆春，記一人而知人人有分。分二：初長行，次偈頌。初又三，初經家紋，二陳供養，三正領解。今初。

爾時四部衆比丘比丘尼。優婆塞優婆夷。天龍、夜叉、乾闥婆、阿修羅、迦樓羅、緊那羅、摩睺羅伽等大衆。見舍利弗於佛前受阿耨多羅三藐三菩提記。心大歡喜。踊躍無量。

二、陳供養。

各各脫身所著上衣。以供養佛。釋提桓因梵天王等。與無數天子。亦以天妙衣。天曼陀羅華。摩訶曼陀羅華等。供養於佛。所散天衣。住虛空中而自迴轉。諸天伎樂百千萬種。於虛空中一時俱作。雨衆天華。

『脫身所著上衣』：衣乃所著，一向不解者，況上衣更爲難捨，今脫供佛，表捨凡小法執。『華』，乃天人所愛，散四華供佛，表捨見愛。

出家二衆之上衣，卽僧伽梨，並不可捨，約表法，袈裟壞色，本是聲聞證眞之道，今脫以供佛，表其捨小乘法執趣無上菩提。小品經中三百比丘聞般若已，皆以僧伽梨而用供養，智論解釋，『亡相爲法』。或云『當日更得』。『天衣』，表寂滅法忍。『天華』，表大乘妙慧。『天樂』，表常樂解脫。『住虛空而自迴轉』，表因、果依正自他悉依法性自然而轉，空性不動，八部心轉。有回小向大，轉三爲一之意。

三、正領解。

而作是言。佛昔於波羅奈初轉法輪。今乃復轉無上最大法輪。

先領昔施權，次領今顯實。純明圓理，故言無上，不同兼但對帶之有上也。絕待無外故名最大，能開前四時兼但對帶中若大若小俱成一大。

次偈頌，分二：初頌開權顯實，二自述得解隨喜迴向。今初。

爾時諸天子欲重宣此義，而說偈言。

昔於波羅奈。轉四諦法輪。分別說諸法。五衆之生滅。
今復轉最妙。無上大法輪。是法甚深奧。少有能信者。

『五衆』：卽五陰，陰卽苦諦，由集故生，有生必滅，生滅滅已，名滅諦，能滅苦集名道諦。

二、自述得解隨喜迴向。

我等從昔來。數聞世尊說。未曾聞如是。深妙之上法。
世尊說是法。我等皆隨喜。大智舍利弗。今得受尊記。
我等亦如是。必當得作佛。於一切世間。最尊無有上。
佛道叵思議。方便隨宜說。我所有福業。今世若過世。
及見佛功德。盡迴向佛道。

初四句述解，次十句隨喜，後四句回向，『我等亦如是』；如身子領解得記。又四衆天人亦具三根，上同身子，中同迦葉等四人，下同五百弟子。『一切世間』：卽器世間、有情世間、正覺世間。『佛道』：卽妙法權實。『福業』：通三世。『見佛功德』：屬慧業，以福慧雙施，回小向大。初爲上根法說周竟。

二、譬說周，爲中根譬說文有四品，初譬喻品正譬開三顯一，二信解品明中根領解，三藥草喻品是如來述成，四受記品是與受決。初中二，初請，二答。初請文中有三節：一自述無疑。二述同輩有感。三新運大悲普爲四衆請說。

爾時舍利弗白佛言。世尊。我今無復疑悔。親於佛前得受阿耨多羅三藐三菩提記。是諸千二百心自在者。昔住學地。佛常教化言。我法能離生老病死。究竟涅槃。是學無學人。亦各自以離我見及有無見等。謂得涅槃。而今於世尊前。聞所未聞。皆墮疑惑。善哉世尊。願為四眾說其因緣。令離疑悔。

『佛常教化』：執昔二教。『聞所未聞』：昔說三是究竟，今又說一為真實，故墮疑惑說『因緣』：說前三後一之所以。四佛略開，釋迦廣顯，身子得記，龍鬼引例，中下猶迷者，因久執或入位，但凡夫則無。

二、佛答，分三：初發起，二正譬說，三勸信流通。今初。

爾時佛告舍利弗。我先不言。諸佛世尊以種種因緣譬喻言辭方便說法。皆為阿耨多羅三藐三菩提耶。是諸所說。皆為化菩薩故。然舍利弗。今當復以譬喻更明此義。諸有智者。以譬喻得解。

『我先不言』：指上明權。『皆為菩提』：指上顯實。『皆為化菩薩』：若權若實皆入佛道無住涅槃。『諸有智者以譬喻得解』：於譬說能解猶稱智者，恐鄙自沈，慰令前進。

二、正譬說，分二：初長行，二重頌。初又二：初立譬，二法合。初又二：初總譬，二別譬。初總譬又六：一長者譬，二舍宅譬，三二門譬，四五百人譬，五火起譬，六三十子譬。今初，長者譬，譬釋迦。

舍利弗。若國邑聚落。有大長者。其年衰邁。財富無量。多有田宅。及諸僮僕。

『國』：譬實報土。『邑』：譬方便土。『聚落』：譬同居土。從寂光本垂三土迹，攝三土迹歸寂光本。『長者』：世間長者有十德：一姓貴、二位高、三大富、四威猛、五智深、六年耆、七行淨、八禮備、九上敬、十下歸。譬出世如來，從三世真如實際中生，姓也。功成道著十號無極，位也。法財萬德悉皆具滿，富也。十力雄猛降魔制外，威也。一心三智無不通達，

智也。早成正覺久遠若斯，耆也。三業隨智運動無失，行也。具佛威儀心大如海，禮也。十方種覺所共稱譽，敬也。七方便而來依止，歸也。若從當分，四教果佛，各論權實十德，若依跨節別地圓住亦得分證圓家十德。

觀心釋長者十德，不出境智行三，觀行五品雖未入位，亦具十法成乘。觀心之智從實相生，姓貴也。三惑不起，稱寂滅忍，位高也。三諦含藏一切功德，大富也。正觀之慧降伏愛見，威猛也。中道雙照權實并明，智深也。久積善根觀出七方便上，年耆也。觀於心性能令三業無過，行淨也。歷緣對境威儀無失，禮備也。能以此觀，則諸佛歡喜上歎也。天龍四部恭敬供養，下歸也。『年』高：譬佛智德。『衰邁』：譬佛斷德。『無量』：總譬萬德。『田宅』：福慧也，若論福德，無行而不修，若論智慧，無境而不照，故云『多有』。田能養命，譬禪定資般若，宅可棲身，譬實境為智所托。『僮僕』：資於身命，譬具足方便，和光六道，曲順羣機，即實智之餘助。

二、舍宅譬，譬上安慰對三界不安隱。

其家廣大。

三、一門譬，譬上以種種法門宣示於佛道。

唯有一門。

宅門（出生死之方便路）、車門（入大乘圓教門）出入凡聖無異路，迷悟由一心，故言一門。又理為教所銓，今取銓理之教為門，理既是一，不容有二，故言以佛教門出三界苦，得涅槃證。

四、五百人譬，譬上眾生，即五道也。

多諸人眾。一百二百。乃至五百人。止住其中。

五、火起譬，譬上安隱法，對五濁不安隱法。文為二，初出所燒之宅相，譬六道果報，次明能燒之火，譬八苦五濁。今初。

堂閣朽故。牆壁隕落。柱根腐敗。梁棟傾危。

『堂』：譬欲界。『閣』：譬色無色界。『牆壁』：譬四大。無色界，

雖無四大造色，但定果，仍是牆壁，以心識維持非全無四大色。『隕落』：譬減損。『柱根』：譬命。『腐敗』：譬危殆不久。『梁棟』：譬意識。

『傾危』：譬遷變。又約觀解者：『堂』，譬身之下分。『閣』，譬頭等上分。『牆壁』，譬皮肉。『隕落』，譬老朽。『柱根』，譬兩足。『腐敗』，譬衰頹。『梁棟』，譬脊骨。『傾危』，譬大期。

次明能燒之火，譬八苦五濁。

周巾俱時欬然火起。焚燒舍宅。

八苦徧在四大四生，故言『周巾』，并皆無常故曰『俱時』。『欬然』，譬本無今有，本無此苦，無明故有。

六、三十子譬，譬上衆生性欲，卽指三乘行人。

長者諸子。若二十。或至三十。在此宅中。

曾習佛法，天性相關，目此結緣者爲『子』。『若十』爲菩薩子。『二十三十』：是二乘子。此機俱得出宅，無此機是五百人，或者支佛出沒不同，或小乘攝或中乘攝。皆言十者，悉有十智之性（世智、他心智、苦智、集智、滅智、道智、法智、比智、盡智、無生智）。初總譬竟。

二、別譬。分四，初長者見火譬，二捨凡用車譬，三等賜大車譬，四無虛妄譬。今初長者見火譬，譬上佛見五濁而起大悲心。

長者見是大火從四面起。卽大驚怖。而作是念。我雖能於此所燒之門。安隱得出。而諸子等於火宅內。樂著嬉戲。不覺不知。不驚不怖。火來逼身。苦痛切已。心不厭惡。無求出意。

『四面』：解有三十一、四大爲四面，六識托其中。二、卽四生（胎、卵、溼、化），俱舍云：『人旁生具四，地獄及諸天，中有唯化生，鬼通胎化二。』三云四倒，從身受心法四面起淨樂常說，或起不淨、苦、無常、無我、榮枯四倒。下文以生老病死爲四邊。『卽大驚怖』：慈故，念其退大善故驚，悲故，憂其將起重惡故怖。『我雖能於此所燒之門安隱得出』：長者

雖安而驚，雖出須入，譬如來安處涅槃，而恒住大悲，故不離三界，有智慧五住究竟，不為五濁八苦所危故安，有定力二死永亡，不為四倒暴風所動故隱。門通權實，按施廢開轉識成智論出。若就權智從所燒門出，若就實智，達燒無燒，佛原欲用實智衣祴几案出之不得，後以無常權智出之。『樂著嬉戲』：著見惑名嬉，著愛思名戲，見思招苦，將苦作樂，必無道滅。『不覺不知不驚不怖』：譬眾生不覺五陰八苦，不知四倒（見惑）三毒（修惑），既不識惑故不驚傷道，亦不畏失滅。『火來逼身』：五識身通三受，三受與三苦相應，曰逼身。『心不厭患』：同時意識與前五識俱，只知分別三受起貪瞋癡，故『無求出意』。又嬉譬見濁，戲譬煩惱濁，不覺不知不驚不怖譬眾生濁，火來逼身苦痛切已譬命濁，心不厭患無求出意譬劫濁，總上諸義共成五濁。

別譬第二捨几用車譬，譬上寢大施小，分二，初捨几譬，譬上念用大乘擬宜不得，二用車譬，初又二，初勸門擬宜不得，二誡門擬宜不得（上文不分勸誡兩門，但總明三意，一思大擬宜，二眾生無機，三念欲息化。）如來初欲勸眾善奉行，成就十力四無畏一切種智，而眾生不堪，次欲誡諸惡莫作證大涅槃，眾生亦不堪，無機息化。今初。

舍利弗。是長者作是思惟。我身手有力。當以衣祴。若以几案。從舍出之。復更思惟。是舍唯有一門。而復陋小。諸子幼稚。未有所識。戀著戲處。或當墮落。為火所燒。

『作是思惟』：譬上三七思惟。『身』：譬神通荷負。『手』：譬智慧提拔。『有力』：譬定慧力莊嚴以此度眾生，即智斷二德。『衣祴』：是西域盛華之器，譬如來知見。『几』：譬四無畏，或圓無作四諦。『案』：案多足無傾覆，譬十力。意謂身手有力，攝受諸子，貯於衣祴捧而出之，置於几案擎而出之。『唯有一門而復陋小』：一是理，門屬教，小機不入故曰陋。『諸子幼稚未有所識』：大乘善根微弱曰『幼稚』。聞大乘生毀謗名『未有所識』。『戀著戲處』：前明善弱，此明惡強，欲界著六塵，色界著禪味，無色界著定。『或當墮落為火所燒』：幼稚戀戲處譬著五欲故墮三途，不識大乘致生毀謗故墮三途。

二、誠門擬宜不得。

我當爲說怖畏之事。此舍已燒。宜時疾出。無令爲火之所燒害。作是念已。如所思惟。具告諸子。汝等速出，父雖憐愍。善言誘喻。而諸子等樂著嬉戲。不肯信受。不驚不畏。了無出心。亦復不知何者是火。何者爲舍。云何爲失。但東西走戲。視父而已。

大乘誠門，不同小乘無常等對治相，如大品中說四念處皆摩訶衍，觀不淨等，能所俱忘，皆不可得。既著戲處，故說怖事，令免五濁火燒五陰舍，宜應捨離，若久住著，必斷善根，故云『無令爲火之所燒害』。『不驚不畏』：明無機。『不知何者是火』：譬不識八苦五濁能燒善根。『何者爲合』：譬不識陰入法是諸苦器。『云何爲失』：譬不知喪失法身之由。『東西走戲視父而已』：背明向暗生死往返，如東西馳走，復起見愛如戲，不從大教，如視父而已。初捨几譬竟。

二、用車譬，譬上尋念過去佛所行方便力。分四，初擬宜三車譬，二知子先心所好譬，三歎三車希有譬，四適子所願譬。今初，譬上尋念過去佛亦作三乘化。

爾時長者卽作是念。此舍已爲大火所燒。我及諸子若不時出。必爲所焚。我今當設方便。令諸子等得免斯害。

『若不時出必爲所燒』：父以化功爲命，子以大善爲命，善盡等於子命斷，子命既斷，則化功亦廢，卽父命斷。焚含死義。

上文云，能於所燒之門安隱得出，指法身無燒名出。今云若不時出必爲所焚，指應身同疾，從物云燒，若衆生有善，則與應身同出，善斷卽不與應身時出，俱爲所焚。從理則法應無壞，從事則物燒佛出，今云俱燒，意在同出。『我今當設方便』：擬欲施權。

二、知子先心所好譬，譬上作是思惟時，十方佛皆現等。

父知諸子。先心各有所好。種種珍玩奇異之物。情必樂著。

『先心』：昔曾習小，性欲不同，昔曾習大，大習未濃，如身子於十住

（發心、治地、修行、生貴、方便、具足、正心、不退、善心、法王子、灌頂）中第六正心住時退大向小，以二至七住斷見思，至六心時見猶未盡。小強大弱，均厭生死慕涅槃，明有小機，開一爲三，故曰『各有所好』。『種種珍玩奇異之物』：譬權教涅槃。

三、歎三車希有譬，譬上思惟是事已，卽趣波羅奈三轉法輪等。

而告之言。汝等所可玩好。希有難得。汝若不取後必憂悔。如此種種羊車。鹿車。牛車。今在門外。可以遊戲。汝等於此火宅。宜速出來。隨汝所欲。皆當與汝。

『汝等所可玩好。希有難得。汝若不取後必憂悔。』：譬勸轉。『如此種種羊車。鹿車。牛車。今在門外。可以遊戲。』：譬示轉。『汝等於此火宅。宜速出來。隨汝所欲。皆當與汝。』：譬證轉。

車舉方便故有三，使雖二乘，義兼菩薩，城爲二三之處故一。車依造作故有，使約權同亦有，城若言化則無。教、人、行，從權俱有，從實俱無，約理則雙廢。

四、適子所願譬，譬上受行悟入。

爾時諸子。聞父所說珍玩之物。適其願故。心各勇銳。互相推排。競共馳走。爭出火宅。

前偈本略，但云是名轉法輪等。今譬事廣，廣明修因至果之相。『適其願』：機教相稱，卽聞慧（四念處）『勇銳』：思心動慮，卽思慧（四正勤）。『互相推排』：推四諦理，排伏見惑歷觀上下八諦三十二行（苦緣、有苦空無常無我四行，集緣、有集因緣生四行，滅緣、有滅盡妙離四行，道緣、有道正迹乘四行。）例從欲界苦修四行，次觀上界苦亦觀四行，從前觀從後減名互相，卽修慧（煖頂及下忍位）。『競』：爭取勝理，縮觀減緣減行趣苦法忍（留一行并所緣苦境入上忍位）『共』：於欲界苦緣中四行，隨觀一行與苦法忍同（世第一位）。『馳走』：一行一剎那引入見道，十六心

（八忍八智）速疾見理，譬上便有涅槃音。『爭出』：思惟道，二果斷六品欲思，三果斷欲思盡，四果斷三界見思盡，成無學果，方出火宅，即譬上偈及阿羅漢法僧差別名。

觀心釋者『適其願』：中道正觀，直觀實相，心法相稱。『勇』：觀與境悉無邊。『銳』：境研心利。『互相推排』：心境相研。『競共馳走』：第六王數修觀緣境均速，即圓觀六根未淨，粗惑未落，亦未離王數。『出火宅』：徧歷一切陰入界等，無非實相。二拾几用車譬竟。

別譬第三等賜大車譬，譬上顯真實相，分四：初父見諸子免難歡喜譬。二諸子索車譬。三等賜諸子大車譬。四諸子得車歡喜譬。今初，譬上令我喜無畏。

是時長者。見諸子等安隱得出。皆於四衢道中。露地而坐。無復障礙。其心泰然。歡喜踴躍。

『四衢道』：譬四諦觀。『露地』：譬三界思盡。『坐』：譬住果不進。『無復障礙』：譬子果縛盡。『泰然』：不為見思所局。『歡喜』：生滅度安隱想。

二、諸子索車譬，譬上大乘機發，咸以恭敬心皆來至佛所。

時諸子等各白父言。父先所許玩好之具。羊車。鹿車。牛車。願時賜與。

『三車』：譬三乘。方等被彈是機索，般若轉教含情索，法華三請為口索。指昔所許三權，正是請今一實。六祖所謂坐卻白牛車，更從門外覓三車。法說周，千二百人身子為首，殷勤三請，菩薩眾中大數有八萬，彌勒為首，合掌以敬心，欲聞具足道，佛陀許云，汝已殷勤三請，豈得不說，身子歡喜。譬說周，身子為中根人及四眾請，文云：善哉世尊，願為四眾說其因緣，佛陀許云：當以譬喻更明此義，迦葉等歡喜。因緣周，佛許云：我及汝等，宿世因緣，吾今當說，富樓那等歡喜。

三、等賜諸子大車譬，譬上正明顯實，正直捨方便但說無上道。分三：初標章，二釋車等，三釋心等。今初。

舍利弗。爾時長者各賜諸子等一大車。

『等』：心等、衆生等、佛性等。『一大車』：一切法皆摩訶衍。『各賜』：各隨本習，於諦緣度乃至色心諸法，開示真實，無非妙乘，祇緣性同，賜義則等。如今法華各授成佛之記，名爲等賜。

二、釋車等，分二：初正明車體，二釋有車之田。今初。

其車高廣。衆寶莊校。周巾欄楯。四面懸鈴。又於其上張設幪蓋。亦以珍奇雜寶而嚴飾之。寶繩交絡。垂諸華纓。重敷婉筵。安置丹枕。駕以白牛。膚色充潔。形體殊好。有大筋力。行步平正。其疾如風。又多僕從而侍衛之。

敍車體中，先敍高廣，次明白牛，後明僕從。『其車高廣』：譬如來知見深遠，橫豎周遍，徹法底源。『衆寶莊校』：譬萬行修飾。『周巾欄楯』：譬持萬善遮衆惡。『四面懸鈴』：譬四無礙辯（法義辭說）下化衆生。『張設幪蓋』：譬四無量心（慈悲喜捨）。『珍奇雜寶而嚴飾之』：譬真實萬善，嚴如來慈悲。『寶繩交絡』：譬四宏誓願，堅固大慈心。『垂諸華纓』：譬四攝（愛語、布施、利行、同事）神通。『重敷婉筵』：譬觀（九想、八背捨、八勝處、十一切處）、練（九次第定）、熏（獅子奮迅三昧）、修（超越三昧）等出世間禪。『安置丹枕』：丹卽赤光，譬無分別法，枕有內外，車外枕，隨所到處，車住須支，支之恐昂，車行枕閒，車息枕用，譬卽動而靜，卽靜而動，車內枕，休息身（行）首（智），譬一行三昧法理而然。

『駕以白牛』：譬無漏般若，能導諦緣度等一切萬行到薩婆若。『白』：是色本，與本淨無漏相應。『膚色充潔』：體具萬德如膚光，煩惱不染如色潔。

『形體殊好』：譬四如意足（欲念進慧）稱行者心。『有大筋力』：筋譬五根（信進念定慧）住立能生，力譬五力（名同五根）摧伏幹用。『行步平正』：譬七覺支（念、擇法、精進、喜、輕安、定、行捨），定慧調立。

『其疾如風』：譬八正道（正見、正思惟、正語、正業、正精進、正命、正念、正定），安穩中行，速疾到薩婆若。『又多僕從而侍衛之』：譬十度

（施戒忍進禪慧方便願力智）中之方便波羅密。

觀心釋者，現前一念介爾之心，豎窮橫遍，卽空假中故『高』，具足百界千如故『廣』，性具萬德，如『衆寶莊校』，心攝諸法，如『周巾欄楯』，心爲音教之本，如『四面懸鈴』，心能普覆，如『張設幃蓋』，心王作觀，諸善心所與之相應，如『以珍奇雜寶而嚴飾之』，心王心所互作無間，如『寶繩交絡』，心生無量福慧，如『垂諸華纓』，心安理得，如『重敷婉筵』，動靜不二，如『安置丹枕』，觀能顯性，如『駕以白牛』，稱性起修，如『膚色』，精一不雜，如『色潔』，圓融自在，如『形體殊好』，圓觀生善根，如『大筋』，圓觀摧伏一切見愛，如『大力』，圓觀定慧不二，如『行步平正』，圓觀無作，任運入於無功用道，如『其疾如風』，圓觀普攝權宜，如『僕從』。

又此文具足十乘觀法，『其車高廣』卽不思議境，『張設幃蓋』卽真正發菩提心，『安內丹枕』卽善巧安心止觀，『安外枕』卽善識通塞，『其疾如風』卽破法徧，及離似道法愛，『駕以白牛』卽調適圓妙三十七道品，『僕從而侍衛』卽對治助開，『行步平正』卽知位次，『有大筋力』卽能安忍。

又此文亦具十如是，『高廣』卽如是體，『衆寶莊校』等，卽如是相，『白牛』卽如是性，『大筋力』策五品進六根，卽如是力，如是作。『華纓』、『僕從』歷住行向地，卽是因，如是緣。『其車』是妙覺極位，卽如是果。『形體殊好』福慧兩足，卽如是報，性具名本，修德名末，性修不二名究竟等。總之，車本自有，非佛所賜，但不經開顯，豈知三權卽一實，一一無非摩訶衍也。

二、釋有車之由。

所以者何。是大長者財富無量。種種諸藏。悉皆充溢。

由財富藏溢，故能各賜諸子等一大車。『財富無量』：譬果地福慧圓滿。『諸藏』：謂行藏理藏，如云一切法趣檀，是趣不過，尸忍進禪智亦然，是約行明如來藏，一切法趣色，是趣不過，受想行識亦復如是，是約理明如來

藏，自行實智滿、名『充』，化他權智用，名『溢』。二釋車等竟。

三、釋心等。

而作是念。我財物無極。不應以下劣小車與諸子等。今此幼童。皆是吾子。愛無偏黨。我有如是七寶大車。其數無量。應當等心各各與之。不宜差別。所以者何。以我此物周給一國。猶尚不匱。何況諸子。

文具三義：一財富、二皆子、三無偏，乃名『心等』。『各各與之』：譬不移本習而示真實，如身子於智慧開佛知見，日連於神通開佛知見。『一國』：譬常寂光理性上。『諸子』譬同居結緣人。佛性種子是平等的，緣了之子，為先結緣者而熟脫之。正因之子是未結緣者，為其下種，故云『皆是吾子』。

四、諸子得車歡喜譬，譬上受行悟人疑網皆已除。

是時諸子各乘大車。得未曾有。非本所望。

本求羊鹿牛三乘，期出分段生死，今得大白牛車，盡於變易生死，過本所望，故歡喜。三等賜大車譬竟。

別譬第四無虛妄譬，譬上不虛令勿疑。分三：初問、次答、三述歎。今初。

舍利弗。於汝意云何。是長者等與諸子珍寶大車。甯有虛妄不。

次答。

舍利弗言。不也。世尊。是長者但令諸子得免火難。全其軀命。非為虛妄。何以故。若全身命。便為已得玩好之具。況復方便。於彼火宅而拔濟之。世尊。若是長者乃至不與最小一車。猶不虛妄。何以故。是長者先作是意。我以方便令子得出。以是因緣。無虛妄也。何況長者自知財富無量。欲饒益諸子。等與大車。

借假修真，身命為重，昔以方便令捨貪瞋得戒定慧解脫等五分法身之重寶，今又開三顯一贖常住慧命，寧為虛妄耶。長者不乖本心故不虛，諸子過本所望故不妄。

三、述歎。

佛告舍利弗。善哉。善哉。如汝所言。

前立譬文竟，此下法合。分二：初合總譬，次合別譬。初又二：初合長者等三譬（長者、五百人、舍宅），次合三十子等三譬（三十子、火起、一門）。與前文譬，文不次第，義則無缺。今初。

舍利弗。如來亦復如是。則為一切世間之父。於諸怖畏衰惱憂患。無明闇蔽。永盡無餘。而悉成就無量知見。力無所畏。有大神力。及智慧力。具足方便智慧波羅密。大慈大悲。常無懈倦。恒求善事。利益一切。而生三界朽故火宅。

『如來』，合長者譬。『利益一切』，一切合五百人譬。『而生三界朽故火宅』，合舍宅譬。『則為一切世間之父』，通指同居方便實報三土，合上國邑聚落。『於諸怖畏衰惱憂患。無明闇蔽。永盡無餘。』顯佛斷德。『而悉成就無量知見』：顯佛智德，合上其年衰邁之內德。『力無所畏』：合上外德財富無量。『有大神力』：合上多田。『及智慧力』：智照境。合上多宅。『具足方便』：合多諸僕從。『大慈大悲』：合多諸人眾。『三界』：合其家廣大。

次合三十子等三譬。

為度眾生老病死。憂悲苦惱。愚癡闇蔽三毒之火。教化令得阿耨多羅三藐三菩提。

『度眾生』：顯緣多，合三十子譬。『生老病死。憂悲苦惱。愚癡闇蔽三毒之火。』合火起譬。『教化令得阿耨多羅三藐三菩提』：合唯有一門譬。初合總譬竟。

次合別譬，有四：初合長者見火譬。二合捨几用車譬。三合等賜大車譬。四合無虛妄譬。今初。

見諸衆生。爲生老病死憂悲苦惱之所燒煮。亦以五欲財利故。受種種苦。又以貪著追求故。現受衆苦。後受地獄畜生餓鬼之苦。若生天上。及在人間。貧窮困苦。愛別離苦。怨憎會苦。如是等種種諸苦。衆生沒在其中。歡喜遊戲。不覺不知。不驚不怖。亦不生厭。不求解脫。於此三界火宅。東西馳走。雖遭大苦。不以爲患。舍利弗。佛見此已。便作是念。我爲衆生之父。應拔其苦難。與無量無邊佛智慧樂。令其遊戲。

『見』字合上長者見。『諸衆生……如是等種種諸苦』：合上大火從四面起。『衆生沒在其中……雖遭大苦不以爲患』：合上諸子等乃至無求出意。『不生厭』：不觀苦集也。『不求解脫』：不觀道滅也。『舍利弗。佛見此已。便作是念。我爲衆生之父。應拔其苦難。與無量無邊佛智慧樂。令其遊戲。』：合上卽大驚怖，我雖能於此所燒之門安隱得出意。『應拔其苦難』：卽大悲。『與無量樂』：卽大慈。

二、合捨几用車譬。分二，初合捨几。次合用車（初合捨几但合勸善，未合誠惡，以勸善爲正，誠惡爲傍，勸善必誠惡也。）初又二。初正合捨几，二提譬帖合。今初。

舍利弗。如來復作是念。若我但以神力及智慧。捨於方便。爲諸衆生讚如來知見力無所畏者。衆生不能以是得度。所以者何。是諸衆生。未免生老病死憂悲苦惱。而爲三界火宅所燒。何由能解佛之智慧。

『神力』：合上身力。『及智慧力』：合上手力。『讚如來知見』：合衣祴。『力無所畏』：合几案。如來擬以身手衣祴等宜衆，但不能以此得度。『未免生老病死』：合上諸子幼稚。『何由能解佛之智慧』：合上唯有一門而復陋小。

二、提譬帖合。（合息化）具明寢大施權後乃顯實。

舍利弗。如彼長者。雖復身手有力而不用之。但以殷勤方便。勉濟諸子火宅之難。然後各與珍寶大車。如來亦復如是。雖有力無所畏而不用之。

『力』：卽如來十力，一知是處非處智力。二知三世業報智力。三知諸禪解脫三昧智力。四知諸根勝劣智力。五知種種解智力。六知種種界智力。七知一切智所道智力。八知天眼無礙智力。九知宿命無漏智力。十知永斷習氣智力。『無所畏』：卽四無畏，一切智無所畏，漏盡無所畏，說障道無所畏，說盡苦道無所畏。初合捨几譬竟。

次合用車譬。分三，初合擬宜三車并知子先心。二合歎三車希有，三合適子所願。今初。

但以智慧方便。於三界火宅拔濟衆生。爲說三乘。聲聞辟支佛佛乘。

『智慧方便』：卽合擬宜三車。『爲說三乘』：卽合知子先心所好。

二、合歎三車希有（上有勸示證三轉，今亦是合，但不次第。）有三——初合示轉，次合證轉，三追合勸轉。今初。

而作是言。汝等莫得樂住三界火宅。勿貪麤弊色聲香味觸也。若貪著生愛。則爲所燒。汝速出三界。當得三乘。聲聞辟支佛佛乘。

『三界火宅』是不苦諦。『貪著生愛』是不集諦。『速出三界當得三乘』是示道滅二諦。

次合證轉，合上隨汝所欲皆當與汝

我今爲汝保任此事。終不虛也。汝等但當勤修精進。如來以是方便。誘進衆生。

三、追合勸轉（譬中先勸故云追合），合上汝等所可玩好希有難得。

復作是言。汝等當知。此三乘法。皆是聖所稱歎。自在無繫。無所依求。乘是三乘。以無漏根力覺道禪定解脫三昧等。而自娛樂。便得無量安隱快樂。

『聖所稱歎』：三乘皆是諸佛方便引物儀式。『自在』：得無生智。

『無繫』：得盡智。『無所依』：我生已盡不受後有。『無所求』：所作已辦梵行已立。『根力覺道』：即五根、五力、七覺支、八正道，通漏無漏，今指無學三十七品。『禪』：即四禪。『定』：即無色四定，亦通漏無漏，今取出世觀練熏修等，無漏禪定。『解脫』：即八解脫（又名八背捨，背彼淨潔五欲，捨是著心，解脫其繫縛之八種禪定。）一內有色想，觀外色解脫（依初禪觀欲界不淨等外色，除內貪。）二內無色想觀外色解脫（依二禪緣初禪色不淨等除貪）。三淨解脫身作證具足住（依四禪觀欲界淨色不貪成於身中），二禪無鼻舌二識，三禪無眼耳身三識所引之顯色貪也。四空無邊處解脫。五識無邊處解脫。六無所有處解脫。七非非想處解脫（依心意識修四無色定，觀苦空無常無我，生厭心而廢捨之。）。『三昧』：即三三昧（有漏曰三三昧，無漏曰三解脫門。）。『無量安隱快樂』：即真空涅槃。二合歎三車希有竟。

三、合適子所願。

舍利弗。若有衆生。內有智性。從佛世尊聞法信受。殷勤精進。欲速出三界。自求涅槃。是名聲聞乘。如彼諸子。為求羊車出於火宅。若有衆生。從佛世尊聞法信受。殷勤精進。求自然慧。樂獨善寂。深知諸法因緣。是名辟支佛乘。如彼諸子。為求鹿車出於火宅。若有衆生。從佛世尊聞法信受。勤修精進。求一切智，佛智，自然智，無師智，如來知見。力無所畏。愍念安樂無量衆生。利益天人。度脫一切。是名大乘。菩薩求此乘故。名為摩訶薩。如彼諸子。為求牛車出於火宅。

『內有智性』：宿習三乘成性，故佛施三乘之教。『聞法信受』：即聞慧。合上聞父所說玩好之物，適其願故。『殷勤』：即思慧，合上心各勇銳。『精進』：即修慧，合上推理排惡。『欲速出三界』：合上競共馳走爭出火宅。『聲聞乘』：如羊不顧後羣。『求自然慧』：辟支是法行人，從他聞法少，不同聲聞之信行也。又十二因緣本自有之，如鹿不依人。『一切智』：菩薩徧知世出世法。『佛智』：舊譯一切種智，菩薩所修，非二乘能得。『自然智』：不借功力，自然而生的一切種智，即無功用智。『無師智』：無師獨悟之智。又前之三智不從師得。有云一切智超支佛，佛智超菩薩，自然超聲聞，無師智超人天。菩薩望此修因，安穩運載，故譬『牛車』。二合捨几用車譬竟。

三、合等賜大車譬（上文有四——一免難、二索車、三等賜、四歡喜，今略不合第二、第四，但合免難義兼索車，合等賜義兼歡喜。）分二，初雙牒免難等賜二譬，二雙合，今初。

舍利弗。如彼長者見諸子等。安隱得出火宅。到無畏處。自惟財富無量。等以大車而賜諸子。

二、雙合，此文先合免難。

如來亦復如是。為一切衆生之父。若見無量億千衆生。以佛教門。出三界苦怖畏險道。得涅槃樂。

『佛教門』：指藏通二教，教下所詮之理為門，三乘聖行依之出苦得樂。次合等賜。

如來爾時便作是念。我有無量無邊智慧力無畏等。諸佛法藏。是諸衆生。皆是我子。等與大乘。不令人獨得滅度。皆以如來滅度而滅度之。是諸衆生脫三界者，悉與諸佛禪定解脫等娛樂之具。皆是一相一種。聖所稱歎。能生淨妙第一之樂。

『諸佛法藏』，合上財富無量，庫藏充溢。即有車之由也。『是諸衆生

皆是我子……禪定解脫等。娛樂之具。』：合上心等。及我財物無極不應以下小車。『一相』：是實相，卽法身。『一種』：是種智般若。『能生淨妙之樂』：卽解脫。三德不可思議，名爲高廣大車。法華開三顯一，顯一佛乘無有餘乘，故學無學人均授佛記，且爲五方諸佛所共說，後以藥王妙音觀音等菩薩述成其行與妙法相應，安樂行品又強調宏法華者，須住四行（身、口、意、願）說經。三合等賜大車竟。

四、合無虛妄譬，分二：初牒譬，二正合。今初。

舍利弗。如彼長者。初以三車誘引諸子。然後但與大車。寶物莊嚴。安隱第一。然彼長者無虛妄之咎。

二、正合。

如來亦復如是。無有虛妄。初說三乘引導衆生。然後但以大乘而度脫之。何以故。如來有無量智慧力無所畏。諸法之藏。能與一切衆生大乘之法。但不盡能受。舍利弗。以是因緣。當知諸佛方便力故。於一佛乘。分別說三。

『能與一切衆生大乘之法』，上云以我此物周濟一國猶尚不匱。『不盡能受』，不得已爲一施三，三由衆生，非佛本意，今說大乘不乖本心，故不虛。前舍利弗問云，願爲四衆說其因緣，今故答云，以是因緣分別說三。二正譬說中，初長文竟。

正譬說中第二重頌，分二：初頌立譬，次頌法合。初又二：初頌總譬，二頌別譬。初又四：初頌長者，二頌家宅，三頌五百人，四頌火起（總頌六意中止頌其四，兼得其二，頌家宅兼得一門，頌五百人兼得三十子。）今初。

佛欲重宣此義。而說偈言。

譬如長者。

但頌長者位號，卽兼名聞行遍德高，如舉佛號，便知智斷慈悲萬德。

二、頌家宅。

有一大宅。其宅久故。而復頓敝。堂舍高危。柱根摧朽。梁棟傾斜。基陞（音敝）隕（音推）毀。牆壁圯（音痞）坼（音徹）。泥塗阨（音智）落。覆苫（音山）亂墜。椽（音傳）栱（音呂）差脫。周障屈曲。雜穢充徧。

此頌喻佛爲三界依歸，故如宅主。『大宅』：指同居土大千三界。

『久』：指三界衆生同業所感之依報無始。『故』：指非今所造。『頓敝』：無常卑鄙。『堂』：指色界。『舍』：指欲界。堂舍通喻衆生別業所感之正報。『高危』：指上界不免無常墮落。『柱』：指命根支持。『摧朽』：指四相所遷。『梁棟』：指意識統御一身。『傾斜』：指諸苦所壞。『基陞』：指過去行業。『隕毀』：指業運遷滅。『牆壁』：指四大。『圯坼』：指互相損害。『泥塗』：指皮膚。『阨落』：指質色落謝。『覆苫亂墜』：指四威儀不正。『椽栱差脫』：指五識取境不聰。『周障』：指意識緣內外三十六物更相隔障。『屈曲』：指六根取境。『雜穢充徧』：指六塵徧染六根。以上約三界色心爲宅體。

化土以識性爲堂舍，故高危。以亂想爲柱根，故摧朽。以無明爲梁柱，故傾斜。以貪愛爲基陞，故隕毀。以我慢爲牆壁，故崩倒。以雜染爲泥塗，故阨落。以二障爲覆苫，故亂墮。以塵勞爲椽栱，故差脫。顯化土可壞。報土以法性爲堂舍，以禪定爲柱根，以願力爲梁柱，以福德爲基陞，以戒律爲牆壁，以衆香爲泥塗，以慈悲爲覆苫，以萬行爲椽栱，故報土不壞。觀心釋者，大宅本體卽大白牛車，豈可騎牛尋牛，五陰實性卽佛性，幻化空身卽法身。惑染卽般若，業行卽解脫。

三、頌五百人。

有五百人。止住其中。

譬五道有三乘根性，兼得三十子譬。喻五道雜居衆生皆不免無常生老病死之苦。

四、頌火起，分四：初頌地上事譬欲界，二頌穴中事譬色界，三頌穴外事譬無色界，四總結。初中四：初明所燒之類，二明火起之由，三正明火起之勢，四明被燒之相。今初（所燒之類，譬十使獸心衆生惡業因果備陳之狀，舉果明因重在因也。）

鴟（音癡）梟（音消）鴟（音雕）鷲。烏鵲鳩鴿。蚺蛇蝮蠍。蜈蚣蚰蜒。守宮百足。鼯（音右）狸鼯（音溪）鼠。諸惡蟲輩。交橫馳走。屎尿臭處。不淨流隘。蜚蝗諸蟲。而集其上。狐狼野干。咀（音矩）嚼（音決）踐踏。嚼（音劑）齧（音擊）死屍。骨肉狼籍。由是羣狗。競來搏（音博）撮（錯）。饑羸（音雷）惴惶。處處求食。鬥諍搯（音渣）掣（音徹）。喙（音涯）啖（音豺）嗥（音豪）吠。其舍恐怖。變狀如是。

本節文譬五鈍使。

『鴟梟鷲鷲。烏鵲鳩鴿。』：八種鳥，譬慢使，鳥凌高下視，譬衆生自舉輕他。鴟夜飛噉蟲，晝不見泰山。土梟長成食父母。鴟似鷹而大，色黑，亦名鷲，沸水令魚出食之。烏傳沫鵲傳枝，鳩則借巢而居，鴿淫合。『蚺蛇蝮蠍。蜈蚣蚰蜒。』：譬瞋使。蚺蛇卽大黑蛇，亦卽蝮蛇，毒在頭尾，螫手斷手，螫足斷足，屬胎生。蠍有劇毒。頸赤者爲蜈蚣，頸不赤者爲蚰蜒。『守宮百足。鼯狸鼯鼠。』：譬癡使。百足死而不僵，卽蠍虎。鼯鼠俗呼黃鼠狼。狸鼠善卜。鼯鼠爲鼠中最小者，傷人人不知痛。『屎尿臭氣。不淨流溢。』：譬癡心所著之境。『蜚蝗』：譬迷事無明，妄計爲常樂我淨。『狐狼野干』：譬貪使。『死屍』：譬粗垢五欲。『羣狗』：譬疑使。

處處皆有。魑魅魍魎。夜叉惡鬼。食噉人肉。毒蟲之屬。諸惡禽獸。孚乳產生。各自藏護。夜叉競來。爭取食之，食之旣飽。惡心轉熾。鬥諍之聲。甚可怖畏。鳩槃荼鬼。蹲踞土埕。或時離地。一尺二尺。往返遊行。縱逸嬉戲。捉狗兩足。撲令失聲。以腳加頸。怖狗自樂。復有諸鬼。其身長大。髀形黑瘦。常住其中。發

大惡聲。叫呼求食。復有諸鬼。其咽如鍼。復有諸鬼。首如牛頭。或食人肉。或復噉狗。頭髮蓬亂。殘害兇險。饑渴所逼。叫喚馳走。

本節文譬五利使，因鬼神有通有智，禽獸則無，故上文譬五鈍使。

利使鬼心徧緣五陰四諦下，故曰：『處處皆有』。『魍』：山林中怪。

『魅』：宅怪。『魍魎』：木石變成之怪。『夜叉』：譬邪見。『食噉人

肉』：譬撥無因果。『毒蟲之屬。諸惡禽獸。孚乳產生。各自藏護。』：譬世間因果相生之用，以爪護子曰孚，以乳哺子曰乳。因能有果名藏，必得不失名護。『爭取食之』：譬撥無世間因果。『食之既飽』：譬邪見成就。

『惡心轉熾』：譬邪見增廣。『鬪諍之聲』：譬撥無因果邪論。『甚可怖

畏』：譬聞此邪論能使人墮落三途。『鳩槃荼鬼』：為鬼道中得食強梁可畏鬼。譬戒取。『蹲（音敦）踞（音據）土埵（音朵）』：虛坐曰蹲，實坐曰踞。譬外道依戒取修十善能生六天高處。『離地一尺二尺』：譬依戒取修得

四禪曰一尺，修得四空曰二尺。『往返遊行』：上昇為往，退墮為返。『捉狗兩足』：妄計苦行為淨。『撲令失聲』：譬非因計因。『以腳加頸』：譬非果計果。『復有諸鬼其身長大』：譬身見。『裸（音裸）形黑瘦』：計我自在不修善法名裸，以惡莊嚴名黑，無功德資名瘦。『常住其中』：譬不能

出三界。『發大惡聲』：譬宣說種種我人等相。『叫呼求食』：譬計我能得涅槃。『復有諸鬼。其咽如鍼。』：即不得食之餓鬼，譬見取，咽細命危

而保其壽，如非想無常妄計涅槃。『復有諸鬼。首如牛頭。』：譬邊見：牛有二角，譬依身見起斷常二見。『頭髮蓬亂』：譬有時計斷害緣起正理，有時計常破無常正理，斷常迴轉不定，如髮蓬亂。『飢渴』：無禪悅食無智慧飲。『馳走』：輪迴三界。

夜叉餓鬼。諸惡鳥獸。饑急四向。窺看窗牖。如是諸難。恐畏無量。

此總結欲界利鈍煩惱衆生之相。

『饑』：譬有漏之心，無道味之食。『急』：譬由饑故生死速疾。『四向』：指見惑利使。『窺看窗牖』：理無是非，計著成過，如隔窗觀空，見空而偏，不得無礙。初明所燒之類竟。

二、明火起之由，（譬起五濁之由）。

是朽故宅。屬於一人。其人進出。未久之間。於後宅舍。忽然火起。

『屬於一人』：譬三界爲一佛所化之土。『其人進出』：譬應身佛赴緣現生現滅。『未久之間』：壽量品云，數現涅槃。『於後宅舍忽然火起』：三界爲宅五陰爲舍；譬如來於大通佛時常教化是等，令伏五濁，捨應之後，衆生起濁。

三、正明火起之勢，（譬正起五濁）。

四面一時。其燄俱熾。棟梁椽柱。爆聲震裂。摧折墮落。牆壁崩倒。

『四面』：譬身受心法。『一時』：譬頓起四倒五濁八苦。『熾』：譬相續漸增。『爆』：譬命根斷。『裂』：譬諸根破壞。『摧折墮落』：譬氣斷骨離筋絕。『牆壁崩倒』：譬四大解散。由濁倒故身命無常。

四、明被燒之相，（譬五濁八苦逼惱利鈍衆生）。

諸鬼神等。揚聲大叫。鷓鴣諸鳥。鳩槃荼等。周惶惶怖。不能自出。

『諸鬼神等』：譬身邊戒見邪五利使。『揚聲大叫』：譬邪見等人，計斷常執有無，其機如鬼，其謀如神者徒呼奈何。『鷓鴣諸鳥』：譬貪瞋癡慢疑五鈍使。『鳩槃荼等』：譬利使中勝者。利使卽見惑，鈍使卽思惑，見思爲三界生因，故曰『不能自出』。初頌地上事譬欲界竟。

二、頌穴中事，譬色界，分三：初譬所燒之類，二明火起之由及火起之勢，三明被燒之相。今初。

惡獸毒蟲。藏竄（音篡）孔穴。毗舍闍鬼。亦住其中。

『孔穴』：譬四禪定，雖不及界外安隱，亦可免欲界粗惡。『惡獸毒蟲』：總舉鈍使眾生。『毗舍闍鬼』：此云噉精氣鬼，略舉利使眾生。得禪生於色界。證之瞋通三界，小乘中云，上界不行瞋，非盡理也。

二、明起火之由，及火起之勢。

薄福德故。爲火所逼。共相殘害。飲血噉肉。

『薄福德故』：爲起火之由。『爲火所逼』：是火起之勢。孔穴中雖無猛炎，猶有熱惱，譬四禪中雖無欲界惡法，亦有愛味細苦。所謂初禪有覺觀，二禪有憂喜，三禪有苦樂，四禪與捨俱，仍屬闇證無觀慧，地地生愛味，境界不分明，未出色籠。『共相殘害』：譬展轉厭下欣上。『飲血』：瓔珞釋支林爲因，默然爲果，飲血譬著默然，或以一心支爲默然。『噉肉』：譬著支林功德，卽初禪覺觀喜樂一心，二禪內淨喜樂一心，三禪捨念智樂一心，四禪不苦樂，捨念清淨一心。

野干之屬。並已前死。諸大惡獸。競來食噉。臭煙燄（音蓬）焯（音勃）。四面充塞。

『野干』：似狐而小，一目色青黃，如狗群行，夜鳴如狼，譬欲界貪，故曰『已先死』。『諸大惡獸』：譬色界貪。『臭煙』：欲界四倒八苦譬猛炎，色界四倒譬臭煙，亦通身受心法及四大，故曰『四面』。二頌穴中事譬色界竟。

三、頌穴外事，譬無色界，分二：初明所燒之類，二明被燒之相。今初。

蜈蚣蚰蜒。毒蛇之類。爲火所燒。爭走出穴。鳩槃茶鬼。隨取而食。

『爲火所燒。爭走出穴。』：譬凡外修六行觀，厭患色籠是苦粗障，欣向無色爲淨妙離。『鳩槃茶鬼。隨取而食。』：譬取上定滅下緣，滅心存心，

心心相依，入四空定。

二、明被燒之相。

又諸餓鬼。頭上火然。饑渴熱惱。周樟悶走。

『諸餓鬼』：譬四空諸天，乏無漏飲食。『頭上火然』：餓鬼本淫習所招，生為欲火，死為業火。譬四空雖居三界之頂，不免無常所燒。『饑』：譬無正道食。『渴』：譬無助道漿。『熱』：譬為微細八苦所逼。『惱』：譬有微細諸惑現行。『周樟悶走』：譬在生死輪迴不知出要。三頌穴外事，譬無色界竟。

四、總結眾難非一。

其宅如是。甚可怖畏。毒害火災。眾難非一。

初頌總譬竟。

二、頌別譬，分三：初長者見火譬，二頌捨几用車譬，三頌等賜大車譬，略不頌無虛妄譬。今初。

是時宅主。在門外立。聞有人言。汝諸子等。先因遊戲，來入此宅。稚小無知。歡娛樂著。長者聞已。驚人火宅。

『門外』：譬法身地。『立』：譬常懷大悲，不處第一義空座。『聞』：上文云見，今頌云聞，顯見聞不二，譬三七思惟。『先因遊戲，來入此宅』：譬發心未得不退，故出而未出，見思戲論，無明起妄，故入三界生死之宅。『稚小』：譬大善未着。『無知』：譬疑惑所纏。『驚人』：譬大悲起應。

二、頌捨几用車譬，分二：初頌捨几，二頌用車。今初（前法合中但合勸門，今但頌誠門。）

方宜救濟。令無燒害。告諭諸子。說眾患難。惡鬼毒蟲。災火蔓莖。眾苦次第。相續不絕。毒蛇虻蝮。及諸夜叉。鳩槃荼鬼。野

干狐狗。鷓鴣鴟梟。百足之屬。饑渴惱急。甚可怖畏。此苦難處。況復大火。諸子無知。雖聞父誨。猶故樂著。嬉戲不已。

『方宜』：擬以大教逗其機宜。『告諭諸子』：譬誡門說衆患難。『惡鬼毒蟲』：總立所燒，譬利鈍十使衆生。『災火蔓莖。衆苦次第。相續不絕。』：總明燒勢及燒相。『毒蛇虻蝮。……甚可怖畏。』：廣明所燒雜列利鈍諸使。『此苦難處，況復大火。』：譬三界因果已不堪處，況又起五濁。『諸子無知』：譬無大乘機。『雖聞父誨。猶故樂著。嬉戲不已。』：深著見思，父誨所不能化，含有息化之意。

二、頌用車，分三：初頌擬宜三車，二頌歎三車希有，三頌適子所願，不頌知子先心。今初。

是時長者。而作是念。諸子如此。益我愁惱。今此舍宅。無一可樂。而諸子等。耽（音丹）湏（音免）嬉戲。不受我教。將爲火害。即便思惟。設諸方便。

『將爲火害』：譬既著見思嬉戲，唯宜施小，若不用小，則大小並亡。

二、頌歎三車希有。

告諸子等。我有種種。珍玩之具。妙寶好車。羊車鹿車。大牛之車。今在門外。汝等出來。吾爲汝等。造作此車。隨意所樂。可以遊戲。

初四句勸轉。『羊車鹿車。大牛之車。今在門外。』：示轉，如示四諦令知出世。『汝等出來』：重勸諦觀而得出宅。『吾爲汝等。造作此車。』：證轉。

三、頌適子所願。

諸子聞說。如此諸車。卽時奔競。馳走而出。到於空地。離諸苦難。

『聞說』：頌聞慧。『奔競』：頌思修。『馳走而出』：頌見諦。『到於空地』：頌無學。二頌捨几用車譬竟。

三、頌等賜大車譬，分四：初頌父見諸子免難歡喜譬，二頌諸子索車譬，三頌等賜諸子大車譬，四頌諸子得車歡喜譬。今初。

長者見子。得出火宅。住於四衢。坐師子座。而自慶言。我今快樂。此諸子等。生育甚難。愚小無知。而入險宅。多諸毒蟲。魘魅可畏。大火猛燄。四面俱起。而此諸子。貪著嬉戲。我已救之。令得脫離。是故諸人。我今快樂。

『住於四衢』，譬見四真諦。『坐獅子座』：長者初在門外有憂故立，今見子免難故坐，方便品云：『今我喜無畏。』又前大機未會故立，今小化已周故坐，立者冥利，坐者顯益。『而自慶言。我今快樂。』：得所化機。

『生育甚難』：二萬億佛所教以大乘曰生，中間小熟曰育，多時將養曰甚難。『愚小』：善根尚微。『無知』：妄惑所覆。『入險宅』：由惑無知而起濁業，則招三界果，入五陰宅，有毒蟲、畜道險，有魘魅、鬼道險，有猛火、地獄道險。『毒蟲魘魅』：述三界利鈍之相。『大火猛燄』：述三界四倒八苦之勢。『貪樂嬉戲』：明起見愛不能自拔。『我已救之』：明歡喜之由。

二、頌諸子索車譬。

爾時諸子。知父安坐。皆詣父所。而白父言。願賜我等。三種寶車。如前所許。諸子出來。當以三車。隨汝所欲。今正是時。惟垂給與。

『知父安坐』：索車時，亦將說法華時。『皆詣父所』：索車儀，正同此會咸以恭敬心皆來至佛所。『如前所許』：執昔疑今，既斥二乘為方便，必當別垂給與。

三、頌等賜諸子大車譬。

長者大富。庫藏衆多。金銀瑠璃。碑磔碼碯。以衆寶物。造諸大車。莊校嚴飾。周巾欄楯。四面懸鈴。金繩交絡。眞珠羅網。張施其上。金華諸纓。處處垂下。衆綵雜飾。周巾圍繞。柔軟繒纈。以爲茵褥。上妙細氈。價值千億。鮮白淨潔。以覆其上。有大白牛。肥壯多力。形體殊好。以駕寶車。多諸僮從。而侍衛之。以是妙車。等賜諸子。

『庫』：以屋盛物，喻六根具一切法。『藏』：以地盛物，喻諸行具一切法。『衆寶』：譬性具諸法。『造』：譬從性起修。『大車』：以性泯修，造本有之車體。『莊校』等，明具度。『處處垂下』：明衆機徧悅。『周巾圍繞』：顯攝物之宜，無所缺少。『鮮白潔淨』：顯事禪卽實相，不同凡小雜染。『大白牛』：表性德，如前釋。『僮從』：卽僕從。

四、頌諸子得車歡喜譬。

諸子是時。歡喜踊躍。乘是寶車。遊於四方。嬉戲快樂。自在無礙。

『寶車』：譬中道妙慧。『四方』：譬橫遊生滅、無生、無量、無作四種四諦，豎遊四十一位，證常樂我淨四德。初頌立譬竟。

二、頌法合，分二：初頌合總譬，二頌合別譬。初中四，初頌合長者，二頌合五百人，三頌合家宅，四頌合火起，今初。

告舍利弗。我亦如是。衆聖中尊。世間之父。

『我亦如是』：頌合位號。『衆聖中尊世間之父』：頌合名行，兼歎德。七種方便聖賢之尊，九種世間之父。

二、頌合五百人，（兼得三十子義）。

一切衆生。皆是吾子。深著世樂。無有慧心。

『一切』：指三界五道。『吾子』：三十合緣因子，一切合正因子。

三、頌合家宅，（兼得一門義）。

三界無安。猶如火宅。

四、頌合火起。

衆苦充滿。甚可怖畏。常有生老。病死憂患。如是等火。熾然不息。

初頌合總譬竟。

二、頌合別譬，分四：初頌合見火，二頌合捨几用車，三頌合等賜大車，四頌合無虛妄。今初。

如來已離。三界火宅。寂然閑居。安處林野。今此三界。皆是我有。其中衆生。悉是吾子。而今此處。多諸患難。唯我一人。能爲救護。

初四句合能見，妙奢摩他、卽觀而止、照而常寂，毗鉢舍那、卽止而觀、寂而常照，故能見。次六句頌合所見。後兩句頌合驚怖入宅。

二、頌合捨几用車，分二：初頌合捨几，二頌合用車。今初。

雖復教詔。而不信受。於諸欲染。貪著深故。

初句頌擬宜，第二句頌不得，後兩句釋成不信之由。

二、頌合用車。

以是方便。爲說三乘。令諸衆生。知三界苦。開示演說。出世間道。是諸子等。若心決定。具足三明。及六神通。有得緣覺。不退菩薩。

初二句頌合擬宜。次四句頌合歎三車希有。後六句頌合適子所願。『若心決定』：總頌三乘馳走之位。『具足三明。……不退菩薩。』：別頌三乘爭出之位。『不退』：義通，兼前三教。二頌合捨几用車竟。

三、頌合等賜大車，分二：初頌合等賜，二頌合歡喜，略不頌免難索車。今初。

汝舍利弗。我爲衆生。以此譬喻。說一佛乘。汝等若能。信受是語。一切皆當。成得佛道。

此先頌皆是我子，等與大乘。乃至皆以如來滅度而滅度之，合心等也。

是乘微妙。清淨第一。於諸世間。爲無有上。佛所悅可。一切衆生。所應稱讚。供養禮拜。

此頌皆是一相一種，聖所稱歎，能生淨妙第一之樂，合車體也。

無量億千。諸力解脫。禪定智慧。及佛餘法。得如是乘。

此追頌我有無量無邊智慧，力無畏等。諸佛法藏，合有車之由。初頌合等賜竟。

三、頌合歡喜。

令諸子等。日夜劫數。常得遊戲。與諸菩薩。及聲聞衆。乘此寶乘。直至道場。以是因緣。十方諦求。更無餘乘。除佛方便。

初七句正明各得大乘法喜，後四句結成勸信。『日夜』：自得中道智如日，慈悲入生死如夜。『遊戲』：有智不住生死，有悲不住涅槃。『與諸菩薩及聲聞衆』：廣化三乘，同得一乘。『乘此寶乘。直至道場。』：此乘純圓，無委曲相。『十方諦求。更無餘乘。』：唯一無二。三頌合等賜大車竟。

四、頌合無虛妄。

告舍利弗。汝諸人等。皆是吾子。我則是父。汝等累劫。衆苦所燒。我皆濟拔。令出三界。我雖先說。汝等滅度。但盡生死。而實不滅。今所應作。唯佛智慧。若有菩薩。於是衆中。能一心聽。諸佛實法。諸佛世尊。雖以方便。所化衆生。皆是菩薩。

初四句先定父子，天性至情，即是頌如來亦復如是，無有虛妄。次四句頌初說三乘，引導衆生。次十四句頌然後但以大乘而度脫之。『皆是菩薩』：昔日結緣佛子，同有真如佛性。

若人小智。深著愛欲。爲此等故。說於苦諦。衆生心喜。得未曾有。佛說苦諦。真實無異。若有衆生。不知苦本。深著苦因。不能暫捨。爲是等故。方便說道。諸苦所因。貪欲爲本。若滅貪欲。無所依止。滅盡諸苦。名第三諦。爲滅諦故。修行於道。離諸苦縛。名得解脫。是人於何。而得解脫。但離虛妄。名爲解脫。其實未得。一切解脫。佛說是人。未實滅度。斯人未得。無上道故。我意不欲。令至滅度。我爲法王。於法自在。安隱衆生。故現於世。

『小智』：聲聞於四乘中最小，以苦諦爲初門。『衆生心喜』：本厭生死，自求涅槃，今聞出離，稱其本習故喜。『苦本』：卽集諦。『方便說道』：猶言方便開三接引。『第三諦』：卽滅諦。『但離虛妄』：離見思。『名得解脫』：除通惑脫分段。『一切解脫』：除別惑脫變易，卽如來無作滅諦大涅槃。『未實滅度』：變易生死尚在。『無上道』：一切種智，卽無作道諦。『我意不欲令至滅度』：斷分段，非大涅槃，未稱佛陀本心。『法王』：於權實法已得自在。『安隱衆生』：許三與一，豈有虛也。

譬說周中四大段中，初譬喻品，正譬開三顯一，有請有答，答中有三，初發起，二正譬說，三勸信流通，以上正譬說竟。

三、勸信流通，分二：初標二章（信佛說不說，勸可通不通），二釋。今初。

汝舍利弗。我此法印。爲欲利益。世間故說。在所遊方。勿妄宣傳。

利益世間故說，五千未退妄傳非器不說，惡者強說令其墮苦，善者不說悞其得樂。大慈念善則可流通，大悲恚惡則不宜流通。

二、釋，分二，初釋可說不可說。二釋可通不可通。今初。

若有聞者。隨喜頂受。當知是人。阿惟越致。若有信受。此經法者。是人已曾。見過去佛。恭敬供養。亦聞是法。若人有能。信汝所說。則爲見我。亦見於汝。及比丘僧。並諸菩薩。斯法華經。爲深智說。淺識聞之。迷惑不解。一切聲聞。及辟支佛。於此經中。力所不及。汝舍利弗。尚於此經。以信得人。況餘聞聲。其餘聲聞。信佛語故。隨順此經。非已智分。

通論三世利益。『隨喜頂受』，是現在益爲說。『見過去佛』，是過去善爲說。『信汝所說』：是未來善爲說。別使二乘人信，下文云：『若深信解者，見佛常住靈鷲。』卽其義也。『阿惟越致』：此云不退。

二、釋可通不可通，分二：初約大悲門莫爲惡說。二約大慈門廣爲善說。今初。

又舍利弗。憍慢懈怠。計我見者。莫說此經。凡夫淺識。深著五欲。聞不能解。亦勿爲說。若人不信。毀謗此經。則斷一切。世間佛種。或復鬻鬻。而懷疑惑。汝當聽說。此人罪報。若佛在世。若滅度後。其有誹謗。如斯經典。見有讀誦。書持經者。輕賤憎惡。而懷結恨。此人罪報。汝今復聽。其人命終。入阿鼻獄。具足一劫。劫盡更生。如是展轉。至無數劫。從地獄出。當墮畜生。若狗野干，其形頹瘦。鰲鼈疥癩。人所觸燒（音饒）。又復爲人。之所惡賤。常困饑渴。骨肉枯竭。生受楚毒。死被瓦石。斷佛種故。受斯罪報。若作駱駝。或生驢中。身常負重。加諸杖捶。但念水草。餘無所知。謗斯經故。獲罪如是。有作野干。來入聚落。身體疥癩。又無一目。爲諸童子。之所打擲。受諸苦痛。或時致死。於此死已。更受蟒身。其形長大。五百由旬。鬻駘無足。宛

轉腹行。爲諸小蟲。之所啞食。晝夜受苦。無有休息。謗斯經故。獲罪如是。若得爲人。諸根闇鈍。矧陋癡躄。盲聾背偻。有所言說。人不信受。口氣常臭。鬼魅所著。貧窮下賤。爲人所使。多病瘠瘦。無所依怙。雖親附人。人不在意。若有所得。尋復忘失。若修醫道。順方治病。更增他疾。或復致死。若自有病。無人救療。設服良藥。而復增劇。若他反逆。抄劫竊盜。如是等罪。橫罹其殃。如斯罪人。永不見佛。衆聖之王。說法教化。如斯罪人。常生難處。狂聾心亂。永不聞法。於無數劫。如恒河沙。生輒聾瘖。諸根不具。常處地獄。如遊園觀。在餘惡道。如己舍宅。駝驢豬狗。是其行處。謗斯經故。獲罪如是。若得爲人。聾盲瘖瘕。貧窮諸衰。以自莊嚴。水腫乾癆。疥癩癰疽。如是等病。以爲衣服。身常臭處。垢穢不淨。深著我見。增益瞋恚。淫欲熾盛。不擇禽獸。謗斯經故。獲罪如是。告舍利弗。謗斯經者。若說其罪。窮劫不盡。以是因緣。我故語汝。無智人中。莫說此經。

『則斷一切世間佛種』：大品以了因爲佛種，涅槃以正因爲佛種，法華以小善成佛，取緣因爲佛種，故曰佛種從緣起，若執權疑實，不信小善成佛，是斷世間緣因種。

本節文具明謗經所招惡報，誠令勿妄宣傳，非經爲罪緣，迷者不信，謗法獲殃，且佛詳述惡因惡果，於初六偈列十四種惡因：一、憍慢、二懈怠、三計我、四淺識、五著欲、六不解、七不信、八顰（音貧）蹙（音促）、九疑惑、十誹謗、十一輕善、十二憎善、十三嫉善、十四恨善。惡果中由謗墮惡，斷佛種。使知者有所避苦生福。

『顰蹙』音貧促。『頌』音哭。『顰』音離。『蹙』音坦。『駝』音折，驢父牛母所生、卽駝駝。『駝』音陀，駱駝。『駝』音俟。『蹙』音畢。『偻』音于。『癰』音雍。『疽』音聚。

二、約大慈門應爲善說，分二：初爲五雙（過現、福慧、慚愧、自他、始終），善人之相可爲宣說，二總結可說。今初。

若有利根。智慧明了。多聞強識。求佛道者。如是之人。乃可爲說。若人曾見。億百千佛。植諸善本。深心堅固。如是之人。乃可爲說。

『利根』『強識』，是現在見佛。『植諸善本』，是過去。過現一雙。

若人精進。常修慈心。不惜身命。乃可爲說。若人恭敬。無有異心。離諸凡愚。獨處山澤。如是之人。乃可爲說。

『修慈心』是愍下，『恭敬』是尊上，又有『慈心』不住涅槃，『離諸凡愚』不住生死，福慧一雙。

又舍利弗。若見有人。捨惡知識。親近善友。如是之人。乃可爲說。若見佛子。持戒清潔。如淨明珠。求大乘經。如是之人。乃可爲說。

『捨惡』『親善』是愧，『持戒』『如珠』名慚，慚愧一雙。

若人無瞋。質直柔軟。常愍一切。恭敬諸佛。如是之人。乃可爲說。復有佛子。於大眾中。以清淨心。種種因緣。譬喻言辭。說法無礙。如是之人。乃可爲說。

『質直』『敬佛』是自行，『譬喻』『說法』是化他，自他一雙。

若有比丘。爲一切智。四方法。合掌頂受。但樂受持。大乘經典。乃至不受。餘經一偈。如是之人。乃可爲說。如人至心。求佛舍利。如是求經。得已頂受。其人不復。志求餘經。亦未曾念。外道典籍。如是之人。乃可爲說。

『四方求法』是始，『合掌頂受』是終，始終一雙。『乃至不受餘經一偈』：秉開權顯實相，則一外無餘。華嚴云：『受一非餘，是名魔業。』乃指滯隨情之說，不務隨智等說。

二、總結可說，可說之對象甚多，略舉五雙十相以示流通耳。

告舍利弗。我說是相。求佛道者。窮劫不盡。如是等人。則能信解。汝當爲說。妙法華經。

譬喻品竟。

信解品第四

正法華名信樂品，但樂不及解，信解此經入初住見道圓位，如文云：世尊往昔說法既久，我時在座，身體疲懈，但念空無相無作，於菩薩法不生一念好樂之心。初聞法說上根已悟，中根未解，動執生疑，廣開五佛，朦朧未曉，今聞譬喻歡喜（世界）踴躍，信發（為人）解生，疑去（對治）理明（第一義），文云：我等今日真是聲聞，以佛道聲令一切聞，名信解品。以根有利鈍，惑有厚薄，說有法譬，悟有先後，秉小教革凡成聖，從聞生解，十五心見道，名信行，歷法觀察，十六心見道，名法行。信行轉入修道名信解。斷欲思一至五品，論家家，為二果向，法行轉入修道，名見得，斷欲六品思，名二果，初果為見道，二至三果名修道，四果名無學道。準小望大，亦應如此，中根之人，聞說譬喻，初破疑惑，入大乘見道（別教初地），故名為信，進入大乘修道（別教二至六地），故名為解，從別教七地去名無學道。

火宅窮子皆以父子為喻，譬喻品以大富長者喻如來，誘引等賜大車，信解品以誘稚貧兒喻弟子，住立門側，無心希求，身子自責不甘為小，聞可作佛，當下擔荷，四子疲懈，至今，始得父子投機，師資合道。總之，內密外現，助揚法化，故次第敷陳。

本迹者，四大弟子（須菩提、摩訶迦旃延、摩訶迦葉、摩訶目犍連）久入大乘，成就佛法，迹引中根示初信解。觀心者，了達心外無法名信，能於現前一念介爾之心見一切法名解。

二、譬說周中第二明中根領解（近領火宅、遠領方便、法譬雙領）分二：初經家敘喜，二白佛自陳。今初。

爾時慧命須菩提。摩訶迦旃延。摩訶迦葉。摩訶目犍連。從佛所聞未曾有法。世尊授舍利弗阿耨多羅三藐三菩提記。發希有心。歡喜踴躍。卽從座起。整衣服。偏袒右肩。右膝著地。一心合掌。曲躬恭敬。瞻仰尊嚴。

『須菩提』：翻善吉，解空第一，以空慧爲命，曰『慧命』。『迦旃延』：翻文飾，論義第一。『迦葉』：翻飲光，頭陀第一。『目連』：翻采菽氏，神通第一，故皆以摩訶稱。『從座起』：表捨小向大。『整衣服』：表聲聞智斷卽菩薩法忍。『偏袒右肩』：右肩譬權被覆，已開權，如偏袒。『右膝著地』：地譬實地，開權顯實如著地。『合掌』：表權實不二。『曲躬恭敬』：譬以我之權趣佛之實。『發希有心』：心領解。『卽從座起』：身領解。『而白佛言』：口領解，亦如身子三業翹誠。

二、白佛自陳，分二：初長文及七十三偈半正陳得解，次十三偈歎佛恩深。初又二：初長行，二重頌。長行又二：初就法略領解，二約譬廣領解。初又二：初正法說，二略舉譬。初又二：初明昔稟三故不求，二明今會一故自得。初又二：初標，標有三——一居僧首，二俗年邁，三證得故。二釋，今初。

而白佛言。我等居僧之首。年並朽邁。自謂已得涅槃。無所堪任。不復進求阿耨多羅三藐三菩提。

『居僧之首』：法臘旣高，晚學以我等爲軌，倘忽改途易轍，棄小求大，恐爲後人所嫌，自顧護彼，所以不求，此一失也。『年並朽邁』：若作菩薩，當任大道，廣度衆生，今旣老朽，無所堪任，所以不求，此二失也。『已得涅槃』：我生已盡（苦諦智）不受後有（集諦智）梵行已立（道諦智）所作已辦（滅諦智），故自斥高原陸地不生蓮，焦芽敗種，此三失也。

二、釋

世尊往昔說法旣久。我時在座。身體疲懈。但念空無相無作。於菩薩法。遊戲神通。淨佛國土。成就衆生。心不喜樂。所以者何。世尊令我等出於三界。得涅槃證。又今我等年已朽邁。於佛教化菩薩阿耨多羅三藐三菩提。不生一念好樂之心。

『在座』：釋佛於方等般若時爲菩薩說法，雖居僧首，不復志求佛道。『得涅槃證』：釋於阿含會上已得涅槃寂滅樂，已超三界生死苦，爲自受用。『年已朽邁』：釋於內滅爲足，正如敗根之士，故曰朽邁。文不次第，釋上

三不求。『空無相無作』：三解脫門。『遊戲神通』：如淨名請飯香積，借座燈王之類。『淨佛國土』：化衆生是菩薩淨佛土，初明昔稟二故不求。

二、明今會一故自得。

我等今於佛前。聞授聲聞阿耨多羅三藐三菩提記。心甚歡喜。得未曾有。不謂於今忽然得聞希有之法。深自慶幸。獲大善利。

本節文明得解之由，遠聞五佛章，略說廣說開三顯實，是故『慶幸』。

近聞總（長者、舍宅、一門、五百人、火起、三十子）別（長者見火、捨几用車、等賜大車、無虛妄）立誓，『獲大善利』。獨舉授聲聞記者，授記必由開顯故也。

二、略舉譬。

無量珍寶。不求自得。

昔般若領教，謂爲菩薩，豈圖今日全蒙等賜。初就法略領解竟。

二、約譬廣領解，分二：初立譬，二法合。初又二：初咨發，二正立譬。今初。

世尊。我等今者。樂說譬喻以明斯義。

二、正立譬，分四：初父子相失譬。二父子相見譬。三追誘譬。由領付家業譬。初父子相失譬領上總譬及方便品中略頌，又爲四：初子背父去。二父求子中止。三子遇到父城。四其父憂念。初又二：初背父而去，二向本而還。今初。

譬若有人。年旣幼稚。捨父逃逝。久住他國。或二十。至五十歲。

『有人』：二乘自譬。『年幼稚』：譬善根微弱。『父』：譬如來應身，於二萬億佛所教化，已成父子。『捨父逃逝』：衆生不感，應身息化，退大心名捨父，無明自覆名逃，趣向生死名逝。『久住他國』：譬輪迴三界五欲。『或二十至五十歲』：天道譬十，人道譬二十，具歷五道譬五十歲。

觀心釋者，本覺如父，始覺種子名子，種子力微爲幼稚，背覺合塵，爲

捨父逃逝，心性爲本國，心外取法爲他國，迷戀五欲卽五十歲。

二、向本而還。

年既長大。加復窮困。馳騁（音逞）四方。以求衣食。漸漸遊行。遇向本國。

『年既長大』：譬大乘善根習業熏發。『加復窮困』：譬退大既久，殘福漸盡故窮，爲八苦所煎故困。『馳騁四方』：譬徧歷身受心法，徧推有無亦非四雙。『以求衣食』：譬求正道食，助道衣。『漸漸遊行遇向本國』：譬厭苦向道希求解脫，涅槃法界爲佛本國，生死五欲是他國。初子背父去竟。

二、父求子中止。

其父先來求子不得。中止一城。其家大富。財寶無量。金銀琉璃。珊瑚琥珀。玻璃珠等。其諸倉庫。悉皆盈溢。多有僮僕。臣佐吏民。象馬車乘牛羊無數。出入息利。乃徧他國。商估賈客。亦甚衆多。

（上言捨父遊行故『遇向本國』，此言父求子不得，故『中止一城』。）

『求子不得』：四大弟子自譬退大以後背覺合塵，佛陀求機不會。『其父先來中止一城』：譬佛不以一處無機而廢餘方施化，故曰先來，或云衣裡明珠爲先來，城指有餘涅槃，譬方便有餘土，雙垂兩相，在同居實報之間，止於權理，故曰中止。『其家大富』：譬勝劣卽尊特，權理卽實相，具萬德故富。『財寶無量』：施戒忍進禪爲財，智慧爲寶，導一切法皆摩訶衍，故曰無量。『金銀琉璃珊瑚琥珀玻璃等』：七寶譬圓乘三十七道品。『倉庫悉皆盈溢』：盛米爲倉譬達禪能生百八三昧，盛物名庫譬實相能發無量義，自資爲盈，外化名溢。『僮僕』：譬方便知見波羅密，又藏通二乘，通菩薩，別三十心，悉如僮僕。『臣佐吏民』：圓十地輔佛行化如臣，十向事理稍深如佐，十行修習諸法如吏，十住初入佛境如民。『象馬車乘牛羊無數』：一心三觀如象，次第三觀如馬，體空觀如牛，析空觀如羊，權實諸法皆名乘，

故曰無數。『出入息利』：二而不二爲人，不二而二爲出，眞諦爲人，俗諦爲出，自利爲人爲息，化他爲出爲利。『乃徧他國』：寂光徧攝餘三土。

『商估賈客亦甚衆多』：譬諸菩薩徧入三土求法，他方大士來此土聞經，來往受益。又如勝劣二應徧入三土益衆而歸法身。

三、子遇到父城。

時貧窮子。遊諸聚落。經歷國邑。遂到其父所止之城。

『聚落』：譬五陰。『國』：譬十八界。『邑』：譬十二入。『城』：譬涅槃。歷苦境，起厭離，觀陰界人爲機，感佛大悲，名『到其父所止之城』。

四、其父憂念。

父每念子。與子離別五十餘年。而未曾向人說如此事。但自思惟。心懷悔恨。自念老朽。多有財物。金銀珍寶。倉庫盈溢。無有子息。一旦終沒。財物散失。無所委付。是以殷勤每憶其子。復作是念。我若得子委付財物。坦然快樂。無復憂慮。

『五十餘年』：由彼昔日一念心動，五陰俱生，具五十惡，淪於五道，眞妄相隔五十二位。『未曾向人說如此事』：釋尊應世以來，自華嚴方等般若諸座，未曾向諸大士說聲聞本是佛子。『心懷悔恨』：悔昔不勤教導，致令逃逝親他，譬如來悔不殷勤令人內凡（圓十信）遂使退失本解，恨其不能精進固志，疏我正法，親他六塵。『自念老朽』：化期將畢，大法未傳。『無有子息』：因法身大士迹雖弟子，本或師表，此指從應化佛發心入道之凡夫，繼如來家業績佛種不斷爲子。『得子』：有可度機。『付財』：授記。『快樂』：稱本心。初父子相失領上總譬竟。

二、父子相見譬，文爲二：初子見父，二父見子。今初。

世尊。爾時窮子傭賃展轉。遇到父舍。住立門側。遙見其父踞師子床。寶几承足。諸婆羅門。剎利居士。皆恭敬圍繞。以眞珠瓔

瑠。價直千萬莊嚴其身。吏民僮僕。手執白拂侍立左右。覆以寶帳。垂諸華旛。香水灑地。散衆名華。羅列寶物。出內取予。有如是等種種嚴飾。威德特尊。窮子見父。有大力勢。卽懷恐怖。悔來至此。竊作是念。此或是王。或是王等。非我傭力得物之處。不如往至貧里肆力有地。衣食易得。若久住此。或見逼迫強使我作。作是念已。疾走而去。

此節文有四意。『傭賃』：見父之由。『住立門側』：見父之處。『踞師子床。……威德特尊。』：見父之相。『見父有大勢力。……疾走而去。』：見父畏避。

『傭賃展轉。遇到父舍。』：厭下欣上，遂成出世善機，蘊小善冥入大乘圓門。父舍卽無緣慈悲，大小二機雙扣此舍。『住立門側遙見其父』：二觀爲方便，如門二邊，二乘偏眞慧眼傍窺法身，大機初發曰遙見，容有小機曰住立門側，若圓機則當門正見，父譬道後法身。法華文句三曰：十地爲道前，妙覺爲道中，證後無道後。又釋籤以地前爲道前，初證以後究竟以前并名道中，自行證後爲道後。『踞師子床』：佛爲人中師子，坐名師子座，說爲師子吼，圓報法身（部雖兼別，仍以圓釋。）安處第一義空法性之座，無復通別二惑八魔四無所畏。『寶几承足』：一几承二足，實諦爲几，定慧爲足，無生定慧依眞如境，托境成觀果體起用，卽定慧力莊嚴法身。『婆羅門』：名淨行，貴族高潔，譬華嚴會中等覺離垢菩薩。『刹利』：卽王種，譬華嚴會中初地至九地菩薩。『居士』：富而未貴，譬華嚴會中三賢菩薩。『眞珠瓔珞』：譬究竟戒，楞嚴定，一切種慧，法音陀羅尼。『價直千萬』：譬四十地功德以嚴法身。『吏民僮僕』：前以吏民譬圓教聖位，僮僕譬別教賢位，今云侍立，則與僮僕共列，祇一吏民，義當兩屬，分異同二門明義，約異門施權，卽以民譬稟方便教斷通惑（見思）吏譬稟別教三賢斷通惑，均就權攝，因別地圓住斷別惑，卽非驅使人矣，約同門開顯，還譬方便波羅密，內與實智同，外與機緣同，譬吏民有內奉外役之義。『手執白拂侍立左右』：白拂譬權智，右譬入空智拂四住塵，左譬入假智拂無知塵，此二爲入中道方

便，故言『侍立』。『覆以寶帳』：真實慈悲。『垂諸華旛』：華譬四攝，旛譬神通。『香水灑地』：譬法水灑諸菩薩心地。『散衆名華』：譬七淨華（三聚淨戒、首楞大定、實慧、斷二諦疑、行於非道達於佛道、智德圓滿、斷德成就）。『羅列寶物』：譬羅列諸地真實功德。『出內取與』：從體起用曰出與，攝用歸體曰取內，收放自如。『威德特尊』：舍那報身有無量色，色有無量相，相有無量好。『大力勢』：智大名大力，神通大名大勢。『恐怖』：小機劣弱怯懼大道。『悔來至此』：法大機小，差機不稱，且有退大之意。『竊作是念』：機中潛密冥有此意，非是顯對見勝應身。『此或是王或是王等』：小機灰斷，以化城爲家，丈六爲主，遙見勝應，便疑佛爲波旬王，徒輩爲等，如身子云：『將非魔作佛嬈亂我心耶。』又法身爲王，報身與法相爲王等。『非我傭力得物之處』：大乘法報，非是小乘受化之處。『貧里』：譬但空之理不具萬德。『肆力有地』：偏空稱於小智。『衣食易得』：得世間禪味，有餘涅槃，無漏衣食，解名食，行名衣。『若久住此』：行大乘須經無量劫。『或見逼迫強使我作』：我本厭怖生死，若修大乘必入生死，廣學萬行，實非本願。『疾走而去』：前是背本覺趣五道曰逃逝，此是畏大乘戀偏空，捨大取小。

二、父見子。

時富長者於師子座見子便識。心大歡喜。卽作是念。我財物庫藏。今有所付。我常思念此子。無由見之。而忽自來。甚適我願。我雖年朽。猶故貪惜。

此節文亦有四意。『師子座』：見子之處。『見子便識』：知是往昔結緣衆生。『心大歡喜』：念佛章云：『十方如來憐念衆生，如母憶子，子若憶母，如母憶時。』佛恒伺子機，今機來稱大慈心，故歡喜。『甚適我願』：庫藏有所付也。『我雖年朽猶故貪惜』：述適願之由，一期化訖曰年朽，未見大機，法無委付，衆生從雖得脫曰貪惜。今機自來，無此憂念，故願得適。二父子相見譬竟。

三、追誘譬。文爲二：初遣旁人追，二遣二人誘。今初。

卽遣旁人急追將還。爾時使者疾走往捉。窮子驚愕。稱怨大喚。我不相犯。何爲見捉。使者執之愈急。強牽將還。於時窮子。自念無罪而被囚執。此必定死。轉更惶怖。悶絕躡地。

此雙領勸誡兩門皆無機。『旁人』：智是能遣，教是所遣，卽從佛出十部經。約臣佐爲旁人，如華嚴中令四法身菩薩說大乘（法慧說十住，功德林說十行，金剛幢說十向，金剛藏說十地。）『急追將還』：用頓教法勸門擬機。『疾走往捉』：大乘明義顯露正直，用此赴機，疾趣菩提。『窮子驚愕稱怨大喚』：此指勸門無機，小乘以煩惱爲怨，生死爲苦，今聞生死卽涅槃，煩惱卽菩提等大教乖心。『使者執之愈急。強牽將還。』：譬大乘誡門擬宜，爲說怖畏之事。『窮子自念無罪』：譬誡門無機，罪譬慈悲。『此必定死』：無大方便人生死，必失三乘慧命。『悶絕』：小智不解大教。『躡地』：溺無明地。

父遙見之。而語使言。不須此人。勿強將來。以冷水灑面。令得醒悟。莫復與語。所以者何。父知其子。志意下劣。自知豪貴。爲子所難。審知是子。而以方便。不語他人云是我子。使者語之。我今放汝。隨意所趨。窮子歡喜。得未曾有。從地而起。往至貧里以求衣食。

此節文爲放捨勸誡，息大乘化，文有四意。『父遙見之。……莫復與語。』：一思惟息化。『所以者何……不語他人云是我子。』：二釋息化之意。『使者語之我今放汝隨意所趨。』：三正明息化。『窮子歡喜……以求衣食。』：四息化稱機。

『父遙見之』：小去大遠爲遙，是結緣子故見。『而語使言』：若約教爲使，則智本說教，智知無機，智息故教息，若約人爲使，語諸菩薩取機之法須同類身，勿現尊特令二乘見。又淨名中，往取香飯，彼佛誡曰：『攝汝身香，無令彼諸衆生而起惑著。普賢身量音聲色像均無邊，入此娑婆促身令

小，化乘白象。『勿強將來』：既無大機，恐傷其善根。『以冷水灑面令得醒悟』：知有小智，宜以灰斷理水，除見思熱，灑向涅槃面（厭生死如背）得離煩悶，悟四真諦。『莫復與語』：決定息大乘教。『志意下劣』：厭苦欣空。『爲子所難』：悲智未發。『審知是子』：於二萬億佛所曾發道心實是佛子，非都無大機。『不語他人』：從阿含至般若，隨他意語，方便覆護未說聲聞作佛。『我今放汝隨意所趣』：大機弱故放，小善強故隨趣。『窮子歡喜』：不爲大教所逼。『從地而起』：前臥無明地，今逗小法，先治界內，故云起。『往至貧里以求衣食』：境攝法狹爲貧里，趣小果仍須正助行故云衣食。初遣旁人追覓。

二、遣二人謗，爲二：初齊教領，二取意領。初又四：初領用方便擬宜三車，二領知子先心，三領歎三車，四領適其所願爭出火宅。今初。

爾時長者將欲誘引其子。而設方便。密遣二人。形色憔悴無威德者。汝可詣彼徐語窮子。此有作處。倍與汝直。窮子若許。將來使作。若言欲何所作。便可語之雇汝除糞。我等二人。亦共汝作。

『將欲誘引其子而設方便』：既息大化，不容孤棄，囑菩薩隱實現權，卽鹿苑時。『密遣二人』：二人，約法爲諦緣，約人爲二乘，約理爲有作真俗。密遣者，約人，內密菩薩行，外現是聲聞，約教，隱滿明半，約理，隱實用偏。『形色憔悴』：二乘但說苦無常不淨，不修相好。『無威德者』：形如槁木，心如死灰，所謂枯木倚寒岩，三冬無暖氣，不具十力四無所畏。『汝可詣彼』：以小教擬小機。『徐語窮子』：小教明理迂隱，故云徐語，大教研理直實，故云疾走。『此有作處』：見修兩道是斷惑作處。『倍與汝直』：戒善諦緣相對爲一倍，漏無漏相對爲二倍。『窮子若許』：有機卽設教曰許。『雇汝除糞』：二乘唯除惑取證（見思如糞穢汙心田），不論淨佛國土成就衆生。『我等二人亦共汝作』：二乘鈍根，憑教修行，智諦相資，以同事攝導也。

二、領知子先心，三領歎三車。

時二使人即求窮子。既已得之。具陳上事。

『得之』：審知有機，即領知子先心。『具陳上事』：雇使共除苦集糞，與道滅直，即領歎三車。

四、領適願爭出火宅。

爾時窮子先取其價。尋與除糞。其父見子。愍而怪之。

『先取其價』：二乘慕果行因，慕滅方肯修道。『愍而怪之』：愍其取羅漢，怪不求佛道。所失者大，所得者寡。初齊教領竟。

二、取意領，文爲四：初領權智久欲擬宜，二領久知小法是其玩好，三領久知須歎三車，四領久知適願受行。今初。

又以他日於窗牖中。遙見子身。

『又』：鄭重辭，將欲取意領法身之地，久知大小之機，一三施化，重述佛意。『他』：指法身，二乘以小望大爲他。『日』：時也，智也，依法身之時，用智照機，故曰『他日』，前齊教領，領化身，故二乘稱自。今取意領，領法身，故二乘稱他日，又就法身說，自行權實爲己，化他權實爲他。『窗牖』：在屋曰窗，在牆曰牖，譬用權智觀逗教，非當門之實智，以偏狹小機不宜大化，故息大而施小，由子隔窗牖庸外，非長者有偏觀之非。『遙』：小去大遠。『見』：擬欲以大接之。『子』：昔曾結緣種大。

二、領久知小法是其玩好。

羸瘦憔悴。糞土塵坌。污穢不淨。

『羸』：音羸，瘦弱也，喻修因智少。『瘦』：喻修因福少。『樵』：喻內怖無常。『悴』：喻外遭八苦。『糞』：喻四住煩惱。『坌』：音盆，聚集也，喻無知煩惱。

三、領久知須歎三車。

卽脫瓔珞細軟上服嚴飾之具。更著麤弊垢膩之衣。塵土分身。右手執持除糞之器。狀有所畏。

『卽脫』：譬隱報身無量功德。『瓔珞』：譬四十二地戒定慧陀羅尼等。『細軟上服』：譬寂滅忍。『嚴飾之具』：譬大小相海，蓋二乘智慧，若見圓滿報身，心必驚畏，故爲子隱尊特。『麤弊垢膩之衣』：譬顯劣應，現丈六老比丘相名粗。生忍（忍有情惱）法忍（忍無情惱）名弊。『塵土分身』：大論云：『有九惱（梵志女孫陀利謗、旃遮婆羅門女繫木盂作腹謗、提婆達多推山壓佛傷指、逆木刺腳、毘樓璃王興兵殺釋種佛時頭痛、受阿耆達多婆羅門請而食馬麥、冷風動故脊痛、六年苦行、入婆羅門聚落乞食不得空鉢而來）。』『右手』：左手喻實，右手譬權。『除糞之器』：譬二十四心除見思法門。『狀有所畏』：示同生死或示金鏘馬麥等報。

四、頌久知適願受行。

語諸作人。汝等動作。勿得懈怠。以方便故。得近其子。後復告言。咄。男子。汝常此作。勿復餘去。當加汝價。諸有所須盆器米麵鹽醋之屬。莫自疑難。亦有老敝使人。須者相給。好自安意。我如汝父。勿復憂慮。所以者何。我年老大。而汝少壯。汝常作時。無有欺怠瞋恨怨言。都不見汝有此諸惡。如餘作人。自今已後。如所生子。卽時長者更與作字。名之爲兒。爾時窮子雖欣此遇。猶故自謂客作賤人。由是之故。於二十年中常令除糞。

本節文譬說三藏教七科道品法門，以顯除糞之相。

『語諸作人』：譬說四念處修慧之法，觀身不淨等破四倒，是除糞之器，斷結之境，外凡位。『汝等動作勿得懈怠』：譬四正勤，修精進滅惡生善。

『咄。男子。』：咄，責聲，正勤是慧如男，如意足是定如女。『汝常此作。勿復餘去。』：譬四如意足修定。念處正勤。動斷專一曰常，不紛動曰：

『勿復餘去』。『當加汝價』：譬如意觀中能發無漏。『諸有所須』：譬漏

無漏善，正助之道，皆從如意觀求，欲須卽得。『盆器』：譬四禪體含支林功德（初禪五支，覺觀喜樂一心。二禪四支，內淨喜樂一心。三禪五支，捨念智樂一心。四禪四支，不苦不樂捨念清淨一心。）。『米』：譬生空智粗。『麵』：譬法空智細，此屬正道。『鹽』：譬十六行觀中之無常。『醋』：譬苦，此屬助道，如米麵難食，須鹽醋佐之。『亦有老敝使人』：譬如意觀能發神通以代手足如使，但神通劣弱如老敝。『須者相給』：譬如意觀中亦有九想八背等助道，助於正道卽成俱解脫人。『好自安意』：譬信進念定慧五根安固難壞。『我如汝父』：三藏果頭非眞佛，故云如父，譬世第一位，內凡相似解發，鄰初果見眞。『勿復憂慮』：譬令其安意破壞見思。『我年老大』：譬佛居道終，已具智斷。『而汝少壯』：譬汝居道始，未有智斷。『無有欺怠』：得信力故無欺，精進力故無怠。『瞋恨怨言』：念力不瞋，定力不恨，慧力不怨。『餘作人』：遠指外道諸見求理，近指四念處等四位未免五過（無信、進、念、定、慧，五根力）。『自今以後如所生子』：下忍通觀上下八諦三十二行，中忍減緣行（七周減緣，二十四周減行。），唯留一行，并所緣苦境入上忍，一行二剎那，前一剎那盡，入世第一，一行一剎那引入見道，名此位爲如所生子。『卽時長者更與作字名之爲兒。』：世第一法與眞不遠，曰卽時，譬定慧調之七覺支，遠離偏邪安隱中行之八正道，無間證眞入見道，名之爲兒，從此轉凡成聖，曰更與作字，阿含說五種佛子，謂四果及辟支佛，菩薩不斷結，子義未成。『雖欣此遇猶故自作賤人』：譬修道位七覺八正入見道，雖爲子，思惟未盡，猶居學位，不知堪任紹大，故曰『猶故』，若得初果，厭小樂大，大乘機發，卽不須進斷其餘殘結。『二十年中常令除糞』：但稟前權教修行盡苦，見諦道一無礙一解脫斷見，思惟道九無礙九解脫斷思，名二十年。

正立譬文，初父子相失譬，二父子相見譬，三追誘譬竟。

四、領付家業譬分二：初領家業（指方等般若），二付家業（在法華）。初又二：初相體信，二命領業。今初。

過是已後。心相體信。入出無難。然其所止。猶在本處。

華嚴無機不受，迷悶躡地。鹿苑取價除糞，革凡成聖。方等淨名褒貶，斷結堪折。般若轉教被加，仍居草庵。法華會三歸一，付財與記。『過是已後』：譬過傭作取價後，方等彈訶時也。『心相體信』：二乘自謂得涅槃價既不虛，今為菩薩說大乘法亦必不虛，是子信父，佛知二乘見思已斷，聞大不謗，聞罵不瞋，是父信子。『入出無難』：見尊特聞大乘名人，復見丈六說小乘法名出。『然其所止猶在本處』：大小出入雖無疑難，猶謂大乘是菩薩事，非已智分，不肯迴心向大，仍居羅漢，不言未來當得作佛。

二、命領業，分二：初命知家事，二受命領知。今初。

世尊。爾時長者有疾。自知將死不久。語窮子言。我今多有金銀珍寶。倉庫盈溢。其中多少所應取與。汝悉知之。我心如是。當體此意。所以者何。今我與汝。便為不異。宜加用心無令漏失。

本節文正譬般若轉教時。『將死不久』：有機則應為生，機盡應謝為死，大品佛命轉教般若，熟酥之教化機將畢，應謝非久。『金銀珍寶』：金譬別教中理，銀譬通教真理（大品雖帶通別說圓，二乘僅成通別理。），理雖非多，約門故言多有，一切法門皆是珍寶。『倉庫盈溢』：倉是定門，庫是慧門，定慧包藏一切禪定智慧內盈外溢。『其中多少』：般若廣略二門。『所應取與』：自行為取，化他為與。『汝悉知之』：大品中云：『汝當為菩薩說。』『我心如是』：佛以般若為心。『當體此意』：二乘解析法空，誠令同我體法空。『今我與汝便為不異』：一被加令說，二諸法皆如，三始定父子天性，我有即汝有，故眾生與佛不異。『宜加用心無令漏失』：約教，為菩薩說不可漏失，約理，此即汝法，後時當用不可漏失。

二、受命領知。

爾時窮子即受教敕。領知眾物。金銀珍寶及諸庫藏。而無希取一餐之意。然其所止故在本處。下劣之心亦未能捨。

『無希取』：須菩提雖說般若，自謂我無其分，二乘至般若，密得別益，若肯希取，即是顯得。『所立故在本處』：住羅漢位。雖慕大，並未言作菩

薩。『下劣之心亦未能捨』：雖恥小，並未捨於小證。

二、付家業譬，分二：初正付家業，二得付欣喜。今初。

復經少時。父知子意漸以通泰。成就大志。自鄙先心。臨欲終時。而命其子。并會親族。國王大臣。刹利居士。皆悉已集。即自宣言。諸君當知。此是我子。我之所生。於某城中捨我逃走。踰嶺辛苦五十餘年。其本字某。我名某甲。昔在本城懷憂推覓。忽於此間遇會得之。此實我子。我實其父。今我所有一切財物。皆是子有。先所出內。是子所知。

『復經少時』：譬般若後正說無量義經之時。『漸以通泰』：既聞從一出多，必收多歸一，此乃彈呵淘汰之功。『成就大志』：大乘機發。『自鄙先心』：鄙棄先心，欲求大道，發言三請。『臨欲終時』：下文云如來不久將入涅槃，正指法華時。『命其子』：二萬億佛所受化之人，大機既熟，十方雲集。『親族』：十方法身菩薩觀音、勢至、文殊、普賢影響衆。『并會國王』：一切漸頓諸經，部部不同名國，當機益物皆言第一，即各稱王，今經會通諸經，故名並會國王。『大臣』：譬等覺菩薩。『刹利』：譬十地菩薩。『居士』：譬三十心菩薩，此等皆從釋迦受化。『諸君當知』：結會父子。『此是我子』：實從我學。『我之所生』：從我得解。『於某城中』：泛指二萬億佛所教化，或指大通智勝因緣。『捨我逃走』：背大乘法遁入生死。『五十餘年』：備經六趣。『其本字某。我名某甲。』：如身子本聲聞名，佛為授記號華光。或指妄因無體，真如離名曰某。『昔在本城懷憂推覓』：法身寂光地中為本城，常以二智觀覓可化之機。『忽於此間遇會得之』：始於靈山感應道交。『此實我子。我實其父。』：我實曾於二萬億佛所，嘗教大法。『今我所有一切財物皆是子有』：正付與家業，一切財物即一切大乘萬行（因）萬德（果）。『先所出內是子所知』：追指大品廣略般若，共不共法，先已領知，今但付與，故法華但論開示悟入佛之知見，不復廣說一切行相（諦緣度）。

二、得付歡喜。

世尊。是時窮子聞父此言。卽大歡喜。得未曾有。而作是念。我本無心有所希求。今此寶藏自然而至。

『我本無心有所希求。今此寶藏自然而至。』：三藏中本心不求大，方等中雖恥小自謂絕望，般若中雖領知自謂無分，如此不求而今自得。齊教領，則鈍根當分領解。取意領，則利根跨節入實，所謂置毒乳中味味殺賊。初立譬竟。

二、法合，分四：初合父子相失，二合父子相見，三合追誘，四合領付家業。今初。

世尊。大富長者。則是如來。我等皆似佛子。

如來合父，似則合子，似有二義：一取大機爲子，昔未逃逝，既非眞位，猶居外凡（別信圓五品）故曰似。二取小機爲子，子既逃父，貶之言似，由結緣不壞，雖大小俱似，子義不亡，以似字合相失。

二、合父子相見。

如來常說我等爲子。

三、合追誘，分二：初合旁人追，二合一人誘。今初。

世尊。我等以三苦故。於生死中受諸熱惱。迷惑無知。樂著小法。

『三苦』：欲界苦苦，色界壞苦，無色界行苦。又世界相續卽壞苦，衆生相續卽苦苦，業果相續卽行苦。又三苦由三受生，苦受生苦苦，根境乖違逼迫，樂受生壞苦，因樂變易生惱，不苦不樂生行苦，念念遷謝。『受諸熱惱』：五濁障重。『迷惑無知』：不受勸誡。『樂著小法』：但有小志不堪大化。

二、合一人誘，分二：初合齊教領，二合取意領。今初。

今日世尊。令我等思惟蠲除諸法戲論之糞。我等於中勤加精進。得至涅槃一日之價。既得此已。心大歡喜。自以爲足。便自謂言。於佛法中勤精進故。所得弘多。

『令我等思惟』：是合具陳上事，卽歎三車。『勤加精進』：是合尋與除糞。『得至涅槃』：是合先取其價。

二、合取意領。

然世尊先知我等心著敝欲。樂於小法。便見縱捨。不爲分別。汝等當有如來知見寶藏之分。

『先知』：合他日遙見子身。『心著敝欲』：合羸瘦憔悴。『不爲分別。……寶藏之分。』：合卽脫瓔珞。三合追誘竟。

四、合領付家業，分二：初合領家業，二合付家業。今初。

世尊以方便力。說如來智慧。我等從佛得涅槃一日之價。以爲大得。於此大乘無有志求。我等又因如來智慧。爲諸菩薩開示演說。而自於此無有志願。所以者何。佛知我等心樂小法。以方便力。隨我等說。而我等不知真是佛子。

『以方便力說如來智慧』：帶三乘方便說大乘實相，合心相體信出入無難。『於此大乘無有志求』：合所止猶在本處。『又因如來智慧爲諸菩薩開示演說』：合受命轉教。『而自於此無有志願』：合無希取。『以方便力隨我等說。而我等不知真是佛子。』：佛帶方便以實相法共二乘說，而二乘不識不共之意。

二、合付家業，分二：初合付業。二合歡喜。今初。

今我等方知世尊。於佛智慧無所恡惜。所以者何。我等昔來真是佛子。而但樂小法。若我等有樂大之心。佛則爲我說大乘法。於

此經中。唯說一乘。而昔於菩薩前。毀訾聲聞。樂小法者。然佛實以大乘教化。

『於諸智慧無所恡惜』：明佛本於大無恡。『我等昔來真是佛子。而但樂小法。』：正由樂小不早付大。『於此經中唯說一乘』：知昔三非實。『於菩薩前毀訾聲聞』：欲令捨偽取真。

二、合歡喜。

是故我等說本無心有所希求。今法王大寶。自然而至。如佛子所應得者。皆已得之。

譬說周中第二明中根領解文之二、白佛自陳中、初長行文竟。

二重頌（初七十三偈，正陳得解，次十三偈歎佛深恩。）分二：初頌法說，二頌譬說。今初。

爾時摩訶迦葉欲重宣此義。而說偈言。我等今日。聞佛音教。歡喜踴躍。得未曾有。佛說聲聞。當得作佛。無上寶聚。不求自得。

二、頌譬說，分二：初頌立譬，二頌法合。初又四：初頌父子相失。二頌父子相見，三頌追誘，四頌付家業。初又四：初頌子背父去，二頌求子中止，三超頌其父憂念，四追頌遇到父城。今初。

譬如童子。幼稚無識。捨父逃逝。遠到他土。周流諸國。五十餘年。

『周流諸國』：譬輪迴三界。『五十餘年』：譬六趣。

二、頌求子中止。

其父憂念。四方推求。求之既疲。頓止一城。造立舍宅。五欲自娛。其家巨富。多諸金銀。碑磔碼碯。眞珠瑠璃。象馬牛羊。輦輿車乘。田業僮僕。人民衆多。出入息利。乃徧他國。商估賈人。

無處不有。千萬億衆。圍繞恭敬。常爲王者。之所愛念。羣臣豪族。皆共宗重。以諸緣故。往來者衆。豪富如是。有大力勢。

『四方推求』：觀四生覓可度之機。『頓止一城』：頓乏住有餘國方便淨涅槃。『造立舍宅』：慈悲舍、性空宅。『五欲自娛』：受用勝妙五塵，稱性法樂。『常爲王者之所愛念』：王譬法身及自受用身，今是勝應，故爲王所愛念。『羣臣豪族』：譬法身大士。『往來者衆』：譬諸土菩薩來往聽法。

三、超頌其父憂念。

而年朽邁。益憂念子。夙夜惟念。死時將至。癡子捨我。五十餘年。庫藏諸物。當如之何。

『益憂念子』：無所委付。『夙夜惟念』：夙是晨，夜爲暮，卽大化始末。

四、追頌遇到父城。

爾時窮子。求索衣食。從邑至邑。從國至國。或有所得。或無所得。飢餓羸瘦。體生瘡癬。漸次經歷。到父住城。

『從邑至邑』：根塵相涉如邑。『從國至國』：十八界如國，卽歷處界求正助道。『或有所得』：修有漏善。『或無所得』：修二乘空善。『饑餓羸瘦』：不得大乘法食如饑餓，無大力用爲羸，無大功德爲瘦。『體生瘡癬』：於諦理起見思。初頌父子相失竟。

二、頌父子相見，分二：初頌子見父，二頌父見子。今初。

傭賃展轉。遂至父舍。爾時長者。於其門內。施大寶帳。處師子座。眷屬圍繞。諸人侍衛。或有計算。金銀寶物。出內財產。注記券疏。窮子見父。豪貴尊嚴。謂是國王。若國王等。驚怖自怪。

何故至此。覆自念言。我若久住。或見逼迫。強驅使作。思惟是已。馳走而去。借問貧里。欲往傭作。

初二句見父之由，次十句見父之相。上云見父處是門側，今云長者於門內見者，見相亦兼處也。『或有計算』：華嚴中菩薩行願多明事數。『注記券疏』：以廣顯略為注，如華嚴廣明身相國土行願，以廣佛知見，顯實相體，授決為記（華嚴前文無授記語，入法界品旁論授記。）四弘誓為利他券約，修行如疏隨還，至菩薩償之方畢。『國王若國王等』：法身是王，報應是長者。

二、頌父見子。

長者是時。在師子座。遙見其子。默而識之。

此含不動寂場而遊鹿苑，雙垂兩相二始同時，故曰在座遙見。二頌父子相見竟。

二、頌追誘，分二：初頌旁人追，二頌二人誘。今初。

卽敕使者。追捉將來。窮子驚喚。迷悶躡地。是人執我。必當見殺。何用衣食。使我至此。長者知子。愚癡狹劣。不信我言。不信是父。

二、頌二人誘，分二：初頌雇作（齊教頌），二頌教作（取意頌）。今初。

卽以方便。更遣餘人。眇目矧陋。無威德者。汝可語之。云當相雇。除諸糞穢。倍與汝價。窮子聞之。歡喜隨來。為除糞穢。淨諸房舍。

『眇目』：譬偏空小智。『矧』：豎短，譬未窮實相之源。『陋』：橫狹，譬不具萬善之飾。『無威』：非四無畏。『無德』：非常樂我淨。『淨諸房舍』：淨六根房五陰舍。

二、頌教作。

長者於牖。常見其子。念子愚劣。樂爲鄙事。於是長者。著敝垢衣。執除糞器。往到子所。方便附近。語令勤作。既益汝價。并塗足油。飲食充足。薦席厚煖。如是苦言。汝當勤作。又以軟語。若如吾子。

文有七科法門。『語令勤作』：語字頌四念處，勤作頌四正勤。『既益汝價』：頌四如意足。『塗足油』：油能除風，譬禪定，復能履水譬神通。『飲食』：卽米、麵、鹽、醋。『薦席厚煖』：卽觀練熏修諸禪。『如是苦言汝當勤作』：結前咄男子汝常此作等文。『又以軟語若如吾子』：頌前好自安意等文以下所譬五根，及五力、七覺、八正。三頌追誘竟。

四、頌領付家業，分二：初頌領業，二頌付業。今初。

長者有智。漸令入出。經二十年。執作家事。示其金銀。眞珠玻瓈。諸物出入。皆使令知。猶處門外。止宿草庵。自念貧事。我無此物。

初二句頌心相體信，次六句頌受命領知，後四句頌無希取。『長者有智』：權智。『經二十年』：教菩薩斷界外別惑見思，與前二十年除糞不同。『執作家事』：轉教。『猶處門外』：雖空見思未盡別惑，未入如來門。

二、頌付家業，分二：初正付業，二頌得付歡喜。今初。

父知子心。漸已曠大。欲與財物。卽聚親族。國王大臣。剎利居士。於此大衆。說是我子。捨我他行。經五十歲。自見子來。已二十年。昔於某城。而失是子。周行求索。遂來至此。凡我所有。舍宅人民。悉以付之。恣其所用。

『二十年』：住二乘位轉大乘教，仁王般若云：『二十八年說摩訶般若。』『某城』：譬從眞起妄，非有定處。

二、頌得付歡喜。

子念昔貧。志意下劣。今於父所。大獲珍寶。并及舍宅。一切財物。甚大歡喜。得未曾有。

二、頌法合，分三：初頌合相失相見，二頌合追誘，三頌合領付家業。今初。

佛亦如是。知我樂小。

『知我』：與子相見。『樂小』：與父相失。

二、頌合追誘。

未曾說言。汝等作佛。而說我等。得諸無漏。成就小乘。聲聞弟子。

初二句頌合追，次四句頌合誘。

三、頌合領付家業，分二：初頌合領家業，二頌合付家業。初中二，初頌合授命領知，二頌合心無希取。今初。

佛敕我等。說最上道。修習此者。當得成佛。我承佛教。爲大菩薩。以諸因緣。種種譬喻。若干言辭。說無上道。諸佛子等。從我聞法。日夜思惟。精勤修習。是時諸佛。卽授其記。汝於來世。當得作佛。一切諸佛。秘藏之法。但爲菩薩。演其實事。而不爲我。說斯眞要。

今但頌合委業，未頌合體信。『最上道』：卽摩訶般若。

二、頌合心無希取，分三：初牒譬總明無希取，二釋無希取意，三結無希取。今初。

如彼窮子。得近其父。雖知諸物。心不希取。我等雖說。佛法寶藏。自無志願。亦復如是。

二、釋無希取意。

我等內滅。自謂爲足。唯了此事。更無餘事。我等若聞。淨佛國土。教化衆生。都無欣樂。所以者何。一切諸法。皆悉空寂。無生無滅。無大無小。無漏無爲。如是思惟。不生喜樂。我等長夜。於佛智慧。無貪無著。無復志願。而自於法。謂是究竟。我等長夜。修習空法。得脫三界。苦惱之患。住最後身。有餘涅槃。佛所教化。得道不虛。則爲已得。報佛之恩。

本節文，顯智斷二德，卽具小斷不希大斷，由具小智不欣大智。『內滅』：三界惑體斷盡。

三、結無希取。

我等雖爲。諸佛子等。說菩薩法。以求佛道。而於是法。永無願樂。導師見捨。觀我心故。初不勸進。說有實利。

由我無願樂，故導師見捨，乃由觀我心，非是吝大法也。

二、頌合付家業。分二：初頌合付業，二頌合歡喜。今初。

如富長者。知子志劣。以方便力。柔伏其心。然後乃付。一切財物。佛亦如是。現希有事。知樂小者。以方便力。調伏其心。乃教大智。

先六句牒譬，後六句正合。

二、頌合歡喜。

我等今日。得未曾有。非先所望。而今自得。如彼窮子。得無量寶。世尊我今。得道得果。於無漏法。得清淨眼。我等長夜。持佛淨戒。始於今日。得其果報。法王法中。久修梵行。今得無漏。無上大果。我等今者。真是聲聞。以佛道聲。令一切聞。我等今者。眞阿羅漢。於諸世間。天人魔梵。普於其中。應受供養。

『得道』：實相道。『得果』：分得圓教初住大乘習果。『無漏法』：昔見無漏不落凡夫，今見無漏不落二乘，中道不漏二邊。『清淨眼』：昔慧眼見空，今淨眼見中，分得佛眼，開佛知見，所見理即正因。『淨戒』：爲真實緣因。『梵行』：爲真實了因。『真是聲聞真阿羅漢』：圓初住位。舉應供，攝殺賊無生二義。初長文重頌正陳得解竟。

世尊大恩。以希有事。憐愍教化。利益我等。無量億劫。誰能報者。手足供給。頭頂禮敬。一切供養。皆不能報。若以頂戴。兩肩荷負。於恒沙劫。盡心恭敬。又以美膳。無量寶衣。及諸臥具。種種湯藥。牛頭栴檀。及諸珍寶。以起塔廟。寶衣布地。如斯等事。以用供養。於恒沙劫。亦不能報。諸佛希有。無量無邊。不可思議。大神通力。無漏無爲。諸法之王。能爲下劣。忍於斯事。取相凡夫。隨宜爲說。諸佛於法。得最自在。知諸衆生。種種欲樂。及其志力。隨所堪任。以無量喻。而爲說法。隨諸衆生。宿世善根。又知成熟。未成熟者。種種籌量。分別知己。於一乘道。隨宜說三。

此十三偈歎佛恩深，恩深難報如文。

章安尊者開佛恩有十：卽室三（四宏益物，慈與樂，悲拔苦）衣四（隱實施權，與一日價，恥小慕大，領家業）座三（付家業自行化他）總之，五時誘導，恩量如空，所以難報。『牛頭栴檀』：華嚴云：『出離垢山，若用塗身，火不能燒。』正法念云：『北洲有山，名曰高山，多有牛頭栴檀，以此山峯狀如牛頭，於此峯中生栴檀樹。』『忍於斯事』：卽久默斯要，不務速說。『取相凡夫』：聲聞執小，凡夫取相，取爲煩惱的異名，涅槃經十七曰：『取著名爲凡夫，取蘊處界爲有情自我。』又三惑皆名取相（見思取生死實有相、塵沙取涅槃照真相、無明取二邊不契中相），歷四教有內外凡（圓五品、別十信、通乾慧、藏資糧爲外凡，圓十信、別三賢、通性地、藏

四善根爲內凡。）。智論四十六曰：『著心取相，菩薩修福德，如草生火，易可得滅。』譬說周中第二明中根領解竟。下文爲譬說周四大段中第三、如來述成。譬說周中的信解品，譬子背父去，追誘，領受家業，迦葉、須菩提、目犍連、迦旃延等中根四大弟子領解。釋信解品竟，次釋藥草喻品。

藥草喻品第五

法華七譬（火宅、窮子、藥草、化城、繫珠、頂珠、醫子）各顯權實，藥草則二乘不無，一雨則述其歸大，所謂三草二木一雨所潤。文句云：『土地是能生，雲雨是能潤，草木是所生所潤，所生所潤通皆有用，而藥草用強。』三草是藏教，二木是通別二教，地雨即是圓教。本住智地，曾施雲雨，迹爲草木。

此品是譬說周四大段中第三如來述成段（初正譬開三顯一，二信解品明中根領解，三藥草喻品是如來述成，四授記品是與授決。）其文爲二，初略述成，二廣述成。初又二：初雙述善哉，二領所不及。今初。

爾時世尊。告摩訶迦葉。及諸大弟子。善哉善哉。迦葉善說如來眞實功德。誠如所言。

信解品，中根領解，列須菩提迦旃延摩訶迦葉目犍連，以迦葉居僧首，又自陳之唱，故世尊獨呼迦葉。迦葉前宣八十六行偈，初二行頌法說，後七十一行頌譬說，次十三行歎佛深恩。世尊雙稱善哉，卽述其於方便譬喻、法譬兩處雙領權實也。『善說如來眞實功德』：眞實是述實，功德是述權。

二、領所不及。

如來復有無量無邊阿僧祇功德。汝等若於無量億劫說不能盡。

迦葉偈言，齊教之領，二乘得益，未及進領橫豎周遍，不道人天小草，菩薩上草小樹大樹，十法界僅言二乘，不涉餘八，七方便人從淺至深皆入眞實，止領二乘，餘五方便都未言及，初心後心，未窮極地，故云領所不及，但其述意不出權實，故下文結歎云，汝等能知如來功德。初略述成竟。

二、廣述成，分二：初長行，二偈頌。初又二：初述成開三顯一，二結歎述成，初又三——初法說、二立譬、三法合。初又二：初舉法王不虛勸信，二正述開三顯一。今初。

迦葉當知。如來是諸法之王。若有所說。皆不虛也。

佛爲法王，於法自在，衆惡已盡，發言誠實，法雖無量不出權實，如大雲普覆，大雨普潤，受益既實，能被不虛。

二、正述開三顯一，分二：初約教明開權顯實，二約智明開權顯實。今初。

於一切法。以智方便而演說之。其所說法。皆悉到於一切智地。

非智無以說，非教無以詮，故先述教。『一切法』：卽七方便權說，爲人天說戒善，爲二乘說諦緣，爲三藏說事度，爲通教說無生，爲別教說次第。

『一切智地』：實相非二稱一，其性廣博爲切，寂而常照爲智，從無住本立一切法爲地，此圓教實說也。上文云：唯此一事實（一切智地）餘二則非真（七方便）此約頓漸二教述其開權顯實。

二、約智明開權顯實。

如來觀知一切諸法之所歸趨。亦知一切衆生深心所行。通達無礙。又於諸法究盡明了。示諸衆生一切智慧。

『諸法之所歸趨』：是契權實理，權智識藥，戒善趣人天爲近趣，低頭舉手遠趣佛果，道品趣涅槃，所行是菩薩道，遠趣寶所，當位，名近名權，趣極，名遠名實，近遠歸趣不同，如別教斷十二品惑證妙覺，以我之果爲他（圓二行）之因。『知一切衆生深心所行』：深心病相不同，權智照之是知病，起深重十惡障人天乘，起四倒六蔽四住五住障聖乘。『又於諸法究盡明了』：實智照權，無權不實。

二立譬，分二：初差別譬（譬上權教權智，三草二木纖濃不等），二無差別譬（譬上實教實智，一地一雨普載普潤）。初又六：一土地、二卉木、三密雲、四注雨、五受潤、六增長。今初。

迦葉。譬如三千大千世界山川谿谷土地。

土地，舉能生則無差別，舉所生則有差別。『三千大千世界』：譬衆生世間，衆生無別法，依五陰和合而立其名。『山川谿谷土地』：世界依山川谿谷土地所成，衆生依五陰所成，山川谿谷土地爲草木種子植根所依，山譬

色陰可見，川譬受陰水流盈涸，谿譬想陰屈曲晦明，谷譬行陰幽隱難見，土地譬識陰通爲所依，衆生依五陰而有習因，增長成辦名習果。山川凸凹深淺五相，譬五乘五陰（山高譬菩薩五陰，川譬支佛，谿譬聲聞，土地譬天，谷下譬人。）。習因依五陰，五陰不出法性，草木依山川，山川依世界，互爲依存不相離。

二、卉木譬。

所生卉木叢林。及諸藥草。種類若干。名色各異。

卉是草，從治病得名。木是樹，從覆蔭爲功。草多爲叢，樹多爲林。小草喻人天，中草喻藏教二乘，上草喻藏教菩薩，小樹喻通教菩薩，大樹喻別教菩薩，若言七善，再開通教聲聞緣覺，五乘七方便從修習得名，倘論進趣，功能漸進，故曰『若干』。

三、密雲譬。

密雲彌布。徧覆三千大千世界。

『密雲』：卽三密，覆蔭譬佛慈悲，卽意密，形色譬佛應世，卽身密，雷聲譬佛言教，卽口密。佛陀以慈悲熏應身說法徧十方，曰『彌布』。三千大千世界如常解。

四、注雨譬。

一時等澍。

譬用口密四辯，注法雨潤衆生。

五、受潤譬。

其澤普洽卉木叢林及諸藥草。小根小莖。小枝小葉。中根中莖。中枝中葉。大根大莖。大枝大葉。

信爲根，戒爲莖，定爲枝，慧爲葉。人天信戒定慧，爲小根莖枝葉。二乘信戒定慧，爲中根莖枝葉。菩薩信戒定慧，爲大根莖枝葉。五乘皆藉此四

法次第相資。

六、增長譬。

諸樹大小。隨上中下各有所受。一雲所雨。稱其種性而得生長。華果敷實。

七方便草木，習報兩因（習因增長，以成報因。）既蒙法雨隨分受潤，習報兩果各得增長。『稱其種性』：明施權稱機。『華果敷實』：習報二果。二、無差別譬，分三：初一地所生，二、一雲所雨，三、三草二木稟益。今初。

雖一地所生。

『一地所生』：道前心地所生，道後智地所成。方便品以等覺以前爲道前，此以博地凡夫無戒善者爲道前，五乘爲道中，果後爲道後，無論道前道後，理地是一，均有能生性，假智以成。

二、一雲所雨。

一雨所潤。

如來一音演說法，衆生隨類（五乘）各得解。

三、三草二木稟益不自覺知。

而諸草木。各有差別。

五乘草木，蒙佛法雨，隨分增長，而不自知皆依佛性，同歸佛慧。二立譬竟。

三、法合，分二：初合差別譬（差別譬有六，今合不次第。）。次合無差別譬。初又二，先正合，次提譬帖合。初又六，初合差別譬中第三密雲譬。

迦葉當知。如來亦復如是。出現於世。如大雲起。以大音聲。普徧世界天人阿修羅。如彼大雲。徧覆三千大千國土。

『如來亦復如是出現於世』：正合應身出世。『如大雲起』：舉譬帖合，

明如來現身覆育一切。『以大音聲』：舉佛口密，合雲雷有聲。『天人阿修羅』：別舉三善道，稟口密聲教之益，兼合假名五陰世間。『如彼大雲』：舉譬帖合如雷聲遠震。『徧覆三千大千』：意譬三乘根性皆是佛子，俱蒙口密利益。『普徧世界』 『國土』：兼合世界山川土地。

二、合差別譬中第四注兩譬。分二：初第六章法門，二勸聽受。初又六，一、十號。

於大眾中而唱是言。我是如來。應供。正徧知。明行足。善逝。世間解。無上士。調御丈夫。天人師。佛。世尊。

十號如常釋。

二、四弘。

未度者令度。未解者令解。未安者令安。未涅槃者令得涅槃。

肇曰發僧那（四宏誓）於始心，終大悲以赴難。

三、三達。

今世後世如實知之。

三世等觀，照機周徧。

四、一心三智。

我是一切知者。

五、五眼。

一切見者。

六、三業共智慧行。

知道者。開道者。說道者。

『知道』：意業。『開道』：身業。『說道』：口業。三業與智俱，謂三輪。

二、勸聽受。

汝等天人阿修羅衆。皆應到此。爲聽法故。

三、合差別譬中第一山川譬。

爾時無數千萬億種衆生。來至佛所而聽法。

攬果報而有衆生，如依山川得有世界，『千萬億種衆生』：卽十法界衆生。

四、合差別譬中第三卉木譬。

如來於時。觀是衆生諸根利鈍。精進懈怠。

根有利鈍，行有進怠，正是習因深淺與卉木同。『於時』：觀機時，含頓漸五時。『諸根利鈍』：三途因惡果苦，不能受道名鈍，七方便人聞教得益名利，含四教根性。『精進懈怠』：三途放逸名怠，人天持五戒十善爲精，人天不厭苦爲怠，二乘畏無常名精，二乘滯空不求作佛名怠，菩薩志求佛道名進。

五、合差別譬中第五受潤譬。

隨其所堪而爲說法。種種無量。皆令歡喜。快得善利。

『隨其所堪』：說法稱機，無增減之失，如人授以十善爲增，天授以五戒爲減。

六、合差別譬中第六增長譬。

是諸衆生聞是法已。現世安隱。後生善處。以道受樂。亦得聞法。既聞法已。離諸障礙。於諸法中任力所能。漸得入道。

『現世安隱後生善處』：是報因感報果，合上文『華敷』增長。『亦得聞法乃至入道』：是習因牽習果，合上文『果實』增長。大品中如來放光照諸地獄，明地獄安隱。諸經中說龍鳥鬼神聞法得道，卽現世安隱，後生天上人間，卽後生善處。於天人中修道，卽是以道受樂。『離諸障礙』：卽現世

安隱。『任力所能。漸得入道』：卽後世以道受樂。

次，提譬帖合。

如彼大雲。雨於一切卉木叢林及諸藥草。如其種性。具足蒙潤。各得生長。

『大雲』：帖合第一形聲兩益。『雨於一切』帖合第二第六章法門中如來十號。『卉木叢林』：帖合第四諸根利鈍，精進懈怠。『如其種性具足蒙潤』：帖合第五受潤得善利。『各得生長』：帖合第六現世安隱後生善處。

次，合無差別譬（上開三：一地所生，一雲所雨，三草二木稟益。今合亦三，但不次第。）分二：初正合，二結釋。初又二：初合一地所生，一雨所潤。二合草木各有差別。今初。

如來說法。一相一味。所謂解脫相離相滅相。究竟至於一切種智。

『一相』：衆生之心同一眞如實相，合一地。『一味』：一乘法，同詮一理合一雨。『解脫相』：無生死相。『離相』：無涅槃相。『滅相』：無相亦無，唯一實相。『所謂解脫相、離相、滅相。』：雙釋一相一味，以衆生心性，卽是性德解脫寂滅三相，如來一音說此三法爲境界，緣起中道之行，終極得爲一切種智，故曰『究竟至於一切種智』。一相，卽無住本，無差別如地，權中之實，立一切法，有差別，如地能生桃李，實中之權。一味，卽實教，純一無雜，非兼但對待。

二、合草木各有差別，分三：初正合衆生如草木故不自知，二合唯有如來能知故與大雲同而不同，三舉譬帖合衆生不知。今初。

其有衆生聞如來法。若持讀誦。如說修行。所得功德。不自覺知。

『其有衆生』：總舉不知之人，合三草二木。『如來法』：卽一音一味一相之法。『若持讀誦如說修行』：正明持說不同，修行各異，如人天作戒善解，三乘作諦緣度解。『所得功德不自覺知』：五方便人各作一解，所得是權，不知卽權歸實，名不自覺知。

二、唯有如來能知故與大雲同而不同。

所以者何。唯有如來。知此衆生種相體性。念何事。思何事。修何事。云何念。云何思。云何修。以何法念。以何法思。以何法修。以何法得何法。衆生住於種種之地。唯有如來如實見之。明了無礙。

『種相體性』：此四法差即無差，無差而差，唯佛能知。『種』：就相對論，三道是三德種，故淨名云：『一切煩惱之儔，爲如來種。』就類論，舉手低頭悉是解脫種，一切世智及三乘解心即般若種，凡有心者皆當作佛即法身種。『相』：據外。『體』：主質。『性』：據內，具如十界十如中釋。『念何事、思何事、修何事』即聞思修三慧。用念取於所念之事，即是三慧境。『以何法念、以何法思、以何法修』：即三慧之因緣，三乘取境，因緣有異，圓妙三慧即無差別。『衆生住於種種之地』：指七方便人住於七位。

三、舉譬帖合衆生不知。

如彼卉木叢林諸藥草等。而不自知上中下性。

未開顯前，七方便人皆同草木，但能受潤增長，並不認識自己根性，一經開顯，方知三草二木根莖枝葉華果，無非一地所生，一雨所潤，所謂從此智地，興大悲云，注權實雨，佛陀最後極唱，欲人悟此性修秘要而已。初正合竟。

二、結釋，分二：初結成差即無差。二、釋出不即說意。今初。

如來知是一相一味之法。所謂解脫相。離相。滅相。究竟涅槃常寂滅相。終歸於空。

『解脫相。離相。滅相。』：即是一中無量。『究竟涅槃常寂滅相。終歸於空。』即是無量中一。『究竟涅槃』：擇非二乘有餘、無餘二涅槃。

『常寂滅相』：非以斷縛爲解脫，法本無縛今亦無脫。『離相』：非捨合名離，法本無合，今亦無離。

『滅相』：非生相盡名滅，法本無生，今已無滅，所謂諸法從本來常自寂滅相。『終歸於空』：歸於中道第一義空，非二乘灰斷之空。

二、釋出不卽說意。

佛知是已。觀衆生心欲而將護之。是故不卽爲說一切種智。

佛陀雖知始終皆一，權實不二，爲護衆生心欲，恐其誹謗，故不卽說中道智。

二、結歎述成。

汝等迦葉。甚爲希有。能知如來隨宜說法。能信能受。所以者何。諸佛世尊隨宜說法。難解難知。

前明如來無量功德，汝等若干無量億劫說不能盡，如大雲雨不可思議，四弟子齊教領解，雖未及究竟佛地，而具領五時權實，開佛知見，分證佛果，故歎希有。又前云汝等說不能盡，今云汝等甚爲希有者，前約佛恩普被猶如雲雨靡不覆潤，佛恩普載，猶如大地靡不生成，非爲一方一機，故云說不能盡。今以佛恩雖普，衆生日用不自覺知，如三草二木植於地，稟潤於雨而不能知，但前品一十三偈，迦葉歎佛深恩，具領始終，雖未及佛地，齊教不虛，今佛具述十恩，甚爲希有而述成之。『未度者令度』：述其知佛四弘誓恩，甚爲希有。『衆生現世安隱，後生善處，以道受樂』：述其知大慈與樂恩，甚爲希有。『旣聞法已離諸障礙，於諸法中任力所能，漸得入道』：述其知大悲拔苦恩，甚爲希有。輪王釋梵是小藥草，述其知勸善除熱惱恩，甚爲希有。知無漏法能得涅槃及緣覺證，是中藥草，述其知除諸熱見愛恩，甚爲希有。上草小樹是述其知恥小慕大恩，甚爲希有。大樹是述其知莊嚴恩，甚爲希有。一地一雨述其知付財，身得受記，心獲法財，已證一實空座恩，甚爲希有。『能知如來隨宜說法』：述其能領開三。『能信能受』：述其能領顯一。初長文竟。

二、重頌，分三：初頌法說，二頌立誓，三頌法合。今初。

爾時世尊欲重宣此義。而說偈言。

破有法王。出現世間。隨衆生欲。種種說法。如來尊重。智慧深遠。久默斯要。不務速說。有智若聞。則能信解。無智疑悔。則爲永失。是故迦葉。隨力爲說。以種種緣。令得正見。

『破有法王』：從因感果名有，凡夫以見思爲因，感分段生死果。二乘以塵沙爲因，感方便變易生死果。菩薩以無明爲因，感自性變易果。唯佛五住已亡，二死果喪，得大自在。『出現世間』：爲利衆生，凡權實諸教，皆使受者得益。『隨衆生欲種種說法』：頌權智說權教。『如來尊重智慧深遠久默斯要不務速說』：頌實智說實教。『有智若聞則能信解。無智疑悔則爲永失』：釋不速說之由。『是故迦葉。隨力爲說。以種種緣。令得正見。』：顯先權後實之巧，以種種緣，卽先施權，令得正見，卽後顯實，唯此一實名爲正見，故涅槃迦葉頌解云：『自此以前，我等皆名邪見人也。』『破有法王』：卽對治。『隨衆生欲』：卽世界。『智聞信解疑悔永失』：是爲人。『令得正見』：卽第一義，此頌如來四悉檀意。

二、頌立譬。分二：初頌無差而差，二頌差而無差。初又二：初超頌能潤無差，二追頌能生所生受潤差別。今初。

迦葉當知。譬如大雲。起於世間。徧覆一切。慧雲含潤。電光晃曜。雷聲遠震。令衆悅豫。日光揜（音掩）蔽。地上清涼。鬢鬢垂布。如可承攬。其雨普等。四方俱下。流澍無量。率土充洽。

『雲』：譬應身，應身隨智慧行，故曰『慧雲』。『含潤』：能具十二部法。『電光晃曜』：譬身放大光。『雷聲遠震』：譬口宣四辯。『日光揜蔽』：譬九十五種邪光不現。『地上清涼』：譬九十八種熱惱得除。『鬢鬢垂布。如可承攬。』：譬應身相好取之不可得。『其雨普等，四方俱下』：譬四辯普應羣機。『流澍無量』：譬一一時中咸具五時八教。『率土充洽』：譬凡有心者皆蒙利潤。

二、追頌能生所生受潤差別。

山川險谷。幽邃所生。卉木藥草。大小諸樹。百穀苗稼。甘蔗葡萄。雨之所潤。無不豐足。乾地普洽。藥木並茂。其雲所出。一味之水。草木叢林。隨分受潤。一切諸樹。上中下等。稱其大小。各得生長。根莖枝葉。華果光色。一雨所及。皆得鮮澤。

『山川險谷』：略頌能生。『幽邃』：譬衆生無始習因隱在色心果報內。『百穀』：譬五乘各以善爲本，五爲莊嚴成百。『甘蔗』：質一，譬禪定所緣境一。『葡萄』：形多，譬智慧所破惑多。『乾地普洽』：譬未信者令信。餘如文，初頌無差而差竟。

二、頌差而無差。

如其體相。性分大小。所潤是一。而各滋茂。

初二句頌所生所潤，第三句頌能潤無差，第四句頌差別不自知。二頌立譬竟。

三、頌法合，分二：初頌合無差而差，二頌合差而無差。初又三：初頌合能潤。二頌合能生所生。三頌復合能潤所潤。今初。

佛亦如是。出現於世。譬如大雲。普覆一切。既出於世。爲諸衆生。分別演說。諸法之實。大聖世尊。於諸天人。一切衆中。而宣是言。我爲如來。兩足之尊。出於世間。猶如大雲。充潤一切。枯槁衆生。皆令離苦。得安隱樂。世間之樂。及涅槃樂。諸天人衆。一心善聽。皆應到此。覲無上尊。我爲世尊。無能及者。安隱衆生。故現於世。爲大眾說。甘露淨法。其法一味。解脫涅槃。以一妙音。演暢斯義。常爲大乘。而作因緣。

初一偈頌，合雲譬，上兩句以身合雲，下兩句舉譬帖合。

次『既出於世』等三偈，略頌十號，文略義含。『既出於世』，卽無上

士及佛。『分別演說』：卽正徧知、明行足，『世尊』卽第十號，『天人』卽調御丈夫、天人師，『如來』卽第一號，『出於世間』卽世間解，『大雲』，兼於善逝。

次『充潤一切』等六句略頌四宏，前文六章法門（1.十號、2.四宏、3.三達、4.一心三智、5.五眼、6.三業共智慧行。）但頌二章。『充潤一切。枯槁衆生。』：卽初宏誓。『皆令離苦』：卽第二誓。『得安隱樂』：卽第三誓。『及涅槃樂』：卽第四誓。

次『諸天人衆』等四偈，頌勸聽受，初二偈歎佛。次兩偈，能說人尊，所說法妙，故勸聽受。『其法一味』：七方便無不歸一乘，差而無差也。『常爲大乘而作因緣』：因緣屬方便，卽無差而差。

二、頌合能生所生。

我觀一切。普皆平等。無有彼此。愛憎之心。我無貪著。亦無限礙。恒爲一切。平等說法。如爲一人。衆多亦然。常演說法。曾無他事。去來坐立。終不疲厭。充足世間。如雨普潤。

合上山川譬，山川譬七種五陰衆生，如雨注不擇溪谷。

上文云：『爾時無數千萬億種衆生，來至佛所而聽法。』今頌則明佛觀一切普皆平等，故『平等說法。』『無有彼此愛憎之心』：有機爲此，無機爲彼，植善爲愛，憎逆爲憎。『曾無他事』：佛事爲自，魔事爲他。『去來坐立』：應初爲來，應後爲去，入實爲坐，出權爲立，佛觀衆生如此，卽是等雨山川之意。

三、頌復合能潤所潤。分二：初頌合能潤，二頌合所潤。今初。

貴賤上下。持戒毀戒。威儀具足。及不具足。正見邪見。利根鈍根。等雨法雨。而無懈倦。

此頌上文『如來於時。觀是衆生。諸根利鈍。精進懈怠。隨其所堪。而爲說法。』『貴賤上下』，約位。『持戒毀戒』，約行。『利根鈍根』，約

習。亦須具歷五乘七方便展轉說之。

二、頌合所潤。又二：初頌上文『種種無量，皆令歡喜，快得善利，是諸衆生聞是法已，現是安隱。』合譬。二頌上文『後生善處，以道受樂，亦得聞法，既聞法已，離諸障礙，於諸法中任力所能漸得人道。』合增長敷實譬。今初。

一切衆生。聞我法者。隨力所受。住於諸地。或處人天。轉輪聖王。釋梵諸王。是小藥草。知無漏法。能得涅槃。起六神通。及得三明。獨處山林。常行禪定。得緣覺證。是中藥草。求世尊處。我當作佛。行精進定。是上藥草。又諸佛子。專心佛道。常行慈悲。自知作佛。決定無疑。是名小樹。安住神通。轉不退輪。度無量億。百千衆生。如是菩薩。名爲大樹。佛平等說。如一味雨。隨衆生性。所受不同。如彼草木。所稟各異。佛以此喻。方便開示。種種言辭。演說一法。於佛智慧。如海一滴。

初一偈總明受潤，次七偈別明受潤，後三句結一明能潤。

第二偈『或處人天』等四句，明人天俱未斷惑，合爲小草。

第三、四偈『知無漏法』等八句，明二乘俱有斷證，合爲中草。

第五偈『求世尊處』等四句，明事六度菩薩，志求作佛，化他勝二乘，獨爲上草。

第六偈，『又諸佛子』等六句，明通教已斷通惑，誓伏餘習涉有化他，望下爲優，比上爲劣，故名小樹。

第七偈，『安住神通』等六句，明別教自行化他，福慧高廣，故名大樹。又可義約三教菩薩各作小、中、大三樹，藏教約三僧祇，通教約七、八、九地，別教約三十心。『於佛智慧，如海一滴』：能潤如海，所潤如一滴，且一滴功德，已於無量億劫說不能盡。

二、頌『後生善處乃至漸得人道』合增長敷實譬。

我雨法雨。充滿世間。一味之法。隨力修行。如彼叢林。藥草諸樹。隨其大小。漸增茂好。諸佛之法。常以一味。令諸世間。普得具足。漸次修行。皆得道果。聲聞緣覺。處於山林。住最後身。聞法得果。是名藥草。各得增長。若諸菩薩。智慧堅固。了達三界。求最上乘。是名小樹。而得增長。復有住禪。得神通力。聞諸法空。心大歡喜。放無數光。度諸衆生。是名大樹。而得增長。

初一偈總頌增長，第二偈舉誓帖釋。次六偈半，別明增長。

別明增長中，『諸佛之法』等六句，明人天增長。『聲聞緣覺』等六句，明二乘增長。『住最後身』有二義，一者二乘不值佛，身未必無後，由見佛故，成最後身，卽是增長義，二者二乘已住有餘涅槃，名最後身，得佛五味調熟，得入法華，聞大乘得解，乃是增長義。『若諸菩薩』等六句，明通教增長，體法智堅，了達三界斷惑盡，名小樹。『復有住禪』下二偈，明別教增長，『復有住禪得神通力』，是人假力。『聞諸法空』，是第一義空。初頌合無差而差竟。

二、頌合差而無差（長文廣，今頌略）。

如是迦葉。佛所說法。譬如大雲。以一味雨。潤於人華。各得成實。迦葉當知。以諸因緣。種種譬喻。開示佛道。是我方便。諸佛亦然。今爲汝等。說最實事。諸聲聞衆。皆非滅度。汝等所行。是菩薩道。漸漸修學。悉當成佛。

初六句，舉譬帖合無差而差，差卽無差，『譬如大雲。以一味雨。』卽頌合上一味雨無差別。『潤於人華。各得成實。』指七方便因華頌上差別也。

次『迦葉當知』下三偈半，結成權實不二。『以諸因緣。種種譬喻。』卽實而權，權卽差別，合上所生。『今爲汝等說最實事』，卽是顯實，實卽無差別，合上一地。『非滅度』：未度變易生死。『是菩薩道』，若道若果皆是佛因，因卽是道。

譬說周中，第三如來述成竟。

釋藥草喻品竟，次釋授記品。

授記品第六

梵語和伽羅，此云授記。

授記亦云受記、受決、受蒞。授是與義，受是得義，記是記事，決是決定，蒞是了蒞，依迹門三周說法，以中根之迦葉等四大聲聞，廻小向大聞法譬二周，開三顯一，具足領解，如來述成，雖自知作佛，而時事未審。若蒙佛誠言，授其當果，劫國決定，近遠了蒞，則大歡喜，今從佛授與得名，故名授記品。

約世諦故記，第一義諦則無，故淨名云：『從如生得記，從如滅得記，如無生滅，則知無記。』思益云：『願不聞記名。』大品云『受記是戲論。』

諸佛本為大事因緣出世，令衆生開示悟入佛之知見，今大事已顯，佛已說竟，衆生已入，法應與記，如父遇子，豈不付財。若正因記，如常不輕，若緣因記，如法師品十種供養，若了因記，如授三根人，正因記則廣，緣了記則狹。他經但記菩薩，不記二乘，但記善不記惡，但記男不記女，但記人天不記畜，今經皆記。

楞嚴三昧經有四種授記：未發心記（十住以前信滿種性地），如常不輕品。適發心記（住行以上含習種、性種、道種）。密記（佛以威神力，密作當得作佛之記，令他人聞，不令當人知。）。現前記（於一切法實解，開佛知見，得無生忍，功德智慧具足，佛於大眾前記其成佛名號國土。）。

瓔珞經第九、法華文句七之一，有八種授記：一、已知他不知，發心自誓，未廣及人。二、衆人盡知己不知，發心廣大，得無畏善權。三、己衆俱知，位在七地，無畏善權，得空觀故。（約通教七地得空觀成，若別圓入地住已名無著，或在別教約教道人無功用方無著。）四、己衆俱不知，未入七地，未得空觀之無著行。五、近覺遠不覺，如彌勒（彌勒成佛在近），六、遠覺近不覺，未能演說聖賢之行。七、遠近俱覺，諸根具足，不捨無著之行，遍遊十方世界，顯佛神德。八、近遠俱不覺，未得菩提，不知如來藏之行。

諸經對菩薩多授法身究竟果記，今品祇記應身八相。諸大弟子久已得記，

今迹示初受以引實。觀心者，能觀心性卽空假中，卽爲諸佛授記。

譬說周中，一譬喻品正譬開三顯一，二信解品明中根領解，三藥草喻品如來述成。今第四授記品與受決，分二：初正受中根記，二許爲下根說宿世，初中二，初授大迦葉記，二按三人記，初又二，初長文，二重頌，初長文爲六：初行因、二得果、三劫國名字莊嚴、四壽命、五正像久近、六國淨。今初。

爾時世尊。說是偈已。告諸大衆。唱如是言。我此弟子摩訶迦葉。於未來世。當得奉觀二百萬億諸佛世尊。供養恭敬。尊重讚歎。廣宣諸佛。無量大法。

世尊入滅，迦葉卽白大衆，如來舍利非我等事，我等事者，宜應結集法藏，勿令正法速滅，此廣宣大法之明證，又奉觀如許諸佛方示成佛，此明涅槃路遠，爲暗禪慢心者戒。

二得果。

於最後身得成爲佛。名曰光明如來。應供。正徧知。明行足。善逝。世間解。無上士，調御丈夫。天人師。佛。世尊。

因中以紫金塗佛像，身常紫金光聚，爲羅漢時曰飲光，果號光明如來。十號如常解。佛拈華迦葉通，以正法眼藏菩提妙心付囑迦葉，迦葉將此光展轉流通。

三劫國名。

國各光德。劫名大莊嚴。

四、壽命。

佛壽十二小劫。

五、正像久近。

正法住世。二十小劫。像法亦住。二十小劫。

六、國淨。

國界嚴飾。無諸穢惡瓦礫荊棘。便利不淨。其土平正。無有高下坑坎堆阜。瑠璃爲地。寶樹行列。黃金爲繩。以界道側。散諸寶華。周徧清淨。其國菩薩。無量千億。諸聲聞衆。亦復無數。無有魔事。雖有魔及魔民。皆護佛法。

因中深心護持正法，故感國淨，無魔事，以魔皆不思議菩薩。

三、重頌。分五：初頌行因得果。二頌國淨。三頌佛壽。四頌正像。五總結。今初。

爾時世尊欲重宣此義。而說偈言。

告諸比丘。我以佛眼。見是迦葉。於未來世。過無數劫。當得作佛。而於來世。供養奉覲。三百萬億。諸佛世尊。爲佛智慧。淨修梵行。供養最上。二足尊已。修習一切。無上之慧。於最後身。得成爲佛。

初四偈頌行因，後兩句頌得果。

二、頌國淨。

其土清淨。瑠璃爲地。多諸寶樹。行列道側。金繩界道。見者歡喜。常出好香。散衆名華。種種奇妙。以爲莊嚴。其地平正。無有丘坑。諸菩薩衆。不可稱計。其心調柔。逮大神通。奉持諸佛。大乘經典。諸聲聞衆。無漏後身。法王之子。亦不可計。乃以天眼。不能數知。

三、頌佛壽。

其佛當壽。十二小劫。

四、頌正像。

正法住世。二十小劫。像法亦住。二十小劫。

五、總結（略不頌劫國名），

光明世尊。其事如是。

授大迦葉記竟。

二、按三人記，分二：初請記，三與記，初中四：初正請、三立譬、三法合、四結請。今初。

爾時大目犍連。須菩提。摩訶迦旃延等。皆悉悚慄。一心合掌。瞻仰尊顏。目不暫捨。卽共同聲而說偈言。

大雄猛世尊。諸釋之法王。哀愍我等故。而賜佛音聲。

『悚慄』：改小入大，脫胎換骨的境界。

二、立譬。

若知我深心。見爲授記者。如以甘露灑。除熱得清涼。如從饑國來。忽遇大王膳。心猶懷疑懼。未敢卽便食。若復得王教。然後乃敢食。

三、法合。

我等亦如是。每惟小乘過。不知當云何。得佛無上慧。雖聞佛音聲。言我等作佛。心尚懷憂懼。如未敢便食。若蒙佛授記。爾乃快安樂。

四、結請。

大雄猛世尊。常欲安世間。願賜我等記。如饑需教食。

二、與記。分三：初記須菩提，二記迦旃延，三記目犍連，初中二：初長文，二重頌。長文又五：初行因，二得果，三劫國莊嚴，四壽命，五正像。今初。

爾時世尊。知諸大弟子心之所念。告諸比丘。是須菩提。於當來世。奉覲三百萬億那由他佛。供養恭敬。尊重讚歎常修梵行。具菩薩道。

二、得果。

於最後身。得成爲佛。號曰名相如來。應供。正徧知。明行足。善逝。世間解。無上士。調御丈夫。天人師。佛。世尊。

今名空生，果稱名相，真空妙有，不同示迹石室觀空也。

三、劫國莊嚴。

劫名有寶。國名寶生。其土平正。玻璃爲地。寶樹莊嚴。無諸丘坑。沙礫荊棘。便利之穢。寶華覆地。周徧清淨。其土人民。皆處寶台。珍妙樓閣。聲聞弟子。無量無邊。算數譬喻所不能知。諸菩薩衆。無數千萬億那由他。

四、壽命。

佛壽十二小劫。

五、正像。

正法住世。二十小劫。像法亦住。二十小劫。其佛常處虛空。爲衆說法。度脫無量菩薩及聲聞衆。

『常處虛空』：表中道第一義空。

二、重頌，分五：初誠聽，二頌行因得果，三頌國淨，四頌壽命，五頌正像。今初。

爾時世尊欲重宣此義。而說偈言。

諸比丘衆。今告汝等。皆當一心。聽我所說。

二、頌行因得果。

我大弟子。須菩提者。當得作佛。號曰名相。當供無數。萬億諸佛。隨佛所行。漸具大道。最後身得。三十二相。端正殊妙。猶如寶山。

三、頌國土淨。

其佛國土。嚴淨第一。衆生見者。無不愛樂。佛於其中。度無量衆。其佛法中。多諸菩薩。皆悉利根。轉不退輪。彼國常以。菩薩莊嚴。諸聲聞衆。不可稱數。皆得三明。具六神通。住八解脫。有大威德。其佛說法。現於無量。神通變化。不可思議。諸天人。數如恒沙。皆共合掌。聽受佛語。

『八解脫』：卽八背捨。能脫心慮，故名解脫。背彼五欲，捨是著心，曰背捨。

四、頌壽命。

其佛當壽。十二小劫。

五、頌正像。

正法住世。二十小劫。像法亦住。二十小劫。

初記須菩提竟。

二、記迦旃延，分二：初長文、二重頌。長文又五：初行因、二得果、三國淨、四壽命、五正像。今初。

爾時世尊。復告諸比丘衆。我今語汝。是大迦旃延。於當來世。以諸供具。供養奉事八千億佛。恭敬尊重。諸佛滅後。各起塔廟。高千由旬。縱廣正等五百由旬。皆以金。銀。瑠璃。磲磔。碼碯。眞珠。玫瑰。七寶合成。衆華瓔珞塗香末香燒香。繒蓋幢幡。供

養塔廟。過是已後。當復供養二萬億佛。亦復如是。供養是諸佛已。具菩薩道。

迦旃延，因中勤掃佛地，為羅漢議論莊嚴，名文飾，成佛號閻浮那提金光，以身光如閻浮樹金。此無劫國名號者，或譯人遺失。

二得果。

當得作佛。號曰閻浮那提金光如來。應供。正徧知。明行足。善逝。世間解。無上士。調御丈夫。天人師。佛。世尊。

三國淨。

其土平正。玻璃為地。寶樹莊嚴。黃金為繩。以界道側。妙華覆地。周徧清淨。見者歡喜。無四惡道。地獄。餓鬼。畜生。阿修羅道。多有天人。諸聲聞眾。及諸菩薩。無量萬億。莊嚴其國。

四壽命。

佛壽十二小劫。

五正像。

正法住世二十小劫。像法亦住二十小劫。

長文竟。

二、重頌。分四：初誠聽、二頌行因、三頌得果、四頌國淨（略不頌壽命正像）。今初。

爾時世尊欲重宣此義。而說偈言。

諸比丘眾。皆一心聽。如我所說。真實無異。

二、頌行因。

是迦旃延。當以種種。妙好供具。供養諸佛。諸佛滅後。起七寶塔。亦以華香。供養舍利。

三、頌得果。

其最後身。得佛智慧。成等正覺。

四、頌國土淨。

國土清淨。度脫無量。萬億衆生。皆爲十方。之所供養。佛之光明。無能勝者。其佛號曰。閻浮金光。菩薩聲聞。斷一切有。無量無數。莊嚴其國。

一二記迦旃延竟。

三記目犍連，分二：初長文，二重頌。初中五：初行因，二得果，三劫國，四壽命，五正像。今初。

爾時世尊復告大衆。我今語汝。是大目犍連。當以種種供具。供養八千諸佛，恭敬尊重。諸佛滅後。各起塔廟。高千由旬。縱廣正等五百由旬。以金。銀。瑠璃。碑磔。碼碯。眞珠。玫瑰。七寶合成。衆華瓔珞。塗香末香燒香。繒蓋幢幡。以用供養。過是已後。當復供養二百萬億諸佛。亦復如是。

迦葉奉觀三百萬億諸佛方得菩提。須菩提供養三百萬億那由它佛方得菩提。目連供養二百萬億八千佛方得菩提，雖同聞妙法，同得授記，根性不同耳。

目連作羅漢時，神通第一，成佛號栴檀香，此香若燒一鉢，普熏小千世界，亦神速故。

二、得果。

當得成佛。號曰多摩羅跋耨檀香如來。應供。正徧知。明行足。善逝。世間解。無上士。調御丈夫。天人師。佛。世尊。

三、劫國。

劫名喜滿。國名意樂。其土平正。玻瓈爲地。寶樹莊嚴。散眞珠華。周徧清淨。見者歡喜。多諸天人。菩薩。聲聞。其數無量。

四、壽命。

佛壽二十四小劫。

五正像。

正法住世四十小劫。像法亦住四十小劫。

長文竟。

二重頌。分五：初頌行因。二頌得果兼國名。三頌壽命。四頌國淨。五頌正像。今初。爾時世尊欲重宣此義。而說偈言。

我此弟子。大目犍連。捨是身已。得見八千。二百萬億。諸佛世尊。爲佛道故。供養恭敬。於諸佛所。常修梵行。於無量劫。奉持佛法。諸佛滅後。起七寶塔。長表金剎。華香伎樂。而以供養。諸佛塔廟。

剎者，具云剎摩。此翻土田，卽一佛所化之土。

二、頌得果兼國名。

漸漸具足。菩薩道已。於意樂國。而得作佛。號多摩羅。耨檀之香。

三、頌壽命。

其佛壽命。二十四劫。

四、頌國淨。

常爲天人。演說佛道。聲聞無量。如恒河沙。三明六通。有大威德。菩薩無數。志固精進。於佛智慧。皆不退轉。

五、頌正像。

佛滅度後。正法當住。四十小劫。像法亦爾。

初正授中根記竟。

二、許爲下根說宿世。

我諸弟子。威德具足。其數五百。皆當授記。於未來世。咸得成佛。我及汝等。宿世因緣。吾今當說。汝等善聽。

下根人，已聞法譬二周，復見上中授記，恐其猶疑不了，深生愧恥，欲增進其道，先許總記，更說宿緣。

第二、譬說周竟。

釋授記品竟，次釋化城喻品。

化城喻品第七

神力名化，防禦稱城，所謂化作不實之城，止息退墮之衆，譬二乘涅槃城乃權智所爲。（見有可度之機生喜卽世界益，得人蘇息卽爲人益，防非禦敵卽破惡益，而言滅度卽第一義益。）

藏通二乘於涅槃生安隱想、生滅度想。通教菩薩則扶習潤生（三藏菩薩伏惑）。如釋論云：如父遇險，一腳入城（以大悲故），一腳行外（不證有餘），憶其子故，從城入險，誓扶餘習入生死，而不以空爲證。別教不說城如化，用城防險，從城門經過，將城作方便，斷見思惑，不以此爲究竟。圓教知無賊與病，亦不須城，故言化城。

本住三德之城，迹入化城。所謂『本住圓明淨覺身，元非因果及根塵，當人肯堅第一念，法界依然只一眞。』

觀緣起性空是入化城，假名爲城，是出化城，觀緣起空中道，是寶所。又本性元淨，如虛空不拒羣相，明鏡不存痕跡，理卽化城，心隨緣熏分染淨，名字化城，圓伏五住觀行化城，乃至究竟開顯圓實爲寶所。

譬喻一品，意在火宅白牛，此品意在化城寶所，出火宅入寶所，前後一貫而意始圓。譬喻品佛陀說二萬億佛所常教化身子，此品與千二百羅漢說，於不可思議阿僧祇劫前，爲十六沙彌時已曾開導汝等，交互發明因緣遠近，且大通智勝爲釋迦之父，可謂佛道相同。

初正說因緣分二：初先明知見久遠，二正明宿世因緣。初又二，初長文，二重頌。長文分三：初出所見事，二舉譬明久遠，三結見昔如今，今初所見事，卽好城，大相，大通智勝佛。

佛告諸比丘。乃往過去無量無邊不可思議阿僧祇劫。爾時有佛。名大通智勝如來。應供。正徧知。明行足。善逝。世間解。無上士。調御丈夫。天人師。佛。世尊。其國名好城。劫名大相。諸比丘。彼佛滅度已來。甚大久遠。

前法說周，爲方便品，開權顯實身子得記。譬說周，有譬喻品說火宅、三車、一車，信解品論窮子，雖知昔權，不知權卽是實，藥草喻品明三草二木，顯法一機異，授記品述四大弟子中根得記。

此下爲因緣說周，遠引大通說法因緣，以顯法一，釋下根之疑，有三品文：一、化城喻品，正說因緣，後二品援記，含領解述成，二、五百弟子授記品，富樓那、憍陳如、三迦葉、迦留陀夷、離婆多、阿菴樓駄、薄俱羅等得記，三、授學無學人記品，阿難羅雲等得記。普遍廣容曰大，四開八達曰通，能應萬有曰智，超出一切曰勝。

二、舉譬明久遠。

譬如三千大千世界。所有地種。假使有人。磨以爲墨。過於東方千國土。乃下一點。大如微塵。又過千國土。復下一點。如是展轉盡地種墨。於汝等意如何。是諸國土。若算師。若算師弟子。能得邊際。知其數否。不也。世尊。諸比丘。是人所經國土。若點不點。盡抹爲塵。一塵一劫。彼佛滅度以來。復過是數。無量無邊百千萬億阿僧祇劫。

所言劫塵數量，乃佛陀的智境，聖言量所說，非凡情能度。顯大通佛出在空劫以前，本無始終，不涉數量，故以塵點爲喻。

三、結見昔如今。

我以如來知見力故。觀彼久遠。猶若今日。

如來知見無見，無見則無所不見，所謂十世古今不離當念，無邊剎海不隔毫端，古今不離，自他不隔，心外無法，則觀三千界如掌中果，咎由無明妄動，迷失本性，變現種種對法差別相，故不能遠見。

古佛名大通智勝，釋迦以四智通之，以空合空，如鏡照鏡，古今一如。

二、重頌。分三：初頌所見事，二頌舉譬明久遠，三頌見昔如今。今初。

爾時世尊欲重宣此義。而說偈言。

我念過去世。無量無邊劫。有佛兩足尊。名大通智勝。

二、頌譽譬明久遠。

如人以力磨。三千大千土。盡此諸地種。皆悉以爲墨。過於千國土。乃下一塵點。如是展轉點。盡此諸塵墨。如是諸國土。點與不點等。復盡抹爲塵。一塵爲一劫。此諸微塵數。其劫復過是。彼佛滅度來。如是無量劫。

三、頌見昔如今。

如來無礙智。知彼佛滅度。及聲聞菩薩。如見今滅度。諸比丘當知。佛智淨微妙。無漏無所礙。通達無量劫。

『淨微妙』：卽空假中三智。智體圓滿名『無漏』。通達周徧，故『無礙』。『佛智』，大圓鏡智。『淨』，平等性智。『微妙』，妙觀察智。『無漏無所礙』，成所作智。

二、正明宿世因緣，分二：初廣述，二重頌。初又二，初遠由，二近由。初又二：初明大通智勝成佛，二明十方梵王請法。初又五：初佛壽長遠，二成道前事，三正明成道，四明成道後眷屬供養，五請轉法輪。今初，明大通佛壽。

佛告諸比丘。大通智勝佛。壽五百四十萬億那由他劫。

本節文明成道前事。

其佛本坐道場。破魔軍已。垂得阿耨多羅三藐三菩提。而諸佛法。不現在前。如是一小劫。乃至十小劫。結跏趺坐。身心不動。而諸佛法。猶不在前。

『本坐道場』：本覺之智，契道場之理，理本不動，爲智所歸。諸佛道同，爲緣事異，釋迦適減劫，壽八十，苦行六年，三七思惟，十方佛現。彌

勒（彌勒爲賢劫千佛之第五佛，自今經五十六億七千萬年出世，以住劫有二十增減，於第九增減之減劫，始有佛出，名曰拘留孫、拘那含牟尼、迦葉、釋迦，至第十增減之減劫彌勒降神，次於第二增減中增劫樓至佛最後成道。）卽日得道，龍華三會唱滅，大通出增劫，十劫思惟，本覺不動，權智未現，非根有利鈍，道有難易，機感不同，而示長短耳。又八相垂迹，降魔成道，似同穢土，若準壽長，復非穢土，蓋同居淨穢其相蓋多，不可引此土小教稍彼文。『魔軍』，爲磨練，則又是一番境界。

本節文仍明，成道前事。

爾時忉利諸天。先爲彼佛於菩提樹下敷師子座。高一由旬。佛於此坐。當得阿耨多羅三藐三菩提。適坐此座。時諸梵天王雨衆天華。面百由旬。香風時來。吹去萎華。更雨新者。如是不絕。滿十小劫供養於佛。乃至滅度。常雨此華。四王諸天爲供養佛。常擊天鼓。其餘諸天作天伎樂。滿十小劫。至於滅度。亦復如是。

『忉利諸天』：指欲界諸天，忉利在地居頂天，爲欲界主，又名三十三天。『諸梵天王』：指色界諸天，係空居，梵天爲色界主。『四王諸天』：係帝釋外將，居須彌山腰，又稱護世四王。

本節文正明成道。

諸比丘。大通智勝佛過十小劫。諸佛之法乃現在前。成阿耨多羅三藐三菩提。

『諸佛之法』：自行化他權實二智。『乃現在前』：智佛坐道場，待機待緣，十劫思惟，機感斯應。

本節文及偈頌，爲大通智勝成道後，十六王子眷屬等供養。

其佛未出家時。有十六子。其第一者。名曰智積。諸子各有種種珍異玩好之具。聞父得成阿耨多羅三藐三菩提。皆捨所珍。往詣

佛所。諸母涕泣而隨送之。其祖轉輪聖王。與一百大臣。及餘百千萬億人民。皆共圍繞。隨至道場。咸欲親近大通智勝如來。供養恭敬。尊重讚歎。到已。頭面禮足。繞佛畢已。一心合掌。瞻仰世尊。以偈頌曰。

大威德世尊。爲度衆生故。於無量億劫。爾乃得成佛。諸願已具足。善哉吉無上。世尊甚希有。一坐十小劫。身體及手足。寂然安不動。其心常愴怕。未曾有散亂。究竟永寂滅。安住無漏法。今者見世尊。安隱成佛道。我等得善利。稱慶大歡喜。衆生常苦惱。盲冥無導師。不識苦盡道。不知求解脫。長夜增惡趣。減損諸天衆。從冥入於冥。永不聞佛名。今佛得最上。安隱無漏道。我等及天人。爲得最大利。是故咸稽首。歸命無上尊。

十六王子若約法卽自行化他八正道。又大通表本覺，諸子表始覺，出家表始契本。燈明有八子，單約識言，故名有意，表轉八識成四智，大通有十六子出家，表一切種智皆由識轉。或表十六心轉小智向大智。『智積』：表雖積大智，尚有滯礙，未至大通。又子名智積表因心，父名智勝表果覺。智積成佛，卽今東方阿閼佛。『諸母』：顯十六王子非一母生。又出家捨貪愛等。又其祖轉輪聖王等事，表王所百法齊轉。

本節文明十六沙彌請大通佛轉法輪。

爾時十六王子偈讚佛已。勸請世尊轉於法輪。咸作是言。世尊說法。多所安隱。憐愍饒益諸天人民。重說偈言。

世雄無等倫。百福自莊嚴。得無上智慧。願爲世間說。度脫於我等。及諸衆生類。爲分別顯示。令得是智慧。若我等得佛。衆生

亦復然。世尊知衆生。深心之所念。亦知所行道。又知智慧力。欲樂及修福。宿命所行業。世尊悉知己。當轉無上輪。

『多所安隱』：佛陀說法，能使愚者智，倒懸者解，得益者多。『世尊知衆生』以下各句，卽具如來十力，知現在衆生念何事，行何道，得何智，樂何法，修何福，又知過去作何業，故能隨機授法。今世尊必知我心，亦定爲我十六沙彌轉無上法輪也。『百福自莊嚴』是福足，『得無上智慧』是慧足。此請滿字根本法輪，如釋迦說華嚴。

二、十方梵王請法，分二：初威光照動，二、梵王來請。今初。

佛告諸比丘。大通智勝佛得阿耨多羅三藐三菩提時。十方各五百萬億諸佛世界六種震動。其國中間幽冥之處。日月威光所不能照。而皆大明。其中衆生各得相見。咸作是言。此中云何忽生衆生。又其國界諸天宮殿乃至梵宮。六種震動。大光普照。徧滿世界。勝諸天光。

佛降神時、初生時、成道時，法爾世界震動，大光普照，但有緣者遠在他方亦覺，無緣者近亦不知。

今大通雖未說明何處放光，但上徹梵宮，下徹幽冥，超日月威光，且轉頓漸半滿法輪，例燈明釋迦，亦應眉間中道智，照一境三諦也。華嚴云：

『菩薩足底放光照於地獄，衆生蒙光皆生切利，復聞天鼓說法，立證十地。』
『忽生衆生』：心性本淨，陰入界覆則暗。

二、梵王來請，分五：初東方、二東南方、三南方、四總舉餘六方、五上方。初又六：初觀瑞驚駭、二互相問決、三尋光見佛、四三業供養、五請轉法輪、六如來默許。今初觀瑞驚駭。

爾時東方五百萬億諸國土中梵天宮殿。光明照耀。倍於常明。諸梵天王各作是念。今者宮殿光明。昔所未有。以何因緣而現此相。

『諸梵天王』：色界十八天中之初禪三天，卽梵衆天、梵輔天、大梵天，

又名尸棄大梵，爲娑婆世界主，領三千大千世界，劫初先生，劫盡後滅。忉利天帝釋爲欲界主。仁王般若以初禪王，配列第七遠行地，斷順道法愛無明習。

二、互相問決。

是時諸梵天王。卽各相詣。共議此事。時彼衆中有一大梵天王。名救一切爲諸梵衆而說偈言。

我等諸宮殿。光明昔未有。此是何因緣。宜各共求之。

爲大德天生。爲佛出世間。而此大光明。徧照於十方。

『爲大德天生』：梵天離欲修禪定，兼修四無量心，身心妙圓，威儀不缺，清淨禁戒，加以明悟，故曰大德天。或曰補處天。

三、尋光見佛。

爾時五百萬億國土諸梵天王。與宮殿俱。各以衣祴盛諸天華。共詣西方。推尋是相。見大通智勝如來。處於道場菩提樹下。坐師子座。諸天。龍王。乾闥婆。緊那羅。摩睺羅伽。人非人等。恭敬圍繞。及見十六王子。請佛轉法輪。

『與宮殿俱』：顯隨身宮殿，依正莊嚴。『衣祴盛華』：備供佛也。

『推尋是相』：推求尋覓光明之所由出。十方來儀，文式皆同，惟敍天龍八部，俱缺夜叉修羅迦樓那三部。

四、三業供養。

卽時諸梵天王。頭面禮佛。繞百千匝。卽以天華而散佛上。其所散華。如須彌山。并以供養佛菩提樹。其菩提樹。高十由旬。華供養已。各以宮殿奉上彼佛。而作是言。惟見哀愍。饒益我等。

所獻宮殿。願垂納處。時諸梵天王。卽於佛前一心同聲。以偈頌曰。

世尊甚希有。難可得值遇。具無量功德。能救護一切。天人之大師。哀愍於世間。十方諸衆生。普皆蒙饒益。我等所從來。五百萬億國。捨深禪定樂。爲供養佛故。我等先世福。宮殿甚嚴飾。今以奉世尊。惟願哀納受。

頭面禮佛，是身業。而作是言及說偈，是口業。一心同聲，卽意業。『供養佛菩提樹』者，以樹乃佛之所依，敬人及物也。

五、請轉法輪。

爾時諸梵天王偈讚佛已。各作是言。惟願世尊轉於法輪。度脫衆生。開涅槃道。時諸梵天王。一心同聲而說偈言。世尊兩足尊。惟願演說法。以大慈悲力。度苦惱衆生。

既云度苦惱衆生。卽是請半字教，如今釋迦華嚴後說阿舍。

六、如來默許。

爾時大通智勝如來。默然許之。

以上東方六科文，其意重在尋光見佛，因人人有佛，個個有光，但不知光之所出，故不得見佛，所以東方以救一切爲首，諸天王向西方尋；東南方以大悲爲首，諸天王向西北方尋；南方以妙法爲首，諸天王向北方尋；上方以尸棄爲首，諸天王向下方尋等。皆描述佛光無在而無所不在，無有定處，故東看則西，南觀成北，其實此光不離大通智勝佛邊，故見佛歡喜，供養所珍，而求大法。

二、東南方，分六，初觀瑞驚駭至六如來默許，今初觀瑞驚駭。

又諸比丘。東南方五百萬億國土諸大梵王。各自見宮殿光明照耀。昔所未有。歡喜踴躍。生希有心。

二、互相問決。

卽各相詣。共議此事。時彼衆中。有一大梵天王。名曰大悲。爲諸梵衆而說偈言。

是事何因緣。而現如此相，我等諸宮殿。光明昔未有。爲大德天生。爲佛出世間。未曾見此相。當共一心求。過千萬億土。尋光共推之。多是佛出世。度脫苦衆生。

三、尋光見佛。

爾時五百萬億諸梵天王。與宮殿俱。各以衣祴盛諸天華。共詣西方。推尋是相。見大通智勝如來。處於道場菩提樹下。坐師子座。諸天。龍王。乾闥婆。緊那羅。摩睺羅伽。人非人等。恭敬圍繞。及見十六王子。請佛轉法輪。

四、三業供養。

時諸梵天王。頭面禮佛。繞百千匝。卽以天華而散佛上。所散之華。如須彌山。并以供養佛菩提樹。華供養已。各以宮殿奉上彼佛。而作是言。惟見哀愍。饒益我等。所獻宮殿。願垂納處。爾時諸梵天王。卽於佛前一心同聲。以偈頌曰。

聖主天中王，迦陵頻伽聲。哀愍衆生者。我等今敬禮。世尊甚希有。久遠乃一現。一百八十劫。空過無有佛。三惡道充滿。諸天衆減少。今佛出於世。爲衆生作眼。

世間所歸趨。救護於一切。爲衆生之父。哀愍饒益者。
我等宿福慶。今得值世尊。

『天中王』：佛爲極聖，統王十界，爲三界諸天所讚。『迦陵頻伽』：此云妙聲鳥，在殼中未出，發聲微妙。『爲衆生作眼』：羅什譯衆生，玄奘譯有情，卽數取趣的有情衆生，失於正見，佛爲指示。

五、請轉法輪。

爾時諸梵天王。偈讚佛已。各作是言。惟願世尊哀愍一切。轉於法輪。度脫衆生。時諸梵天王。一心同聲而說偈言。
大聖轉法輪。顯示諸法相。度苦惱衆生。令得大歡喜。
衆生聞此法。得道若生天。諸惡道減少。忍善者增益。

此東南方諸梵天王亦同前所請爲半字教。

六、如來默許。

爾時大通智勝如來。默然許之。

二東南方竟。

三、南方、分六，初覩瑞驚駭，至六如來默許，今初覩瑞驚駭。

又諸比丘。南方五百萬億國土諸大梵王。各自見宮殿光明照耀。昔所未有。歡喜踴躍。生希有心。

二、互相問決。

卽各相詣。共議此事。以何因緣。我等宮殿有此光曜。時彼衆中有一大梵天王。名曰妙法。爲諸梵衆而說偈言。

我等諸宮殿。光明甚威曜。此非無因緣。是相宜求之。

過於百千劫。未曾見是相。爲大德天生。爲佛出世間。

三、尋光見佛。

爾時五百萬億諸梵天王。與宮殿俱。各以衣祴盛諸天華。共詣北方。推尋是相。見大通智勝如來。處於道場菩提樹下。坐師子座。諸天。龍王。乾闥婆。緊那羅。摩睺羅伽。人非人等。恭敬圍繞。及見十六王子。請佛轉法輪。

四、三業供養。

時諸梵天王。頭面禮佛。繞百千匝。卽以天華而散佛上。所散之華。如須彌山。并以供養佛菩提樹。華供養已。各以宮殿奉上彼佛。而作是言。惟見哀愍。饒益我等。所獻宮殿。願垂納處。爾時諸梵天王。卽於佛前一心同聲。以偈頌曰。

世尊甚難見。破諸煩惱者。過百三十劫。今乃得一見。
諸飢渴衆生。以法雨充滿。昔所未曾覩。無量智慧者。
如優曇鉢華。今日乃值遇。我等諸宮殿。蒙光故嚴飾。
世尊大慈愍。惟願垂納處。

『破諸煩惱』：五住究竟。『饑渴衆生』：佛不出世，衆生之法喜禪悅之食，甘露解脫之漿。

五、請轉法輪。

爾時諸梵天王偈讚佛已。各作是言。惟願世尊轉於法輪。令一切世間諸天魔梵。沙門婆羅門。皆獲安隱。而得度脫。時諸梵天王。一心同聲以偈頌曰。

惟願天人尊。轉無上法輪。擊於大法鼓。而吹大法螺。

普雨大法雨。度無量眾生。我等咸歸請。當演深遠音。

無上法輪，擊大法鼓，吹大法螺，普雨法雨等句，卽是請轉對半明滿之教，如今之方等。

魔天梵天分善惡，沙門婆羅門簡邪正，法輪一轉皆趣安隱。擊鼓警其惰，吹螺繫其念，雨雨潤其枯。

六、如來默許。

爾時大通智勝如來。默然許之。

三、南方竟。

四、總舉餘六方。

西南方乃至下方亦復如是。

按西晉竺法護最初所譯此經名正法華，列十方梵王請法，係先四方，次四維（東南、西南、西北、東北），次上下方，與東晉後秦鳩摩羅什所譯，今妙法蓮華經所列梵王次第稍有出入，未知梵本順序如何。按上列尋光，東至西、東南至西北、南至北，及下文，上至下，乃至二字超略東方隅。若依梵王方位，除東、東南、南、上、等四方，餘西南、下、西北、西、北、東北等六方，用乃至二字總舉。

五、上方，分五，初觀端驚駭，至五請轉法輪（世尊卽說故無默許文），十方請竟。今初觀端驚駭。

爾時上方五百萬億國土諸大梵王。皆悉自覩所止宮殿。光明威曜。昔所未有。歡喜踴躍。生希有心。

二、互相問決。

卽各相詣。共議此事。以何因緣。我等宮殿有斯光明。時彼衆中有一大梵天王。名曰尸棄。爲諸梵衆而說偈言。

今以何因緣。我等諸宮殿。威德光明躍。嚴飾未曾有。如是之妙相。昔所未聞見。爲大德天生。爲佛出世間。

三、尋光見佛。

爾時五百萬億諸梵天王。與宮殿俱。各以衣祴盛諸天華。共詣下方。推尋是相。見大通智勝如來。處於道場菩提樹下。坐師子座。諸天龍王。乾闥婆。緊那羅。摩睺羅伽。人非人等。恭敬圍繞。及見十六王子。請佛轉法輪。

四、三業供養。

時諸梵天王。頭面禮佛。繞百千匝。卽以天華。而散佛上。所散之華。如須彌山。并以供養佛菩提樹。華供養已。各以宮殿奉上彼佛。而作是言。惟見哀愍。饒益我等。所獻宮殿。願垂納處。時諸梵天王。卽於佛前一心同聲。以偈頌曰。

善哉見諸佛。救世之聖尊。能於三界獄。勉出諸衆生。
普智天人尊。哀愍羣萌類。能開甘露門。廣度於一切。
於昔無量劫。空過無有佛。世尊未出時。十方常闇暝。
三惡道增長。阿修羅亦盛。諸天衆減少。死多墮惡道。
不從佛聞法。常行不善事。色力及智慧。斯等皆減少。
罪業因緣故。失樂及樂想。住於邪見法。不識善儀則。

不蒙佛所化。常墮於惡道。佛爲世間眼。久遠時乃出。
哀愍諸衆生。故現於世間。超出成正覺。我等甚欣慶。
及餘一切衆。喜歎未曾有。我等諸宮殿。蒙光故嚴飾。
今以奉世尊。惟垂哀納處。願以此功德。普及於一切。
我等與衆生。皆共成佛道。

前東南方云：百八十劫空過無佛。南方云：百三十劫乃得一見。今上方云：於昔無量劫空過無有佛。乃機緣不同，致見佛奢促，能同時蒙光共集，斯從感應道交，非偶然也。

『三界獄』：前以三界如火宅，以有五欲燒煮，此以三界喻獄，以有煩惱囚縛。若『不如三界見於三界』，不住三界不離三界。仁王般若云：『於三界外別更有一衆生界者，卽是外道大有經說。』三界僅表示欲、色、無色三種心態。『羣萌』：卽羣生，草之初生曰萌，意羣生皆有善芽萌於內，待緣而發。

五、請轉法輪。

爾時五百萬億諸梵天王偈讚佛已。各白佛言。惟願世尊轉於法輪。
多所安隱。多所度脫。時諸梵天王而說偈言。

世尊轉法輪。擊甘露法鼓。度苦惱衆生。開示涅槃道。
惟願受我請。以大微妙音。哀愍而敷演。無量劫集法。

文云大微妙音，敷演無量劫集法，又云度苦惱衆生，是請帶半明滿之教，如今釋迦說般若。

十六王子最初請大通智勝佛轉『無上輪』滿字，如今佛說華嚴。東方暨東南方梵王請轉度苦滅惡法輪，半字教，如今佛說阿含。南方及餘六方梵王請轉『無上法輪』對半明滿教，如今佛說方等。上方梵王請轉『微妙音無量

劫集法』帶半明滿法輪，如今佛說般若。十六王子後請法華，節目宛然，今古一致。然佛法道同，不應偏請，如今佛始終具轉五味，皆酬梵王所請，彼亦應然。初明結緣遠由竟。

二、明結緣近由（佛受請說法，故得覆講緣。）分二：初轉半字法輪，二、轉廢半明滿法輪。初中三：初受請、二正轉、三聞法得道。今初。

爾時大通智勝如來。受十方諸梵天王及十六王子請。

智佛受十方梵王請，先轉四諦十二因緣法，然後爲十六王子說一乘實相。

二、正轉（此中應說諦緣度，爲下根論結緣開顯，略不言六度。）分二：初明四諦，二明十二因緣。今初。

卽時三轉十二行法輪。若沙門婆羅門。若天魔梵。及餘世間所不能轉。謂是苦。是苦集。是苦滅。是苦滅道。

『三轉』：示相轉、勸修持、作證轉。因衆生有三根，爲生聞思修三慧，有見修無學三道，故佛說法，法至於三，或爲聲聞三轉，爲緣覺再轉，爲菩薩一轉。維摩云：『三轉法輪於大千，其輪本來常清淨，天人得道此爲證，三寶於是現世間。』示轉者：謂此是苦逼迫性（三界二十五有果報，皆是苦苦、壞苦、行苦。）此是苦集招感性（三界見思煩惱爲招苦之因），此是苦滅可證性（見思滅則生死滅，此處寂靜安隱。），此是苦滅道可修性（因戒生定，由定發慧，依四念處具足三十七道品入三脫門，乃爲滅苦之道。）

勸轉者：謂此是古汝應知，此是集汝應斷，此是滅汝應證，此是道汝應修。

證轉者：謂此是苦我已知，不復更知。此是集我已斷，不復更斷。此是滅我已證，不復更證。此是道我已修，不復更修。

『十二行』：一約四諦教，二約十六行。約教者，卽示勸證，轉苦集滅道，三四成十二。約行者，三轉皆生眼智明覺，於一苦諦，謂苦法忍爲眼、苦法智爲智、苦類忍爲明、苦類智爲覺，餘三諦亦爾，成十六心，三根人各得十六心則成四十八行。今約三乘利根，聞示轉，卽各生眼智明覺，三人合

舉，故言十二行。轉者，將此法轉入衆生之心，有轉煩惱成菩提，轉生死成涅槃義。輪者，能摧躐三界煩惱，如來以法輪，運載衆生出生死。沙門未從佛聞，婆羅門不解其理，天著樂，魔破法，梵味禪，故云『所不能轉』。

『餘世間』：指四果支佛正覺世間。四諦義通大小偏圓，有生滅、無生、無量、無作，隨智所解不同，非獨聲聞法。

二、明十二因緣。

及廣說十二因緣法。無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死憂悲苦惱。無明滅則行滅。行滅則識滅。識滅則名色滅。名色滅則六入滅。六入滅則觸滅。觸滅則受滅。受滅則愛滅。愛滅則取滅。取滅則有滅。有滅則生滅。生滅則老死憂悲苦惱滅。

無明行愛取有五支是集諦，其餘七支是苦諦，無明滅乃至老死滅是滅諦，觀因緣智是道諦。廣前苦集爲流轉門，廣前道滅爲還滅門，故曰『廣說』。無明愛取三煩惱（惑）、行有二支屬業道、從識至受并生死，七支同名一苦道，十二因緣卽惑業苦。

此十二法亦通大小偏圓，有思議生滅，思議不生滅，不思議生滅，不思議不生滅，非但辟支法。

無明以癡爲體，迷暗爲性，分根本、支末兩種，迷於眞如法界理的原始一念爲根本，又名元品無明，障中無明，在別地圓住始斷。依根本而起三細六粗之惑業爲枝末。心心所相應而起，由貪瞋慢疑見等之煩惱，分別發業，俱起潤生，卽見思惑。所作業果爲行，依止初心是識，與識共生四蘊爲名色，名色增長爲六處，根境識三合爲觸，與觸共生爲受，於受染著爲愛，愛增長爲取，取所起有漏業爲有，從業起蘊爲生，蘊熟爲老，蘊壞爲死（以上依大經等語義解十二因緣），三世破斷常，二世破著我，一念破性實。

總之，無明等展轉感果名因，互相由籍爲緣，三世相續無間斷，由過去無明行爲因，感未來生死之果。二正轉竟。

三、聞法得道。

佛於天人大眾之中說是法時。六百萬億那由他人。以不受一切法故。而於諸漏心得解脫。皆得深妙禪定。三明六通。具八解脫。第二第三第四說法時。千萬億恒河沙那由他等眾生。亦以不受一切法故。而於諸漏心得解脫。從是已後。諸聲聞眾。無量無邊不可稱數。

『不受一切法』：即根境不偶。斷見證初果，悟諦緣空，了無所著，有受即累，有著故昏。『於諸漏心得解脫』：即脫盡見思諸縛，證無學。心解脫，又曰慧解脫，乃鈍根待時解脫羅漢，唯離煩惱障。『深妙禪定』：觀練熏修諸禪即俱解脫，又曰定解脫，乃利根不時解脫羅漢，俱離一切禪定之障。倘離慧定二障，則為滅盡定之至極而得自在。

觀練熏修乃出世間四種禪：

一、觀禪，即九想八背捨（八解脫）、八勝處、十一切處。又以八背捨，觀九次第定（四禪四空滅盡定），從初禪心起，次入二禪，乃至滅受想定，不令異念得人，名觀禪。修八背捨，背五欲，捨著心，再加八勝處，十一切處，此三法為遠離三界貪愛之出世間禪，智論曰：『背捨為初門，勝處為中行，一切處為成就，三種觀足，即是觀禪體成就。』發無漏慧，斷三界見思，證羅漢果，即轉名八解脫。

(一)內有色相外觀色，謂繫心住緣，先觀自身爛壞不淨，皮肉脫落，但見白骨，復以此不淨觀，觀於所有人之青瘀等色，令生厭惡，此依初禪緣欲界之色，使貪不起。

(二)內無色相外觀色，謂內身雖無色想之食，為使堅牢，更觀外色不淨等相，此依二禪定，緣初禪之色。

(三)淨背捨身作證，謂於定中，惟觀八色等光明（青黃赤白及四大），清淨光潔，妙寶之色，徧滿身中，悉皆怡悅，此依四禪定緣三禪淨色，亦緣欲

界色，所異者，爲可愛色，非可憎色。（初禪以禪悅爲食，離舌識，既不受食，亦不聞香，故無鼻識，但有眼耳身三識。二禪以上則眼不見色，耳不聞聲，身不知觸，五識皆無，故三禪定中無眼識所引之顯色貪。）

（四）虛空、（五）識無邊、（六）無所有、（七）非想非非想等背捨，謂行人於欲界棄自身不淨色，初背捨後又除內身白骨之色，第二背捨後又除棄外身一切不淨之色，尚有八種淨色，皆依心住，若捨淨色緣空，捨空緣識，依四無色定緣五陰等，悉皆無常、苦、空、無我，心生厭背而不愛著。（八）滅受想背捨，即滅五陰中受想二心。

二、練禪，即九次第定，練無漏有漏而除諸間穢，使不次第而爲次第。又以九次第定練四念處，名練禪。

三、熏禪，即獅子奮迅三昧，奮除味禪法愛，如熏皮使熟，隨意作物。又以奮迅三昧熏習四念處，名熏禪。

四修禪，即超越三昧，又名頂禪，修前九次第定，遠近超出超人自在，如初禪入三禪近也，初禪入滅盡定遠也。又以超越三昧修四念處名修禪。以上四種禪法，義出大品，名始南岳，皆明以四念處爲繫緣對象。可參習禪法秘要（佛爲迦絺羅難陀說不淨觀，爲禪難提比丘說數息法，爲阿祇達說四大觀，爲迦旃延弟子槃直迦說白骨觀，暨須陀洹至無學果之境觀等。）『第二第三第四』：敘多會說法。

初大通智勝佛轉半字法輪竟。

二、轉廢半圓滿法輪（重請滿字法輪）分七：初諸子出家。二請法。三所將亦出家。四佛受請。五時衆有解不解。六時節。七說已入定。今初。

爾時十六王子。皆以童子出家而爲沙彌。諸根通利。智慧明了。已曾供養百千萬億諸佛。淨修梵行。求阿耨多羅三藐三菩提。

『童子』：爲八歲以上未冠者總稱。西國出家寄侍比丘所者曰童子。經中以菩薩爲童子，取法王子意，或取無淫欲念者爲童子。

『出家』：看破名利，突破繫縛，出生死煩惱家。釋迦出家成道，過八

年回國，爲父王說法，淨飯王不覺禮拜，佛躍身虛空，隱身不現，禮已乃現，且爲父王抬棺，皆示孝名爲戒。『沙彌』：翻息慈，息惡行慈，息世染，慈濟羣生。有三品沙彌，七歲至十三歲名驅烏沙彌，十四至十九歲名應法沙彌，正合沙彌之位。二十至七十歲爲名字沙彌，本是僧位，以緣未及，故稱沙彌之名字。『諸根通利』：卽六根清淨。及六根互用曰通，卽相似位，入佛境界曰利，卽初住位。『智慧明了』：卽開示悟入。

二、請法。

俱白佛言。世尊。是諸無量千萬億大德聲聞。皆已成就。世尊亦當爲我等說阿耨多羅三藐三菩提法。我等聞已。皆共修學。世尊。我等志願如來知見。深心所念。佛自證知。

十六王子初請大通智勝佛，轉無上圓頓法輪，諸子大乘法德悉已具足，愍諸方便人，重請智佛開權顯實。『大德』：梵語婆檀陀，行滿位高之謂，原爲稱佛之名，在律中則爲比丘之稱，毘奈耶雜事十九曰：『年少比丘喚老者爲大德，老喚少年爲具壽，若不爾者得越法罪。』『聲聞皆已成就』：明其障除機動，是故爲請。『我等志願如來知見』：此法華經但明佛之知見，唯志於此，卽正請滿字。

三、所將亦出家。

爾時轉輪聖王。所將衆中八萬億人。見十六王子出家。亦求出家。王卽聽許。

『轉輪聖王』：身具三十二相，卽位時，由天感得輪寶，有金銀銅鐵，降伏四方，在增劫人壽兩萬歲以上，減劫八萬歲以上始出世。鐵銅銀金四輪王，配位則爲別教信住行向。

四、佛受請。

爾時彼佛受沙彌請。過二萬劫已。乃於四衆之中。說是大乘經。名妙法蓮華。教菩薩法。佛所護念。說是經已。十六沙彌。爲阿耨多羅三藐三菩提故。皆共受持諷誦通利。

大通智勝佛在未說法華前，分別爲十六王子及十方梵王請，轉滿字、半字、對半明滿、帶半明滿等法輪，於其中間歷兩萬劫，且下文頌云：『說六波羅密，及諸神通事，分別真實法。』意即在兩萬劫說方等般若等經，過兩萬劫始說法華，亦含久默斯要不務速說之意。

五、時衆有解不解。

說是經時。十六菩薩沙彌皆悉信受。聲聞衆中。亦有信解。其餘衆生千萬億衆。皆生疑惑。

『菩薩沙彌』：以守沙彌十戒之身，再受菩薩十重四十八輕戒者，十六王子急於學大乘，無暇進具比丘大戒。如靈峯藕益智旭大師自稱菩薩沙彌。『信受』：能宏通。『信解』：能入實。『千萬億衆皆生疑惑』：卽爲十六子未來結法華緣者，疑與謗不同。

六、時節。

佛說是經。於八千劫未曾休廢。

日月燈明佛六十小劫說法華，謂如食頃，釋迦相傳僅八年，大通則八千劫未曾休廢，雖只開權顯實，諸法實相數語，且其開迹顯本，具明曠劫不思議事，百界千如，性修因果橫豎三法，窮劫難盡。下文從地湧出品『以諸菩薩讚法而讚於佛，經五十小劫。謂如半日。』時節唯心可知。

七、說已入定。

說是經已。卽入靜室。住於禪定八萬四千劫。

此正顯結緣之近因，由佛入定，諸疑惑衆，無所諮問，故十六菩薩沙彌爲不解者反覆講說。『靜室』：卽入定處所。『八萬四千劫』：爲入定時節，

那伽常在定，無有不定時，豈有出入時刻，祇因時衆機緣在十六子覆講齊限。

二、正結緣，分二：初法說結緣，二、譬說結緣。初中三：初明昔日共結緣，二明中間更相值遇，三明明日還說法華。初中二：初覆講利生，二、佛起稱嘆。今初。

是時十六菩薩沙彌。知佛入室。寂然禪定。各升法座。亦於八萬四千劫。爲四部衆。廣說分別妙法華經。一一皆度六百萬億那由他恒河沙等衆生。示教利喜。令發阿耨多羅三藐三菩提心。

由佛入定，所以得說，佛知一化將畢，不復成熟者，令王子共其結緣。又知此等必由王子究竟得度，所以入定久而不出。

沙彌菩薩升座，重解不在年，其儀式可稍異具戒大德。令發菩提心，故云『度』。倘初發心誓願作佛，已過於世間，卽是度七方便彼岸義。『示教利喜』：指示善與惡，教誨行善捨惡，自他兩利，皆大歡喜。

二、佛起稱嘆，分二：初正稱歎，二勸親信。今初。

大通智勝佛。過八萬四千劫已。從三昧起。往詣法座。安祥而坐。普告大衆。是十六菩薩沙彌。甚爲希有。諸根通利。智慧明了。已曾供養無量千萬億數諸佛。於諸佛所。常修梵行。受持佛智。開示衆生。令人其中。

『受持佛智。開示衆生。』：自行已圓，再覺他者，始能令人毘盧性海之中。

二、勸親近。

汝等皆當數數親近而供養之。所以者何、若聲聞辟支佛及諸菩薩。能信是十六菩薩所說經法。受持不毀者。是人皆當得阿耨多羅三藐三菩提如來之慧。

此昔佛普懸授記之文。

二、明中間更相值遇。

佛告諸比丘。是十六菩薩。常樂說是妙法蓮華經。一一菩薩所化六百萬億那由他恒河沙等衆生。世所生與菩薩俱。從其聞法。悉皆信解。以此因緣。得值四萬億諸佛世尊。於今不盡。

『於今不盡』：值遇有三種，一、始終遇大乘，二、遇大退小，仍接以小。三、值小，退後無機未度，故云不盡。

權教一向說時節因緣長，以誘進疲夫，實教定短爲正，故六根五品一世可期，金光明一生十地，普賢觀意六根極遲不出二生，然長短在機，只要克勤精進，何須論長短。

三、明今日還說法華，分二：初先結會古今。二、正明還說法華。初中二：初結師之古今。二、會弟子古今。今初。

諸比丘。我今語汝。彼佛弟子十六沙彌。今皆得阿耨多羅三藐三菩提。於十方國土現在說法。有無量百千萬億菩薩聲聞以爲眷屬。其二沙彌。東方作佛。一名阿閼。在歡喜國。二名須彌頂。東南方二佛。一名師子音。二名師子相。南方二佛。一名虛空住。二名常滅。西南方二佛。一名帝相。二名梵相。西方二佛。一名阿彌陀。二名度一切世間苦惱。西北方二佛。一名多摩羅跋梅檀香神通。二名須彌相。北方二佛。一名雲自在。二名雲自在王。東北方佛。名壞一切世間怖畏。第十六我釋迦牟尼佛。於娑婆國土。成阿耨多羅三藐三菩提。

十六沙彌是古，八方作佛是今。『阿閼』：翻不動。『須彌頂』：翻妙高。『師子音、師子相』：表師音一吼，其相抖擻。『虛空住、常滅』：慧日住空無明則滅。『帝相梵相』：厚德載物統王大千。『阿彌陀』：無量光壽。『度一切世間苦惱』：以慧澤人，令得清涼。『梅檀香神通』：不速而疾。『須彌相』：高出萬物。『云自在、云自在王』：無心潤萬物。『壞一切世間怖畏』：成壞止於一念。『釋迦牟尼』：翻能仁寂默。方方各二，

係忍知合說。

二、會弟子古今，分四：初明本結大緣、二釋今住聲聞疑、三正結會古今、四釋未來弟子疑。今初。

諸比丘。我等爲沙彌時。各各教化無量百千萬億恒河沙等衆生。從我聞法。爲阿耨多羅三藐三菩提。

此明初聞法時皆爲無上菩提，但此後有退不退，致使解脫分前後。

二、釋今住聲聞疑。

此諸衆生。於今有住聲聞地者。我常教化阿耨多羅三藐三菩提。是諸人等。應以是法漸入佛道。所以者何。如來智慧。難信難解。

先明此諸衆生雖於大通佛時爲菩提從我聞法，應已證覺道，現仍住聲聞位者，因實法難信，故以權法漸入佛道。

三、正結會古今。

爾時所化無量恒河沙等衆生者。汝等諸比丘。及我滅度後。未來世中聲聞弟子是也。

『汝等諸比丘』：卽今之古。『未來世中聲聞弟子』：卽不盡之古今。

四、釋未來弟子疑。

我滅度後。復有弟子不聞是經。不知不覺菩薩所行。自於所得功德生滅度想。當入涅槃。我於餘國作佛。更有異名。是人雖生滅度之想。入於涅槃。而於彼土求佛智慧。得聞是經。唯以佛乘而得滅度。更無餘乘。除諸如來方便說法。

現在者聞法華開顯入實，但未來者，雖未得聞法華而入滅度，佛於餘國作佛，必使其得聞是經，除如來方便說三乘，其實無二三也。『餘國』：或指方便有餘土。

二、正明還說法華，分二：初明應時故說。二、釋前開三意。今初。

諸比丘。若如來自知涅槃時到。衆又清淨。信解堅固。了達空法。深入禪定。便集諸菩薩及聲聞衆。爲說是經。世間無有二乘而得滅度。唯一佛乘得滅度耳。

『涅槃時到』：諸佛出世化道將畢之時，如迦葉佛、日月燈明佛出淨土，說法華經竟卽入涅槃。釋迦出穢土，說法華經竟仍唱當滅，故此經爲最後極唱。『衆又清淨』：卽斷德。『信』：卽四不壞信，謂佛法僧戒。『解』：是無漏正解，是智德。『了達空法』：是證真諦，屬智德。智斷成就方能『深入禪定』。又『衆又清淨』得三藏教益，免火宅難，『信解堅固』於方等教心相體信，『了達空法』得般若轉教益。『集諸菩薩』：是會親族。『及聲聞衆』：是命其子。假使涅槃時到而衆不清淨，亦不能說此經，如多寶如來，以現世無機，故不得說法華，只留全身塔，誓於滅後處處爲說法華者作證。

二、釋前開三意。

比丘當知。如來方便。深入衆生之性。知其志樂小法。深著五欲。爲是等故。說於涅槃。是人若聞。則便信受。

此明爲小機說權教，令破弊免難，後說一乘。初法說結緣竟。

二、譬說結緣，分二：初立譬，二法合。初中二：初導師譬，二將導譬。今初。

譬如五百由旬險難惡道。曠絕無人怖畏之處。若有多衆。欲過此道至珍寶處。有一導師聰慧明達。善知險道通塞之相。

『五百由旬』：約果報則同居分段爲三百，方便變易爲四百，實報變易爲五百。約煩惱則三界見思爲三百，塵沙爲四百，無明爲五百。約觀心，入空觀爲三百，入假觀爲四百，入中觀爲五百。『險難惡道』：譬生死因果，分段變易爲果，見思五住爲因，由此因果故言惡道。『曠絕無人』：道有二種——一曠絕有人可依，如生死中有涅槃，煩惱中有菩提，雖復曠絕，有人

可依。二無人可依，譬生死煩惱無涅槃菩提，則為曠絕無人。又別圓二教非曠有人，通教二乘曠而有人，三藏二乘曠而無人，故為此人設化。『若有多衆』：譬十六王子所化未解脫之衆。『欲過此道至珍寶處』：譬發心欲求無上菩提。『有一導師』：譬十六菩薩沙彌。『聰慧明達』：耳淨曰聰，意淨曰慧，眼淨曰明，餘根淨曰達，即六根清淨。又慧即一心三智，明即具足五眼。又三明為明，十力為達。『善知險道通塞之相』：雖是險道有塞有通，具方便者即塞成通，乏善巧者即通成塞，所謂宜於兩可莫粗心。

二、將導譬，分三：初所將人衆譬、二中路懈退譬、三滅化引至寶所譬。今初。

將導衆人欲過此難。

『衆人』：譬本結緣未得度者，本緣不失而為導師所導。

二、中路退懈譬。分二：初退大、二接小。今初。

所將人衆。中路懈退。白導師言。我等疲極。而復怖畏。不能復進。前路猶遠。今欲退還。

『中路』：發心為始，成佛為終，兩者中間，而起退意，非指半途也。

『白導師言』：有慈悲導師，（一般稱謂）因地結緣導師，果地權智實智導師，此指白結緣之導師。退大則大機滅，接小則小機生，一生二滅感於法身，義如『白』。『疲極』：譬善根微弱，無明所賜。『怖畏』：譬懼生死，不能放膽突出。『前路猶遠』：譬三惑難斷。

二、接小，分二：初方便設化，二歡喜前人。今初。

導師多諸方便。而作是念。此等可愍。云何捨大珍寶而欲退還。作是念已。以方便力。於險道中過三百由旬。化作一城。告衆人言。汝等勿怖。莫得退還。今此大城。可於中止。隨意所作。若人是城。快得安隱。若能前至寶所亦可得去。

『多諸方便』：譬如來權智。『此等可愍』：知其無大機。『化作一

城』：知其可小接。『汝等勿怖，莫得退還』：譬三轉中之勸轉。『今此大城可於中止，隨意所作』：是示轉。『若人是城，快得安隱』：是證轉。

『若能前至寶所，亦可得去』：未開顯前，此語似早，若密聞無妨，或論宿世，亦可得說，總之開權顯實後即得說之。

二、歡喜前入。

是時疲極之衆。心大歡喜。歎未曾有。我等今者免斯惡道。快得安隱。於是衆人前入化城。生已度想。生安隱想。

『大歡喜』：即聞慧。『未曾有』：即煖位。『免惡道』：即頂位。

『快安隱』：即忍位。『前入化城』：即見諦。『生已度想』：即無學位。

三、滅化引至寶所譬。

爾時導師。知此人衆即得止息。無復疲倦。即滅化城。語衆人言。汝等去來。寶處在近。向者大城。我所化作爲止息耳。

『寶處』：有二義，若約究竟則以極果爲寶所，如云：唯佛與佛乃能究竟諸法實相，若約分人，即以初發心住爲寶所，如云：得佛法分。『向者大城。我所化作。』：譬廢權顯實。

本經五處開三顯一；方便品約教開三顯一，文云：『如來但以一佛乘故爲衆生說法，無二亦無三。』火宅約行開三顯一（車即行），文云：『各乘大車遊於四方，嬉戲快樂。』信解中約人開三顯一（結會傭作之人，即是長者之兒），文云：『我等昔來真是佛子』。藥草喻中，約差別無差別，知不知權實之理，明開三顯一。今化城正約理開三顯一，破除二乘化理，顯寶所真實一理。下文五百頌解，舉珠爲譬，亦是約理。初立譬竟。

二、法合，分二：初正合，二舉譬帖合。初中二：初合導師譬，二合將導譬。今初。

諸比丘。如來亦復如是。今爲汝等作大導師。知諸生死煩惱惡道。險難長遠。應去應度。

『如來』：合導師。『汝等』：合多衆。『生死』：合果上險難。『煩惱』：合因地險難。『長遠』：合五百由旬。『應去應度』：合善知通塞，亦合欲至寶處。

二、合將導譬。

若衆生但聞一佛乘者。則不欲見佛。不欲親近。便作是念。佛道長遠。久受勤苦乃可得成。佛知是心怯弱下劣。以方便力。而於中道爲止息故。說二涅槃。若衆生住於二地。如來爾時卽便爲說。汝等所作未辦。汝所住地。近於佛慧。當觀察籌量所得涅槃。非真實也。但是如來方便之力。於一佛乘分別說三。

『若衆生』：合所將人衆。『但聞一佛乘。……乃可得成。』：合中路懈退譬。『佛知是心……說二涅槃。』：合化作一城譬，有餘無餘爲聲聞緣覺二涅槃。『衆生住於二地』：合前生已度想，生安隱想。

二、舉譬帖合。

如彼導師爲止息故。化作大城。既知息已。而告之言。寶處在近。此城非實。我化作耳。

『化作大城』：帖合施三。『寶處在近』：帖合顯一。

二、重頌，分二：初頌結緣之由。二頌正結緣。初中二：初頌遠由、二頌近由。初又二：初頌大通智勝成佛，二頌十方梵王請法。今初。

爾時世尊欲重宣此義。而說偈言。

大通智勝佛。十劫坐道場。佛法不現前。不得成佛道。
諸天神龍王。阿修羅衆等。常雨於天華。以供養彼佛。
諸天擊天鼓。並作衆伎樂。香風吹萎華。更雨新好者。

過十小劫已。乃得成佛道。諸天及世人。心皆懷踴躍。
彼佛十六子。皆與其眷屬。千萬億圍繞。俱行至佛所。
頭面禮佛足。而請轉法輪。聖師子法雨。充我及一切。

偈中頌成道前後事，及請轉法輪並眷屬供養，未頌佛壽長遠。

二、頌十方梵王請法。分二：初頌威光照動。二頌梵王來請。今初。

世尊甚難值。久遠時一現。爲覺悟羣生。震動於一切。

二、頌梵王來請。

東方諸世界。五百萬億國。梵宮殿光曜。昔所未曾有。
諸梵見此相。尋來至佛所。散華以供養。並奉上宮殿。
請佛轉法輪。以偈而讚歎。佛知時未至。受請默然坐。
三方及四維。上下亦復爾。散華奉宮殿。請佛轉法輪。
世尊甚難值。願以本慈悲。廣開甘露門。轉無上法輪。

前三偈頌東方，後二偈總頌九方。初頌遠由竟。

二、頌近由，分二：初頌轉半字法輪，二頌轉廢半明滿法輪。今初。

無量慧世尊。受彼衆人請。爲宣種種法。四諦十二緣。
無明至老死。皆從生緣有。如是衆過患。汝等應當知。
宣暢是法時。六百萬億姪。得盡諸苦際。皆成阿羅漢。
第二說法時。千萬恒沙衆。於諸法不受。亦得阿羅漢。
從是後得道。其數無有量。萬億劫算數。不能得其邊。

『無明至老死皆從生緣有』：謂此有故彼有，指無明爲行之生緣，行爲識之生緣，乃至生爲老死之生緣。『盡諸苦際』：知其過患，用觀智滅無明，此滅故彼滅。『六百萬億姪』：十萬爲億，十億爲兆，百億爲京，千億爲秭，萬億爲姪。

二、頌轉廢半明滿法輪。

時十六王子。出家作沙彌。皆共請彼佛。演說大乘法。
我等及營從。皆當成佛道。願得如世尊。慧眼第一淨。
佛知童子心。宿世之所行。以無量因緣。種種諸譬喻。
說六波羅密。及諸神通事。分別真實法。菩薩所行道。
說是法華經。如恒河沙偈。彼佛說經已。靜室入禪定。
一心二處坐。八萬四千劫。

偈中頌諸子出家請法，雖未頌所將亦出家，但以營從二字該之，因緣譬喻波羅密句，含頌二萬劫先說方等般若等，頌說法華入定文顯，未頌有解不解。『如恒河沙偈』：稱性應機之談，廣略不同。如今經七卷二十八品，燈明說六十劫，大通演八千劫，常不輕於威音王所，聞二十萬億偈，喜見（藥王前身）於日月淨明德佛處，聞八萬億阿閼婆偈。

二、頌正結緣，分二：初頌法說、二頌譬說。初中三：初頌昔共結緣，二頌中間更相值遇，三頌今日還說法華。今初。

是諸沙彌等。知佛禪未出。爲無量億衆。說佛無上慧。
各各坐法座。說是大乘經。於佛宴寂後。宣揚助法化。
一一沙彌等。所度諸衆生。有六百萬億。恒河沙等衆。

二、頌中間更相值遇。

彼佛滅度後。是諸聞法者。在在諸佛土。常與師俱生。

三、頌今日還說法華，分二：初頌結會古今。二頌正明還說法華。今初。

是十六沙彌。具足行佛道。今現在十方。各得成正覺。
爾時聞法者。各在諸佛所。其有住聲聞。漸教以佛道。
我在十六數。曾亦爲汝說。是故以方便。引汝趣佛慧。

列一偈頌結師之古今，次二偈但頌會現在弟子古今，略不頌未來弟子。

二、頌正明還說法華（但頌應時故說，略不頌釋開三意）。

以是本因緣。今說法華經。令汝入佛道。慎勿懷驚懼。

正明說法本因，由往昔因緣，故復爲說，汝等當直下承當，勿得更懷驚懼於胸。初頌法說竟。

二、頌譬說，分二：初頌立譬，二頌法合。初中二：初頌導師譬，二頌將導譬。今初。

譬如險惡道。迴絕多毒獸。又復無水草。人所怖畏處。
無數千萬衆。欲過此險道。其路甚曠遠。經五百由旬。
時有一導師。強識有智慧。明了心決定。在險濟衆難。

長文云『曠絕無人』，今頌云『迴絕多毒獸』，人譬菩提涅槃，獸譬煩惱生死，獸多且毒，正以小機，見思惑重，五濁障深，不得行大道。『無水草』：水譬禪定，草譬智慧。『強識』：頌聰慧明達。『在險』：頌善知險道通塞之相。

二、頌將導譬，分二：初頌所將人衆中路懈退。二頌滅化引至寶所。初中二：初頌衆人退大，二頌導師接小，今初衆人退大。

衆人皆疲倦。而白導師言。我等今頓乏。於此欲退還。

二、頌導師接小。又二：初頌方便設化，二頌歡喜前入。今初。

導師作是念。此輩甚可愍。如何欲退還。而失大珍寶。
尋時思方便。當設神通力。化作大城郭。莊嚴諸舍宅。
周而有園林。渠流及浴池。重門高樓閣。男女皆充滿。
卽作是化已。慰衆言勿懼。汝等人此城。各可隨所樂。

『城郭』：內曰城，外曰郭，譬有餘、無餘二涅槃。『舍』：譬二乘生緣慈悲。『宅』：譬二乘生空智。『園林』：譬二乘總持無漏法林。『渠流』：譬九次第定。『浴池』：譬八解脫。『重門』：譬三解脫門。『樓閣』：譬盡智無生智。『男女』：男譬禪定，女譬智慧。

約圓教觀心釋者，智體周遍如城。善法圓足如郭，畢竟空爲舍宅，性具萬行爲園林，九種大禪爲渠流浴池，生死二空爲重門，一心三智爲高樓閣，直善成自行如男，慈悲化他如女。

二、頌歡喜前入。

諸人旣入城。心皆大歡喜。皆生安隱想。自謂已得度。

初頌所將人衆，中路懈退竟。

二、頌滅化引至寶所。

導師知息已。集衆而告言。汝等當前進。此是化城耳。
我見汝疲極。中路欲退還。故以方便力。權化作此城。
汝今勤精進。當共至寶所。

初頌立譬竟。

二、頌法合，分二：初頌正合，二頌舉譬帖合。初中二：初頌合導師，二頌合將導。今初。

我亦復如是，爲一切導師。

二、頌合將導。

見諸求道者。中路而懈廢。不能度生死。煩惱諸險道。
故以方便力。爲息說涅槃。言汝等苦滅。所作皆已辦。
既知到涅槃。皆得阿羅漢。爾乃集大眾。爲說真實法。
諸佛方便力。分別說三乘。唯有一佛乘。息處故說二。
今爲汝說實。汝所得非滅。爲佛一切智。當發大精進。
汝證一切智。十力等佛法。具三十二相。乃是真實滅。

『息處故說二』：聲聞緣覺有餘無餘之涅槃。『一切智』：是般若。
『三十二相』：是法身。『真實滅』：是解脫，三德不縱橫，卽是如來秘密
之藏。又一切智，是法性識，十力等是法性受想行，三十二相卽法性色，獲
得究竟常樂我淨法性五陰，盡未來際不生不滅，乃名真實滅，二乘灰斷仍受
變易生死，故云『汝所得非滅』。初頌正合竟。

二、舉譬帖合。

諸佛之導師。爲息說涅槃。既知是息已。引入於佛慧。

初二句帖合施權，次二句帖合顯實。

三、因緣說周中，初正說因緣竟。釋化城喻品竟。次釋五百弟子受記品。

五百弟子授記品第八

三、因緣說周（化城喻品）中有兩科文：初正說因緣（大通佛時十六沙彌），二授下根記（五百弟子授記品——繫珠喻）分二——初此品授千二百記（但標五百者，以五百得記名同，五百口陳領解也。）、二學無學品授二千人記。初中二，初授滿慈子，二授千二百人。初又二，初序默領解，二如來述成。初及二，初敘其得解歡喜，二敘其默念領解。今初。

爾時富樓那彌多羅尼子。從佛聞是智慧方便隨宜說法。又聞授諸大弟子阿耨多羅三藐三菩提記。復聞宿世因緣之事。復聞諸佛有大自在神通之力。得未曾有。心淨踊躍。卽從座起。到於佛前。頭面禮足。却住一面。瞻仰尊顏。目不暫捨。

得解之由有四：初聞法譬二周開三顯一（智慧是領二處之實，方便隨宜是領二處之權。）二聞授身子等五大弟子記（諸大弟子卽領開權，授菩提記卽領實。）三復聞宿世結緣之事（先教無上道今還說法華是領實，常與師俱是領權。）四復聞諸佛有大自在神通力（觀彼久遠猶若今日權立化城，如彼導師，亦各具權實二義。）『得未曾有』：從昔未聞開權顯實，而今得聞。『心淨』：除涅槃愛，破無明惑。『踊躍』：開佛知見，得解由佛，故起內解歡喜，外形恭敬。

二、敘其默念領解。

而作是念。世尊甚奇特。所爲希有。隨順世間若干種性。以方便知見而爲說法。拔出衆生處處貪著。我等於佛功德。言不能宣。唯佛世尊。能知我等深心本願。

文有二意，初明默念領解，次唯佛世尊下，明默求發迹請記。

上二周得悟，因下根未悟，皆口陳領解，不求發迹。今下根已悟，無所勸動，權化事足，故默念，且默念領解爲大領解，如淨名默然，是真入不二

門。『世尊甚奇特所為希有』——領實智，『隨順世間若干種性以方便知見而為說法』——領權智，此領方便品中開權顯實意。『拔出衆生處處貪著』：領火宅中開權顯實。『我等於佛功德言不能宣』：領藥草喻中如來復有無量功德，汝等所不能及。『我等深心本願』：我等是通念請發諸人迹，深心是三世助佛宣化之本懷，本願是本求無上大菩提，從深心故須發迹，從本願故須授記。初敘默念領解竟。

二如來迹記分二：初長文，二偈頌。初中二：初述本迹，二與授記。初又三：初就釋迹世行因發迹，二約過去世顯其本行，三就三世佛所修因。今初。

爾時佛告諸比丘。汝等見是富樓那彌多羅尼子不。我常稱其於說法人中。最為第一。亦常歎其種種功德。精勤護持。助宣我法。能於四衆示教利喜。具足解釋佛之正法，而大饒益同梵行者。自捨如來。無能盡其言論之辯。

衆人但見富樓那，迹為聲聞，不知其本是菩薩。『說法人中，最為第一』，若非法身妙本，無以垂於第一勝迹，此舉迹以顯本。『種種功德』：本地福慧萬行莊嚴，此舉本以明迹。『精勤護持，助宣我法』：念助宣五味半滿，兼但對帶純圓等法。『能於四衆示教利喜』：是述其迹中助宣半字法門。『具足解釋佛之正法』：是述其迹中助宣滿字法門。『而大饒益同梵行者』：助佛饒益迹中所化半滿弟子，同修清白梵行之伴侶。『自捨如來』：妙覺以下皆無能知其功德。

二、約過去世顯其本行。

汝等勿謂富樓那。但能護持助宣我法。亦於過去九十億諸佛所。護持助宣佛之正法。於彼說法人中亦最第一。又於諸佛所說空法。明了通達。得四無礙智。常能審諦清淨說法。無有疑惑。具足菩薩神通之力。隨其壽命。常修梵行。彼佛世人。咸皆謂之實是聲

聞。而富樓那以斯方便。饒益無量百千衆生。又化無量阿僧祇人。令立阿耨多羅三藐三菩提。爲淨佛土故。常作佛事教化衆生。

今日助宣爲發迹，過去助宣爲顯本，顯本有遠近，舉九十億近本以證遠。『護持助宣』：助佛宣揚權實之教，意指助宣半字酪味法。『所說空法』：析空、體空、第一義空，用擬阿含、方等、般若三味，意指助宣熟酥一相一味寂滅法，亦如今佛轉教說般若，六波羅密互相收攝（大品富樓那品，六度互嚴）。『咸皆謂之實是聲聞』：於時既未發迹，但謂三藏實證，方等被訶，般若被加不言是大菩薩。『化無量衆生令立阿耨多羅三藐三菩提』：別明開權顯實，同今法華，助宣醍醐味法。

三、約三世佛所修因。

諸比丘。富樓那。亦於七佛說法人中而得第一。今於我所說法人中亦爲第一。於賢劫中當來諸佛說法人中亦復第一。而皆護持助宣佛法。亦於未來護持助宣無量無邊諸佛之法。教化饒益無量衆生。令立阿耨多羅三藐三菩提。爲淨佛土故。常勤精進教化衆生。

亦例前助宣半滿五味利益大小。『七佛』：釋迦以前之七佛，卽毘婆尸佛、尸棄佛、毘舍浮佛、拘留孫佛、拘那含牟尼佛、迦葉佛、釋迦牟尼佛。此中前三佛爲過去莊嚴劫之最後三佛，次四佛爲現在賢劫之出世者。大悲經三曰：『阿難我滅度後此賢劫中當有九百九十六佛出興於世，拘留孫如來爲首，我爲第四（出於第九減劫），次後彌勒當補我處（出於第十減劫），乃至最後盧遮（樓至）如來，（出於第二增劫），如是次第，汝應當知。』法華玄義亦曰：『摩耶是千佛之母，淨飯是千佛之父，羅睺羅千佛之子。』又藥王經曰：『華光佛爲首，毘沙浮佛爲終，於現在賢劫中成道之千佛。日光佛爲首，須彌相爲終，於未來星宿劫當成佛。』初述本迹竟。

二與授記分五：初明因圓果滿，二、明國土廣淨，三、明劫國名字，四、明佛壽法住，五、明滅後供養舍利。今初。

漸漸具足菩薩之道。過無量阿僧祇劫。當於此土得阿耨多羅三藐三菩提。號曰法明如來。應供。正徧知。明行足。善逝。世間解。無上士。調御丈夫。天人師。佛。世尊。

初一句明因圓，餘文爲果滿。

二、明國土廣淨，分五：初明國大嚴淨，二、明純是善道，三、明人天福慧具足，四、明菩薩聲聞衆數甚多，五、總結莊嚴。今初。

其佛以恒河沙等三千大千世界爲一佛土。七寶爲地。地平如掌。無有山陵谿澗溝壑。七寶臺觀。充滿其中。諸天宮殿。近處虛空。人天交接。兩得相見。

『地平如掌』：非指人掌，海底有石名掌，此石無有一微塵許不平，當引是海掌，或賢劫經正明如佛手掌。『三千大千世界』：智論七，佛地論六曰：須彌山爲中心，七山八海交互繞之，更以鐵圍山爲外郭，是一小世界。合此小世界一千爲小千世界，合此小千世界一千爲中千世界，合此中千世界一千爲大千世界，小中大三千組成一佛所化之土，且此三千大千之廣，恰等於第四禪天，成壞必同時。

二、明純是善道。

無諸惡道。亦無女人。一切衆生皆以化生。無有淫欲。

有女人而無惡道，如阿閼佛國，雖有女人而無女事。今惡道女人俱無，則如無量壽國，無三惡道，女人往生皆現丈夫相。

三、明人天福慧具足。

得大神通。身出光明。飛行自在。志念堅固。精進智慧。普皆金色。三十二相而自莊嚴。其國衆生常以二食。一者法喜食。二者禪悅食。

『法喜食』：聞法歡喜，以資慧命。『禪悅食』：入禪適悅以持法身，

不須分段飲食也。

四、明菩薩聲聞衆數甚多。

有無量阿僧祇千萬億那由他諸菩薩衆。得大神通。四無礙智。善能教化衆生之類。其聲聞衆。算數校計所不能知。皆得具足六通三明。及八解脫。

『四無礙智』：卽法無礙，義無礙，辭無礙，樂說無礙。『三明』：佛曰三達，羅漢曰三明，卽宿命、天眼、漏盡。『八解脫』：卽八背捨，意謂背棄三界貪愛而得解脫。

五、總結莊嚴。

其佛國土。有如是等無量功德莊嚴成就。

三、明劫國名字。

劫名寶明。國名善淨。

四、明佛壽法住。

其佛壽命。無量阿僧祇劫。法住甚久。

五、明滅後供養舍利。

佛滅度後。起七寶塔。徧滿其國。

二、如來述成中長文竟。

二、偈頌分二：初頌發迹。二頌授記。初中二：初總發諸聲聞迹，二頌發富樓那迹。今初。

爾時世尊欲重宣此義。而說偈言。

諸比丘諦聽。佛子所行道。善學方便故。不可得思議。
知衆樂小法。而畏於大智。是故諸菩薩。作聲聞緣覺。

以無數方便。化諸衆生類。自說是聲聞。去佛道甚遠。度脫無量衆。皆悉得成就。雖小欲懈怠。漸當令作佛。內秘菩薩行。外現是聲聞。少欲厭生死。實自淨佛土。示衆有三毒。又現邪見相。我弟子如是。方便度衆生。若我具足說。種種現化事。衆生聞是者。心則懷疑惑。

『小欲』：示求小乘。『懈怠』：示退大乘。非但亦爲聲聞，亦作外道及三毒凡夫，如身子聞佛說其食不淨食，誓不再受人請示暝，難陀愛妻不貪，調達害佛及周利槃陀示癡畢陵伽婆之慢，三迦葉崇事水火等，皆大權示現。

二、頌發富樓那迹。

今此富樓那。於昔千億佛。勤修所行道。宣護諸佛法。爲求無上慧。而於諸佛所。現居弟子上。多聞有智慧。所說無所畏。能令衆歡喜。未曾有疲倦。而以助佛事。已度大神通。具四無礙智。知諸根利鈍。常說清淨法。演暢如是義。教諸千億衆。令住大乘法。而自淨佛土。未來亦供養。無量無數佛。護助宣正法。亦自淨佛土。常以諸方便。說法無所畏。度不可計衆。成就一切智。

前五偈約過去佛顯本，後二偈就未來佛行因，略不頌現在佛及七佛。初頌發迹竟。

二、頌授記分三：初頌因圓果滿，二、超頌國劫名字，三、頌國土廣淨（略不頌佛壽法住及滅後起塔）。今初。

供養諸如來。護持法寶藏。其後得成佛。號名曰法明。

初半行頌因圓，次半行頌果滿。

二、超頌國劫名字。

其國名善淨。七寶所合成。劫名爲寶明。

三、頌國土廣淨。

菩薩衆甚多。其數無量億。皆度大神通。威德力具足。充滿其國土。聲聞亦無數。三明八解脫。得四無礙智。以是等爲僧。其國諸衆生。淫欲皆已斷。純一變化生。具相莊嚴身。法喜禪悅食。更無餘食想。無有諸女人。亦無諸惡道。富樓那比丘。功德悉成滿。當得斯淨土。賢聖衆甚多。如是無量事。我今但略說。

略不頌壽命法住滅後起塔。初授滿慈子記竟。

二、授千二百人記分三：初念請、二與記、三領解。今初。

爾時千二百阿羅漢心自在者。作是念。我等歡喜。得未曾有。若世尊各見授記。如餘大弟子者。不亦快乎。

二、與記分二：初長文、二、偈頌。初中三：初總記千二百，二、別記橋陳如，三、別記五百。今初。

佛知此等心之所念。告摩訶迦葉。是千二百阿羅漢。我今當現前次第與授阿耨多羅三藐三菩提記。

二、別記橋陳如。

於此衆中。我大弟子橋陳如比丘。當供養六萬二千億佛。然後得成爲佛。號曰普明如來。應供。正徧知。明行足。善逝。世間解。無上士。調御丈夫。天人師。佛。世尊。

陳如最初得度，爲僧上座，故別授記。

三、別記五百。

其五百阿羅漢。優樓頻螺迦葉。伽耶迦葉。那提迦葉。

迦留陀夷。優陀夷。阿菟樓駄。離婆多。劫賓那。薄拘羅。周陀。莎伽陀等。皆當得阿耨多羅三藐三菩提。盡同一號。名曰普明。

優樓頻螺又云鬱爲，譯木瓜林。伽耶，譯城。那提，譯江。三迦葉爲兄弟，皆爲佛弟子。十二遊經曰：『三年爲鬱爲迦葉兄弟三人說法，滿千比丘。』『迦留陀夷』：此云，黑光。據毘尼爲六羣之一，年七十餘方得調伏，證阿羅漢，勸化第一，足一千家。『優陀夷』：亦云優波離，持律第一。

『周陀』：亦云周利，此云大路邊生，證阿羅漢能持三藏。『莎伽陀』：亦云繫陀伽，此云小路邊生，兄周陀授一句伽陀，百日不能成誦，佛親授我拂塵，我除垢，猶復得前遺後，教以調息方證聖果，其神力降毒龍。前列衆中有橋梵婆提、畢陵伽婆蹉、摩訶俱絺羅、難陀、孫陀羅難陀，不見別授，或總攝五百人及千百人中，長文竟。

二、偈頌分二：初頌記陳如及五百，二頌授總授聲聞記。今初。

爾時世尊欲重宣此義。而說偈言。

橋陳如比丘。當見無量佛。過阿僧祇劫。乃成等正覺。
常放大光明。具足諸神通。名聞徧十方。一切之所敬。
常說無上道。故號爲普明。其國土清淨。菩薩皆勇猛。
咸升妙樓閣。遊諸十方國。以無上供具。奉獻於諸佛。

作是供養已。心懷大歡喜。須臾還本國。有如是神力。佛壽六萬劫。正法住倍壽。像法復倍是。法滅天人憂。其五百比丘。次第當作佛。同號曰普明。轉次而授記。我滅度之後。某甲當作佛。其所化世間。亦如我今日。國土之嚴淨。及諸神通力。菩薩聲聞衆。正法及像法。壽命劫多少。皆如上所說。

先頌授陳如記，初二句明行因。次兩偈明得果。次兩偈半明國淨。次一句明佛壽。次三句明正像末。最後二偈半頌五百記。

二、頌總授聲聞記。

迦葉汝已知。五百自在者。餘諸聲聞衆。亦當復如是。其不在此會。汝當爲宣說。

『餘諸聲聞』：指千二百人中已授五百，餘七百人並總指一切聲聞。

『其不在此會者』：無論在與不在得記是同。授千二百記中，第二與記竟。

三、領解分二：初長文，二偈頌。初中二：初經家敘喜，二、自陳領解。今初。

爾時五百阿羅漢。於佛前得授記已。歡喜踊躍。卽從座起到於佛前。頭面禮足。悔過自責。

內心歡喜，外形恭敬，歡喜踊躍是慶今得解，悔過自責是愧昔不解。

二、自陳領解分二：初法說，次譬說。今初。

世尊。我等常作是念。自謂已得究竟滅度。今乃知之如無智者。所以者何。我等應得如來智慧。而便自以小智爲足。

『自謂已得究竟滅度』：是悔責昔迷。『得小爲足』：不知求大。『今

乃知之，如無智者。』：是慶今始悟，亦自責根鈍不能早悟，封小失大，等於無智。

二、譬說分二：初立譬，二法合。初中二：初醉酒譬（譬自謂滅度小智爲足）。二、親友覺悟譬（譬今乃知之，應得如來智慧。）初又二：一、初繫珠譬（領上王子結緣）。二、醉臥不覺譬（領上中間退大）。三、起已遊行譬（領上接之以小）。今初。

世尊。譬如有人至親友家。醉酒而臥。是時親友。官事當行。以無價寶珠繫其衣裏。與之而去。

『有人』：五百二乘自譬。『親友』：譬昔日十六王子。『家』：譬大乘教。『醉酒而臥』：譬無明從未醒。醉有二義——一重醉，都不覺知。二輕醉，微覺尋忘，在五品之初，未入相似位。『官事當行』：譬王子餘處機興逗緣往應，化他非私務，曰官事。『無價寶珠』：譬一乘實相。『繫其衣裏』：譬慚愧忍辱二衣。聞法所生信樂之心，爲內裏善根了因智願種子。

二、醉臥不覺。

其人醉臥。都不覺知。

此譬無明心重，尋復不憶，領中間懈退，不受大法。

三、起已遊行譬。

起已。遊行。到於他國。爲衣食故勤力求索。甚大艱難。若少有所得。便以爲足。

『起已遊行』：譬善根欲發，厭苦求樂。『到於他國』：譬背大乘國，往小乘土。『衣食』：譬正助二行。『求索艱難』：譬除糞未入正法。『少有所得便以爲是』：譬傭作自資，秉權教得小果。初醉酒譬竟。

二、親友覺悟譬（領上以是本因緣今說法華經，等賜諸子白牛大車）。文分三：初呵責。二、示珠。三、歡賢。今初。

於後親友會遇見之。而作是言。咄哉丈夫。何爲衣食乃至如是。

『會遇見之』：譬大乘機發。『咄哉』：訶責之詞，譬動執生疑。三周中皆有訶責之辭，法說中『我令脫苦縛』，譬說中『我先不言皆爲三菩提耶』，因緣說中『宿世因緣我今當說』等。

二、示珠。

我昔欲令汝得安樂五欲自恣。於某年月日。以無價寶珠繫汝衣裏。今故現在。而汝不知。勤苦憂惱以求自活。甚爲癡也。

『安樂』：譬大般涅槃。『五欲自恣』：譬大乘稱性真實受用。『某年月日』：譬十六王子輔講法華時。『今故現在』：譬正開顯。法說中廣明五佛，譬說中等賜大車，因緣說中覆講結緣，還爲說大，皆示珠之義。

三、勸買。

汝今可以此寶。貿易所需。常可如意。無所乏短。

珠雖無價，須貿易，方顯其用，性具萬德，靠解行以竟其功。勸買之義，如法說中身子得記，譬說中四人得記，因緣說中千二，二千得記。初立譬竟。

二、法合分二：初合醉酒，二合覺悟。初中三：初合繫珠，二合醉臥不知，三合起已遊行得少爲足。今初。

佛亦如是。爲菩薩時。教化我等令發一切智心。

二、合醉臥不知。

而尋廢忘。不知不覺。

一、合起已遊行得少爲足。

既得阿羅漢道。自謂滅度。資生艱難。得少爲足。

於三界內資生艱難，無大乘功德法財資生艱難，故得少爲足，保果不前。初合醉酒譬竟。

二、合親友覺悟譬分三：初合訶責。二合示珠，三合勸買。今初。

一切智願。猶在不失。今者世尊覺悟我等。作如是言。諸比丘。汝等所得。非究竟滅。

二、合示珠。

我久令汝等種佛善根。以方便故示涅槃相。而汝謂爲實得滅度。

三、合勸買。

世尊。我今乃知實是菩薩。得受阿耨多羅三藐三菩提記。以是因緣。甚大歡喜。得未曾有。

三、領解中初長文竟。

二、倡頌分二：初頌內心得解，二頌自陳領解。今初。

爾時阿若憍陳如等欲重宣此義。而說偈言。

我等聞無上。安隱授記聲。歡喜未曾有。禮無量智佛。

今於世尊前。自悔諸過咎。

初一偈頌歡喜得解，次半偈頌悔過自責。

二、頌自陳領解分二：初頌法說，二頌譬說。今初。

於無量佛寶。得少涅槃分。如無智愚人。便自以爲足。

二、頌譬說分二：初頌立譬，二頌法合。初中二：初頌醉酒譬。二頌親友覺悟譬。今初。

譬如貧窮人。往至親友家。其家甚大富。具設諸肴膳。以無價寶珠。繫著內衣裏。默與而捨去。時臥不覺知。是人既已起。遊行詣他國。求衣食自濟。資生甚艱難。得少便爲足。更不願好者。不覺內衣裏。有無價寶珠。

『貧窮人』：譬凡夫未有修德。『親友』：譬生佛同一心性。『大富』：譬具足權實功德。『肴膳』：譬諸方便教。『寶珠』：譬一乘教理。『內衣』：譬信樂之心。慚愧忍辱爲外衣，初結緣時具足二衣，退大墮落則無外衣，信樂之內衣亦應不全，但種子仍在，衣弊而已。

二、頌親友覺悟譬。

與珠之親友。後見此貧人。苦切責之已。示以所繫珠。貧人見此珠。其心大歡喜。富有諸財物。五欲而自恣。

實報勝妙五塵，非世間五欲也。初頌立譬竟。

二、頌法合分二：初頌合醉酒。二頌合覺悟。今初。

我等亦如是。世尊於長夜。常愍見教化。令種無上願。我等無智故。不覺亦不知。得少涅槃分。自足不求餘。

初一偈頌合繫珠，次半偈頌合醉臥不知，後半偈頌合起已遊行得少爲足。

二、頌覺悟。

今佛覺悟我。言非實滅度。得佛無上慧。爾乃爲真滅。我今從佛聞。授記莊嚴事。乃轉次受決。身心徧歡喜。

初半偈頌訶責，次半偈頌合示珠，後一偈頌合勸買。

初授千二百記竟。

釋五百弟子受記品竟，次釋授學無學人記品。

授學無學人記品第九

聲聞乘四果中研真斷惑之預流、一來、不還、三果四向曰學人，真窮惑盡之阿羅漢果曰無學人。此品記法華迹門三周說法中因緣周，由彼等聞往昔之因緣，初廻小乘心，發無上菩提心，佛於彼等授當來必當作佛之記別。

約觀心六卽中，理卽非學非無學，餘四爲學，分真已去而學而無學，究竟卽爲無學。

有學無學別卽世界，見道研真卽爲人，修道斷惑卽對治，真窮惑盡無所復學卽第一義。

藏教析法研員爲學，真窮惑盡爲無學。通教體法研真爲學，無真無惑爲無學。別教次第研真爲學，通別惑盡，權實理窮爲無學。圓教研如來藏，有學無學，法性實相，非學非無學。

阿難迹爲學人，羅睺羅迹爲無學，而本地不可思議，餘二千人亦應各有本迹。

因緣說周中授下根人記，五百弟子授記品授千二百記，學無學品授二千人記分二：初請記，二授記。初中二——初二人請，次二千人請。初又二：初默念請，二發言請。今初。

爾時阿難羅睺羅。而作是念。我等自思惟。設得授記。不亦快乎。

二、發言請又二：初引例，二引望。今初。

卽從座起。到於佛前。頭面禮足。俱白佛言。世尊。我等於此亦應有分。唯有如來我等所歸。

二、引望。

又我等爲一切世間天人阿修羅所見知識。阿難常爲侍者。護持法藏。羅睺羅是佛之子。若佛見授阿耨多羅三藐三菩提記者。我願旣滿。衆望亦足。

羅云俗親，阿難法親，位列多識中，總與千二百記，今更索別記也。初二人請竟。

次二千人請。

爾時學無學聲聞弟子二千人。皆從座起。偏袒右肩。到於佛前。一心合掌。瞻仰世尊。如阿難羅睺羅所願。住立一面。

但有默念引例二意，無羅云之親重，阿難之親勝，故不發言引望。

二、授記分二：初記二人，次記二千。初中二：初記阿難。二記羅雲。初又五：初長文、二重頌、三新發意者生疑、四如來發迹釋疑、五阿難顯本述歎。今初。

爾時佛告阿難。汝於來世當得作佛。號山海慧自在通王如來。應供。正徧知。明行足。善逝。世間解。無上士。調御丈夫。天人師。佛。世尊。（初明得果）。當供養六十二億諸佛。護持法藏。然後得阿耨多羅三藐三菩提（二明行因）。教化二十千萬億恒河沙諸菩薩等。令成阿耨多羅三藐三菩提（三明說法度人）。國名常立勝旛。其土清淨。瑠璃為地。劫名妙音徧滿（四明國劫名號）。其佛壽命無量千萬億阿僧祇劫。若人於千萬億無量阿僧祇劫中。算數校計不能得知。（五明佛壽）。正法住世。倍於壽命。像法住世，復倍正法。（六明法住）。阿難。是山海慧自在通王佛。為十方無量千萬億恒河沙等諸佛如來所共讚歎。稱其功德。（七明諸佛稱讚）。

山表實智不動，海表權智應世。

二、重頌。

爾時世尊欲重宣此義。而說偈言。

我今僧中說。阿難持法者。當供養諸佛。然後成正覺。

號曰山海慧。自在通王佛。其國土清淨。名常立勝旛。教化諸菩薩。其數如恒沙。佛有大威德。名聞滿十方。壽命無有量。以愍衆生故。正法倍壽命。像法復倍是。如恒河沙等。無數諸衆生。於此佛法中。種佛道因緣。

三、新發意者生疑。

爾時會中新發意菩薩八千人。咸作是念。我等尚不聞諸大菩薩得如是記。有何因緣。而諸聲聞得如是決。

通疑聲聞今日發心，卽蒙佛記，昔方等中記諸菩薩無量劫行，乃得佛記。新發意卽三賢位。

四、如來發迹釋疑。

爾時世尊知諸菩薩心之所念。而告之曰。諸善男子。我與阿難等於空王佛所。同時發阿耨多羅三藐三菩提心。阿難常樂多聞。我常勤精進。是故我已得成阿耨多羅三藐三菩提。而阿難護持我法。亦護將來諸佛法藏。教化成就諸菩薩衆。其本願如是。故獲斯記。

『空王佛』：過去世之佛，空王爲佛之總名，今爲一佛之名，法曰空，佛曰空王，以空無一切邪執爲入涅槃城之要門。圓覺經曰：『佛爲萬法之王，又曰空王。』又觀佛三昧經九曰：『阿彌陀佛因位爲比丘時，拜此佛之白毫相而成佛。』

釋迦與阿難同學於空王佛所，一精進超前得佛，一多聞持經迹爲侍者，本地如此，故得此妙記。

五、阿難顯本述歎。

阿難面於佛前。自聞授記及國土莊嚴。所願具足。心大歡喜。得未曾有。卽時憶念過去無量千萬億諸佛法藏。通達無礙。如今所聞。亦識本願。爾時阿難而說偈言。

世尊甚希有。令我念過去。無量諸佛法，如今日所聞。

我今無復疑。安住於佛道。方便爲侍者。護持諸佛法。

阿難聞記，又述昔因，而識本願，能憶念過去諸佛法藏，如善財於彌勒樓閣前，聞彈指聲，頓見閣中諸佛境界。

初記阿難竟。

二、記羅睺羅分二——初長文。二重頌。今初。

爾時佛告羅睺羅。汝於來世當得作佛。號蹈七寶華如來。應供。正徧知。明行足。善逝。世間解。無上士。調御丈夫。天人師。佛。世尊。當供養十世界微塵等數諸佛如來。常爲諸佛而作長子。猶如今也。是蹈七寶華佛。國土莊嚴。壽命劫數。所化弟子。正法像法。亦如山海慧自在通王如來無異。亦爲此佛而作長子。過是已後。當得阿耨多羅三藐三菩提。

舉足下足皆蹈寶華，此密行之果也。

二、重頌。

爾時世尊欲重宣此義。而說偈言。

我爲太子時。羅睺爲長子。我今成佛道。受法爲法子。

於未來世中。見無量億佛。皆爲其長子。一心求佛道。

羅睺羅密行。唯我能知之。現爲我長子。以示諸衆生。

無量億千萬。功德不可數。安住於佛法。以求無上道。

初記一人竟。

次記二千人分三：初長文、二重頌、三得記歡喜。今初。

爾時世尊見學無學二千人。其意柔軟。寂然清淨。一心觀佛。佛告阿難。汝見是學無學二千人不。唯然已見。阿難。是諸人等。當供養五十世界微塵數諸佛如來。恭敬尊重。護持法藏。末後同時於十方國。各得成佛。皆同一號。名曰寶相如來。應供。正徧知。明行足。善逝。世間解。無上士。調御丈夫。天人師。佛。世尊。壽命一劫。國土莊嚴。聲聞菩薩。正法像法。皆悉同等。

其想柔軟，無剛強難化之心，寂然清淨，無卒暴不平之氣。

二、重頌。

爾時世尊欲重宣此義。而說偈言。

是二千聲聞。今於我前住。悉皆與授記。未來當成佛。所供養諸佛。如上說塵數。護持其法藏。後當成正覺。各於十方國。悉同一名號。俱時坐道場。以證無上慧。皆名爲寶相。國土及弟子。正法與像法。悉等無有異。咸以諸神通。度十方衆生。名聞普周徧。漸入於涅槃。

三、得記歡喜。

爾時學無學二千人。聞佛授記。歡喜踴躍。而說偈言。世尊慧燈明。我聞授記音。心歡喜充滿。如甘露見灌。

二、迹門正說竟。

顯明大師法集

釋授學無學人記品竟。次釋法師品。

法師品第十

此品明五種法師：一受持、二讀、三誦、四解說、五書寫，除解說爲化他外，餘爲自行。

大論明六種法師：一信力故受，二念力故持，三看文爲讀，四不忘爲誦，五宣傳爲說，六聖人經書難解須解釋。今經合受持爲一，合解說爲一。

法者軌則義，師者訓匠也，法雖可軌，體不自弘，通之在人，師於妙法，再以妙法訓匠於他，自行利他均稱法師。

讀誦書寫是外行，卽如來衣遮一切惡；受持是內行，卽如來座蕩一切相；解說益他，卽如來室生一切善，爲法師三軌。

前三周有八品文（法說周方便品，譬說周譬喻品、信解品、藥草喻品、授記品，因緣說周化城喻品、五百授記品、授學無學人記品。）是迹門正說領解受記。此下五品（法師品、見寶塔品、提婆達多品、勸持品、安樂行品）是迹門流通。法師品傳三世宏經方軌。寶塔品會十方諸佛而付囑，雲集分身，唱入涅槃，募人付囑，出本眷屬，開本壽量。達多品引往古弘經，彼我兼益，以證功德深重，持品八萬大士忍力成者此土弘經，新得記者他土弘經，安樂行品外凡初心欣斯勝福，顧己力弱，無益自他，便生退沒，佛爲此人說安樂行，依之弘法，不慮危苦。

本品分二：初嘆美能持法人，二嘆美所持之法及示通經方軌。初中二：初明稟道弟子功深福重，二明授道師功深福重。初又二：初佛世弟子。二滅後弟子。今初。

爾時世尊因藥王菩薩告八萬大士。藥王。汝見是大衆中無量諸天。龍王。夜叉。乾闥婆。阿修羅。迦樓羅。緊那樓。摩睺羅伽。人。與非人。及比丘比丘尼。優婆塞優婆夷。求聲聞者。求辟支佛者。求佛道者。如是等類。咸於佛前聞妙法華經一偈一句。乃至一念隨喜者。我皆與授記。當得阿耨多羅三藐三菩提。

『因藥王菩薩普告八萬大士』：憑藥王爲法焚身苦行，普告忍力堅固之

八萬大士，欲其效法，精進護持助宣妙法。

藥王在日月淨明德佛法中，名一切衆生喜見菩薩，曾習苦行精勤萬二千歲，爲持法華焚身燒臂，得現一切色身三昧。於雷音宿王華智佛法中，爲妙莊嚴王王子，名淨藏淨眼，化其父母聞妙法出家證果。

『汝見是大衆』等，前三周授三根記。本品是普授記，不惟身子四人，滿慈五百，及千二並二千得記，凡預法華座席之八部四衆求三乘人，但聞一偈一句，一念隨喜，皆得成佛。『一偈一句』：舉少況多，不論何偈何句，只要義合權實本迹十妙四一，功德皆爾。『一念隨喜』：舉淺況深，不論讀誦修行，但能於一念心中深解開權顯實，權實不二，事理圓融，雖具煩惱性，能知如來秘密之藏，廣解一切心之與法皆是佛法。大經所謂少聞多解，雖未有行，但隨喜法及人，功報尚多，況行到耶，必由此經成菩提，雖無劫國，當得理同。

二、滅後弟子。

佛告藥王。又如來滅度之後。若有人聞妙法華經乃至一偈一句。一念隨喜者。我亦與授阿耨多羅三藐三菩提記。

佛陀滅後聞經隨喜，功福與佛世同，故亦得記。

二、明授道師功深福重，分二：初長行。二偈頌。初中二：初別明，二總明（別者人有上下，時有現未，總者不論上下及以現未，逆之得罪，順之得福。）初別中二：初明現世。二明來世。初又二：初明下品師，二明上品師（皆約凡位判）。今初。

若復有人。受持讀誦解說書寫妙法華經乃至一偈。於此經卷敬視如佛。種種供養。華香瓔珞。末香塗香燒香。繒蓋幢幡。衣服伎樂。乃至合掌恭敬。

下品師相，卽五種法師（一受持、二讀、三誦、四解說、五書寫），十種供養（一華、二香、三瓔珞、四末香、五塗香、六燒香、七繒蓋幢幡、八衣服、九伎樂、十合掌）。

藥王當知。是諸人等。已曾供養十萬億佛。於諸佛所成就大願。愍衆生故。生此人間。藥王。若有人問。何等衆生於未來世當得作佛。應示是諸人等。於未來世必得作佛。何以故。若善男子善女人。於法華經乃至一句。受持讀誦。解說書寫。種種供養經卷。華香瓔珞。末香塗香燒香。繒蓋幢幡。衣服伎樂。合掌恭敬。是人一切世間。所應瞻奉。應以如來供養而供養之。當知此人是菩薩。成就阿耨多羅三藐三菩提。哀愍衆生。願生此間。廣演分別妙法華經。

此廣明下品師功報，『已曾供養』等，先明因深。『愍衆生』等，明現功大。『若有人問』等，明未來報重。

佛上初利爲母說法，優闍王等思慕造栴檀像供人瞻禮，世尊回來見像作禮讚曰：『我滅度後賴汝於震旦國，度人無量』，一香像尚能持佛慧命。況持此經之人乎。

二、明上品師。

何況盡能受持種種供養者。藥王。當知是人。自捨清淨業報。於我滅度後。愍衆生故。生於惡世廣演此經。

先況出上品師相，『藥王當知是人，自捨清淨業報』：略明上品師功報，悲願所牽仍是業生，願兼於業，未有神通應生。

二、明來世，分二：初明下品師。二明上品師。今初。

若是善男子善女人。我滅度後。能竊爲一人說法華經乃至一句。當知是人。則如來使。如來所遣。行如來事。

『竊爲一人說法華經乃至一句』：言行所化之少，所說之簡，雖有一句之慧解，無廣聞多學，止堪竊爲一人說一句。未可處衆廣演。大論云：『小慧無多聞，如小雨無雷。』又云：『有慧無多聞，亦不知實相，譬如大暗中，

有目無所覩，有聞無智慧，亦不知實相，譬如大明中，有燈而無照，無聞無智慧，喻如人身牛，有聞有智慧，是所說應受。』故知廣爲人說者，必是多聞多慧。此明下品師相。

然此經是如智所說，說於如理，行人秉此如教，宣於如理，則爲『如來使，如來所遣』。又佛無他事，唯如智照如理爲事，行人依如教，行如理，卽是『行如來事』，又以如智如理化衆生爲事，行人能有大悲，以此經中眞如之理爲衆生說，令得利益，亦名『行如來事』，此明下品師功報。

觀心釋者，智心觀境，境卽眞如，境來發智，智爲如所使，名『如來使』。觀智從如中來，名『如來所遣』。歷一切，無不眞如，眞如卽佛事，名『行如來事』。

二、明上品師。

何況於大眾中。廣爲人說。

以竊爲一人況出普爲大眾，乃至一句況出廣說，此是上品師相，功報之大不言可知。

二、總明現未下上法師，逆之得罪，順之得福。

藥王。若有惡人以不善心。於一劫中現於佛前，常毀罵佛。其罪尚輕。若人以一惡言。毀訾在家出家讀誦法華經者。其罪甚重。

此明逆之得罪，但約初後心，明其輕重，不論福田損益，以佛證平等大慈，恒於惡人生悲憫心，又非惡人所能逼惱，如以禮送人，而人不受，持禍自歸。又如打罵栴檀，亦染香氣，反受佛化，且佛體如空，毀之如唾空，故言罪輕，今初心行人，忍力未成，一聞毀訾，阻礙勝事，是斷佛種，故其罪重。

藥王。其有讀誦法華經者，當知是人。以佛莊嚴而自莊嚴。則爲如來肩所荷擔。其所至方。應隨向禮。一心合掌。恭敬供養。尊重讚歎。華香瓔珞。末香塗香燒香。繒蓋幢幡。衣服餽饌。作諸

伎樂。人中上供而供養之。應持天寶而以散之。天上寶聚。應以奉獻。所以者何。是人歡喜說法。須臾聞之。即得究竟阿耨多羅三藐三菩提故。

此明順之得福。『以佛莊嚴而自莊嚴』：佛以定慧為莊嚴，行人能修定慧故。『如來肩所荷擔』：在背為荷，在肩為擔。修非權非實法身體，即是為如來荷。能權能實二智之用，即是如來擔。『其所至方應隨向禮』：行人有所趣向，悉與實相相應，皆為禮敬供養。『應持天寶』等，舉重況輕，天寶尚應奉供，況人中上供耶。『所以者何』等，釋成應禮應供之意。二明授道師，功深福重中。初長文竟。

二、倡頌分三：初獎勵自行利他。二重頌別總二義。

三、結歎經最第一。今初。

爾時世尊欲重宣此義。而說偈言。

若欲住佛道。成就自然智。常當勤供養。受持法華者。
其有欲疾得。一切種智慧。當受持是經。並供養持者。

『自然智』：即本覺真智，無修無證平等大慧。『一切種智』：即諸佛果智，因修萬行，果具萬德之所證。

二、重頌別總兩義，分二：初頌別明，二頌總明。初中二：初頌現世，二頌來世。今初。

若有能受持。妙法華經者。當知佛所使。愍念諸衆生。
諸有能受持。妙法華經者。捨於清淨土。愍衆故生此。
當知如是人。自在所欲生。能於此惡世。廣說無上法。
應以天華香。及天寶衣服。天上妙寶聚。供養說法者。

初二句頌下品師，次二句頌下品功報，次二句頌上品師，後十句頌上品

功報。『自在所欲生』：是願生。

二、頌來世。

吾滅後惡世。能持是經者。當合掌禮敬。如供養世尊。
上饌衆甘美。及種種衣服。供養是佛子。冀得須臾聞。
若能於後世。受持是經者。我遣在人中。行於如來事。

初二句超頌上品師，次六句明上品功報，次二句追頌下品師，後二句頌下品功報，初頌別明竟。

二、頌總明。

若於一劫中。常懷不善心。作色而罵佛。獲無量衆罪。
其有讀誦持。是法華經者。須臾加惡言。其罪復過彼。
有人求佛道。而於一劫中。合掌在我前，以無數偈讚。
由是讚佛故。得無量功德。歎美持經者。其福復過彼。
於八十億劫。以最妙色聲。及與香味觸。供養持經者。
如是供養已。若得須臾聞。則應自欣慶。我今獲大利。

初二偈頌逆之得罪，後四偈頌順之得福。讚佛功德固大，但佛不因讚而增進，若讚持經者，從此增進，所以福倍，以經典所在卽如來舍利之身。二重頌別總兩義竟。

三、結歎經最第一。

藥王今告汝。我所說諸經。而於此經中。法華最第一。

『諸經』：包括一代時教，始自華嚴終至涅槃。『最第一』：諸大乘經，雖各稱第一，乃兼但對帶相待之第一，法華爲純圓獨妙絕待第一，故曰最。

初歎美能持法人竟。

二、歎美所持之法，及不通經方軌。分二：初長文、二偈頌。初中二：初歎經法、二示方軌。初又五：初約法歎、二約人歎、三約處歎、四約因歎、五約果歎（法勝、人尊、處貴、因巧、果妙）。今初。

爾時佛復告藥王菩薩摩訶薩。我所說經典。無量千萬億。已說今說當說。而於其中。此法華經最爲難信難解。藥王。此經是諸佛秘要之藏。不可分布妄授與人。諸佛世尊之所守護。從昔已來未曾顯說。而此經者。如來現在猶多怨嫉。況滅度後。

『已說』：指般若已前漸頓諸說，皆帶方便，取信爲易。『今說』：指同一座席無量義經，明一生無量。未明無量還一，取信亦易。法華論法則一切差別融通歸一，論人則師第本迹俱甚久遠。二門悉與昔反，故『難信難解』。『當說』：指大涅槃經，法華能解則涅槃易信。『秘要之藏』：隱而不說名秘，總一切法名要，眞如實相色蘊無外名藏。『不可分布』：法妙難信，深智可授，無智益罪。『從昔以來未曾顯說』：於三藏中不說一二乘作佛，亦不明師第本迹，方等般若雖說實相如來藏理，亦未說五乘作佛，亦未發迹顯本，頓漸諸經皆未融會，故名爲秘，此經具說昔所秘法，卽是開『諸佛秘要之藏』。『猶多怨嫉』：如五千退席，佛世尚爾，況滅後也。

二、約人歎。

藥王當知。如來滅後。其能書持讀誦供養爲他人說者。如來則爲以衣覆之。又爲他方現在諸佛之所護念。是人有大信力。及志願力。諸善根力。當知是人與如來共宿。則爲如來手摩其頭。

『如來衣覆』：修學大忍爲衣。『諸佛護念』：實相爲佛，實智爲子，尊崇實相，發生實智，卽爲諸佛護念。『大信力』：信則信理，理卽法身，此經分別功德品明四信功德：一、一念信解，二、解其言趣，三、聞持供養，四、深信觀成。起信論之四信，爲信眞如與三寶，瓔珞經四不壞信，爲佛法僧寶與戒。『志願力』：卽圓四宏誓願，志願是立行，行卽解脫。『善根

力』：根固難動，卽般若德，亦卽圓妙大智，三力卽三德秘藏。『與如來共宿』：初心棲此三力，與如來不殊。『手摩其頭』：摩頭卽授記，行人以願力、善力自行權實爲機感如頭，如果以化他二智如手，開發前人自行權實之頭，感應道交故言摩頂。

三、約處歎。

藥王。在在處處。若說若讀。若誦若書。若經卷所住處。皆應起七寶塔。極令高廣嚴飾。不需復安舍利。所以者何。此中已有如來全身。此塔應以一切華香瓔珞。繒蓋幢幡。伎樂歌頌。供養恭敬。尊重讚歎。若有人得見此塔。禮拜供養。當知是等。皆近阿耨多羅三藐三菩提。

『在在處處』：廣指八相，阿含明四處起塔，佛陀生處，得道處，轉法輪處，入涅槃處等四相。『若說若讀若誦若書』：卽五法師，所持者與法身齊，與法師共宿。『經卷所住處』：此法華經是生法身處，得道之場，法輪正體，大涅槃窟，故四相五師及此經所在皆應起塔供養。『不須復安舍利』：釋論云，碎骨是生身舍利，經卷是如來智慧結晶，爲法身舍利，經著塔中，則爲已有法身全身舍利，故不須復安舍利。『已有如來全身』：生身舍利有碎有全，碎如釋迦，全如多寶。法身舍利亦有全碎，諸方便教爲碎。法華一實爲全。四教五時委簡，或純粹無全或全碎相半，唯此法華皆入實相，再無餘法，爲純全。

四、約因歎。

藥王。多有人在家出家行菩薩道。若不能得見聞讀誦書持供養是法華經者。當知是人未善行菩薩道。若有得聞是經典者。乃能善行菩薩之道。

『未善行菩薩道』：指前三教行人拙度，未能巧度，若人圓教正顯圓實方名巧度，爲善行菩薩道，大論通以衍門爲巧，今經別以一實爲巧。

五、約果歎，分五：初明近果、二立譬、三法合、四釋近、五揀非。今初。

其有衆生求佛道者。若見若聞是法華經。聞已信解受持者。當知是人。得近阿耨多羅三藐三菩提。

『阿耨多羅三藐三菩提』：此云無上正等正覺，有二義——一者初心菩提即圓初住位，二者後心菩提即圓妙覺極果，今明近果，正以圓真如實智爲因，還以爲果。華嚴云：『初發心時便成正覺，位當圓初住。』道前真如即是正因（不思議理即，隨拈一法無非法界），道中真如即爲緣因（名字——聞解色香即中道，事理同一念。觀行——外凡五品。相似——內凡十信。）亦名了因（分證住行向地等覺聖位）。道後真如即是圓果（究竟即）。普賢觀云：『大乘因者諸法實相是，大乘果者亦諸法實相是。』釋論云：『初觀實相名因，觀竟名果。』法華云：『如是本末究竟等。』涅槃云：『發心畢竟二不別。』真如實相不當因果，亦非前後，今約修行則有前後及因果也。新譯金光明經云：『前際如來（理即）不可思議，中際（名字——分證）如來種種莊嚴，後際如來（究竟）常無破壞。』

二、立譬。

藥王。譬如有人。渴乏須水。於彼高原穿鑿求之。猶見乾土。知水尚遠。施功不已。轉見溼土。遂漸至泥。其心決定知水必近。

約觀門釋者，『高原』：譬衆生心具諸煩惱，『穿鑿』：譬修習觀智。『清水』：譬理味。析、體理同故略三藏，依通觀『乾土』：譬乾慧地。『濕土』：譬性地。『泥』：譬見諦。約別觀『穿鑿乾土』：譬別十住，修從假入空觀，斷四住，不見不空，故去水尚遠，『轉見溼土』：譬別十行修從空出假，斷界外塵沙，十向因二觀習中道，伏無明，去水則近。圓觀中道，非空非假，雙照空假，若入初住發真中解，即破無明，如泥澄清，得見中道清水。本文明觀，意在於圓。

約教門釋者，『土』：譬經教。『水』：譬中道。三藏未詮中道，猶如乾土，方等般若帶方便說中道，猶如溼土，法華正直顯露說無上道，猶如泥，

因法華教，生聞思修，悟中道，見佛性所發真慧，不復依文，如獲清水無復土相。

三、法合。

菩薩亦復如是。若未聞未解。未能修習是法華經。當知是人。去阿耨多羅三藐三菩提尚遠。若得聞解思惟修習。必知得近阿耨多羅三藐三菩提。

於法華中獲聞思修，卽是圓觀三慧，方能近果，非乾溼等教中聞思修也。

四、釋近。

所以者何。一切菩薩。阿耨多羅三藐三菩提。皆屬此經。此經開方便門。示真實相。是法華經藏。深固幽遠。無人能到。今佛教化成就菩薩。而爲開示。

『一切菩薩』：明諸權因。『三菩提』：指諸權果，權因權果皆攝屬此經，如乾溼等土，悉依於水。『開方便門示真實相』：昔所不說，今皆說之，方便卽真實，如云：汝等所行是菩薩道，決了聲聞法，是諸經之王，乃至治世語言資生事業，皆與實相不相違背，咸令衆生開示悟入佛之知見。若不開者則『深固幽遠，無人能到。』今開之卽得見水無乾土也。

五、揀非。

藥王。若有菩薩。聞是法華經驚疑怖畏。當知是爲新發意菩薩。若聲聞人。聞是經驚疑怖畏。當知是爲增上慢者。

新發意菩薩，增上慢聲聞，既於此經驚疑怖畏，悉是乾土，尚非濕土，況能見水耶。初歎經法竟。

二、示方軌分二：初正明方法，二明五利益。初中三——初標章，二、解釋，三、勸修。今初。

藥王。若有善男子善女人。如來滅後。欲爲四衆說是法華經者。云何應說。是善男子善女人。入如來室。著如來衣。坐如來座。爾乃應爲四衆廣說斯經。

二、解釋。

如來室者。一切衆生中大慈悲心是。如來衣者。柔和忍辱心是。如來座者一切法空是。

『慈悲室』：就無緣慈同體悲卽法身，若被衆卽解脫，令衆生會於同體卽般若。『柔忍衣』：仁王有五忍——一、伏忍，別菩薩三賢位，一一、信忍，一至三地，三、順忍，四至六地，四、無生忍，七至九地，五、寂滅忍，十地至等覺。天臺觀經疏，指無生忍爲別地圓住，又別十信爲伏忍，三賢爲柔順忍，十地爲無生忍。就忍力所覆卽法身，能覆嚴身卽般若，和光利物卽解脫。『法空座』：就能坐卽般若，所坐卽法身，身座冥稱卽解脫。

又大慈安樂卽資成軌，柔和伏瞋斷惑卽觀照軌，坐座卽眞性執。上云以佛莊嚴卽柔和衣，如來肩所荷擔卽法空座（二乘人空），與如來共宿卽慈悲室。

三、勸修。

安住是中。然後以不懈怠心。爲諸菩薩及四衆廣說是法華經。

安住三法，又勸不懈怠心廣說，故知此是圓觀行五品（隨喜讀誦說法兼行六度正行六度）中前二位，至相似十信位，任運妙音徧滿三千，不待勸也。初正明方法竟。

二、明五利益。

藥王。我於餘國遣化人。爲其集聽法衆（一遣化人）。亦遣化比丘比丘尼。優婆塞優婆夷。聽其說法。是諸化人。聞法信受。隨順不逆（二遣化四衆）。若說法者在空閒處。我時廣遣天龍。鬼

神。乾闥婆。阿修羅等聽其說法（三遣八部）。我雖在異國。時時令說法者得見我身（四見佛身）。若於此經忘失句讀。我還爲說令得具足（五與總持）。

『見我（佛）身』：以生心契佛心，感應道交，是見法佛。二歎經法及示方執中初長文竟。

二、偈頌，分三：初總勸，二、頌長文，三、結勸。今初。

爾時世尊欲重宣此義。而說偈言。

欲捨諸懈怠。應當聽此經。是經難得聞。信受者亦難。

二、頌長文，文二：初但頌約果歎。二、頌方軌。初中二——初頌立譬，二頌法合（略不頌近果、釋近、揀非）。今初。

如人渴需水。穿鑿於高原。猶見乾燥土。知去水尚遠。
漸見溼泥土。決定知近水。

二、頌法合。

藥王汝當知。如是諸人等。不聞法華經。去佛智甚遠。
若聞是深經。決了聲聞法。是諸經之王。聞已諦思維。
當知此人等。近於佛智慧。

初但頌約果歎竟。

二、頌方軌，分二：初頌正明方法。二頌明五利益。今初。

若人說此經。應入如來室。著於如來衣。而坐如來座。
處衆無所畏。廣爲分別說。大慈悲爲室。柔和忍辱衣。
諸法空爲座。處此爲說法。若說此經時。有人惡口罵。

加刀杖瓦石。念佛故應忍。

初偈半頌標章，次一偈頌解釋，後一偈頌勸修。

『念佛』：念釋迦爲一大事因緣出現於世，我應倣效。念他佛，我不敢輕於汝等，汝等皆當作佛。念自佛，豈能與衆生爭。

二、頌明五利益。

我千萬億土，現淨堅固身。於無量億劫。爲衆生說法。

此總明如來應身徧滿十方，以五事守護說經者。

若我滅度後。能說此經者。我遣化四衆。比丘比丘尼。及清淨士女。供養於法師。

此超頌第二遣四衆。

引導諸衆生。集之令聽法。若人欲加惡。刀杖及瓦石。則遣變化人。爲之作衛護。

此追頌第一遣化人。

若說法之人。獨在空閒處。寂寞無人聲。讀誦此經典。我爾時爲現。清淨光明身。若忘失章句。爲說令通利。

此超頌第五與總持。

若人具是德。或爲四衆說。空處讀誦經。皆得見我身。

此頌第四令見佛。『是德』：卽室衣座三德。

若人在空閒。我遣天龍王。夜叉鬼神等。爲作聽法衆。是人樂說法。分別無罣礙。諸佛護念故。能令大衆喜。

此追頌第三遣八部。二頌長文竟。

三、結勸。

若親近法師。速得菩薩道。隨順是師學。得見恆沙佛。

法師品竟。

見寶塔品第十一

『塔』：具云塔婆，此翻方墳，亦翻靈廟，亦翻浮圖。有舍利者名塔，無舍利者名支提。

按阿含明四處起塔，謂佛生處、得道處、轉法輪處、入涅槃處。今法華實相，諸佛三身皆從此生，先佛已居，今佛並坐，當佛亦然。釋迦入塔，二身相稱，如智稱境，表報身生而不生。古佛塔現證經，示法身滅而不滅。分身云集，表應身。

塔出音聲，證前三周說法皆真實，開塔起後，聲徹下方，召本弟子論壽量，四衆皆覩，故言見寶塔品。

瓔珞經校量供養舍利云：『如供養一佛舍利起塔滿一四天下，不如供養生身，由色身有舍利故。又起塔滿大千，供養色身，不如供養法身，由法身有色身故。當知見色不如聞經，以由聞經有法身故，故經偏圓，卽法身全碎功德不等。』今經純圓，是全法身，故持經功深，宏宣力大，多寶佛塔從地涌出證明。

觀心釋者，依經修觀，與法身相應，境智必會，如塔來證經。境智既會，則大報圓滿，如釋迦與多寶同坐一座。以大報圓，故隨機出應，如分身皆集。由多寶出，則三佛得顯，由持經故，卽具三身。

迹門流通中第二見寶塔品爲二，初長文、二偈頌。初中三：初明多寶湧現，二、明分身遠集，三、明釋迦唱募。初又六：初現塔之相，二諸天供養，三多寶稱歎，四時衆驚疑，五大樂說問，六如來答。今初。

爾時佛前有七寶塔。高五百由旬。縱廣二百五十由旬。從地涌出。住在空中。種種寶物而莊校之。五千欄楯。龕室千萬。無數幢幡以爲嚴飾。垂寶瓔珞。寶鈴萬億而懸其上。四面皆出多摩羅跋栴檀之香。充徧世界。其諸旛蓋。以金銀瑠璃。碑磔碼碯。眞珠玫瑰。七寶合成。高至四天王宮。

『七寶』：表全性起修，全修顯性之無作性德，七覺支七聖財（聞、信、戒、定、進、捨、慙）。『高五百由旬』：是一萬里，豎表因中萬行，果中萬德，或表堅超五位（住行向地等）。『縱廣二百五十由旬』：卽一萬里，橫表萬善莊嚴，或表橫出二十五有。『地』：表無明心地，以無所破，破於無明。『空』：表第一義空，以無所住，住第一義空。『從地涌出。住在空中。』：表七方便人，藏理未開，無明所隱，如塔在地，今聞三周開顯，開佛知見，顯出法身，如塔涌空。塔來住空，開門見佛，表發迹顯本。『種種寶物』：表衆多定慧而莊校。『欄楯』：表總持。

『龕室』：表慈悲無量空室。『幢幡』：表神通勝相。『垂諸瓔珞』：表四十地戒定慧陀羅尼功德，上嚴法身，下被衆生。『寶鈴』：表八音四辯。『四面皆出多摩羅跋梅檀之香』：表無作四諦，常樂我淨八德香，多摩羅跋此云藿（交趾有），又云性無垢。『高至四天王宮』：表窮無作四諦之理。

二、諸天供養。

三十三天。雨天曼陀羅華。供養寶塔。餘諸天龍。夜叉。乾闥婆。阿修羅。迦樓羅。緊那羅。摩睺羅伽。人非人等。千萬億衆。以一切華香瓔珞。旛蓋伎樂。供養寶塔。恭敬尊重讚歎。

『三十三天』：事解可知，約理住行向爲三十，十地爲一，等覺爲一，妙覺爲一，同依實相第一義境。『雨天曼陀羅華』：譯圓華，白圓華、適意華、悅意華、雜色華、柔軟華、天妙華等，或曰小圓華。表初心亦具四十二地功德因華向於法身。『天龍。夜叉。乾闥婆。阿修羅。迦樓羅。緊那樓。摩睺羅伽。人非人等。』：表內外凡之八部等（開顯論本迹），亦依實相，向果行因。

三、多寶稱歎。

爾時寶塔中出大音聲。歎言善哉善哉。釋迦牟尼世尊。能以平等大慧教菩薩法。佛所護念。妙法華經。爲大衆說。如是如是。釋迦牟尼世尊。如所說者。皆是眞實。

『善哉善哉』：歎契理契機。『平等大慧』：法平等卽中道，生平等卽一切衆生同圓種智。『如是如是』：一如法性實理之是，二如衆生根性之是，故皆『真實』，證前開權顯實不虛。

四、時衆驚疑。

爾時四衆。見大寶塔住在空中。又聞塔中所出音聲。皆得法喜。怪未曾有。從座而起。恭敬合掌。却住一面。

『得法喜』：領前證。『怪未曾有』：助起後。『四衆』：約三周新悟。有信解行證。又有發起、當機、影響、結緣，或指比丘等四衆。

五、大樂說問。

爾時有菩薩摩訶薩。名大樂說。知一切世間天人阿修羅等心之所疑。而白佛言。世尊。以何因緣。有此寶塔從地涌出。又於其中發是音聲。

准下答意，問亦有三：一、何因有此塔。二、何故塔從地出。三、何故發是音聲。『大樂說』：乃法詞義等辯中之樂說無礙辯。

六、如來答，分三：初超答何故涌出。二、追答何因有塔。三、答何故發是音聲。今初。

爾時佛告大樂說菩薩。此寶塔中有如來全身。乃往過去東方無量千萬億阿僧祇世界。國名寶淨。彼中有佛。號曰多寶。其佛行菩薩道時。作大誓願。若我成佛滅度之後。於十方國土有說法華經處。我之塔廟。爲聽是經故涌現其前。爲作證明。讚言善哉。

此答第二問，寶塔爲證法華所以從地涌出，文中先述本緣，再述昔願。

釋論明多寶如來開三未顯一而取滅度，故隨喜作證。

二、追答何因有塔。

彼佛成道已。臨滅度時。於天人大眾中告諸比丘。我滅度後。欲供養我全身者。應起一大塔。

此答第一問，出彼佛遺命，令造此塔。

三、答何故發是音聲。

其佛以神通願力。十方世界。在在處處。若有說法華經者。彼之寶塔。皆涌出其前。全身在於塔中。讚言善哉善哉。大樂說。今多寶如來塔。聞說法華經故從地涌出。讚言善哉善哉。

此答第三問，為作證明故發是音聲。

菩薩處胎經云：『此大地種，厚八十四萬億里，地下有風、有水、有火、有沙，沙下有金剛剎，諸佛全身舍利，盡在金剛剎，乃至法鼓世界。』

二、明分身遠進，分七：初大樂說請見七寶，二、明應集分身，三、大樂說請集，四、放光遠召，五、諸佛同來，六、嚴淨國界，七、與欲開塔。今初。

是時大樂說菩薩。以如來神力故白佛言。世尊。我等願欲見此佛身。

下列諸文欲開全身之塔，次集分身之佛，再放光遠召唱募付囑，正應開近顯遠，為大事之由，故須如來神力令問。

二、明應集分身。

佛告大樂說菩薩摩訶薩。是多寶佛有深重願。若我寶塔為聽法華經故。出於諸佛前時。其有欲以我身示四眾者。彼佛分身諸佛。在於十方世界說法。盡還集一處。然後我身乃出現耳。大樂說。我分身諸佛。在於十方世界說法者。今應當集。

集分身乃可開塔，正密示本地功德。

三、大樂說請集。

大樂說白佛言。世尊。我等亦願欲見世尊分身諸佛。禮拜供養。

四、放光遠召。

爾時佛放白毫一光。卽見東方五百萬億那由他恒河沙等國土諸佛。彼諸國土。皆爲玻瓈爲地。寶樹寶衣以爲莊嚴。無數千萬億菩薩充滿其中。徧張寶幔。寶網羅上。彼國諸佛。以大妙音而說諸法。及見無量千萬億菩薩。徧滿諸國爲衆說法。南西北方四維上下。白毫相光所照之處。亦復如是。

釋迦指諸佛爲分身，各土諸佛又指釋迦爲分身，彼此互融。此土說法華諸佛來集，他土說法華釋迦亦必往集，賓主歷然。娑婆爲穢土，衆生根劣，必須爲實施權，因施權又須開權顯實，方明如來設化之始要，分身諸佛多是淨土，淨穢交徹，一乘實相之旨，昭然若揭。

五、諸佛同來。

爾時十方諸佛。各告衆菩薩言。善男子。我今應往娑婆世界。釋迦牟尼佛所。並供養多寶如來寶塔。

六、嚴淨國界，分三：初變娑婆，二、變八方各二百萬億那由他，三、更變他方二百萬億那由他。今初。

時娑婆世界。卽變清淨。瑠璃爲地。寶樹莊嚴。黃金爲繩以界八道。無諸聚落村營城邑。大海江河山川林藪。燒大寶香。曼陀羅華。徧布其地。以寶網幔羅覆其上。懸諸寶鈴。唯留此會衆。移諸天人置於他土。是時諸佛。各將一大菩薩以爲侍者。至娑婆世界。各到寶樹下。一一寶樹。高五百由旬。枝葉華果。次第莊嚴。諸寶樹下。皆有師子之座。高五由旬。亦以大寶而校飾之。爾時

諸佛。各於此座結跏趺坐。如是展轉。徧滿三千大千世界。而於釋迦牟尼佛一方所分之身。猶故未盡。

移未熟天人，非移其身相，乃移其知見，以『唯留此會衆』，故下文有『諸天寶華』。

二、變八方二百萬億那由他。

時釋迦牟尼佛。欲容受所分身諸佛故。八方各更變二百萬億那由他國。皆令清淨。無有地獄餓鬼畜生。及阿修羅。又移諸天人置於他土。所化之國。亦以瑠璃爲地。寶樹莊嚴。樹高五百由旬。枝葉華果。次第嚴飾。樹下皆有寶師子座。高五百由旬。種種諸寶以爲莊校。亦無大海江河。及目真鄰陀山。摩訶目真鄰陀山。鐵圍山。大鐵圍山。須彌山等諸山王。通爲一佛國土。寶地平正。寶交露幔。徧覆其上。懸諸旛蓋。燒大寶香。諸天寶華。徧布其地。

『目真鄰陀山』：龍王名，譯爲解脫，聞法而脫龍苦，住於金剛座側之池中。西域記八曰：『帝釋化池東鄰中有月支鄰陀龍王池，其水清黑，其味甘美。西岸有小精舍，中作佛像，昔如來初成正覺，於此宴坐，七日入定，時此龍王警衝而來，卽以其身繞佛七匝，化出多頭俯垂爲蓋。』卽大小石山。

『須彌山』：西域記一曰：『蘇迷盧山，唐言妙高山，舊曰須彌。』凡器世界之最下爲風輪，其上爲水輪，再上爲金輪（卽地輪）。最上有九山、八海，須彌居中，四寶所成，爲一小世界中心，其頂爲帝釋天所居，其半腹爲四天王所居，出水入水皆爲八萬由旬，勝鬘寶窟曰：『海拔三百三十六萬里。』

『鐵圍山』：須彌山外，有七山八海，第八鹹海，圍繞此鹹海者卽鐵圍山，此山由鐵而成，用圍小千界者。

三、更變八方各二百萬億那由他。

釋迦牟尼佛。爲諸佛當來坐故。復於八方。各更變二百萬億那由他國。皆令清淨。無有地獄餓鬼畜生。及阿修羅。又移諸天人置於他土。所化之國。亦以瑠璃爲地。寶樹莊嚴。樹高五百由旬。枝葉華果。次第莊嚴。樹下皆有寶師子座。高五由旬。亦以大寶而校飾之。亦無大海江河。及目真鄰陀山。摩訶目真鄰陀山。鐵圍山。大鐵圍山。須彌山等諸山王。通爲一佛國土。寶地平正。寶交露幔。徧覆其上。懸諸旛蓋。燒大寶香。諸天寶華。徧布其地。爾時東方釋迦牟尼所分身。百千萬億那由他恒河沙等國土中諸佛。各各說法來集於此。如是次第十方諸佛。皆悉來集。坐於八方。爾時一一方。四百萬億那由他國土諸佛如來。徧滿其中。

初變以八背捨禪變娑婆爲淨土，表淨除四住。次變以勝處定變二百萬億那由他爲自在，表淨除塵沙。三變以一切處三昧，更變二百萬億那由他於境廣普，表淨除無明。智論所謂背捨爲初門，勝處爲中行，一切處爲成就（觀禪）。

或云初變，轉六識，破見思，出火宅，二變轉七識，破塵沙，出化城。三變，轉八識，破無明，至寶所。又初變爲方便土，次變爲實報土，三變爲寂光土。三變表根塵識同轉，機有三故三變。地涌顯法身常在，三變，遣染淨之心，集衆，表皆是實相。淨穢無性故能變，自他不隔故說移，約理則融，約事不壞，且事禪理定名殊義一，罪性本空，何必爭論次第與圓破，貴在隨機而用也。

七、與欲開塔，分五：初諸佛問訊說欲，二釋迦開塔，三四衆皆同見聞，四二佛分座，五四衆請加處空。今初。

是時諸佛。各在寶樹下坐師子座。皆遣侍者。問訊釋迦牟尼佛。各齎寶華滿掬。而告之言。善男子。汝往詣耆闍崛山釋迦牟尼佛。

所。如我辭曰。少病少惱。氣力安樂。及菩薩聲聞衆。悉安隱否。以此寶華散佛供養。而作是言。彼某甲佛。與欲開此寶塔。諸佛遣使。亦復如是。

『與欲』：如僧中作法說欲，凡僧中說戒授戒等法事，已有事緣，不能出席，而於此法事隨喜共欲其事之希望，名爲欲，此欲意授他比丘，謂之與欲，其比丘受彼委託，謂之受欲，出僧中而說之，謂之說欲。

大集明若干佛與欲，華嚴亦說十方若干佛同說華嚴。小品亦云千佛同說般若，準今經意，應是釋迦分身，以帶方便，故未顯說。『彼某甲佛』：如云我在異國更有異名。

二、釋迦開塔。

爾時釋迦牟尼佛。見所分身佛悉已來集。各各坐於師子之座。皆聞諸佛。與欲同開寶塔。卽從座起。住虛空中。一切四衆起立合掌。一心觀佛。於是釋迦牟尼佛。以右指開七寶塔戶。出大音聲。如卻關鑰。開大城門。

『以右指開七寶塔戶』：表開權。如彌勒彈指樓閣門開，門門有慈氏。釋迦按指，多寶塔開，人人見多寶。『如卻關鑰』：表卻障動機。

三、四衆皆同見聞。

卽時一切衆會。皆見多寶如來。於寶塔中坐師子座。全身不散。如入禪定。又聞其言。善哉善哉。釋迦牟尼佛。快說是法華經。我爲聽是經故而來至此。爾時四衆等。見過去無量千萬億劫滅度佛說如是言。歎未曾有。以天寶華聚。散多寶佛。及釋迦牟尼佛上。

『見佛』：表顯實。

四、二佛分座而坐。

爾時多寶佛。於寶塔中分半座與釋迦牟尼佛。而作是言。釋迦牟尼佛。可就此座。卽時釋迦牟尼佛。入其塔中。坐其半座。結跏趺座。

五、四衆請加處空。

爾時大衆。見二如來在七寶塔中。師子座上結跏趺坐。各作是念。佛坐高遠。惟願如來以神通力。令我等輩俱處虛空。卽時釋迦牟尼佛。以神通力。接諸大衆皆在虛空。

寶塔與衆在空，分身居地者，以時衆迹門開權，初入寂光，故以空表之，分身示迹，各有所化之土，故居地以表之。二、明分身遠集竟。

三、明釋迦唱募。

以大音聲普告四衆。誰能於此娑婆國土。廣說妙法華經。今正是時。如來不久當入涅槃。佛欲以此妙法華經。付囑有在。

『付囑有在』：近明有在，指法師品初八萬大士，勸持品之初，二萬菩薩。遠令有在，指地湧品，本弟子衆，令觸處流通。初長文竟。

二、偈頌分三：初頌多寶，二頌分身，三頌付囑。今初。

爾時世尊欲重宣此義。而說偈言。

聖主世尊。雖久滅度。在寶塔中。尚爲法來。諸人云何。不勤爲法。此佛滅度。無央數劫。處處聽法。以難遇故。彼佛本願。我滅度後。在在所往。常爲聽法。

二、頌分身。

又我分身。無量諸佛。如恒沙等。來欲聽法。及見滅度。多寶如來。各捨妙土。及弟子衆。天人龍神。諸供養事。令法久住。故來至此。爲坐諸佛。以神通力。移無量衆。令國清淨。諸佛各各。詣寶樹下。如清淨池。蓮華莊嚴。其寶樹下。諸師子座。佛坐其上。光明嚴飾。如夜闇中。然大炬火。身出妙香。徧十方國。衆生蒙熏。喜不自勝。譬如大風。吹小樹枝。以是方便。令法久住。

初三偈，頌應集，兼見多寶，次一偈，頌淨國界，後四偈半，頌諸佛同來。

三、頌付囑分二：初舉三佛以勸流通，二、舉難持之法以勸流通。初中三：初募覓其人，二、正舉三佛以勸持經，三、釋勸意。今初。

告諸大衆。我滅度後。誰能護持。讀說斯經。今於佛前。自說誓言。

二、正舉三佛以勸持經。

其多寶佛。雖久滅度。以大誓願。而師子吼。多寶如來。及與我身。所集化佛。當知此意。諸佛子等。誰能護法。當發大願。令得久住。

三、釋勸意。

其有能護。此經法者。則爲供養。我及多寶。此多寶佛。處於寶塔。常遊十方。爲是經故。亦復供養。諸來化佛。莊嚴光飾。諸世界者。若說此經。則爲見我。多寶如來。及諸化佛。

能護持妙法華經，卽爲供養多寶及釋迦並諸化佛。

二、舉難持之法以勸流通，分二：初正舉勸，二釋勸意。初中三：初誠勸，二正舉難持以勸，三釋難持意。今初。

諸善男子。各諦思惟。此爲難事。宜發大願。

二、正學難持以勸。

諸餘經典。數如恒沙。雖說此等。未足爲難。若接須彌。擲置他方。無數佛土。亦未爲難。若以足指。動大千界。遠擲他國。亦未爲難。若立有頂。爲衆演說。無量餘經。亦未爲難。若佛滅後。於惡世中。能說此經。是則爲難。假使有人。手把虛空。而以遊行。亦未爲難。於我滅後。若自書持。若使人書。是則爲難。若以大地。置足甲上。升於梵天。亦未爲難。佛滅度後。於惡世中。暫讀此經。是則爲難。假使劫燒。擔負乾草。人中不燒。亦未爲難。我滅度後。若持此經。爲一人說。是則爲難。若持八萬。四千法藏。十二部經。爲人演說。令諸聽者。得六神通。雖能如是。亦未爲難。於我滅後。聽受此經。問其義趣。是則爲難。若人說法。令千萬億。無量無數。恒沙衆生。得阿羅漢。具六神通。雖有是益。亦未爲難。於我滅後。若能奉持。如斯經典。是則爲難。

說餘經，接須彌，動大千，立有頂，有富樓之辯，目連之通，身子之智，皆可勝任。把空遊行，提土升天，乾草不燒，空行空，地連天，火接火，若了性火真空週徧法界等，故不難。八萬四千法藏及十二部經，俱通大小。兼但對帶之教易宏，純圓獨妙之經難持。

三、釋難持意。

我爲佛道。於無量土。從始至今。廣說諸經。而於其中。此經第一。若有能持。則持佛身。

久默斯要不務速說，以難持故，因能持者，卽持佛身，以體（實相）宗（化他立權、自行顯實、一乘因果）用（權實二智）三，衣（忍辱）、座

(法空)、室(慈悲)三，卽三身，體，室爲法身，宗：座爲報身，用：衣爲應身。

二、釋勸意，分三：初重募持經之人。二、明能持難持則諸佛喜歎。三、明卽成自行化他勝行。今初。

諸善男子。於我滅後。誰能受持。讀誦此經。今於佛前。自說誓言。

二、明能持難持則諸佛喜歎。

此經難持。若暫持者。我則歡喜。諸佛亦然。如是之人。諸佛所歎。

三、明卽成自行化他勝行。

是則勇猛。是則精進。是名持戒。行頭陀者。則爲疾得。無上佛道。能於來世。讀持此經。是真佛子。住淳善地。(自行勝行)佛滅度後。能解其義。是諸天人。世間之眼。於恐懼世。能須臾說。一切天人。皆應供養。(化他勝行)。

『勇猛』：內自攝持。『精進』：超不退地。『持戒』：內外自正。

『頭陀』：塵勞自淨。

見寶塔品竟。

提婆達多品第十二

鳩摩羅什從秦弘始八年夏，於長安草堂寺譯法華經，譯竟命其門人四聖（生、肇、融、叡）十哲（加曇影、慧嚴、慧觀、僧碧、道常、道標）中，僧叡講之，當時有七卷二十八品，長安宮人請將提婆達多品淹留在內，故江東所傳止得二十七品，梁有滿法師以此品安持品前，陳南岳大師亦以此品次寶塔後，後見長安舊本，方知二師深得經意。

提婆達多，亦云調達，此翻天熱，以其行三逆（一破和合僧，將五百弟子去。二、出佛身血，大石擲佛，佛足出血，置毒爪中，欲於禮佛時傷佛，教闍王放醉象蹋佛。三、殺羅漢，華色比丘尼見而呵之，則以拳殺之。）生時人天心熱。是斛飯王子，阿難親兄。

約教者，前三教逆祇是逆，圓教逆而順，大經云：提婆達多必不害僧。報恩經云：若有人言提婆達多實是惡人阿鼻者，無有是處。大雲經云：提婆達多不可思議所有行業同於如來。

觀心者，楞伽第三云：『斷二根本（無明發業如父，貪愛潤生如母。）名害父母，彼諸使不現，名害羅漢，異相諸陰和合積聚，究竟斷，名破僧，究竟斷彼七種識身煩惱，名出佛身血。』

迹門流通第三品，分二：初明昔日達多通經釋迦成道，二、明今日文殊通經龍女作佛。

初中三：初明往昔師弟持經之相，二、結會古今，三、勸信。初又二：初長文，二、偈頌。長文又四：初明求法時節，二、正明求法，三、求得法師，四、受法奉行。今初。

爾時佛告諸菩薩及天人四衆。吾於過去無量劫中。求法華經無有懈倦。

二、正明求法，分二：初明發願，二、明修行。今初。

於多劫中常作國王。發願求於無上菩提。心不退轉。

二、明修行，分二：初明欲滿檀那勤行布施。二、明爲滿般若勤求妙法。今初。

爲欲滿足六波羅密。勤行布施。心無吝惜。象馬七珍。國城妻子。奴婢僕從。頭目髓腦。身肉手足。不惜軀命。

六波羅密滿相：檀如尸毘王代鴿，施如普明王捨國，忍如仙人被割，進如大施抒海，禪如闍梨雀巢，智如助賓息諍。

二、明爲滿般若勤求妙法。

時世人民。壽命無量。爲於法故。捐捨國位。委政太子。擊鼓宣令。四方求法。誰能爲我說大乘者。吾當終身供給走使。

二、正明求法竟。

三、求得法師。

時有仙人來白王言。我有大乘。名妙法華經。若不違我。當爲宣說。

四、受法奉行。

王聞仙言。歡喜踴躍。卽隨仙人。供給所需。采果汲水。拾薪設食。乃至以身而爲牀座。身心無倦。於時奉事。經於千歲。爲於法故，精勤給侍。令無所乏。

初長文竟。

二偈頌，分四：初頌時節及正求法，二、頌求得法師，三、頌受法奉行，四、結證勸信。今初。

爾時世尊欲重宣此義。而說偈言。

我念過去劫。爲求大法故。雖作世國王。不貪五欲樂。
椎鐘告四方。誰有大法者。若爲我解說。身當爲奴僕。

二、頌求得法師。

時有阿私仙。來白於大王。我有微妙法。世間所希有。若能修行者。吾當爲汝說。

『阿私陀仙』：此云無比。

三、領受法奉行。

時王聞仙言。心生大喜悅。即便隨仙人。供給於所需。采薪及果蔬。隨時恭敬與。情存妙法故。身心無懈倦。普爲諸衆生。勤求於大法。

四、結證勸信。

亦不爲己身。及以五欲樂。故爲大國王。勤求獲此法。遂致得成佛。今故爲汝說。

初明往昔師弟持經之相竟。

二、結會古今，分二：初正結會，二明師弟功報俱滿。今初。

佛告諸比丘。爾時王者。則我身是。時仙人者。今提婆達多是。

二、明師弟功報俱滿，分二：初明弟子圓因報滿，二、明法師妙果當成。今初。

由提婆達多善知識故。令我具足六波羅密。慈悲喜捨。

此明因圓。『善知識』：有三種——一、外護，二、同行，三、教授。

總之，要言行一致，看破名利。『六波羅密』十度（加方便、願、力、智），約教道有事理，證道唯圓，稱性六度，如施爲法界，一切法趣施，是趣不過。『慈悲喜捨』，有生緣、法緣、無緣，三藏二乘但爲自調，菩薩爲法別修，至果乃名無緣，通教三緣，二乘同稟，別教次第修三，圓教一心圓具。

三十二相。八十種好。紫磨金色。十力。四無所畏。四攝法。十八不共神通道力。成等正覺。廣度衆生。

次明果圓，三十二相，諸教所列修得不同，多在教道，三藏以精進持戒爲本，通教以空無生爲本，別教以道種智爲本，圓教以實相爲本。若實道者，但是稱性發得，不須各修。八十種好，十力神通等具如法數不錄。皆因提婆達多善知識故。

此結證由通經之益。提婆達多雖爲佛怨，而能世世相值，足徵爲迹示逆相而誠後學也。初明圓因報滿竟。

二、明法師妙果當成，分三：初明正果成，二明所化度，三明滅後利益。今初。

告諸四衆。提婆達多。卻後過無量劫當得成佛。號曰天王如來。應供。正徧知。明行足。善逝。世間解。無上士。調御丈夫。天人師。佛。世尊。世界名天道。

毘尼藏中，明調達臨入獄時，得無根信（初無信根，蒙佛力而生信。）稱南無，未及稱佛卽陷墮，佛記其三劫罪畢，出獄爲人，當得辟支佛果，號曰南無。旣悟道已，持鉢受供，甫得食時，以宿命通自觀宿行，知是臨終一稱南無佛之力，愧不受食，遂取滅度，與此經稱善知識而得授記，乃大小兩機所見不同。如央掘摩羅，殺人取指冠首爲鬘，懺悔得羅漢果。

二、明所化度。

時天王佛。住世二十中劫。廣爲衆生。說於妙法。恒河沙衆生得阿羅漢果。無量衆生發緣覺心。恒河沙衆生發無上道心。得無生忍。至不退轉。

別教十住證位不退，十向證行不退。十地證念不退。圓教初信證位不退，八至十信證行不退，初住證念不退。

二、明滅後利益。

時天王佛般涅槃後。正法住世。二十中劫。全身舍利起七寶塔。高六十由旬。縱廣四十由旬。諸天人民。悉以雜華。末香燒香塗香。衣服瓔珞。幢旛寶蓋。伎樂歌頌。禮拜供養七寶妙塔。無量衆生得阿羅漢果。無量衆生悟辟支佛。不可思議衆生發菩提心。至不退轉。

三、勸信。

佛告諸比丘。未來世中。若善男子善女人。聞妙法華經提婆達多品。淨心信敬。不生疑惑者。不墮地獄餓鬼畜生。生十方佛前。所生之處。常聞此經。若生人天中。受勝妙樂。若在佛前。蓮華化生。

『淨心信敬』：不於善惡之迹，妄生分別曰淨心，深知生生示現爲怨，正是成就作佛之鍊爐爲信，於彼爲怨爲惱之人，能起真實善知識想爲敬。

『不生疑惑』：明清靈峰天臺三十一祖智旭大師解：『了達鐘以扣鳴，刀以磨利，金以練精，梅以寒香，但取其益，不計其非，如子食乳不譏母醜，如人採果不嫌枝曲。』『蓮華化生』：胎經云：『非界內四生中胎卵濕化之化生，非化而言化也。』如無量壽經云：『處華臺久者爲胎生，實非胎也。』

二、明今日文殊通經龍女作佛，分二：初明通經，二明利益。初中五：初智積請退，二、釋尊止之，三、文殊尋來，四、智積問，五、文殊答。今初。

於時下方多寶世尊。所從菩薩。名曰智積。白多寶佛。當還本土。

『智積』：梵語般若拘羅，爲奉侍供養寶塔者。

釋迦牟尼佛告智積曰。善男子。且待須臾。此有菩薩名文殊師利。可與相見。論說妙法。可還本土。

迹門證經雖畢，本門未彰，故託在文殊以留多寶。

三、文殊尋來。

爾時文殊師利坐千葉蓮華。大如車輪。俱來菩薩。亦坐寶蓮花。從於大海娑竭羅龍宮。自然涌出。住虛空中。詣靈鷲山。從蓮華下。至於佛所。頭面敬禮二世尊足。修敬已畢。往智積所。共相慰問。却坐一面。

文殊大智如海，表從性海流出而來。龍宮表不動，來去示隨緣，所謂不來而來，不往而往，皆為利物，理雖不動，化事成規。『娑竭羅龍宮』：娑竭羅，翻鹹海，依住處得名。

四、智積問。

智積菩薩問文殊師利。仁往龍宮。所化衆生。其數幾何。

五、文殊答，分四：初答利益甚多，二蒙益者集證。三文殊結益，四智積偈讚。今初。

文殊師利言。其數無量。不可稱計。非口所宣。非心所測。且待須臾。自當證知。

二、蒙益者集證。

所言未竟。無數菩薩坐寶蓮華。從海涌出。詣靈鷲山。住在虛空。此諸菩薩。皆是文殊師利之所化度。具菩薩行。皆共論說六波羅密。本聲聞人。在虛空中說聲聞行。今皆修行大乘空義。

蒙益者有二種：一者本發大小心者，二者本是聲聞蒙化向大者。『住在虛空』：同證平等性。『大乘空義』：即諸法實相。

三、文殊結益。

文殊師利謂智積曰。於海教化。其事如是。

四、智積偈讚。

爾時智積菩薩以偈讚曰。

大智德勇健。化度無量衆。今此諸大會。及我皆已見。
演暢實相義。開闡一乘法。廣導諸衆生。令速成菩提。

初明通經竟。

二、明利益，分九：初文殊自敍，二、智積問，三、文殊答，四、智積執別教爲疑，
五、龍女明圓釋疑，六、身子挾三藏權難，七、龍女以一實除疑，八、時衆聞見得益，
九、智積身子默然信受。今初。

文殊師利言。我於海中。唯常宣說妙法華經。

二、智積問。

智積問文殊師利言。此經甚深微妙。諸經中寶。世所希有。頗有
衆生勤加精進。修行此經速得佛不。

三、文殊答。

文殊師利言。有娑竭羅龍王女。年始八歲。智慧利根。善知衆生
諸根行業。得陀羅尼。諸佛所說甚深秘藏。悉能受持。深入禪定。
了達諸法。於剎那頃發菩提心。得不退轉。辯才無礙。慈念衆生
猶如赤子。功德具足。心念口演。微妙廣大。慈悲仁讓。志意和
雅。能至菩提。

文中文殊歎龍女，不出弘誓定慧諸行，『智慧利根，至悉能受持』等句，
是圓慧。『深入禪定，至辯才無礙』等句，是圓定。『慈念衆生，猶如赤子』
是弘誓。『功德具足，至能至菩提』等句，是圓行。定慧均等，故能『於剎
那頃，發菩提心』。介爾有心三千具足，三千卽空，位不退；三千卽假，行
不退；三千卽中，念不退。所謂『得不退轉』。雙照縱橫，故能『辯才無
礙』。上合佛心，下同生心，又解本性，故能『功德具足』。

四、智積執別教爲疑。

智積菩薩言。我見釋迦如來。於無量劫難行苦行。積功累德。求菩提道未曾止息。觀三千大千世界。乃至無有如芥子許。非是菩薩捨身命處。爲衆生故。然後乃得成菩提道。不信此女。於須臾頃便成正覺。

智積爲物騰疑，釋迦必先證圓，苦行示迹同別，乃化他之權，龍女久積資糧，發心卽登不退，乃自行之實，權實不二，事理互融，理靠事顯，事依理彰，圓人受法不墮邊執。

五、龍女明圓釋疑。

言論未訖。時龍王女忽現於前。頭面禮敬。却住一面。以偈讚曰。
深達罪福相。徧照於十方。微妙淨法身。具相三十二。
以八十種好。用莊嚴法身。天人所戴仰。龍神咸恭敬。
一切衆生類。無不宗奉者。又聞成菩提。唯佛當證知。
我闡大乘教。度脫苦衆生。

初兩偈半讚佛明圓，後一偈引證釋疑。

『深達罪福相。徧照於十方。』：卽十法界相，善惡相替互論罪福，如三塗爲罪，人天爲福，有漏爲罪，無漏爲福，偏空爲罪，出假爲福，二邊爲罪，中道爲福，但中爲罪，圓中爲福。前三教達不深，照不徧，唯圓人了知現前一念豎徹三諦之底，橫該十界之邊，深達罪福一相。『微妙淨法身具相三十二』：空故淨，假故微，中故妙，三德不縱橫不并別，卽是諸佛所證法身，法身無相，無所不相，實相爲大小相海之本，將所具還用莊嚴法身，所謂全性成修，全修顯性。『唯佛當證知』：引佛爲證，釋寶積之疑。『我闡大乘教。度脫苦衆生』：意顯不久，當往南方無垢世界成佛轉法輪。

六、身子挾三藏權難。

爾時舍利弗語龍女言。汝謂不久得無上道。是事難信。所以者何。女身垢穢。非是法器。云何能得無上菩提。佛道懸曠。經無量劫。勤苦積行。具修諸度。然後乃成。又女人身。猶有五障。一者不得作梵天王。二者帝釋。三者魔王。四者轉輪聖王。五者佛身。云何女身速得成佛。

身子於方等會上，淨名經中，便已了知男女無有定相，例如灌溪親近末山問答，況今初周得悟，登圓初住，已與龍女所證是同，有此問者亦是爲物騰問也。

七、龍女以一實除疑。

爾時龍女有一寶珠。價值三千大千世界。持以上佛。佛卽受之。龍女調智積菩薩尊者舍利弗言。我獻寶珠。世尊納受。是事疾否。答言甚疾。女言。以汝神力觀我成佛。復速於此。

『寶珠』：表修得圓因。『上佛』：表將因克果。『佛卽受之』：表獲果甚速。觀心釋者，寶珠爲始覺，佛爲本覺，始本合一，卽成佛坐道場。

當時衆會皆見龍女。忽然之間變成男子。具菩薩行。卽往南方無垢世界。坐寶蓮華。成等正覺。三十二相。八十種好。普爲十方一切衆生。演說妙法。

身子前文云：『女身垢穢，非是法器。』故龍女變成男身，往無垢世界成佛。菩薩處胎經云：魔梵釋女皆不捨身不受身，悉於現身得成佛，乃約自行之實言。故偈云：法性如大海，不說有是非，凡夫聖賢人，平等無高下，唯在心垢滅，取證如反掌。此經明變成男子者，係約化他八相之權言，且如身子蒙記，已登圓住，亦能八相作佛，猶記在曠劫之後成佛，卽證理之實與物機從權不等。

八、時衆見聞得益。

爾時娑婆世界菩薩聲聞。天龍八部。人與非人。皆遙見彼龍女成佛。普爲時會人天說法。心大歡喜。悉遙敬禮。無量衆生聞法解悟。得不退轉。無量衆生得受道記。無垢世界。六反震動。娑婆世界。三千衆生住不退地。三千衆生發菩提心。而得受記。

先明遙見遙聞遙禮，南方緣熟，彼土衆生得益。次明娑婆緣薄，此土衆生祇以龍女教化，皆是從體起用，普現色身三昧之力，隨宜示現。

九、智積身子默然信受。

智積菩薩及舍利弗。一切衆會。默然信受。

釋提婆達多品竟。次釋持品。

勸持品第十三

本品文分受持勸持，三處（此土他方往返）廣宣此經，受持中明二萬菩薩奉命此土持經，聲聞發願他國流通，勸持中八十萬億那由他菩薩，順佛意發誓，周旋往返十方世界宏經，故有本云勸持兩義俱存。

雙釋兩意似世界，二萬似爲人，八十似對治，佛意似第一義。

勸持爲迹門流通第四品（一法師，二寶塔，三達多）。文分爲二：初明受持，二明勸持。初中三：初二萬菩薩奉命此土持經，二聲聞發誓他國流通，三諸尼請記。今初。

爾時藥王菩薩摩訶薩。及大樂說菩薩摩訶薩。與二萬菩薩眷屬俱。皆於佛前作是誓言。惟願世尊不以爲慮。我等於佛滅後。當奉持讀誦說此經典。後惡世衆生。善根轉少。多增上慢。貪利供養。增不善根。遠離解脫。雖難可教化。我等當起大忍力。讀誦此經。持說書寫。種種供養。不惜身命。

二、五百八千聲聞發誓他國流通。

爾時衆中五百阿羅漢得受記者白佛言。世尊。我等亦自誓願。於異國土廣說此經。復有學無學八千人得受記者。從座而起。合掌向佛。作是誓言。世尊。我等亦當於他國土廣說此經。所以者何。是娑婆國中人多弊惡。懷增上慢。功德淺薄。瞋濁諂曲。心不實故。

此明聲聞衆雖已蒙記，以其始行菩薩道，未能於惡世苦行宏經，須開安樂行品始行之軌。

三、諸尼請記，分四：初記大愛道及六千尼，二、記耶輸陀羅，三、諸尼領解，四、諸尼發願。今初。

爾時佛姨母摩訶波闍波提比丘尼。與學無學比丘尼六千人俱。從座而起。一心合掌。瞻仰尊顏。目不暫捨。於時世尊告憍曇彌。何故憂色而視如來。汝心將無謂我不說汝名。授阿耨多羅三藐三菩提記耶。憍曇彌。我先總說一切聲聞。皆已授記。今汝欲知記者。將來之世。當於六萬八千億諸佛法中。爲大法師。及六千學無學比丘尼。俱爲法師。汝如是漸漸具菩薩道。當得作佛。號一切衆生喜見如來。應供。正徧知。明行足。善逝。世間解。無上士。調御丈夫。天人師。佛。世尊。憍曇彌。是一切衆生喜見佛。及六千菩薩轉次授記。得阿耨多羅三藐三菩提。

『摩訶波闍波提』：譯曰大愛道，唐譯大生主，本梵王名，一切衆生皆彼子故，亦云憍曇彌，此云衆主。本行集云：釋種善覺，生於八女，時淨飯王兄弟四人，各納二女，淨飯王妃，卽摩耶愛道，摩耶生已，七日命終，生忉利天，愛道是姨，故云姨母。

二、記耶輸陀羅。

爾時羅睺羅母耶輸陀羅比丘尼。作是念。世尊於授記中。獨不說我名。佛告耶輸陀羅。汝於來世百千萬億諸佛法中。修菩薩行。爲大法師。漸具佛道。於善國中。當得作佛。號具足千萬光相如來。應供。正徧知。明行足。善逝。世間解。無上士。調御丈夫。天人師。佛。世尊。佛壽無量阿僧祇劫。

『耶輸陀羅』：此云名稱，諸女中有名稱也。悉達太子之夫人，羅睺羅之母。解見序品。

三、諸尼領解。

爾時摩訶波闍波提比丘尼。及耶輸陀羅比丘尼。并其眷屬。皆大歡喜。得未曾有。卽於佛前而說偈言。

世尊導師。安隱天人。我等聞記。心安具足。

四、尼衆發願。

諸比丘尼說是偈已白佛言。世尊。我等亦能於他方國土廣宣此經。

與聲聞始行菩薩道者同，或因他方緣熟，故云於他方國宏經。

二、明勸持，分二：初長文，二偈頌。初中四：初佛眼視，二菩薩請教，三念佛默然，四順佛意發誓。今初。

爾時世尊。視八十萬億那由他諸菩薩摩訶薩。

眼視默勸。

二、菩薩請勸。

是諸菩薩。皆是阿惟越致。轉不退法輪。得諸陀羅尼。卽從座起。至於佛前。一心合掌而作是念。若世尊告敕我等持說此經者。當如佛教。廣宣斯法。

『阿惟越致』：卽不退轉，與阿踰跋致同。『陀羅尼』：此云總持，瑜伽論云：『陀羅尼有四種——一、法，二、義，三、咒，四、能得忍。』本經普賢菩薩勸發品，誦法華、見普賢，得三陀羅尼，旋陀羅尼（空）百千萬億旋陀羅尼（假）法音方便陀羅尼（中）。

三、念佛默然。

復作是念。佛今默然。不見告敕。我當云何。

四、順佛意發願。

時諸菩薩敬順佛意。并欲自滿本願。便於佛前作師子吼。而發誓言。世尊。我等於如來滅後。周旋往返十方世界。能令衆生書寫此經。受持讀誦。解說其義。如法修行。正憶念。皆是佛之威力。惟願世尊。在於他方遙見守護。

二明勸持中初長文竟。

二、偈頌（孤起述菩薩弘經方軌）分四：初明著衣宏經，二明入室宏經，三明坐座宏經，四總結請知。初中三：初總論時節以明著衣（被鎧之言）、二別明所忍之境、三明著衣意。今初。

卽時諸菩薩。俱同發聲而說偈言。

惟願不爲慮。於佛滅度後。恐怖惡世中。我等當廣說。

二、別明所忍之境，分三：初通明邪人，卽俗衆，二明道門增上慢者，三明僭聖增上慢者（於中初猶可忍、第二過前、第三最甚）。今初。

有諸無智人。惡口罵詈等。及加刀杖者。我等皆當忍。

二、明道門增上慢者。

惡世中比丘。邪智心諂曲。未得謂爲得。我慢心充滿。

三、明僭聖增上慢者。

或有阿練若。衲衣在空閒。自謂行眞道。輕賤人間者。貪著利養故。與白衣說法。爲世所恭敬。如六通羅漢。是人懷惡心。常念世俗事。假名阿練若。好出我等過。而作如是言。此諸比丘等。爲貪利養故。說外道論義。自作此經典。誑惑世間人。爲求名聞故。分別於是經。

常在大眾中。欲毀我等故。向國王大臣。婆羅門居士。及餘比丘眾。誹謗說我惡。謂是邪見人。說外道論義。

『阿練若』：即阿蘭若，此云空寂，或云無諍，為寺院之總名，是比丘住處，去村里五百弓。華嚴經曰：『阿蘭若法菩提道場。』大日經疏三曰：『阿蘭若，名為意樂處，謂空寂行者所樂之處，或獨一無侶，或二三人，於寺外造限量小房，或施主為造，或但居樹下空地，皆是也。』金剛經曰：『阿蘭那』行，十二頭陀抖擻行之一。

凡居蘭若為調煩惱，倘自舉滅他，非無諍行，心無內實，身營外虛，使有眼者寒心。尋師進道，有其軌範，所謂不破本參不入山，不破重關不閉關，不破牢關忍中行，方能增戒守一。

三、明著衣意。

我等敬佛故。悉忍是諸惡。為斯所輕言。汝等皆是佛。如此輕慢言。皆當忍受之。濁劫惡世中。多有諸恐怖。惡鬼入其身。罵詈毀辱我。我等敬信佛。當著忍辱鎧。為說是經故。忍此諸難事。我不愛身命。但惜無上道。我等於來世。護持佛所囑。世尊自當知。濁世惡比丘。不知佛方便。隨宜所說法。惡口而顰蹙。數數見擯出。遠離於塔寺。如是等眾惡。念佛告救故。皆當忍是事。

『忍辱鎧』：濁世弘經必著忍衣方不受傷，如人入陣有甲不被刀箭所害，四教行者皆各有忍辱鎧。

三藏教用苦無常不淨無我為鎧，如納衣比丘，截棄不淨而取於淨，又如身善口意不善但念其善，不念不善。

通教用空爲鎧，語句增減時處，意義不同，如阿拘盧奢，秦言罵；拘盧奢，秦言喚聲，且東西方用語亦不同，總之，空谷傳聲，於我何爲。

別教觀凡聖假相出生十界不同，用卽假爲鎧，凡夫憂喜苦樂捨五受中，身受苦，心受憂悲，聖人不心受，復於罵者生大悲心，念拔其苦，如子狂迷而罵其母，母常憐念冀子病癒。

圓教觀受卽法界爲鎧，上等諸佛，下等衆生，迷悟一心，卽慈悲室法空座，一鎧一切鎧。初著衣宏經竟。

二、明入室宏經。

諸聚落城邑。其有求法者。我皆到其所。說佛所囑法。

三、明坐座宏經。

我是世尊使。處衆無所畏。我當善說法。願佛安隱住。

四、總結請知。

我於世尊前。諸來十方佛。發如是誓言。佛自知我心。

（釋持品竟。次釋安樂行品。

安樂行品第十四

三周開顯，若法若喻（火宅、窮子、藥草、化城、繫珠、鬘珠、鬘子），不逾三德，前法師品，是流通之始，具列三法為執，下三品（寶塔、達多、勸持）通以室衣座三為流通之軌。塔涌在空，座也，處處證經，室也，眾寶莊嚴，衣也。調達中，釋迦輕生重法，身為床座，相好之身必有法報，法身—衣也、報身—座也，應身—室也，若從釋迦因中所行五波羅密—衣也，般若波羅密—座也，慈悲喜捨—室也。勸持品偈文，亦彰三法宏經。

文句云：『此品是迹門流通第四意（三軌加身口意願四安樂），若一萬（持品初二萬菩薩眷屬俱，皆於佛前發誓宏經。）八十億（持品中諸尼索記，佛視八十億菩薩等。）受命宏經，深識權實，廣知頓漸，又達機緣，神力自在，濁世惱亂，不障通經，不俟更示方法。若初依（五品：隨喜、讀誦、說法、兼行六度、正行六度。六根）始心（隨喜品中發願回向隨善勸請懺悔等五悔）欲修圓行，入濁宏經，為濁所惱，自行不立，亦無化功，為是人故，須示方法，明安樂行。』

釋此品為三：依事釋、附文釋、法門釋。各有略廣。略事釋者，身無危險故安，心無憂惱故樂，二業安樂進於宏經口業之行。

廣事釋者，安樂即大涅槃，從果立名，行即涅槃道，從因得名。有因果俱苦者，如常見外道行苦行得苦果。有因樂果苦者，如斷見外道恣情取樂，後得苦報。有因苦果樂者，如析法二乘，無常拙度，加工苦至，方入涅槃。今安樂行，如實巧度，乃因果俱樂。大經云：定苦行者謂諸凡夫，苦樂行者，聲聞緣覺，定樂行者，謂諸菩薩。三藏菩薩有教無人，通教三乘因果俱偏，別教菩薩因偏果圓，總之，七方便粗因粗果，皆非安樂行。此品為圓教菩薩因果皆圓，妙因妙果始稱安樂行。略附文釋者，附法師品，著如來衣，則法身安，人如來室，則解脫心安，坐如來座，則般若導宏經之行。附今品，住忍辱地故身安，而不卒暴，故心樂，觀諸法實相，故行進宏經，此係一心三德，本來不別，與涅槃寄示滅顯三德不同。

廣附文釋者，行有三義，謂止行（法身—如來衣）、觀行（般若—如來

座)、慈悲行(解脫—如來室)，止觀慈悲導三業及誓願，三行爲涅槃道，三德爲行之境，境稱安樂，道稱行。大論云：菩薩從初發心，常觀涅槃行道，一切諸法中悉有安樂性，一切衆生卽大涅槃，不可復滅。

略法門釋者，安名不動(不爲生死涅槃所動)、樂名無受(不受凡夫五受，及覺法樂、寂靜樂，有受則有苦，無受則無苦。)、行名無行(有受卽有行，無受則無所行，不行凡聖行，而行中道。)

廣法門釋者，卽廣明不動門、不受門、不行門。

前法師品略示宏經，益他爲本，先明入室。此品辨惡世宏經，安諸逼惱，先著如來衣，如云諸法從本來，常自寂滅相，若乖寂起相，先用般若坐座蕩之。若云諸法不生般若生，愍衆行道，次入如來室，化世必涉違從，必著如來衣，說之次第，行無差別。

此是迹門流通第五品，經文分二—初問、二答。初中二：初歎前品深行菩薩能如法宏經，二問始行菩薩云何惡世宏經。今初。

爾時文殊師利法王子菩薩摩訶薩白佛言。世尊。是諸菩薩。甚爲難有。敬順佛故。發大誓願。於後惡世。護持讀說是法華經。

二、問始行菩薩云何惡世宏經。

世尊。菩薩摩訶薩。於後惡世。云何能說是經。

二、答，分三：初總標章，二解釋修行方法，二總明行成之相。今初。

佛告文殊師利。若菩薩摩訶薩。於後惡世欲說是經。當安住四法。

二、解釋修行方法，分四：初身安樂行，二口安樂行，三意安樂行，四誓願安樂行。
初中二：初長文、二偈頌。長文中二：初標，二釋。今初。

一者安住菩薩行處。及親近處。能爲衆生。演說是經。

二、釋，分二：初釋行處，二釋親近處。今初。

文殊師利。云何名菩薩摩訶薩行處。若菩薩摩訶薩住忍辱地。柔和善順而不卒暴。心亦不驚。又復於法無所行。而觀諸法如實相。亦不行。不分別。是名菩薩摩訶薩行處。

約一法（一實諦）二法（生法二忍）三法（不思議三諦）釋『菩薩行處』。

一法釋菩薩行處者，一實諦之理，為一切所歸，為一切作本，而徧無分別，即直緣一諦而立三行。一切所歸，故云：『住忍辱地』，依中道理地起行，所謂理雖無行，依理而行，行於不行之行。為一切作本，若得理本，在剛能『柔和』，在逆能『善順』，『而不卒暴』，心安『不驚』，所謂萬物得地而生，衆行得理而成，此亦不行之行。徧無分別，故云『又復於法無所行而觀諸法如實相』，謂行與無行，性相無二，見諸法實，即是非行非不行之行，無三行而三行，故名為『行』，同一實諦，故名為『處』，此一法行處為宏經方軌，即所歸，合如來衣，作本，合如來室，無分別，合如來座。二法釋菩薩行處者，即生法二忍，亦即人法二空，此約圓教真俗假實明二空二忍，悉見中道，故不同二乘。真諦即法空，俗諦即生空，真諦破假，假破即相空，俗諦破性實，性破即性空，故真俗不二，為對所破分真俗。若更開者，即為四忍（伏忍、順忍、無生忍、寂滅忍），『柔和』即伏忍，『善順』即順忍，所謂不懼生死，不求涅槃，『又復於法無所行而觀諸法如實相』即無生忍，『亦不行不分別』即寂滅忍。別教十信為伏忍，三賢為順忍，伏、順二忍名生忍位淺，地上無生寂二忍名法忍位深。圓教則二忍、四忍悉通初後，其理即中道，大經云：發心畢竟二無別，從初發心圓伏五住至金剛頂皆名伏忍，初後悉不違實相，皆名順忍，初後悉不起二邊心，皆名無生忍，初後悉休息衆行，皆名寂滅忍。始終以二空理忍諸法是著如來衣，安住二空理是坐如來座，愍諸衆生，是人如來室。二空四忍是『行』，理即是『處』。

三法釋菩薩行處者，約不思議三諦，『柔和善順』，即善順真諦，能忍虛妄見愛，『而不卒暴心亦不驚』，即安於俗諦，忍衆根機，稱適機宜，『於法無所行』等，即安中諦，能忍二邊，正住中道，故云『觀實相』，亦

不得中實，故云『不分別』。此據三諦之地名『處』，忍五住之辱名『行』。行亦有三：謂止行，卽行而不行，著如來衣。觀行，卽非行非不行，坐如來座。慈悲行，卽不行而行，入如來室，是菩薩『行處』明宏經之軌。

二、釋親近處，分三：初約遠論近，二、約近論近，三、約非遠非近論近。初又十：初遠豪勢、二、遠邪人邪法、三、遠兇險戲、四、遠旃陀羅、五、遠二乘、六、遠欲想、七、遠不男、八、遠危害、九、遠譏嫌、十、遠畜養。今初。

云何名菩薩摩訶薩親近處。菩薩摩訶薩。不親近國王王子。大臣官長。

恃附勢力，易失正道，初似小益，久則大損。倘仁王忠臣孝子，必爲佛教外護，近之無損。

二、遠邪人邪法。

不親近諸外道梵志尼犍子等。及造世俗文筆。讚詠外書。及路伽耶陀。逆路伽耶陀者。

邪人法者，易於染習，迷於正理，正觀未成，切須防斷。『梵志』：在家事梵。『尼犍』：出家外道。『路伽耶陀』：亦云惡論，西域外道典籍，依於愛見而爲答釋者。『逆』：徵問之謂，卽依於愛見而爲問難者。又『逆路』：逆君父之論。『伽耶陀』：卽婆羅門四種之韋陀經（一曰壽，謂養生繕性。二、曰祠，謂享祭祈禱。三、曰平，謂禮義占卜，兵法軍陣。四、曰術，謂異能伎數，禁咒醫方。）。

三、遠兇險戲。

亦不親近諸有兇戲。相掎（音拆）相撲。及那羅等種種變現之戲。

『那羅』：此云力，卽角力戲。

四、遠旃陀羅。

又不親近旃陀羅。及畜豬羊雞狗。畋獵漁捕。諸惡律儀。如是人等或時來者。則爲說法。無所希望。

『旃陀羅』：譯曰屠者，在四姓之外，以屠殺爲業，男曰旃陀羅，女曰旃陀利。

五、遠二乘衆。

又不親近求聲聞比丘比丘尼。優婆塞優婆夷。亦不問訊。若於房中。若經行處。若在講堂中。不共住止。或時來者。隨宜說法。無所希求。

近二乘人，令人遠菩提故，西方大小兩乘各居不雜，故云『或來』。既未受大，無妨小志，故云『隨宜說法』。

六、遠欲想。

文殊師利。又菩薩摩訶薩。不應於女人身。取能生欲想相。而爲說法。亦不樂見。若人他家。不與小女處女寡女等共語。

欲想最能殺害菩提心。

七、遠不男。

亦復不近五種不男之人。以爲親厚。

『五不男』：卽生、劇、妬、變、半。生不男——謂胎中或初生時便缺男根。劇不男——謂截去或亂壞。妬不男——謂因他姪欲，乍有根起，而無根用。變不男——見男變女，見女變男。半不男——謂半月有用，半月不能。此皆重難，非佛法器，不得出家，亦不應與親厚。

八、遠危害。

不獨入他家。若有因緣須獨入時。但一心念佛。

九、遠譏嫌。

若爲女人說法。不露齒笑。不現胸臆。乃至爲法。猶不親厚。況復餘事。

十、遠畜養。

不樂畜年少弟子。沙彌小兒。亦不樂與同師。

少年習性未定，畜之妨修正業，同師則嬈亂請益。

前文但云住忍辱地，是直緣理，今約戒門弘經，以正慧遠離十法。

圓人總論觀心，無非法界，無所謂離與不離，別論遠離三教豪勢，遠離二邊邪法邪人，二觀神通名兇戲，三惑旃陀羅殺三智命，偏空滅想名二乘衆，中道法愛爲欲想，滅色住空名不男，方便觀智皆害圓極，一切俗境名爲譏嫌，前三教善根名爲年少小兒。迹示離十種惱，本無二邊境。

二、約近論近。

常好坐禪。在於閒處。修攝其心。文殊師利。是名初親近處。

前約戒門遠離十法，此約定門以助止觀成就，有修定之心、修定之處、修定要門。『常好坐禪』：是修定之心。『在於閒處』：是修定之處。『修攝其心』：是修定要門。『初親近處』：前附戒門即持戒清淨。本文在於閒處，即閑居靜處，意兼息諸緣務，近善知識，二十五方便略衣食具足。

三、約非遠非近論近。分三：初總標境智，二、別釋，三、結成。今初。

復次菩薩摩訶薩。觀一切法空。

此約慧門以助止觀成就。『觀』：中道觀智。『一切法』：十法境界。『空』：不思議第一義諦。

二、別釋。

如實相。不顛倒。不動不退不轉。如虛空無所有性。一切語言道斷。不生不出不起。無名無相。實無所有。無量無邊。無礙無障。

『如實相』：別釋所觀十法境界，不如三界見於三界，以實爲相，平等無一異。『不顛倒』：無枯榮四倒，雙照枯榮之中道觀。『不動』：不爲二死所動。『不退、不轉』：心心寂滅自然流入薩婆若海，不如凡夫流轉生死，不如二乘轉凡成聖。『如虛空』：但有名字，字不可得。『無所有性』：無自他共無因等性。『一切言語道斷』：離四句絕百非不可思議。『不生』：惑智稱理，則行位因果皆不生。『不出』：全體卽是，故無可出。『不起』：入理故，則方便、理、教、皆寂。『無名』：一切名所不能詮，卽性空。『無相』：一切相所不能形容，卽相空。『實無所有』：觀體非二邊之有。『無量』：非陰界入等數法。『無邊』：非偏小分限法。『無礙』：徧入諸法。『無障』：無能遮止。

本文對十八句立十八觀，祇是能觀之智無相無作與所觀之境稱實相應。

三、結成。

但以因緣有。從顛倒生故說。常樂觀如是法相。是名菩薩摩訶薩第二親近處。

上文直明中道觀慧，今明雙照二邊，以中觀無有不照二邊者，中體無作，二邊隨緣，以無作觀，照緣解惑。『因緣有』：有涅槃。『顛倒生』：生生死。『故說』：由顛倒故說、由二邊故說、由不思議故說，雖三釋不同，其顯一境，爲不思議教。『常樂觀如是法相』：卽三諦等法，涅槃是真諦，生死是俗諦，涅槃生死所依之體是中諦，結不思議三觀。

綜通上三節文，以觀總釋。『觀一切法空如實相』：標觀體。『不顛倒』以下等句，皆釋觀相。三節經文有十九句，初一句觀一切法空是總，後十八句，對大品十八空——『如實相』：卽第一義空。『不顛倒』：卽內空。『不動』：卽外空。『不退』：卽內外空。『不轉』：卽空空，以空破諸法，此空亦空。『如虛空』：卽大空。『無所有性』：卽畢竟空。『一切語言道斷』：卽一切空。『不生』：卽有爲空，因緣不合卽不生。『不出』：卽無爲空。『不起』：卽無始空。『無名』：卽性空。『無相』：卽相空。『實無所有』：卽不可得空。『無量』：卽法空。『無邊』：卽無法空。『無

碍』：卽有法無法空。『無障』：卽散空。大經云：『如來常修十八空義』。此十八空從所得名，隨十八種境，能空祇一大空，皆是中道正慧，故用大品十八空，釋本文十八句，說之次第，理無次第，一切法趣。

二、偈頌。分三：初頌標，二、頌釋，三明行成。今初。

爾時世尊欲重宣此義。而說偈言。

若有菩薩。於後惡世。無怖畏心。欲說是經。應入行處。及親近處。

二、頌釋。分二：初頌約遠論近。二、頌非遠非近。今初。

常離國王。及國王子。大臣官長。兇險戲者。及旃陀羅。外道梵志。亦不親近。增上慢人。貪著小乘。三藏學者。破戒比丘。名字羅漢。及比丘尼。好戲笑者。深著五欲。求現滅度。諸優婆夷。皆勿親近。若是人等。以好心來。到菩薩所。爲聞佛道。菩薩則以。無所畏心。不懷希望。而爲說法。寡女處女。及諸不男。皆勿親近。以爲親厚。亦莫親近。屠兒魁膾。畋獵漁捕。爲利殺害。販肉自活。銜賣女色。如是之人。皆勿親近。兇險相撲。種種嬉戲。諸淫女等。盡勿親近。莫獨屏處。爲女說法。若說法時。無得戲笑。入里乞食。將一比丘。若無比丘。一心念佛。是則名爲。行處近處。以此二處。能安樂說。

長文中明身安樂行『住忍辱地，柔和善順而不卒暴，心亦不驚，又復於法無所行，而觀諸法如實相，亦不行，不分別。』爲行處。以遠豪勢，遠邪人邪法，遠兇險戲、遠旃陀羅、遠二乘、遠欲想、遠不男、遠危害、遠譏嫌、遠畜養。『常好坐禪，在於閑處，修攝其心。』爲第一親近處。『觀一切法空，如實相，不顛倒、不動、不退、不轉，如虛空，無所有性，一切語言道斷，不生、不出、不起、無名、無相，實無所有，無量、無邊、無礙、無

障。』但以因緣有從顛倒生故說，常樂觀如是法相。』為第二親近處。

長文分釋行處親近處，頌中取意合頌，不復次第，正顯文有廣略，理非淺深。

『常離國王』：意謂遠離暴君，親近仁王。『增上慢人』：未證謂證，未得謂得者。『貪著小乘，三藏學者。』：佛在波羅奈，最初為五人說契經修多羅藏，佛在羅閱祇，最初為須那提說毘尼藏，佛在毘舍離獼猴池，最初為跋耆子說阿毘曇藏（初名相續解脫經，後名為論。）『名字羅漢』：假名阿蘭若。『深著五欲』：欲界皆有欲相。俱舍云：『六受欲交抱，執手笑視淫。』『求現滅度』：但求小乘果證，無大慈悲者。著五欲為生死邊，求滅度是涅槃邊，捨二邊近中道明矣。

二、頌非遠非近。

又復不行。上中下法。有為無為。實不實法。亦不分別。是男是女。不得諸法。不知不見。是則名為。菩薩行處。

『上中下法』：指前三教，或指三乘，或三教菩薩，咸開入圓。『有為無為』：指六凡四聖的有漏無漏，十界咸入真如平等。『實不實法』：有漏情有理無，理無名不實；無漏理有情無，以情無名不實。此頌『於法無所行，而觀諸法如實相。』『亦不分別是男是女』：男是定女是慧，定慧性本絕言，故不可分別。『不得諸法』：常寂滅相故。『不知不見』：遠離能行戲論相。此頌『亦不行不分別』。

一切諸法。空無所有。無有常住。亦無起滅。是名智者。所親近處。

此頌觀一切法空等文。『無有常住』：非真諦。『亦無起滅』：非俗諦。真俗雙非，正顯中道。

顛倒分別。諸法有無。是實非實。是生非生。在於閒處。修攝其心。安住不動。如須彌山。觀一切法。皆無所有。猶如虛空。無有堅固。不生不出。不動不退。常住一相。是名近處。

此頌『從顛倒生故說』以爲所觀之境，兼頌約近論近以爲方便，重頌正觀一切法空等。

上文附戒附定合爲初親近處，附慧爲第二親近處，今以定慧合頌而頌戒門，則雙結行近，顯三學互融。『常住一相』：無對相則常住，一相卽實相，實相卽法非法。

三、明行成，分三：初標行成，二、釋行成而得安樂，三、頌總結。今初。

若有比丘。於我滅後。人是行處。及親近處。說斯經時。無有怯弱。

『無有怯弱』：事成外儀無失。理成內心無滯。

二、釋行成而得安樂。

菩薩有時。入於靜室。以正憶念。隨義觀法。從禪定起。爲諸國王。王子臣民。婆羅門等。開化演暢。說斯經典。其心安隱。無有怯弱。

『入於靜室』：安樂之因，修定止惡，得人無我，外儀不損，身安樂；修慧離著，得法無我，內無顛倒，心安隱。

三、頌總結。

文殊師利。是名菩薩。安住初法。能於後世。說法華經。

『初法』：爲身口意願四安樂行之初。初身安樂行竟。

二、口安樂行，分二：初長文，二、偈頌。初中二：初標，二釋。今初。

又文殊師利。如來滅後於末法中欲說是經。應住安樂行。

二、釋。分二：初止行，二、觀行（止行防非是如來衣，觀行說法是如來座，又止行拔苦，觀行多樂是如來室。）初止行又四：初不說過，二、不輕慢，三、不歎毀，四、不怨嫌。今初。

若口宣說。若讀經時。不樂說人及經典過。

說人過者，如揚糞穢，自薰薰他，非安樂行。一切經典皆是如來方便隨宜所說，如食石密中邊皆甜，安得有過，說經典過者，皆由不解權實妙理，非安樂行。

二、不輕慢。

亦不輕慢諸餘法師。

教有偏圓，法有權實，末世宏經者，為護物機，多先漸後頓，所謂先以異方便，助顯第一義，不可重實輕權，倚圓蔑偏。

三、不歎毀。

不說他人好惡長短。於聲聞人。亦不稱名說其過惡。亦不稱名讚歎其美。

日藏經云：『不稱他短，不說己長。』梵網將『自讚毀他』列為十重。且修道人，背生死向涅槃，寸陰必爭，那有閑空稱長道短，況說人好壞，於彼毫無榮耀或減損，故大論云：『自讚自毀，讚他毀他，如是四法，智者不為。』『聲聞人』：指根性不定者，對大歎小，令失大故，若毀二乘，則大小俱失。

四、不怨嫌。

又亦不生怨嫌之心。

『怨』：謂彼人法妨害我道，損己怨怪。『嫌』：謂其鄙劣，違情嫌責，心機一動聲說即發，杜說過之源，故『不生怨嫌之心』。安樂行為宏大法，將護小行，應捨怨嫌之心。初止行竟。

二、觀行。

善修如是安樂心故。諸有聽者。不逆其意。有所難問。不以小乘法答。但以大乘而爲解說。令得一切種智。

說法者，觀諸法空，不取不著不執，不逆人意，不違法相，不以小乘法答，若無大機方便說小，不能妨其大緣，不可執大輕小，須有知機之智，鑒物之能。□安樂行長文竟。

二、偈頌。分三：初頌標，二頌釋，三明行成。今初。

爾時世尊欲重宣此義。而說偈言。

菩薩常樂。安隱說法。於清淨地。而施牀座。以油塗身。澡浴塵穢。著新淨衣。內外俱淨。

長文但說『欲說是經。應住安樂行。』，偈中別出行相，『安隱說法』卽入如來室。『於清淨地而施牀座』：卽坐如來座。『以油塗身』等四句，卽著如來衣。以此三種行相而導口業名安樂行。

二、頌釋。分二：初頌止行，二頌觀行。初中四：初頌不輕慢，二、頌不歎毀，三、頌不說過，四頌不怨嫌。（長文皆約止善說，頌中皆約行善說）。今初。

安處法座。隨問爲說。

『隨』卽不輕慢意。

二、頌不歎毀。

若有比丘。及比丘尼。諸優婆塞。及優婆夷。國王王子。羣臣士民。以微妙義。和顏爲說。若有難問。隨義而答。

但依於義，不談人好惡，隨義而答有三，勝負自知爲智者語卽可答，敖現放恣爲王者語，是非長短爲愚者語，卽不可答。

三、頌不說過。

因緣譬喻。敷演分別。以是方便。皆使發心。漸漸增益。入於佛道。

說人及經典過，係生毒念，不說過則喜，而能發心入佛道。

四、頌不怨嫌。

除懶惰意。及懈怠想。離諸憂惱。慈心說法。

怨嫌心則懈怠憂惱，慈心說法則精進歡悅。初頌止行竟。

二、頌觀行。

晝夜常說。無上道教。以諸因緣。無量譬喻。開示衆生。咸令歡喜。衣服臥具。飲食醫藥。而於其中。無所希望。但一心念。說法因緣。願成佛道。令衆亦爾。是則大利。安樂供養。

『說無上道』，即頌但以大乘答，『願成佛道』，即頌令得一切種智。

二頌釋竟。

三、明行成。分四：初標行成，二明內無過則外難不生，三、明內有善法所以行成，

四、格量功德。今初。

我滅度後。若有比丘。能演說斯。妙法華經。

二、明內無過則外難不生。

心無嫉恚。諸惱障礙。亦無憂愁。及罵詈者。又無怖畏。加刀杖等。亦無擯出。安住忍故。

如無臭物，蠅則不來。

三、明內有善法所以行成。

智者如是。善修其心。能住安樂。如我上說。

『如我上說』：長文中說內無過，偈中說內有善。

四、格量功德。

其人功德。千萬億劫。算數譬喻。說不能盡。

二、口安樂行竟。

三、意安樂行，分二：初長文，二、偈頌。初中三：初標、二、釋、三、結行成。今初。

又文殊師利。菩薩摩訶薩。於後末世法欲滅時。受持讀誦斯經典者。

二、釋，分二：初止行，二、觀行（止行是衣、觀行是座、拔苦與樂是室）。初中四：初不嫉誑、二不輕罵、三不惱亂、四不諍競。今初。

無懷嫉妬諂誑之心。

自行先捨貪，利他必除瞋，諂誑乖智慧之道，嫉妬違慈悲之心，故安樂行菩薩最須棄之。

二、不輕罵。

亦勿輕罵學佛道者。求其長短。

藏通別圓行者，所求佛道權實不同，不應以圓長呵前三短，所謂知機可責，不知勿罵。

三、不惱亂。

若比丘比丘尼。優婆塞優婆夷。求聲聞者。求辟支佛者。求菩薩道者。無得惱之。令其疑悔。語其人言。汝等去道甚遠。終不能得一切種智。所以者何。汝是放逸之人。於道懈怠故。

四眾所求之三乘皆為如來方便為實施權之法，倘依之求道，亦可漸引歸圓，若自恃精進，薄得圓解，呵其懈怠，去道尚遠，使彼疑悔，進不能取圓，退不能守權，是為惱亂行人。

四、不諍競。

又亦不應戲論諸法。有所諍競。

『戲論』：指名字薄解，未入五品觀行，每於消文釋義而起諍論。

大論，非有非無爲戲論。淨名斥小乘，說見苦斷是戲論。中論觀法品，三界通惑，見論愛論爲戲論。均非本文所取。初止行竟。

二、觀行，分四：初大悲想治嫉誑，二慈父想治輕罵，三大師想治惱亂，四、平等說法治諍競。今初。

當於一切衆生起大悲想。

悲拔苦，豈能嫉誑。

二、慈父想治輕罵。

於諸如來起慈父想。

佛爲四生慈父，安可輕罵，求其長短。

三、大師想治其惱亂。

於諸菩薩起大師想。於十方諸大菩薩。常應深心恭敬禮拜。

行菩薩道者，有化訓之德，皆衆生師，恭敬供養惟恐不誠，何得惱害。

四、平等說法治諍競。

於一切衆生平等說法。以順法故。不多不少。乃至深愛法者。亦不爲多說。

『平等』，破偏執諍。『不多不少』，量器利鈍，彼既不堪多說無益，若能領解，塵說剎說不爲多。二釋竟。

三、結行成。

文殊師利。是菩薩摩訶薩。於後末世法欲滅時。有成就是第三安樂行者。說是法時。無能惱亂。

由止行成，故惡不能加。

得好同學。共讀誦是經。亦得大眾而來聽受。聽已能持。持已能誦。誦已能說。說已能書。若使人書。供養經卷。恭敬尊重讚歎。

由觀行成，故勝人來集。意安樂行長文竟。

二、偈頌，分二：初頌釋，二頌行成（略不頌標）。初中二：初頌止行，二頌觀行。今初。

爾時世尊欲重宣此義。而說偈言。

若欲說是經。當捨嫉恚慢。諂誑邪偽心。常修質直行。
不輕憊於人。亦不戲論法。不令他疑悔。云汝不得佛。

初四句頌長文釋止行中，初不嫉誑。『恚慢』為嫉之本。『邪偽』為諂誑之註腳。『質直行』正明對治門。第五句頌長文中，二不輕慢。第六句頌長文中，四不諍競。後兩句頌長文，三不惱亂。

二、頌觀行。

是佛子說法。常柔和能忍。慈悲於一切。不生懈怠心。
十方大菩薩。愍眾故行道。應生恭敬心。是則我大師。
於諸佛世尊。生無上父想。破於憍慢心。說法無障礙。

初一偈頌長文釋觀行中，初大悲想。第二偈頌，三大師想。次半偈頌，二慈父想。後半偈頌，平等說法。初頌釋竟。

三、頌行成。

第三法如是。智者應守護。一心安樂行。無量眾所敬。

『第三法』：指意安樂行。

四、誓願安樂行，分二：初長文，二偈頌。初中二：初明行法，二、歎經。初又三：初標，二釋，三結行成。今初。

又文殊師利。菩薩摩訶薩。於後末世法欲滅時。有持是法華經者。

二、釋，分三：初明誓願所緣之境，二、明起誓願之由，三、正立誓願。今初。

於在家出家人中生大慈心。於非菩薩人中生大悲心。

『在家』：未斷通惑在三界內者。『出家』：已斷通惑出三界者。文中所稱在家出家，攝藏通二教三乘，別教信住行向四十心，取發方便心雖未斷無明，但入實不遙，通成大機，即慈境與樂誓。『非菩薩』：指界內流轉之徒，既不發小，況復真實，即悲境拔苦誓。

二、明起誓願之由。

應作是念。如是之人。則為大失。如來方便隨宜說法。不聞不知不覺。不問不信不解。

『如來方便隨宜說法』：通指一代時教，大小偏圓，頓漸顯密，兼但對帶，施廢開，定不定等法。非菩薩人於權法『不聞不知不覺』。在家出家則於妙法『不問不信不解』。『不聞』無三乘聞慧，『不知』無三乘思慧，『不覺』無三乘修慧。『不問』無一乘聞慧，『不信』無一乘思慧，『不解』無一乘修慧。『大失』是起慈誓之由，『不聞不知不覺，不問不信不解』，未發偏圓之心，權實三慧皆無，為起悲之由。

三、正文誓願。

其人雖不問不信不解是經。我得阿耨多羅三藐三菩提時。隨在何地。以神通力。智慧力。引之令得住是法中。

前文云：『不聞不知不覺，不問不信不解。』本文略云：『雖不問不信不解。』正明菩薩不約偏發心，但欲與其圓道三慧。『神通力』，深觀如來

衣如來室大善寂力，所謂不起滅定現諸威儀，先以定動。『智慧力』，深觀如來座得智慧力，四辯莊嚴，後以慧拔，二力祇是福慧二嚴。『住是法中』，為實施權，開權顯實。二釋竟。

三、結行成，分二：初明離過，二、明利益。今初。

文殊師利。是菩薩摩訶薩。於如來滅後。有成就此第四法者。說是法時。無有過失。

本節文明離過，義結止行成。無瞋垢過失，是慈悲室所成。無懈怠過失，是忍辱衣所成。無諂曲過失，是法空座行成。

二、明利益，分二：初正明，二、釋結。今初。

常為比丘比丘尼。優婆塞優婆夷。國王王子大臣人民。婆羅門居士等。供養恭敬。尊重讚歎。虛空諸天。為聽法故亦常隨侍。若在聚落城邑。空閒林中。有人來欲難問者。諸天晝夜。常為法故而衛護之。能令聽者皆得歡喜。

本節文自他兼益，義結觀行成。人天供養，隨侍聽法，是室行成。諸天衛護無能難問，是衣行成。聽者歡喜，是座行成。

二、釋結。

所以者何。此經是一切過去未來現在諸佛神力所護故。

諸佛所護，是誓願行成。初明行法竟。

二、歎經，分二：初就法略歎，二約譬廣歎。今初。

文殊師利。是法華經於無量『國』中。乃至名字不可得聞。何況得見受持讀誦。

諸佛出世，懸遠難值，既使佛出，又久默斯要，故見聞受持斯經，實不可思議因緣。

二、約譬廣歎，分二：初不與珠譬，二與珠譬。初中二，初立譬，二法合。初又五：初威伏諸國，二小王不順，三起兵討伐，四有功喜賜，五惟不與珠。今初。

文殊師利。譬如強力轉輪聖王。欲以威勢降伏諸國。

『轉輪聖王』，譬如來化世。『諸國』，譬陰入界諸境。

二、小王不順。

而諸小王不順其命。

『小王』，譬見愛等諸煩惱魔。『不順』，譬調伏未得無漏。

三、起兵討伐。

時轉輪王起種種兵而往討伐。

戒如堅甲，定如碉堡，慧如利刃。『種種兵』：譬七賢（五停心、總別相念、四加行）中方法為前軍。須陀洹斯陀含中方法（初果於煖頂位，用八忍八智觀欲界四諦，修十六行，於忍位通觀上下八諦減緣減行修三十二行，斷見預聖流，二果以後用九無碍道九解脫道之定慧，斷欲界九品思惑的前六品，餘三品猶潤一番生死有家家，故名一來，）為次軍。阿那含阿羅漢中方法（三果超一種子斷欲思盡，名不還，歷三界七種般那舍，取證四果，而般涅槃，四果修四禪八定及滅盡定，九次第定，止息一切心識之至極禪定，斷三界見思盡名無生，）為後軍。所破者是三毒等分八萬四千盜寇，俱舍云：『牟尼說法蘊，數有八千，未關於大。』

四、有功喜賜。

王見兵衆戰有功者。即大歡喜。隨功賞賜。或與田宅聚落城邑。或與衣服嚴身之具。或與種種珍寶。金銀瑠璃。碑磔碼碯。珊瑚琥珀。象馬車乘。奴婢人民。

『田』——譬禪定。『宅』——譬智慧。『聚落』——譬初果、二果。

『邑』——譬二果。『城』——譬四果涅槃。『衣服』——譬慚忍善法。

『嚴身之具』——譬助道善法。『種種珍寶』——譬七科無漏道品。『象馬車乘』——譬二乘盡智無生智。『奴婢』——譬神通。『人民』——譬有漏賢位善法。

五、惟不與珠。

唯髻中明珠不以與之。所以者何。獨王頂上有此一珠。若以與之。王諸眷屬必大驚怪。

出分段機名小功勳，出變易機名大功勳，若無大功忽賜髻珠，則眷屬驚怪。譬衆生大機未發，忽說此經，不惟二乘疑惑，卽菩薩亦驚怪。初立譬竟。

二、法合，亦分五：初合威伏諸國，至五合唯不與珠。今初。

文殊師利。如來亦復如是。以禪定智慧力得法國土。王於三界。

『禪定智慧力』：禪定是慈忍行成，福德莊嚴，解脫德；智慧是空座行成，智慧莊嚴，般若德，以此二力顯法身德，合上『強力轉輪聖王』。『法國土』：卽證常寂光土。『王於三界』：統攝實報方便同居三土，合上『欲以威勢降伏諸國』，令斷三惑出二死順法性。

二、合小王不順。

而諸魔王不肯順伏。

欲界魔，住他化自在天，三界魔，居色界摩醯首羅天。合法——同居三界有見愛魔王，方便三界有塵沙魔王，實報三界有無明魔王，皆不順法性。若將摩字寫成磨練，則爲善知識矣。所謂能受天魔真鐵漢，不遭人已足庸才，倘佛魔不二，又是一番境界。

三、合起兵討伐。

如來賢聖諸將與之共戰。

『賢』，卽五停心總別相念四加行七賢位前軍。『聖』，卽七聖位，隨信行初果向、十五心進取見道。隨法行得初果，十六心見道斷見。信解二果

向，信行轉入修道，憑信發真斷欲思一至五品，論家家。見得得二果，法行轉入修道，見法得理，斷六品欲思。身證滅盡定，受想心滅，三果向斷欲思七至八品，論一種子，得三果斷九品欲思。四果有時解脫，信行鈍根，待時入道，斷上界七十一品思，論般那含。不時解脫，法行利根，不待具緣斷非想第九品思，而入無學道。以上三軍與界內見愛煩惱戰鬪。

四、合有功賞賜。

其有功者心亦歡喜。於四眾中爲說諸經令其心悅。賜以禪定解脫無漏根力諸法之財。又復賜與涅槃之城。言得滅度。引導其心。令皆歡喜。

『有功』：指能降見愛。

五、合唯不與珠。

而不爲說是法華經。

濁障雖除，大機未發，故不爲說，所以本經方便品云：『止不須復說』。佛陀初以理深難解止之，身子自他求決請之。再以驚疑不信止之，以久植必解爲請。後止爲謗必墮，三請爲利根得益，果有五千退席。

二、與珠譬，分二：初文譬，二法合。今初。

文殊師利。如轉輪王。見諸兵衆有大功者。心甚歡喜。以此難信之珠。久在髻中不妄與人。而今與之。

『有大功者』：指破無明，位在別地圓住。『難信之珠』：譬中道實智，體是三德。『久在髻中』：實爲權所隱。解髻與珠，卽開權顯實。

二、法合。

如來亦復如是。於三界中爲大法王。以法教化一切衆生。見賢聖軍與五陰魔。煩惱魔。死魔共戰。有大功勳。滅三毒。出三界。

破魔網。爾時如來亦大歡喜。此法華經。能令衆生至一切智。一切世間多怨難信。先所未說。而今說之。

大集經云：『知苦壞陰魔，斷集壞煩惱魔，證滅離死魔，修道壞天子魔。』今不云天子魔者，以小乘賢聖多斷三魔滅三毒，至八相成道降魔時，始壞天子魔。『有大功勳破魔網』：即大乘機發，而說此難信之妙經。『一切智』：依別義，空性平等，能知理內理外所銓法相，能銓名字，不能以一切道起一切種，依總義，總名佛智與一切種智同。

文殊師利。此法華經。是諸如來第一之說。於諸說中最高甚深。末後賜與。如彼強力之王久護明珠。今乃與之。文殊師利。此法華經。諸佛如來秘密之藏。於諸經中。最爲其上。長夜守護。不妄宣說。始於今日。乃與汝等而敷演之。

前文既以法合竟，意猶未盡，又復提譬帖合，殷勤讚歎欲令聞者作難遭想，依安樂行敬愛持弘。誓願安樂行之初，長文竟。

二、偈頌，分二：初頌行法，二頌歎經。初中二：初超頌行成，二、追頌行法。今初。爾時世尊欲重宣此義。而說偈言。

常行忍辱。哀愍一切。乃能演說。佛所讚經。

上總明行成，今頌別顯，初句頌著衣行成，次句頌入室行成，三句頌座行成。

二、追頌行法，分三：初頌誓願所緣之境，二頌起誓願之由，三頌正立誓願。今初。後末世時。持此經者。於家出家。及非菩薩。應生慈悲。

二、頌起誓願之由。
斯等不聞。不信是經。則爲大失。

三、頌正立誓願。

我得佛道。以諸方便。爲說此法。令住其中。

初頌行法竟。

二、頌歎經（但頌約譬廣歎，不頌就法略歎。）長文兩譬兩合，今分初總頌兩譬，二、總頌兩合。今初。

譬如強力。轉輪之王。兵戰有功。賞賜諸物。象馬車乘。嚴身之具。及諸田宅。聚落城邑。或與衣服。種種珍寶。奴婢財物。歡喜賜與。如有勇健。能爲難事。王解髻中。明珠賜之。

先三偈頌不與珠譬，後一偈頌與珠譬。

二、總頌兩合。

如來亦爾。爲諸法王。忍辱大力。智慧寶藏。以大慈悲。如法化世。見一切人。受諸苦惱。欲求解脫。與諸魔戰。爲是衆生。說種種法。以大方便。說此諸經。既知衆生。得其力已。末後乃爲。說是法華。如王解髻。明珠與之。此經爲尊。衆經中上。我常守護。不妄開示。今正是時。爲汝等說。

先三偈半頌合不與珠，後三偈頌合與珠。二解釋修行方法竟。

三、總明行成之相，分三：初結勸四行，二舉三報以勸，三、總結。今初。

我滅度後。求佛道者。欲得安隱。演說斯經。應當親近。如是四法。

二、舉三報以勸（亦名三障清淨）分三：初報障轉，轉現報。二、業障轉，轉生報。

三、煩惱障轉，轉後報。今初。

讀是經者。常無憂惱。又無病痛。顏色鮮白。

『無憂惱』，轉現報之心。『無病痛』：轉現報之色。

二、業障轉，轉生報。

不生貧窮。卑賤醜陋。

惡業感惡果，持經不生卑陋處。

三、煩惱障轉，轉後報。分二：初別明三煩惱障轉，二、總明一切煩惱障轉。初又三：初貪障轉，二瞋障轉，三癡障轉。今初。

衆生樂見。如慕賢聖。天諸童子。以爲給使。

貪財色爭名利，故爲人忽慢，今貪欲障轉，故衆生敬慕，天童給使。

二、瞋障轉。

刀杖不加。毒不能害。若人惡罵。口則閉塞。遊行無畏。如師子王。

捨瞋則鳥不驚，遇險化爲夷。

三、癡障轉。

智慧光明。如日之照。

初別明三煩惱障轉竟。

二、總明一切煩惱障轉，分四：初夢入十信相似位，二、夢入初住見道位，三夢入住行向地修道位，四夢入妙覺究竟位。今初。

若於夢中。但見妙事。見諸如來。坐師子座。諸比丘衆。圍繞說法。又見龍神。阿修羅等。數如恒沙。恭敬合掌。自見其身。而爲說法。

圓教十信相似位，乃斷見思伏無明，出三界，所謂十善（信）菩薩發大心，長別三界苦輪海。別教十信爲觀行位，與藏七賢，通一二地，爲伏見思位。

本文所稱，十信相似位，初住見道，住行向地分證修道位，妙覺究竟位，應屬圓教。

『夢』：旭祖解：『是獨頭意識與睡眠心所合，幻現三世種種境界，所夢與過去事相應，即是習氣影子，與未來事相應，即是吉凶先兆。』從五事故有夢，如偈說：『以疑心分別，學習因現事，非人來相語。』或加曾聞見及諸患七事故夢。夢與想皆是意識所發，此識至『遠行地純無漏』，末那至『無功用行我恒摧』，賴耶迄『不動地前才捨藏，金剛道後異熟空』，前五識爲『圓明初發成無漏』，藏識心，末那意，識了別，此心意識六七因中轉，五八果上圓，轉識成智始無夢。金剛經：『如夢幻泡影』，乃就如幻三昧說，所謂水月道場，空華佛事。呂祖四十年黃梁一夢公與侯，係日思夜夢，種子現行互爲關涉，所謂夢中明明有六趣，覺後空空無大千，乃於夢中作得主與作不得主之意。

科文總明一切煩惱障轉，從初信心（除四住）乃至妙覺八相成佛，皆如來莊嚴而自莊嚴，卽忍辱報。本文前兩偈半爲慈悲報，後兩句爲正見無癡報，慈悲是弘誓似發，正見無癡是界內真成，卽無見修二惑。

又持經現感此相，當知過去久已成就，今藉緣而發。又有因心果覺等相，并是夢中見未來後報之相，此乃百千萬劫事在一念夢中，用表一中無量，無量中一。迹門流通段有五品文，法師（示通經方軌）寶塔（古佛證經）達多（今佛成道）、勸持（二萬此土持經，八十萬億，他方宣通。）、安樂（身口意願行成）以三周開顯，法實故四行功成。弘經力大，功超累劫，果相先彰。

本文初兩句總貫諸文，次四句表上求佛道，後六句表下化衆生。

二、夢入初住見道位。

又見諸佛。身相金色。放無量光。照於一切。以梵音聲。演說諸法。佛爲四衆。說無上法。見身處中。合掌讚佛。聞法歡喜。而爲供養。得陀羅尼。證不退智。佛知其心。深入佛道。卽爲授記。成最正覺。汝善男子。當於來世。得無量智。佛之大道。國土嚴淨。廣大無比。亦有四衆。合掌聽法。

『又見諸佛』，表初住分真見道無生忍位，圓初住與別初地同得八相成道，所謂初發心時便成正覺。『見身處中』：表入實。『聞法歡喜』：表圓發心住，與別歡喜地等。『得陀羅尼』：即本經第二十八品普賢勸發得旋陀羅尼（空），百千萬億旋陀羅尼（假）、法音方便陀羅尼（中）。『證不退智』：圓教初信位不退，八至十信行不退，初住念不退。『即為授記』：入初住，得無生記荊。

三、夢人住行向地修道位。

又見自身。在山林中。修習善法。證諸實相。深入禪定。見十方佛。

『善法』：稱性起修之七科，十波羅密、四等、四攝、三昧總持等一切佛道。『證諸實相』：歷住行向地四十番證中道。『深入禪定』：初住已得，為順大經，即十地中無垢三昧。『見十方佛』：後心菩薩入金剛定，諸佛現前授職。

四、夢入妙覺究竟位。

諸佛身金色。百福相莊嚴。聞法為人說。常有是好夢。
又夢作國王。捨宮殿眷屬。及上妙五欲。行詣於道場。
在菩提樹下。而處師子座。求道過七日。得諸佛之智。
成無上道已。起而轉法輪。為四眾說法。經千萬億劫。
說無漏妙法。度無量眾生。後當入涅槃。如煙盡燈滅。

夢八相佛，寄顯妙覺，從須陀洹至辟支佛悉皆有夢，唯佛不夢，無疑無習故，金光明最勝王經明將證十地，皆先有夢。二舉三報以勸竟。

三、總結行成。

若後惡世中。說是第一法。是人得大利。如上諸功德。

初迹門開權顯實竟，釋安樂行品竟，次釋從地涌出品。

從地涌出品第十五

文句云：『師嚴道尊，鞠躬祇奉（師嚴故命不可違，道尊故有命必赴。）如來一命，四方奔踴（寶塔品末，釋迦欲以法華經付囑有在，是通命。下文他方菩薩八恒沙衆請弘經，佛止之曰，我娑婆世界，自有六萬恒河沙衆，是別命，此世界悉檀。）三世化導，惠利無疆（一月萬影，孰能思量，召過以示現，弘經以益當（三世化導皆屬過去，釋迦自當現在益物，菩薩弘經且在當來，一月是本，萬影是迹，明諸菩薩本難測，今佛迹難量，此爲人悉檀。）虛空湛寂，無早無晚，或者執迹而闇其本，召昔示今，破近顯遠（虛空是理，故無早晚，本迹是事，執有近遠，此對治悉檀。）寂場少父，寂光老兒，示其藥力，咸令得知（父先服種智還年之藥，雖老而若少，子亦久稟常住不死之方，雖少而若老，此第一義悉檀。）』以四悉檀因緣故從地涌出。

『地』，是實際理地。『涌出』，一切賢聖皆以無爲法而有差別。此品雖是結前妙行之要，實爲破近顯遠，開本壽量之由，此品顯迹妙，壽量顯本妙。

二、本門開迹顯遠（開師門之近迹，顯佛地之遠本。）其文爲三：初從此至汝等自當因是得聞，是序段。二、從爾時釋迦牟尼佛告彌勒菩薩下，迄分別功德品初，彌勒說偈，是正說段。三從爾時佛告彌勒訖常不輕品，共三品半，是流通段。

初序段爲一：初涌出，二疑問。初中三：初他方菩薩請弘經，二、如來不許，三、下方涌出。今初。

爾時他方國土諸來菩薩摩訶薩。過八恒河沙數。於大衆中起。合掌作禮而白佛言。世尊。若聽我等於佛滅後。在此娑婆世界。勤加精進。護持讀誦書寫供養是經典者。當於此土而廣說之。

他方菩薩聞通經福大，咸欲發願，住此弘宣。

二、如來不許。

爾時佛告諸菩薩摩訶薩衆。止。善男子。不需汝等護持此經。所以者何。我娑婆世界。自有六萬恒河沙等菩薩摩訶薩。一一菩薩。各有六萬恒河沙眷屬。是諸人等。能於我滅後護持讀誦廣說此經。

『止』：雖分身影響，普徧十方，但責任區不同，機緣有異，倘許他方，則下方不出，不能破近顯遠。召下方者，是我弟子應弘我法，緣深利多，開近顯遠。

三、下方涌出，分二：初經家紋相，二、明問訊。初中五：初涌出，二身相，三住處，四聞命、五眷屬。今初。

佛說是時。娑婆世界三千大千國土。地皆震裂。而於其中有無量千萬億菩薩摩訶薩。同時涌出。

地覆本時眷屬，如迹隱本。地裂表開迹顯本。

二、身相。

是諸菩薩身皆金色。三十二相。無量光明。

三、住處。

先盡在此娑婆世界之下。此界虛空中住。

在下不屬此，空中不屬彼，非此非彼卽中道。『下』表法性淵底。『方』是毘盧遮那身土之相。『住』卽常寂光，亦卽常樂我淨四德秘藏。娑婆名堪忍，安樂行以忍爲棲止地，修忍以謙下爲本，忘我故住空。衆生性具，菩薩修顯，諸佛滿證，無不互徧互入互現互融，所謂自心遮那不離下凡一念。

四、聞命。

是諸菩薩。聞釋迦牟尼佛所說音聲。從下發來。

聞命、弘法、破執、顯本、具上四意故來。

五、眷屬。

一一菩薩。皆是大眾唱導之首。各將六萬恒河沙眷屬。況將五萬四萬三萬二萬一萬恒河沙等眷屬者。況復乃至一恒河沙。半恒河沙。四分之一。乃至千萬億那由他分之一。況復千萬億那由他眷屬。況復億萬眷屬況復千萬百萬乃至一萬。況復一千一百乃至一十。況復將五四三二一弟子者。況復單已樂遠離行。如是等比。無量無邊。算數譬喻所不能知。

約情六萬恒河沙眷屬為多，領三二一者為少，單已為獨。若依文推尋，六萬五萬眷屬為少。單已者生佛平等，人我雙亡為多，所謂一己非獨，六萬非多，後後多於前前。偈云：單已無眷屬，其數轉過上。若約法門，一道清淨，福慧二嚴，三無漏學，四諦，五眼，六度。約心一念具十界，界界互具成百界，每界有十如，則成百界千如，歷三世間，總云：三千性相百界千如。多不多空也，一不一假也，雙非雙照中也。初經家敘相竟。

二、明問訊，分五：初三業供養，二陳問訊之辭，三佛答安樂，四偈頌隨喜，五如來述歎。初中三：初正明供養，二明所經時節，三明佛神力加持。今初。

是諸菩薩從地出已。各詣虛空七寶妙塔。多寶如來釋迦牟尼佛所。到已。向二世尊頭面禮足。及至諸寶樹下師子座上佛所。亦皆作禮。右繞三匝。合掌恭敬。以諸菩薩種種讚法。而以讚歎。住在一面。欣樂瞻仰於二世尊。

『作禮右繞』：是身業供養。『種種讚歎』：是口業供養。『欣樂瞻仰』：是意業供養。

二、明所經時節。

是諸菩薩摩訶薩從初涌出。以諸菩薩種種讚法而讚於佛。如是時間。經五十小劫。是時釋迦牟尼佛。默然而坐。及諸四眾。亦皆默然。

約真諦則大小久暫悉皆平等，約俗諦則大小久暫仍自歷然。維摩丈室容燈王國之三萬二千師子座，一一座高八萬四千由旬，是小可容大。延半日爲五十劫，是暫可容久。大經云：『處夢謂經年，覺乃須臾頃。』故時無實法，長短本空，事理互攝，故有於一毫端現寶王剎，在微塵裏轉大法輪之妙境。不可以釋迦住世僅八十年，相傳八年說法華經之事而廢理。

三、明佛神力加持。

五十小劫。佛神力故。令諸大眾謂如半日。爾時四眾亦以佛神力故。見諸菩薩徧滿無量百千萬億國土虛空。

佛眼觀之，時間長短不二，餘眼觀之，解惑不無長短，所謂凡夫肉天眼通礙不同，聖人法慧二眼勝劣各別。解者卽短而長，謂五十劫。惑者卽長而短，謂如半日。例如凡夫見三界爲異，二乘爲如，佛見之非如非異，而如而異。起信論云：『或示超地速成正覺，以爲怯弱眾生故。或說無量阿僧祇劫當成佛道，以爲懈怠眾生故。』種性根異，解惑俱機。

觀菩薩滿虛空，知非己力，卽知如來現此神變，所謂：『見兩猛知龍大、見華盛知池深，見應滿虛空，則知真彌法界。』初三業供養竟。

二、陳問訊之辭。

是菩薩眾中。有四導師。一名上行。二名無邊行。三名淨行。四名安立行。是四菩薩於其眾中。最爲上首。唱導之師。在大眾前。各共合掌。觀釋迦牟尼佛。而問訊言。世尊少病少惱。安樂行不。所應度者受教易否。不令世尊生疲勞耶。爾時四大菩薩而說偈言。世尊安樂。少病少惱。教化眾生。得無疲倦。又諸眾生。受化易否。不令世尊。生疲勞耶。

『四導師』：擬開示悟入四十位，如華嚴舉法慧德林金剛幢金剛藏說四十位，兼純不同，本迹雖殊，彼此俱四，成爲導首。四菩薩皆名行者，因持

經以妙行爲首，卽四安樂行成也（上行是身、無邊行是語、淨行是意、安立行是願。），四安樂行能令行人現生轉障，藉他方菩薩聞四行之妙，請於娑婆宏經，故唱導之首，皆曰行。『上行』：開佛知見，超于九界。『無邊行』：示佛知見，一行一切行。『淨行』：悟佛知見，事理圓融。『安立行』：入佛知見，自安安他猶如大地。

問辭、分長行偈頌，各有二意，一問如來安樂，二問衆生易度，安樂卽自行，易度卽化他，見釋迦示同人法，娑婆弊惡難度，故有是問。

三、佛答安樂。

爾時世尊於菩薩大眾中而作是言。如是如是。諸善男子。如來安樂。少病少惱。諸衆生等。易可化度。無有疲勞。所以者何。是諸衆生世世已來。常受我化。亦於過去諸佛恭敬尊重。種諸善根。此諸衆生始見我身。聞我所說。卽皆信受人如來慧。除先修習學小乘者。如是之人。我今亦令得聞是經。入於佛慧。

佛答安樂易度兩事相成，易度則安樂，安樂則易度。易度爲二：一根利德厚，世世以來常受大化，始見我身，卽稟華嚴人如來慧。二根鈍德薄，須開頓說漸，始於華嚴，終於法華，中開三乘，先習小歷三藏方等般若調伏，今聞法華入於一乘佛慧。華嚴法華佛慧不殊，教相稍異，法華文具舉十意釋之：『第一始見今見，第二開合不開合，第三豎廣橫略，第四本一迹多，第五加說不加說，第六變土不變土，第七多處不多處，第八斥奪不斥奪，第九直顯實，開權顯實，第十利根初熟鈍根後熟。』華嚴兼別以明佛慧，方等對三以現佛慧，般若帶二以現佛慧，唯法華開彼所兼所對所帶，乃至三藏但生滅法，咸成佛慧。

四、偈頌隨喜。

爾時諸大菩薩而說偈言。

善哉善哉。大雄世尊。諸衆生等。易可化度。能問諸佛。甚深智慧。聞已信行。我等隨喜。

『能問』，指諸經當機衆，華嚴四菩薩，法華身子三請，所問者爲佛智慧。

五、如來述歎。

於時世尊讚歎上首諸大菩薩。善哉善哉。善男子。汝等能於如來發隨喜心。

菩薩隨喜其迹，如來述歎其本，密顯壽量。初涌出序竟。

二疑問序，分二：初此土菩薩疑問。二他土菩薩疑問。初中二：初長文敍疑念。二、偈頌正發問。今初。

爾時彌勒菩薩。及八千恒河沙諸菩薩衆。皆作是念。我等從昔已來。不見不聞。如是大菩薩摩訶薩衆。從地涌出。住世尊前。合掌供養。問訊如來。

彌勒迹居補處，何以不識，約實論，則近成補處，不知久本。約權論，則本高迹下，爲物騰疑。

二、偈頌正發問，分四：初問來處來緣，二敍眷屬數量，三問師法是誰，四結請決疑。今初。

時彌勒菩薩摩訶薩。知八千恒河沙諸菩薩等心之所念。并欲自決所疑。合掌向佛以偈問曰。

無量千萬億。大衆諸菩薩。昔所未曾見。願兩足尊說。

是從何所來。以何因緣集。巨身大神通。智慧叵思議。

其志念堅固。有大忍辱力。衆生所樂見。爲從何所來。

問意有二：一何處來，二何因緣。『巨身大神通』：歎人如來室。『智慧叵思議』：歎坐如來座。『其志念堅固有大忍辱力』：歎著如來衣，三皆自行德。『衆生所樂見』：歎化他德。

二、敘眷屬數量。

一一諸菩薩。所將諸眷屬。其數無有量。如恒河沙等。或有大菩薩。將六萬恒沙。如是諸大眾。一心求佛道。是諸大師等。六萬恒河沙。俱來供養佛。及護持是經。將五萬恒沙。其數過於是。四萬及三萬。二萬至一萬。一千二百等。乃至一恒沙。半及三四分。億萬分之一。千萬那由他。萬億諸弟子。乃至於半億。其數復過上。百萬至一萬。一千及一百。五十與一十。乃至三三一。單已無眷屬。樂於獨處者。俱來至佛所。其數轉過上。如是諸大眾。若人行籌數。過於恒沙劫。猶不能盡知。

一、問師法是誰。

是諸大威德。精進菩薩衆。誰爲其說法。教化而成就。從誰初發心。稱揚何佛法。受持行誰經。修習何佛道。

『稱揚』：出乎口。『受持』：存乎心。『修習』：現乎事。

四、結請決疑，分四：初結歎。二請答來處。三請答來緣。四明大會同請。今初。

如是諸菩薩。神通大智力。

二、請答來處。

四方地震裂。皆從中涌出。世尊我昔來。未曾見是事。願說其所從。國土之名號。我常遊諸國。未曾見是衆。我於此衆中。乃不識一人。

三、請答來緣。

忽然從地出。願說其因緣。

四、明大會同請。

今此之大會。無量百千億。是諸菩薩等。皆欲知此事。是諸菩薩衆。本末之因緣。無量德世尊。惟願決衆疑。

『本末因緣』：包括所師、來處、來緣。初此土菩薩疑問竟。

二、他土菩薩疑問。

爾時釋迦牟尼分身諸佛。從無量千萬億他方國土來者。在於八方諸寶樹下。師子座上。結跏趺坐。其佛侍者。各各見是菩薩大衆。於諸三千大千世界四方。從地涌出。住於虛空。各白其佛言。世尊。此諸無量無邊阿僧祇菩薩大衆。從何所來。爾時諸佛各告侍者。諸善男子。且待須臾。有菩薩摩訶薩。名曰彌勒。釋迦牟尼佛之所授記。次後作佛。已問斯事。佛今答之。汝等自當因是得聞。

釋迦所證分身諸佛，為證明說經來集，故不為答，以侍者為分身眷屬，橫在十方與彌勒同疑，二土菩薩俱不知本地，彌勒所問事迹，釋迦一代未曾顯說，由此答問廣顯長壽，須佛自答。初本門序段竟。

二、正說段，分二：初誠許，二、正說。初中二：初長文，二、偈頌。長文又三：初述歎，二、誠，三、許。今初。

爾時釋迦牟尼佛。告彌勒菩薩。善哉善哉。阿逸多。乃能問佛如是大事。

『阿逸多』：翻無能勝，卽彌勒菩薩，又名慈氏。初一『善哉』，迹其上契佛心，次一『善哉』、歎其下契羣念。『佛如是大事』：開迹顯本，爲釋尊大事，又約修德果位，不約性德理趣名事。

二、誠。

汝等當共一心。被精進鎧。發堅固意。

『一心』誠勿亂，『精進』誠勿懈，『堅固』誠勿退。蓋如來實智久成，權迹長遠，化窮三世，益遍十方，非等覺以下所能思議。所謂：『法身無去亦無來，可嘆時人空自猜，三世十方俱坐斷，乾坤信是眼中埃。』

三、許。

如來今欲顯發宣示諸佛智慧。諸佛自在神通之力。諸佛師子奮迅之力。諸佛威猛大勢之力。

『諸佛智慧』：總標果智。『自在』是我德，『神通』是樂德，『奮迅』除垢，是淨德。『威猛大勢』是常德。滿四德益二世，故皆名『力』。又『自在神通』，是慈悲室。『師子奮迅』是法空座。『威猛大勢』是忍辱衣。又『自在神通』約過去久遠。『師子奮迅』約現在分身。『威猛大勢』約未來益物。初長文竟。

二、偈頌，分二：初頌誠。二頌許（略不顯述歎）今初。

爾時世尊欲重宣此義。而說偈言。

當精進一心。我欲說此事。勿得有疑悔。

二、頌許。

佛智叵思議。汝今出信力。住於忍善中。昔所未聞法。今皆當得聞。我今安慰汝。勿得懷疑懼。佛無不實語。智慧不可量。所得第一法。甚深叵分別。如是今當說。汝等一心聽。

初誠許竟。

二、正說，分二：初從此訖壽量品是正開近顯遠。二分別功德品初長文是總授法身記。三彌勒說偈是總申領解。初中二：初訖此品是略開顯動執生疑，二壽量品是廣開顯斷疑生信。初又二：初略開。二疑請。初又二：初長文，二偈頌。初又二：初答所師，二答來處（不答何因緣集，所以下文重請。）今初。

爾時世尊說此偈已。告彌勒菩薩。我今於此大眾宣告汝等。阿逸多。是諸大菩薩摩訶薩。無量無數阿僧祇從地涌出。汝等昔所未見者。我於是娑婆世界。得阿耨多羅三藐三菩提已。教化示導是諸菩薩。調伏其心。令發道意。

此答誰為說法教化，從誰初發心之問。

二、答來處，分二：初答，二釋。今初。

此諸菩薩。皆於是娑婆世界之下，此界虛空中住。於諸經典。讀誦通利。思惟分別。正憶念。

『界下空中』，答其住中道處，亦即來處。『諸經典』：追答稱揚何佛法，受持行誰經，修習何佛道等問。圓人受法無法不圓，法華妙典，權實不二，十方三世『諸經典』，悉入其中，此答稱揚。『讀誦通利思惟分別』，是答受持。『正憶念』是答修習。

二、釋，分二：初釋住處。二釋稱揚受持修習。今初。

阿逸多。是諸善男子等。不樂在眾多有所說。常樂靜處。勤行精進。未曾休息。亦不依止人天而住。

『不樂在眾』：眾，指界內界外五陰。『多有所說』：多，指空有二邊。

『常樂靜處』：靜處，即中道第一義諦。『勤行精進未曾休息』：心心流注，任運與薩婆若海相應。『不依人天』：人多滯著表有邊，天住淨福表空邊，界下虛空，表不依二邊住常寂光法性土。

二、釋稱揚受持修習。

常樂深智。無有障礙。亦常樂於諸佛之法。一心精進求無上慧。

由『常樂深智。無有障礙。』故於諸經典，悉皆稱揚。由『常樂於諸佛之法』，所以讀誦通利思惟分別。由『一心精進求無上慧』，故能正憶念。初長文竟。

二、偈頌，分二：初頌長文，二、正略開顯。初中二：初頌答所師，二頌答來處。今初。

爾時世尊欲重宣此義。而說偈言。

阿逸汝當知。是諸大菩薩。從無數劫來。修習佛智慧。
悉是我所化。令發大道心。此等是我子。

頌答所師。

二、頌答來處，兼歎菩薩德。

依止是世界。常行頭陀事。志樂於靜處。捨大眾憤鬧。
不樂多所說。如是諸子等。學習我道法。晝夜常精進。
爲求佛道故。在娑婆世界。下方空中住。志念力堅固。
常勤求智慧。說種種妙法。其心無所畏。

初頌長文竟。

二、正略開顯。

我於伽耶城。菩提樹下坐。得成最正覺。轉無上法輪。

爾乃教化之。令初發道心。今皆住不退。悉當得成佛。

我今說實語。汝等一心信。我從久遠來。教化是等衆。

既云成道後令發初心，又云：從久遠來教化是等，雖然開近顯遠，亦爲動執生疑之由。

二、疑請，分二：初長文，二偈頌。初中二：初經家敘疑，二、騰疑請答。今初。

爾時彌勒菩薩摩訶薩。及無數諸菩薩等。心生疑惑。怪未曾有。而作是念。云何世尊於少時間。教化如是無量無邊阿僧祇諸大菩薩。令住阿耨多羅三藐三菩提。

二、騰疑請答，分二：初騰疑，二請答。初中三：初法說，二、立譬，三、法合。初又三：初執近疑遠，二執遠疑近，三結難信。今初。

卽白佛言。世尊。如來爲太子時。出於釋宮。去伽耶城不遠。坐於道場。得成阿耨多羅三藐三菩提。從是已來。始過四十餘年。世尊云何於此少時。大作佛事。以佛勢力。以佛功德。教化如是無量大菩薩。當成阿耨多羅三藐三菩提。

『爲太子時』：釋迦牟尼爲中印度迦毘羅城主淨飯主之子，母曰摩耶，名呼悉達多，誕生於城東嵐毘尼園。『釋宮』：釋迦是姓，譯曰能，爲刹帝利種之一族，本稱瞿曇氏，後分族而稱釋迦氏。『去伽耶城不遠』：伽耶，此云山城，西城記八曰：『渡尼連禪河至伽耶城，城甚險固，少居人，唯婆羅門有千餘家，本仙人之祚胤也。』出城東南行三里，大道坦坦，直至菩提道場。

中阿含五十六，增一阿含三十七，有部律雜事三十八，大槃涅槃經、本行集經，皆言二十九出家，苦行六年，三十五成道。

修行本起經、瑞應本起經、六度集經，則云：十九出家，三十成道。頌曰：『十九踰城六苦行，五歲遊歷三十成，說法度生五十年，是則共當八十

壽。

二、執遠疑近。

世尊。此大菩薩衆。假使有人。於千萬億劫。數不能盡。不得其邊。斯等久遠已來。於無量無邊諸佛所。植諸善根。成就菩薩道。常修梵行。

彌勒既不知其數，不識一人，而言『植諸善根』等者，概由佛歎住處德業等，豈近成佛能化。

三、結難信。

世尊。如此之事。世所難信。

因不明如來設教之始終，本迹之廣遠。故云：『難信』。初法說竟。

二、立譬。

譬如有人。色美髮黑。年二十五。指百歲人。言是我子。其百歲人。亦指年少。言是我父。生育我等。是事難信。

此執俗情提法着。古人以喻釋喻，謂父服還年之藥（譬如來服垂迹之藥），示伽耶所生。菩薩直論本地，形如百歲。

三、法合。

佛亦如是。得道已來。其實未久。

此合年二十五，不應有百歲子。

而此大衆諸菩薩等。已於無量千萬億劫。爲佛道故。勤行精進。善人出住無量百千萬億三昧。得大神通。久修梵行。善能次第習諸善法。巧於問答。人中之寶。一切世間甚爲希有。

此合百歲之人，不應是年二十五歲所生。

『善人出住』：卽入定出定住定，文句云：『約藏通，九次第爲善人（無間入），師子奮迅是善出（以散名出），超越是善住（雖經超散住禪宛然）。約別意，初地至十地名善入，十地入重玄門倒修凡夫事，名善出，妙覺名善住。約圓意，畢（窮）法性三昧名善入，首楞嚴名善出（能現威儀），王三昧名善住（如王安國）。』文含智、進、禪、慧、願、戒、施、方便、力、忍等十度。

今日世尊。方云得佛道時初令發心。教化示導。令向阿耨多羅三藐三菩提。世尊得佛未久。乃能作此大功德事。

此合結難信。初騰疑竟。

二、請答。分二：初明請意，二正請答。初又二：初爲現在，二爲未來。今初。

我等雖復信佛隨宜所說。佛所出言未曾虛妄。佛所知者皆悉通達。

我雖未達，仰信而已。

二、爲未來。

然諸新發意菩薩。於佛滅後。若聞是語。或不信受。而起破法罪業因緣。

初心易生誹謗，仰信未能增道損生。

二、正請答。

唯然世尊。願爲解說。除我等疑。及未來世諸善男子。聞此事已亦不生疑。

請除現在未來之疑。初長文竟。

二、偈頌分二：初頌騰疑，二、頌請答。初中三：初頌法說，二頌立譬，三頌法合。初又三：初頌執近，二頌執遠，三頌結難信。今初。

爾時彌勒菩薩欲重宣此義。而說偈言。

佛昔從釋種。出家近伽耶。坐於菩提樹。爾來尚未久。

一一、頌執遠。

此諸佛子等。其數不可量。久已行佛道。住於神通力。
善學菩薩道。不染世間法。如蓮華在水。從地而涌出。
皆起恭敬心。住於世尊前。

三、頌結難信。

是事難思議。云何而可信。佛得道甚近。所成就甚多。
願爲除衆疑。如實分別說。

初頌法說竟。

二、頌立譬。

譬如少壯人。年始二十五。示人百歲子。髮白而面皺。
是等我所生。子亦說是父。父少而子老。舉世所不信。

初五句頌譬執近疑遠，次一句頌譬執遠疑近，後兩句頌譬結難信。

三、頌法合。

世尊亦如是。得道來甚近。是諸菩薩等。志固無怯弱。
從無量劫來。而行菩薩道。巧於難問答。其心無所畏。
忍辱心決定。端正有威德。十方佛所讚。善能分別說。
不樂在人衆。常好在禪定。爲求佛道故。於下空中住。

初半偈頌合年二十五，次三偈半頌合百歲子（略不頌合結難信）。初頌騰疑竟。

二、頌請答。

我等從佛聞。於此事無疑。願佛爲未來。演說令開解。
若有於此經。生疑不信者。卽當墮惡道。願今爲解說。
是無量菩薩。云何於少時。教化令發心。而住不退地。

初略開顯動執生疑竟。

釋從地湧出品竟。次釋如來壽量品。

如來壽量品第十六

『如來』：指十方三世，真應本迹二佛，法報應三身之通號。『壽量』：詮量諸佛之功德，如來身相甚多，如華嚴兩種十身（融三世間十身，佛具十身），妙音觀音三十三身，十法界身等，今品明二三身如來。二身如來者，成論云：『乘如實道來成正覺。』如是智，實是境，道是因，覺是果，此真身如來。倘云來生三有，示成正覺，則屬應身如來，蓋真身云成，應身云生。

三身如來者，大論云：『如法相解（法報），如法相說（應身）。』有佛無佛性相常然，徧一切處而無有異，名如，不動而至爲來。經云：我實成佛以來無量無邊劫，此法身如來。從理名如，從智名來，十地滿足，得常住涅槃，卽報身如來。如境如智合，處處示成正覺，轉妙法輪，如經云：出釋氏宮，卽應身如來。故論云：如法相說，是三如來不可單取。

本迹真應佛者，諸經以寂滅道場所成法報爲本，從本起勝劣二應爲迹。今經取寂場及中間所成三身皆名爲迹，本昔道場所得三身爲本。非本無以垂迹，非迹無以顯本，本迹雖殊，不思議一。從真俗中三諦之本起應爲迹，本迹皆言語道斷，心行處滅。

『壽量』：壽者受義，文句云：『真如不隔諸法，境智相應，一期報得百年不斷，故名受。』量者詮量，文句云：『詮量法如來以理爲命，報如來以智慧爲命，應如來同緣爲命。』此品詮量通明三身，若從別意，正論報身佛功德。

二、廣開顯斷疑生信，分二：初誠信，二正答。初中四：初三誠，二三請，四重誠（共四請回誠並前迹門三請一誠，合爲五誠七請。）今初。

爾時佛告諸菩薩及一切大衆。諸善男子。汝等當信解如來誠諦之語。復告大衆。汝等當信解如來誠諦之語。又復告諸大衆。汝等當信解如來誠諦之語。

『誠諦』：忠誠審實。昔機淺方便施權，止可隨他意語，今隨自意語示之以要，故二誠信解。

二、三請。

是時菩薩大衆。彌勒爲首。合掌白佛言。世尊。惟願說之。我等當信受佛語。如是三白已。

菩薩既秉誠誠，說必信受。

三、重請。

復言。惟願說之。我等當信受佛語。

四、重誠。

爾時世尊。知諸菩薩三請不止。而告之言。汝等諦聽。

初誠信竟。

二、正答，分二：初長文，二偈頌。初中二：初正開近顯遠，二明三世益物。初又二：初出執近之情，二破近顯遠。今初。

如來秘密神通之力。一切世間天人及阿修羅。皆謂今釋迦牟尼佛。出釋氏宮。去伽耶城不遠。坐於道場。得阿耨多羅三藐三菩提。

『秘密』：昔所不說名密，唯佛自知名密，卽三一相卽的二德秘藏。

『神通之力』：神是天然不動之理，卽法性身，通是無壅不思議慧，卽報身，力是幹用自在，卽應化身。

『天人修羅』，菩薩攝在三善道內，二乘被開，俱成菩薩，餘三惡道，罪重根鈍少智，不知作此情調。

文句云：『菩薩有三種，謂下方他方舊住，下方卽本日所化，故無執近之謂。他方舊住俱有二種，一從法身應生菩薩，多無執近之謂，二今生始得無生忍，或未得者，咸有此執近之情調。』

二、破近顯遠，分二：初正顯遠，二舉譬格量久遠。今初。

然善男子。我實成佛已來。無量無邊百千萬億那由他劫。

此明久遠之長，以破伽耶近成之短。

二、舉譬格量久遠。分三：初舉譬問，二答，三合顯久遠。今初。

譬如五百千萬億那由他阿僧祇三千大千世界。假使有人抹為微塵。過於東方五百千萬億那由他阿僧祇國。乃下一塵。如是東行。盡是微塵。諸善男子。於意云何。是諸世界。可得思惟校計。知其數否。

下塵被點之界，已不可說，況盡是微塵界，豈可數說。

二、答。

彌勒菩薩等俱白佛言。世尊。是諸世界。無量無邊。非算數所知。亦非心力所及。一切聲聞辟支佛。以無漏智。不能思惟知其限數。我等住阿惟越致地。於是事中。亦所不達。世尊。如是諸世界。無量無邊。

一非算數心力所及，二非無漏智所思惟，三非阿惟越致所達，唯佛智能知。

三、合顯久遠。

爾時佛告大菩薩衆。諸善男子。今當分明宣語汝等。是諸世界。若著微塵及不著者。盡以為塵。一塵一劫。我成佛已來。復過於此百千萬億那由他阿僧祇劫。

金光明經云：『一切海水可知滴數，無有能知如來之壽。』此明未來常住，非明過去久成。

不可以法身解此，以法身無始，豈論遠劫，法身平等何獨釋迦。且諸佛身所證三身必同，故云『諸佛道同』。三世益物必同，故云『是我方便諸佛亦然』。總之，顯本可同，遠近不等，例如日月燈明八子，大通智勝十六子，

釋迦一子，有子是同，其數不等。故知最初成道為體為本，從體起用為迹，又以最初實得體用為本，從是以來，所有三世體用皆為迹。初正開近顯遠竟。

二、明三世益物，分二：初法說，二、譬說。初中二：初正明三世益物，三總結不虛。初又三：初明過去益物，二明現在益物，三明未來益物。初又三：初過去益物處，二、拂過去迹疑，三、明過去益物所宜。今初。

自從是來。我常在此娑婆世界。說法教化。亦於餘處百千萬億那由他阿僧祇國。導利衆生。

上明成佛甚久，久居何處呢，故云『常在娑婆世界及餘諸國……導利衆生。』

娑婆翻堪忍，卽本應身所居之土，今日迹居不異於本，但今昔特異，見燒者謂近，照本者達遠。故經云：『我土不毀，常在靈山，豈離伽耶別求常寂，非寂光外別有娑婆。』肇論云：『釋迦掩室於摩揭，淨名杜口於毘耶。』

三、拂過去迹疑。

諸善男子。於是中間。我說然燈佛等。又復言其入於涅槃。如是皆以方便分別。

『然燈佛』：瑞應經譯曰錠光（取錠為燈之足）。智度論譯曰然燈，梵名提洹竭提和竭羅。釋迦如來因行中第二阿僧祇劫滿時逢此佛出世，買五華之蓮以供養佛，髮布於泥令佛踏之，以受未來成佛之記別。

疑者曰：若成佛如此之久，云何經中說於然燈佛時方得授記，又既成佛證常住身，云何儒童菩薩在然燈佛時得記宏法，壽終入滅更生餘處。佛曰：『皆以方便分別。』當知爾時釋迦得記，並非業果分段生身，釋迦又捨壽入涅槃，皆是從本無迹。

三、明過去益物所宜，分二：初感應，二施化。今初。

諸善男子。若有衆生來至我所。我以佛眼。觀其信等諸根利鈍。隨所應度。

『至我所』：即是過去衆生漸頓兩機冥和法身。『佛眼觀』：起劣、勝兩應，圓照衆生萬善，知其始末。『信等諸根』：卽信進念定慧。慧根卽了因，餘根屬緣因，此二善根，各有利鈍，通攝頓漸機緣，頓機利鈍，卽是圓別根機，漸機利鈍，卽是藏通根機。且四教乃至人天諸根，各各自論利鈍。

二、施化分二：初明形聲兩益，二明得益歡喜。今初。

處處自說名字不同。年紀大小。亦復現言當人涅槃。又以種種方便。說微妙法。

『處處』：豎則微塵劫數，橫則十方刹海，無非如來，垂迹之處。『自說』：隨自意語。『名字不同』：機有優劣，形分勝負，或示勝應身，或示劣應身，或示三乘等身。『年紀大小』：真應佛壽不等，非生現生，處處降神，非滅現滅，示入涅槃。『種種方便說微妙法』：頓漸顯密，或定不定，由兼但對帶而施開廢，入於實相。

二、明得益歡喜。

能令衆生。發歡喜心。

現身形益，說法聲益，聲形二益度衆生，令成一切種智。初明過去益物竟。

二、明現在益物。分二：初感應，二施化。今初。

諸善男子。如來見諸衆生。樂於小法。德薄垢重者。

『如來見』：卽佛眼照見。『諸衆生樂小法者』：所見之機，例人天樂弊欲，入乘樂灰斷，三教菩薩著漸成，乃至捨本求迹，歷別修行一乘，不能一心圓頓普修，甚至樂近成，而不欲聞久遠者，故屬樂小法。

『德薄』：緣了二善功用微劣。『垢重』：三惑濃厚。

二、施化，分二：初明現形，三明說法。今初。

爲是人說。我少出家。得阿耨多羅三藐三菩提。然我實成佛已來。久遠若斯。但以方便教化衆生令人佛道。作如是說。

前明利鈍二機來感法身，今卽非生現生，現勝劣兩應，此兩應各有生法二身。

劣應生身者，百劫修相好業，於最後身，正慧托胎，在伽耶城，淨飯王家，受生報身，於摩伽陀國而成覺道。

劣應法身者，以戒、定、慧、解脫、解脫知見五分功德之法爲體，轉五蘊（轉色蘊成戒身、轉受蘊成定身、轉想成慧、轉行成解脫、轉識成解脫知見）成此五分，仁王般若經菩薩行品云：『觀五蘊色受想行識，得戒忍、定忍、慧忍、解脫忍、解脫知見忍。』經三僧劫修三十四心，在菩提樹下，斷結成佛。

勝應生身者，住摩耶胎常說大乘。勝應法身者，於寂滅道場，金剛後心，斷無明盡，得妙覺相應慧，窮照法性，萬德普備。

『出家』：劣應出分段家，勝應出二死家。『從三菩提』：劣應以生滅四諦所發無漏，盡無生智爲菩提，勝應照三諦一實之道，一切種智爲菩提。

『然我實成佛已來』下，明本質不生，今經望寂場遮那之體，既是迹成，正破勝劣兩應，生法二身，雙垂兩相，二始同時，方便說耳。

二、明說法，分二：初明一代所說，二釋出巧說之由。今初。

諸善男子。如來所演經典。皆爲度脫衆生。或說己身。或說他身。或示己身。或示他身。或示他事。諸所言說。皆實不虛。

『所演經典』：泛指一代時教。『皆爲度脫衆生』：頓漸顯密定與不定，無非應病與藥。『或說己身』：說自己往昔因緣。『或說他身』：說諸佛菩薩及餘弟子種種因緣。『或示己身』：現勝應佛像。『或示他身』：現劣應及九界像。『或示己事』：現佛界事，現種智，現大自在等。『或示他事』：

現九界事，現小智斷，現九惱等。『諸所言說皆實不虛』：為度眾生，於不同世間之言教，皆有其因果始終並無分毫虛誑。

二、釋出巧說之由，分二：初明由照權實理，為說示之本，二明由稱漸頓機，為說示之緣。今初。

所以者何。如來如實知見三界之相。無有生死若退若出。亦無在世及滅度者。非實非虛。非如非異。不如三界見於三界。如斯之事。如來明見無有錯謬。

『如實知見三界之相』：如來稱性而修，如理而照，實智照實理，則無三界之因相。『無有生死若退若出』：如來所證之理即法性身，能證之智即自受用身，以種智佛眼如實知見澈法底源，則分段變易二種生死之相，當體即是真如實相，故無生死可退入，無生死可出離。『亦無在世及滅度者』：觀十界實法皆空，則無在生死之世，及人涅槃之滅。『非實非虛』：十界假名如昨夢，故非滅度之實，非生死之虛。『非如非異』：非世間之隔異，非出世之真如。

生死無退出，亦無在世滅度，滅度非實，生死非虛，真如非如，世間非異，此明雙非，正顯真俗不二的中道。『不如三界見於三界』：如來窮照三界之實理，即俗而真，隨自智說，隨自意語，開權顯實，開迹顯本，不同兩種三界之人，見三界為有、為空。倘即真而俗，同於三界見於三界，係隨情說，隨他意語，為實施權，為本垂迹。總之，如來以無量智明見無有錯謬，兩益皆實不虛。

二、明由稱漸頓機故即是說示之緣。

以諸眾生有種種性。種種欲。種種行。種種憶想分別故。欲令生諸善根。以若干因緣譬喻言辭。種種說法。所作佛事。未曾暫廢。

『種種性』：過去習所成之利鈍根種。『種種欲』：從根種所發之現行。

『種種行』：隨諸樂欲所作善惡業行。『種種憶想分別』：隨所作行而生於相似慧解。

於『種種性』，宜用為人悉檀，以善根猶性。於『種種欲』，宜用世界悉檀，以大論從果曰世界，禪經從因名樂欲。於『種種行』，宜用為人對治兩悉檀，以隨樂欲而修諸行，行起宿善，治破現惡。於『種種憶想分別』，宜用第一義悉檀，以頓漸之機，隨其善根欲樂，修得內凡相似解（別三賢圓十信），入住登地為第一義，如外凡五品（隨喜、讀誦、說法、兼行六度、正行六度），內修三觀，觀三諦，外修五悔助理解（懺悔、勸請、隨喜、回向、發願）。因圓人受法，無法不圓，故能常境無相，無相而相，三諦宛然，常智無緣，無緣而緣，無非三觀。

『種種說法』：如四教各明四門入理（有、空、亦有亦空、非有非空），並以四門配於四教，適應頓漸之機，例藏教有門，說三世實有，法體恒有，空門，立三假（因成相續相待）空我法，亦有亦空門，雙照實有與空理，非有非空門，雙非有空。通教有門，即空之有，空門，即有之空，亦空亦有門，雙照空有，非空非有門，雙遮空有，智論所謂『一切實一切不實，一切亦實亦不實，一切非實非不實，佛於此四句廣說第一義悉檀。』別教有門，觀虛妄之色盡，別有妙色，名曰佛性，空門，觀如來藏與大涅槃皆空，亦有亦空門，雙觀真空妙有，非有非空門，觀但中法性之理。圓教有門，觀見思之假即是法界，具足一切佛法，是三諦相即之假，空門，觀一切法不在因不屬緣，我及涅槃亦皆空，是三諦相即之空，亦有亦空門，為空假相即，是空假相雙之中，非有非空門，見思即法性，故見思非有，法性即見思，故法性非空，是雙非空假之中道。

『所作佛事未曾暫廢』：總結不虛，如上若干已他形聲，皆令眾生入佛知見，為實施權，開權顯實，皆實不虛，佛事無廢。

三、明未來益物，分二：初正明非滅唱滅以益未來，二釋須唱滅意。初又二：初明本實不滅，二明方便唱滅。今初。

如是我成佛已來。甚大久遠。壽命無量阿僧祇劫。常住不滅。諸善男子。我本行菩薩道所成壽命。今猶未盡。復倍上數。

『甚大久遠壽命無量』：牒前過去事。『常住不滅』：正明未來永恒益

物。『我本行菩薩道所成壽命。今猶未盡。復倍上數。』：舉因況果，謂未成佛前，初悟圓因而登任分證法身之壽，已不可盡，倍於如上所說塵點劫，況成佛果壽耶。蓋法身壽命無始終，報身壽命有始無終，應身壽命隨緣修短，有始有終，今正明報身修得壽命，雖約過去剎塵爲譬，仍是有始，未來直云常住不滅，則是無終。

二、明方便唱滅。

然今非實滅度。而使唱言當取滅度。如來以是方便。教化衆生。

三身並有非滅唱滅之義。

法身非滅唱滅者，如文句引淨名云：『法本不生，今則無滅。』卽是法身非滅，又云：『是寂滅義。』是滅生之滅，非卽生之滅，爲未了者唱耳。又引瓔珞中寂照帖釋，彼經以照寂爲等覺，以寂照爲妙覺，所謂照寂是唱滅，寂照是唱生。且迷心執著，卽煩惱生而智慧滅，若解心無染，則智慧生煩惱滅，解生惑滅，約理性而言，若無迷解二緣，則不唱有此生滅。

報身非滅唱滅者，惑智本無生滅，明暗亦不相除，爲報身無生滅體，不解者謂其卽是佛而生憍恣，故復唱言，修道能滅惑，豈智慧真能滅煩惱耶。

應身非滅唱滅者，應身是法報之用，體旣不滅，用豈有窮，卽應身不滅，因衆生常見佛，則生憍恣故唱我於今夜當取滅度。

文句云：『法身當體論不生滅，報身了達無能生滅，應身相續不生滅。』迹教化道有滅不滅。

二、釋須唱滅意，分二：初不滅有損，二唱滅有益。今初。

所以者何。若佛久住於世。薄德之人。不種善根。貧窮下賤。貪著五欲。入於憶想妄見網中。若見如來常在不滅。便起憍恣。而懷厭怠。不能生於難遭之想。恭敬之心。

『不種善根』：指不生真中二善。『貪著五欲』：是生思惑。『入於憶想妄見網中』：是生見惑。見思生而未斷，安能令斷無明，故須唱滅，以生

真中二善，損於通別二惡。『起憍恣』：即增見惑。『懷厭怠』：即增思惑。『不能生難遭想』：即不能生見諦解。『不生恭敬心』：即不能生思惟道。

若聞生佛平等，不藉修證，悞謂天然彌勒，自然釋迦，則生憍恣上慢，故為唱言要須滅惑，法身方乃寂滅。若聞煩惱即菩提，明暗不相除，智慧不滅煩惱，使起放逸，不復修善，故為唱言，明時無暗，具足煩惱何能有慧，報身智慧能斷障惑，無明力大，佛菩提智能滅。應身非滅唱滅見前後文。眾生聞是唱滅，便於三佛生難遭想，起恭敬心。

二、唱滅有益。

是故如來以方便說。比丘當知。諸佛出世。難可值遇。所以者何。諸薄德人。過無量百千萬億劫。或有見佛。或不見者。以此事故。我作是言。諸比丘。如來難可得見。斯眾生等聞如是語。必當生於難遭之想。心懷戀慕渴仰於佛。便種善根。是故如來雖不實滅。而言滅度。

『或有見佛』：多善少惡，不為其人唱滅，是人見佛常在靈山。『或不見佛』：其人障重善輕，為說三身難會，三佛雖復非生非滅，必須生善滅惡，乃得證此，是故三身雖不實滅，而唱滅也。初正明三世益物竟。

二、總結不虛。

又善男子。諸佛如來。法皆如是。為度眾生。皆實不虛。

事理相攝，性修不二，權實本迹，無不誠諦而不虛。初法說竟。

二、譬說，分二：初立譬，二法合。初中二：初良醫治子譬（譬上三世益物），二治子實益譬（譬上總結不虛）。初又三：初遠行譬（譬過去益物），二還來譬（譬現在益物），三復去譬（譬未來益物）。今初。

譬如良醫。智慧聰達。明練方藥。善治眾病。其人多諸子息。若二十。乃至百數。以有事緣。遠至餘國。

前三世益物文中分兩大段，初法說，二譬說。法說中有三節文，初過去益物處，二拂過去迹疑，三明過去益物所宜，今譬說但譬益物所宜，就所宜中有感應施化兩文。『良醫』，譬前感應文中『我以佛眼觀』，有能應之智。『其人多諸子息』，譬前感應文中『衆生來至我前』，有能感之機。前施化文中有形聲兩益，及得益歡喜，今略不譬歡喜及聲益，於形益中又不譬非生現生，但譬非滅現滅。故文云：『有事緣遠至他國。』

文中列醫有十種，通收邪正，貫彼偏圓：一、空見外道，教人起邪，斷善根法，法身既亡，慧命亦死。二、有見外道，投岸赴火，苦行行善，不得禪定，不能斷結。三、修定斷結外道，雖斷事禪，未斷見惑，隨禪受生，仍受輪迴，如世醫所治療已復生（佛未出時上三種亦稱醫），四、二乘止治一兩種有緣者，不能徧治一切。五、藏教菩薩廣治而無巧術。六、通教菩薩，但治有反復凡夫，不治焦種必死二乘。七、別教地前菩薩，雖治難癒之病，不能一時治一切病。八、圓教十信菩薩，雖一時能治一切，不能令平復如本（自入未深）。九、圓教四十心菩薩，能徧治一切，亦能平復如本，而不能過本（法身本有，今令證本，故名爲復，究竟覺名過本）。十、如來能一時治一切病，既能平復，又能過本（良醫）。

阿含云良醫有四種：一、善知病相（不出界內），二、知病因起（不出依正），三、善知方治（不逾生滅無常），四、畢竟不發（祇住涅槃）。文句記說，望今但成第四五兩醫。大經云：曉八術（天眼、宿命、漏盡等三達及五眼）者，對此仍疏。『智慧』：權實二智深知二諦。『聰達』：五眼鑒機頓漸不差。『明練方藥』：譬十二分教，能詮文如方，所詮理如藥。

『善治衆病』：能觀諸根利鈍，巧用四悉檀。『多諸子息若二十乃至百數』：若十聲聞，二十支佛，百數菩薩，或以性具十界機，或人天、或二乘、或佛菩薩等兩界機，十界互具成百界機。子義有三種：一正因佛子，卽一切衆生之性德，故云『其中衆生皆是吾子』，二緣因佛子，稟教修行，故云

『長者諸子若二十乃至三十先因遊戲入火宅』，三了因佛子，謂聞法悟道而三因開發，正因理心發卽法身德，了因慧心發卽般若德，緣因善心發卽解脫得，故云『從佛口生，從法化生，得佛法分，真是佛子。』若了因子常得

見父，父不遠行。緣因子，機尚未熟，父即遠行，飲他毒藥之義，今云多諸子息，正是普收正因子。

若東三從一，有性修三因，性德三因合成正因，修德三因，合成緣因，性修不二合成了因。約修則緣了各三，論理則始終具三，理中三因約迷說，五品觀行十信相似並入緣攝，初住分證名了因。『以有事緣遠至他國』：譬此土機淺他方緣熟，非滅現滅。

二、還來譬（譬現在益物）分二：初譬感應，二譬施化。今初。

諸子於後。飲他毒藥。藥發悶亂。宛轉於地。

此譬上文『如來見諸衆生樂於小法德薄垢重者』，『飲他毒藥』，佛世雖曾結緣，通惑未斷，佛陀非滅唱滅，大地幽暗，漸著於三界見思毒藥。『藥發悶亂。宛轉於地。』：輪轉六道，不知出要。

二、譬施化，分二：初譬現行，二譬說法。今初。

是時其父。還來歸家。諸子飲毒。或失本心。或不失者。遙見其父。皆大歡喜。拜跪問訊。善安隱歸。我等愚癡。誤服毒藥。願見救療。更賜壽命。

『還來歸家』：譬上文『爲是人說，我少出家得阿耨多羅三藐三菩提』，非生現生。『或失本心』：譬貪著三界，先失迹中所種三乘善根，爲是人非滅唱滅付待後期。『或不失者』：譬雖著五欲，未失三乘善根，爲是人非生唱生，而成熟脫之。『遙見其父』：譬佛出時，衆生亦見色身，而爲見思障已五分，與佛五分成遙，不得親奉法身。『皆大歡喜』：見聞佛出，皆有喜敬求救之事，具如諸經，如梵王請等。

二、譬說法（上文法說明一代所說，及釋巧說之由，所謂照理稱機）今總明三意：初譬佛受請轉頓漸法輪，二譬勸誡，三譬得益。今初。

父見子等苦惱如是。依諸經方。求好藥草。色香美味。皆悉具足。擣篩和合。與子令服。

『經方』：譬十二分教。『藥草』：譬從佛出五味，頓漸法門。『色』：譬大小乘戒，戒防身口，事相彰顯。『香』：譬事理諸禪，功德普熏。

『味』：譬權實諸慧，能證空中理味。『皆悉具足』：不論頓漸大小偏圓皆有此三學，以戒粗定細，香不可見，因香可遙知，味到方覺，如慧到理顯。此戒定慧卽八正道（語業命是戒，正定是定，思惟見精進念屬慧。）修之能見佛性。又色香味卽三德（色是法身，體遍故。香是解脫，離臭故。味是般若，覺義故。）大小偏圓一切法門，悉攬此三德爲體。『擣』：譬空三昧，空觀也。『篩』：譬無相三昧，假觀也。『和合』：譬無作三昧，中觀也。大小偏圓皆有此三種三昧，一一三昧皆具戒定慧，亦皆以三德爲體，修以三觀名『令服』。醫藥擣之未篩如著空相，篩而未合，猶計所作，三法（觀）具足，服可治病。

二、譬勸誠。

而作是言。此大良藥。色香美味。皆悉具足。汝等可服。速除苦惱。無復衆患。

『汝等可服』，是勸。『速除苦惱』，是誠。

三、譬得益。

其諸子中不失心者。見此良藥。色香俱好。即便服之。病盡除愈。

不失心者，服藥病愈，譬上皆實不虛，見色香好，服之味美，得味病除，譬由戒生定，因定發慧，能斷三惑。二還來譬（譬現在益物）竟。

三、復去譬（譬未來益物）分四：初超譬不滅有損，二譬方便唱滅，三譬唱滅有益，四追譬本實不滅。今初。

餘失心者。見其父來。雖亦歡喜問訊。求索治病。然與其藥。而不肯服。所以者何。毒氣深入。失本心故。於此好色香藥。而謂不美。

『餘失心者』：譬往昔緣淺或未結緣者，屬未來機，須待滅後方漸熟脫。

『毒氣深入』：譬上文貪著五欲入於憶想妄見網中。『好色香藥而謂不美』：譬上文便起憍恣而懷厭怠，卽是不能持戒習定而不得理味。

二、譬方便唱滅。

父作是念。此子可愍。爲毒所中。心皆顛倒。雖見我喜。求索救療。如是好藥。而不肯服。我今當設方便。令服此藥。卽作是言。汝等當知。我今衰老。死時已至。是好良藥今留在此。汝可取服。勿憂不瘥。作是教已。復至他國。遣使還告。汝父已死。

『死時已至』：譬當入涅槃。『是好良藥。今留在此。』：譬留諸經教法門。『復至他國』：譬此方現滅他方現生。『遣使』：譬四依傳宏。

三、譬唱滅有益。

是時諸子聞父背喪。心大憂惱。而作是念。若父在者。慈愍我等。能見救護。今者捨我。遠喪他國。自惟孤露。無復恃怙。常懷悲感。心遂醒悟。乃知此藥。色香美味。卽取服之。毒病皆愈。

四、追譬本實不滅。

其父聞子。悉已得瘥。尋便來歸。咸使見之。

佛後『醒悟』，服藥修行，能感未來應化，如遺教經云：『其未度者，亦皆作得度因緣。』普賢觀云：『精進苦到得見釋迦分身多寶。』如智者親見靈山一會儼然未散，故知滅實不滅。初良醫治子譬（譬上文三世益物）竟。

二、治子實益譬（譬上總結不虛）。

諸善男子。於意云何。頗有人能說此良醫虛妄罪否。不也。世尊。

初立譬竟。

二、法合。

佛言。我亦如是。成佛已來。無量無邊百千萬億那由他阿僧祇劫。爲衆生故。以方便力。言當滅度。亦無有能如法說我虛妄過者。

『成佛以來無量劫』：合過去益物。『言當滅度』：合未來益物，略不
合現在。『亦無有能如法說虛妄過者』，合治子實益。初長文竟。

二、偈頌，分二：初頌正顯遠，二頌三世益物。今初。

爾時世尊欲重宣此義。而說偈言。

自我得佛來。所經諸劫數。無量百千萬。億載阿僧祇。

二、頌三世益物，分二：初頌法說，二頌譬說。初中二：初頌正明三世益物，二頌總
結不虛。初又三：初頌過去，二頌現在，三頌未來。初又三：初超頌過去益物所宜，
二追頌過去益物處。三頌拂過去迹疑。今初。

常說法教化。無數億衆生。令人於佛道。爾來無量劫。
爲度衆生故。方便現涅槃。

『常說法教化』：頌聲益。『令人於佛道』：頌得益。『方便現涅槃』：
頌形益，其中非滅現滅，卽兼非生現生義。

二、追頌過去益物處。

而實不滅度。常住此說法。

三、頌拂過去迹疑。

我常住於此。以諸神通力。令顛倒衆生。雖近而不見。

二、頌現在，分二：初頌感應，二頌施化。今初。

衆見我滅度。廣供養舍利。咸皆懷戀慕。而生渴仰心。
衆生既信伏。質直意柔軟。一心欲見佛。不自惜身命。

前長文中明感應云『樂於小法德薄垢重』，今頌云『供養舍利而生渴

仰』，彼約不知久成長義說，今約能感迹化義說。雖言戀慕渴仰，乃至不惜身命，以佛眼觀之，仍不免樂近成小法。

二、頌施化。

時我及衆僧。俱出靈鷲山。我時語衆生。常在此不滅。

以方便力故。現有滅不滅。

『俱出靈鷲山』：頌現形。鷲山，舊稱耆闍崛山，以山上鷲鳥多，故名靈鷲，在中印度摩竭陀國王舍城東北十四、五里處。『我時語衆生』：頌說法，前長行說法文，先明一代所說，次釋巧說之由，今僅用一句頌出。『常在此不滅』：頌顯實。『以方便力故現有滅不滅』：略頌稱機。二、頌現在竟。

三、頌未來（前上文有非滅唱滅，釋須唱滅，及本實不滅方便唱滅。）今不次第頌分二：初頌方便唱滅，兼須唱滅義，二、頌本實不滅，兼廣釋不見得見之由。今初。

餘國有衆生。恭敬信樂者。我復於彼中。爲說無上法。
汝等不聞此。但謂我滅度。我見諸衆生。沒在於苦惱。
故不爲現身。令其生渴仰。因其心戀慕。乃出爲說法。

初一偈先明不滅，次半偈正頌唱滅，次一偈頌釋須唱滅意，後二句是頌唱滅有益，得成未來機應。

二、頌本實不滅，兼廣釋不見得見之由。

神通力如是。於阿僧祇劫。常在靈鷲山。及餘諸住處。
衆生見劫盡。大火所燒時。我此土安隱。天人常充滿。
園林諸堂閣。種種寶莊嚴。寶樹多華果。衆生所遊樂。
諸天擊天鼓。常作衆伎樂。雨曼陀羅華。散佛及大眾。

此正領本實不滅。『常在靈鷲山』：既云常在，即指自受用實報上，若按頌文『寶莊嚴』句，則爲他受用實報上。『及餘諸住處』：謂方便有餘土，即上餘國義。『衆生見劫盡。大火所燒時。我此土安隱。』：衆生妄見劫盡，而佛土本無生滅，即此同居便是方便實報寂光。『天人常充滿』：十地爲天，三十心爲人。『衆生所遊樂』：即方便有餘土之學無學人。『天鼓』：表大法不藉言說。『曼陀羅華』：表賢聖因位，天鼓伎樂天華，即實報土中俗諦勝妙五塵，及方便土中真諦法性五塵。

**我淨土不毀。而衆見燒盡。憂怖諸苦惱。如是悉充滿。
是諸罪衆生。以惡業因緣。過阿僧祇劫。不聞三寶名。**

此釋不見之由，衆生同業妄見燒盡，而寂光、實報、方便、三種淨土，皆悉不毀。但說毀與不毀，仍屬別業妄見。

三寶有住持三寶（刻劃圖形、貝葉黃卷、剃髮染衣）。別相三寶（法、報、應佛，教理智斷法，三賢十聖僧。）一體三寶（眞如覺道佛，軌持平直法，事理和尚僧）。

諸有修功德。柔和質直者。則皆見我身。在此而說法。

此釋得見之由。『諸有修功德』：即指三乘權實緣修真修。『功德』是如來室。『柔和』如來衣。『質直』是如來座。相似三法則見如來應身，分證三法則見如來報身，究竟三法則見如來法身。

或時爲此衆。說佛壽無量。久乃見佛者，爲說佛難值。

此總結，由衆生見不見故，使如來巧說不同，意顯說雖不同，皆實不虛。初頌三世益物竟。

二、頌總結不虛。

我智力如是。慧光照無量。壽命無數劫。久修業所得。汝等有智者。勿於此生疑。當斷令永盡。佛語實不虛。

初一偈頌諸佛法皆如是。『久修業所得』：正顯此品如來壽量是修得，有始無終，因有始則過去所成有久有近，唯無終謂盡未來際常住不滅，約性顯則無始無終，生佛同體。次一偈頌爲度衆生皆實不虛，結勸令斷執近之疑。

二、頌譬說，分二：初頌立譬，二頌法合。今初。

如醫善方便。爲治狂子故。實在而言死。無能說虛妄。

初三句頌非滅現滅，意顯三世益物，『方便』又顯滅實非滅，過去久遠未來常住，皆實不虛。第四句卽頌總結不虛。

二、頌法合。

**我亦爲世父。救諸苦患者。爲凡夫顛倒。實在而言滅。
以常見我故。而生憍恣心。放逸著五欲。墮於惡道中。**

此亦頌非滅現滅，並頌不滅有損，以顯唱滅是方便。

**我常知衆生。行道不行道。隨所應可度。爲說種種法。
每自作是意。以何令衆生。得人無上道。速成就佛身。**

此正頌不虛，猶良醫方便治子病。初正聞近顯遠竟（從地湧出品正說文分三，訖壽量品是初正聞近顯遠，二、分別功德品初長文是總攝法身記，三、稱彌勒說偈，是總申領解）。

釋如來壽量品竟，次釋分別功德品。

分別功德品第十七

佛說壽量，本（地湧衆）迹（靈山衆）弟子，得種種益，乃至現在四信（一念信解，略解言趣，廣爲人說，信深觀成。）滅後五品亦皆得益。功德者，謂福利之功，善行之德，卽修功有所得。

本品具有授記領解流通，於流通中各有淺深不同，故言分別。

二、總授法身記，分三：初經家總敘，二如來分別，三瑞表圓益。今初。

爾時大會聞佛說壽命劫數長遠如是。無量無邊阿僧祇衆生。得大饒益。

二、如來分別。

於時世尊告彌勒菩薩摩訶薩。阿逸多。我說是如來壽命長遠時，六百八十萬億那由他恒河沙衆生。得無生法忍。

『無生法忍』：無生之法忍可於心。華嚴云：初發心時便成正覺，所有慧身不由他悟，清淨妙法身，湛然應一切。卽圓教初發心住位。

復有千倍菩薩摩訶薩。得聞持陀羅尼門。

『聞持陀羅尼』：大論二十八曰：『一、聞持陀羅尼，於一切所聞之法，憶持不忘。二、分別陀羅尼，分別一切諸法而不誤。三、人音聲陀羅尼，於一切衆生之毀譽語言不動其心。』陀羅尼，譯曰總持，乃智慧之總持力，此聞持不忘，分別不誤，人音不動心，可配於三觀智三諦境解之。

迹門三周說法，三根得記，是圓初住見道位，今聞本門極唱，轉入修道，增圓妙道，損變易生，證圓十住。法華用開示悟入對瓔珞之住行向地等位，以顯圓教因果。

復有一世界微塵數菩薩摩訶薩。得樂說無礙辯才。

『樂說無礙辯才』：四無碍辯（法、義、辭、樂說）之一，增道損生，

證圓十行不思議假（位對聞持樂說及旋）恒沙佛法橫豎貫通，自在演說，辯才無碍。

復有一世界微塵數菩薩摩訶薩。得百千萬億無量旋陀羅尼。

『百千萬億無量旋陀羅尼』：普賢勸發品之三種陀羅尼（旋陀羅尼、百千萬億旋陀羅尼、法音方便陀羅尼）之一，文句曰：『陀羅尼旋假入空，百千旋者，旋空出假，方便云者，為方便道得入中道第一義諦。』增道損生，證圓十向，事理圓融，真俗不二，一中無量，無量中一，重重旋轉，互總互持。

復有三千大千世界微塵數菩薩摩訶薩。能轉不退法輪。

增道損變易生，證圓初歡喜地，心心流入薩婆若海，圓轉三不退輪（依往教判，圓初信位不退，八至十信行不退，初住念不退。）。

復有二千中國土微塵數菩薩摩訶薩。能轉清淨法輪。

增道損變易生，證第二離垢地，由離三惑垢而入第三發光地。

復有小千國土微塵數菩薩摩訶薩。八生當得阿耨多羅三藐三菩提。

此證圓第四焰慧地，餘八品微細無明斷盡入妙覺（斷一品入第五難勝地，斷二品入第六現前地，斷三品入第七遠行地，斷四品入第八不動地，斷五品入第九善慧地，斷六品入第十法雲地，斷七品入等覺，斷八品盡入妙覺。），每斷一品無明，即損一變易生死，增一分中道。

復有四四天下微塵數菩薩摩訶薩。四生當得阿耨多羅三藐三菩提。

此增道損變易生，證圓八地，斷餘四品微細無明入妙覺位（斷一品入九地，斷二品入十地，斷三品入等覺，斷四品入妙覺。）。

『四天下』：即金輪聖王領四大洲。序品云：『威德自在各領四天下。』

復有三四天下微塵數菩薩摩訶薩。三生當得阿耨多羅三藐三菩提。

此增道損變易生，證圓九地，斷餘三品（生）得妙覺。

復有二四天下微塵數菩薩摩訶薩。二生當得阿耨多羅三藐三菩提。

此增道損變易生，證圓十地，斷餘二品（生）得妙覺。

復有一四天下微塵數菩薩摩訶薩。一生當得阿耨多羅三藐三菩提。

此增道損變易生，證等覺，故止餘一生。

復有八世界微塵數衆生。皆發阿耨多羅三藐三菩提心。

『八世界微塵數衆生發菩提心』：指圓教六根清淨人，圓五品爲外凡，隨喜妙法，內三觀觀三諦，外五悔助理解，讀誦說法正助六度，伏五住煩惱，是觀行卽佛。圓初信爲內凡，斷見顯眞，二至七信斷思，八至十信斷界內外塵沙，是相似卽佛。仁王云：『十善（信）菩薩發大心長別三界苦輪海。』永嘉云：『同除四住此處爲齊，若伏無明三藏則劣。』卽此位。

四教儀云：『圓教位次，若不以六卽判之，則多濫上聖，謂一切衆生皆有佛性，有佛無佛性相常住，又云一色一香無非中道，總是理卽。次從善知識及從經卷聞見此言，爲名字卽。依教修行爲觀行卽（五品位）。相似解發爲相似卽（十信）。分破分見爲分證卽（從初住至等覺）。智斷圓滿爲究竟卽（妙覺）。約修行位次從淺至深，故名爲六，約所顯理體，位位不二，故名爲卽。』華嚴名四十二位，以信爲根本，故曰初發心時便成正覺。楞嚴由三增進漸次（修習除其助因，眞修剝其正性，增進違其現業。）成就五十五位眞菩提路，依四種清淨明誨（淫殺盜妄）圓滿一心悟無生忍。此經依四安樂行及四信五品，盡持經之妙，聞壽量妙悟法身，純談實相，不說智斷行位，只以開示悟入佛之知見爲本，僅約別位以驗悟耳。二如來分別竟。

三、瑞表圓益。

佛說是諸菩薩摩訶薩。得大法利時。於虛空中。雨曼陀羅華。摩訶曼陀羅華。以散無量百千萬億寶樹下師子座上諸佛。并散七寶

塔中師子座上釋迦牟尼佛。及久滅度多寶如來。亦散一切諸大菩薩及四部衆。又雨細末栴檀沉水香等。於虛空中天鼓自鳴。妙聲深遠。又雨千種天衣。垂諸瓔珞。眞珠瓔珞。摩尼珠瓔珞。如意珠瓔珞。徧於九方。衆寶香鑪。燒無價香。自然周至。供養大會。一一佛上。有諸菩薩執持旛蓋。次第而上。至於梵天。是諸菩薩。以妙音聲歌無量頌。讚歎諸佛。

前序品有六瑞（入定說法雨華地動衆喜放光），本文亦含六瑞（雨華雨香天鼓天衣燒香幡蓋）。『虛空中』：表平等法性。『雨曼陀羅華』：表從法性出四十因位圓妙慧華。華散分身『諸佛』，表應身。『釋迦』：表報身修德。『多寶』：表法身性德。『亦散一切諸大菩薩及四部衆』：表大會皆得圓因妙慧成三身妙果。『雨細末栴檀沉水香』：表從法性出福德香供奉三身普及四衆。『天鼓自鳴』：表圓音演妙法。『千種天衣』：表寂滅忍衣徧覆一切。『垂諸瓔珞』：表戒定慧陀羅尼攝化衆生。『徧於九方』：表從上方雨垂徧八方及地，喻一佛界徧該九界。『衆寶香鑪燒無價香。自然周至供養大會一一佛上。』：表自行妙德總趣極果。『有諸菩薩執持幡蓋次第而上至於梵天』：旛者轉義，表增道損生，蓋者覆義，表慈悲益物，次第而上表從因至果，梵者淨義，表究竟四德。『以妙音聲歌無量頌。讚歎諸佛』：表以佛道聲令一切聞。二總授法身記竟。

三、彌勒總申領解，分三：初頌時衆得解，二頌如來分別，三頌瑞表圓益。今初。

爾時彌勒菩薩從座而起。徧袒右肩。合掌向佛而說偈言。

佛說希有法。昔所未曾聞。世尊有大力。壽命不可量。
無數諸佛子。聞世尊分別。說得法利者。歡喜充徧身。

前迹門記二乘，但直領解，未申供養，聞本門已，與菩薩同申供養領解。『座』：表法空座。『從座而起』：表不住空而展轉增進。『徧袒右肩』：本迹權實未發，表右肩被覆，今已開顯故徧袒。『合掌』：表本迹雖殊不思

議一。『向佛』：表增道損生速趣極果。

二、頌如來分別。

或住不退地。或得陀羅尼。或無礙樂說。萬億旋總持。

『不退地』：卽頌無生法忍，圓初住念不退位，餘如前解。

或有大千界。微塵數菩薩。各各皆能轉。不退之法輪。
復有中千界。微塵數菩薩。各各皆能轉。清淨之法輪。
復有小千界。微塵數菩薩。餘各八生在。當得成佛道。
復有四三二。如此四天下。微塵諸菩薩。隨數生成佛。
或一四天下。微塵數菩薩。餘有一生在。當成一切智。
如是等衆生。聞佛壽長遠。得無量無漏。清淨之果報。

『無量無漏』：揀異二乘之有量。『清淨之果報』：妙因所感清淨無障

礙土。

復有八世界。微塵數衆生。聞佛說壽命。皆發無上心。

證人配位如前。二頌如來分別竟。

三、頌瑞表圓益。

世尊說無量。不可思議法。多有所饒益。如虛空無邊。
雨天曼陀羅。摩訶曼陀羅。釋梵如恒沙。無數佛土來。
雨栴檀沉水。繽紛而亂墜。如鳥飛空下。供散於諸佛。

此頌雨華雨香二瑞供佛。

天鼓虛空中。自然出妙聲。天衣千萬種。旋轉而來下。

此頌天鼓天衣二瑞。表佛說法覆護，略不頌瓔珞。

衆寶妙香鑪。燒無價之香。自然悉周徧。供養諸世尊。

此頌燒香供養瑞。

其大菩薩衆。執七寶旛蓋。高妙萬億種。次第至梵天。

一一諸佛前。寶幢懸勝旛。亦以千萬偈。歌詠諸如來。

此頌旛蓋讚歎瑞。

如是種種事。昔所未曾有。聞佛壽無量。一切皆歡喜。

佛名聞十方。廣饒益衆生。一切具善根。以助無上心。

此總頌瑞表圓益。二本門正說段竟。

二、流通段（從此詎常不輕品共三品半，爲本門流通，自本文至隨喜功德，法師功德兩品申明初品之因與果功德，常不輕品引證讚毀罪福。）初明現在四信，二明滅後五品。初又四：初一念信解，二解其言趣，三聞持供養，四深信觀成。初又二：初長文，二偈頌。初又三：初出相貌，二明功德，三明位行不退。今初。

爾時佛告彌勒菩薩摩訶薩。阿逸多。其有衆生。聞佛壽命長遠如是。乃至能生一念信解。

前如來分別文中，述說『如來壽命長遠』聞之得益深廣，有得無生法忍者，信滿入住，有得聞持樂說旋總持者，證入住行向，有轉不退輪者登初地，轉清淨輪者晉二三地，證入四地，餘八生歷五地等妙而成佛者，或經四三二一增道損生，斷微細無明得菩提者，或發無上心入于十信，咸得圓益，并申供養，均屬本門正說授記段。今文流通之始，乃約初結緣人，未登十信，或從此會略聞，佛壽長遠，或從現在菩薩展轉聞，時既甚促，聞亦不多，故云：『乃至能生一念信解』。

『一念』：即現前一念介爾之心。『信解』：信佛本地所證之理，非實

非權，而實而權，非本非迹，而能本能迹，信解此理是釋尊所久證，亦是衆生所久迷，亦爲現前一念介爾之心所同具。晉譯華嚴覺林菩薩偈曰：『心如工畫師造種種五陰，一切世界中，無法而不造，如心佛亦爾，如佛衆生然，心佛及衆生是三無差別。』文句云：『隨所聞處，豁爾開明，隨語而入，無有罣礙，信一切法皆是佛法。』如是信解，乃十信初心，未得六根清淨，非鐵輪王正位，正顯觀境深而實位彌下。

二、明功德，分二：初總論無量，二格量顯多。今初。

所得功德。無有限量。

二、格量顯多，分二：初舉五度爲格量本，二正格信解功德甚多。今初。

若有善男子善女人。爲阿耨多羅三藐三菩提故。於八十萬億那由他劫。行五波羅密。檀波羅密。尸羅波羅密。羼提波羅密。毗梨耶波羅密。禪波羅密。除般若波羅密。

『除般若波羅密』：今以本門正慧，校量次第權五，此中般若卽是深信解相，爲能較量，故言『除』，且『般若』名通，本文則局。『波羅密』翻度岸，別教行人，各自於五盡其邊際，期心出假，亦得名度。言八十萬億那由他劫行五波羅密，俱不及一念信解功德，唯得般若者，功德相等。

二、正格信解功德甚多。

以是（五度）功德比前（一念信解）功德。百分千分。百千萬億分。不及其一。乃至算數譬喻所不能知。

三、明位行不退。

若善男子善女人。有如是功德。於阿耨多羅三藐三菩提退者。無有是處。

別教第六正心住猶退，第七不退住，方得位不退，八住至十向得行不退，住行向是三賢，又爲內凡，登地爲念不退。圓教初信至七信，圓順信解，自

內而熏，卽位不退，八至十信是行不退，初住爲念不退。此舉圓信望別住爲下。

二、偈頌，分三：初超頌功德，二頌行位不退，三追頌相貌。初又二：初超頌格量顯多，二追頌總論無量。初又二：初頌舉五度爲格量本，二頌正格信解功德甚多。今初。爾時世尊欲重宣此義。而說偈言。

若人求佛慧。於八十萬億。那由他劫數。行五波羅密。
於是諸劫中。布施供養佛。及緣覺弟子。并諸菩薩衆。
珍異之飲食。上服與臥具。栴檀立精舍。以園林莊嚴。
如是等布施。種種皆微妙。盡此諸劫數。以迴向佛道。
若復持禁戒。清淨無缺漏。求於無上道。諸佛之所歎。
若復行忍辱。住於調柔地。設衆惡來加。其心不傾動。
諸有得法者。懷於增上慢。爲斯所輕惱。如是亦能忍。
若復勤精進。志念常堅固。於無量億劫。一心不懈息。
又於無數劫。住於空閒處。若坐若經行。除睡常攝心。
以是因緣故。能生諸禪定。八十億萬劫。安住心不亂。
持此一心福。願求無上道。我得一切智。盡諸禪定際。
是人於百千。萬億劫數中。行此諸功德。如上之所說。

『除睡常攝心』：經行林中未嘗睡眠，攝心一處。『盡諸禪定除』：深入無際也。

二、頌正格信解功德甚多。

有善男女等。聞我說壽命。乃至一念信。其福過於彼。

初超頌格量顯多竟。

二、追頌總論無量。

若人悉無有。一切諸疑悔。深心須臾信。其福爲如此。

『須臾』：卽一念。初超頌功德竟。

二、頌行位不退，分二：初明不易信解，二、明信解則必發願故得不退。今初。

其有諸菩薩。無量劫行道。聞我說壽命。是則能信受。

『無量劫行道』：久修諸度，聞說壽命，始能信受，足徵信解不易，若利根，初聞卽能一念得解。

二、明信解則必發願故得不退。

如是諸人等。頂受此經典。願我於未來。長壽度衆生。

如今日世尊。諸釋中之王。道場師子吼。說法無所畏。

我等未來世。一切所尊敬。坐於道場時。說壽亦如是。

『諸人等』：雙指利鈍兩根。『願我於未來』：起慈悲願，藉行願聞經信解故不退。二頌行位不退竟。

三、追頌相貌。

若有深心者。清淨而質直。多聞能總持。隨義解佛語。

如是之人等。於此無有疑。

『深心』：於本地圓門，仍具五法（一、聞遠壽生信、二、深心、三、直心、四、多聞心、五、爲他說）乃能斷疑，一念信解。所謂先聞遠本，次入深心及直心，生於多聞而爲他說。『深』心，窮理不二。『直』心，始終一貫。

又『深心』，卽如來室。『清淨質直』：不爲五住所污，正念眞如，卽如來衣。『多聞能總持隨義解佛語』：隨有所聞，便能總一切法，持一切義，了知如來隨情隨智等語，卽如來座。有此觀行三法，乃能信解究竟三法之理而無疑。初一念信解竟。

二、解其言趣。

又阿逸多。若有聞佛壽命長遠。解其言趣。是人所得功德。無有限量。能起如來無上之慧。

前但一念信解未能敷說，今能解其言趣，便能起自他無上之慧。

三、聞持供養。

何況廣聞是經。若教人聞。若自持。若教人持。若自書。若教人書。若以華香瓔珞幢旛繒蓋。香油蘇燈。供養經卷。是人功德。無量無邊。能生一切種智。

廣聞廣解，廣爲他說，廣修供養，自行化他功德外資，令內智疾人，『能生一切種智』。

四、深信觀成。

阿逸多。若善男子善女人。聞我說壽命長遠。深心信解。則爲見佛常在耆闍崛山。共大菩薩諸聲聞衆。圍繞說法。又見此娑婆世界。其地瑠璃。坦然平正。閻浮檀金以界八道。寶樹行列。諸臺樓觀皆悉寶成。其菩薩衆咸處其中。若有能如是觀者。當知是爲深信解相。

『見佛常在耆闍崛山（靈山）共大菩薩諸聲聞衆圍繞說法』：是方便有餘相，藏通二乘，雖斷通惑，仍存本名，故方便土中大小共舉。『又見娑婆其地瑠璃乃至菩薩咸處其中』：是實報莊嚴土相，淨未嘗穢，報土中雖純菩薩，乃是他受用報。

理具此二土之相，依理修觀，雖未真證，以觀力故，其相可見。一念信解，解其言趣兩信，是聞慧。聞持供養一信，是思慧。深信觀成一信，是修慧。從淺至深，觀成暫見二土，滅三界惑，成六根清淨十信位，此觀漸深漸成，三惑分滅，觀境相應，入住任運徧見，則應用無方。文句記云：『觀土既爾，身佛心然，故觀長壽須了宗旨。』初明現在四信竟。

二、明滅後五品，分二：初列五品，粗格量後四品功德。二隨喜功德品，廣格量初品功德。初中二：初長文，二偈頌。長文爲五：初直起隨喜心，二加受持讀誦，三加教人（說法），四加兼行六度，五加正行六度。今初。

又復如來滅後。若聞是經而不毀訾。起隨喜心。當知己爲深信解相。

長文五科五人，通論皆自行化他，自行通稱弟子，化他通稱法師。初隨喜品標人，格量在後品說。

二、加受持讀誦，分二：初標人相，二格量功德。今初。

何況讀誦受持之者。

二、格量功德。

斯人則爲頂戴如來。阿逸多。是善男子善女人。不須爲我復起塔寺。及作僧坊。以四事供養衆僧。所以者何。是善男子善女人。受持讀誦是經典者。爲已起塔。造立僧坊。供養衆僧。則爲以佛舍利。起七寶塔。高廣漸小。至於梵天。懸諸旛蓋。及衆寶鈴。華香瓔珞。末香塗香燒香。衆鼓伎樂。簫笛箜篌。種種舞戲。以妙音聲歌唄讚頌。則爲於無量千萬億劫。作是供養已。

『不須爲我復起塔寺乃至四事（衣服、飲食、臥具（房舍）、湯藥）供養衆僧』：初心恐被事緣紛動，妨修正業。『受持讀誦是經典者。爲已起塔造立僧坊供養衆僧。』：經文所詮之理，卽是法身全身舍利，能詮之文，不異七寶妙塔，能行和合不二，亦是第一義僧，廢事存理，所益弘多。

若執理廢事，謂持經卽是第一義戒，則於下品兼行六度中不須持戒矣。持性戒固可不犯性罪，倘能五篇七聚（波羅夷、僧殘、波逸提、提舍尼、突吉羅分惡作惡說爲二，於第三位加偷蘭遮），性遮二業悉皆清淨，是乘戒具急。違於戒乘緩急，事理雙修，據小文迷觀道，慕大節昧存亡，非今經意。

三、加教人，分二：初標人相，二格量功德。今初。

阿逸多。若我滅後。聞是經典。有能受持。若自書。若教人書。

二、格量功德。

則爲起立僧坊。以赤栴檀作諸殿堂三十有二。高八多羅樹。高廣嚴好。百千比丘。於其中止。園林浴池。經行禪窟。衣服飲食。牀褥湯藥。一切樂具。充滿其中。如是僧坊堂閣。若干百千萬億。其數無量。以此現前供養於我。及比丘僧。是故我說如來滅後。若有受持讀誦。爲他人說。若自書若教人書。供養經卷。不須復起塔寺。及造僧坊。供養衆僧。

前品自己受持讀誦，便爲具足供養三寶，今轉以教人，則知法施功德，於供養中最。『多羅樹』：譯曰岸樹或高竦樹。西域記云：南印鹿達那補羅國北不遠，有多羅林三十餘里，極高者七、八十尺，果熟而赤，如大石榴，人多食之，其葉形如椶（音宗）櫚（音呂）卽常綠喬木，乾燥可以刻文字，或稱貝葉，此樹幹中斷，不再生芽，經中譬比丘犯波羅夷罪，永斷佛種。

四、加兼行六度，分二：初標人相，二格量功德。今初。

況復有人。能持是經。兼行布施持戒。忍辱精進。一心智慧。

圓觀漸深，涉事不妨正行，以事助理，名『兼行』。

二、格量功德。

其德最勝。無量無邊。譬如虛空。東西南北四維上下。無量無邊。是人功德。亦復如是無量無邊。疾至一切種智。

五、加正行六度，分二：初標人相，二格量功德。今初。

若人讀誦受持是經。爲他人說。若自書。若教人書。復能起塔。及造僧坊。供養讚歎聲聞衆僧。亦以百千萬億讚歎之法。讚歎菩薩功德。又爲他人。種種因緣。隨義解說此法華經。復能清淨持戒。與柔和者而共同止。忍辱無瞋。志念堅固。常貴坐禪。得諸深定。精進勇猛。攝諸善法。利根智慧。善答問難。

『供養讚歎聲聞衆僧』：安樂行中由始心觀淺，恐染小習，誠勿親近求聲聞人，亦不說過，亦不讚美，今五品觀深力大，因讚歎二乘，令趣大乘。

二、格量功德。

阿逸多。若我滅後。諸善男子善女人。受持讀誦是經典者。復有如是諸善功德。當知是人。已趣道場。近阿耨多羅三藐三菩提。坐道樹下。阿逸多。是善男子善女人。若坐若立若經行處。此中便應起塔。一切天人皆應供養。如佛之塔。

『已趣道場近阿耨多羅三藐三菩提。坐道樹下。』：位在鐵輪十信，不久得人銅輪初住，能八相成道。仁王菩薩行品云：『中下品善粟散王，上品十善鐵輪王，（十信）習種銅輪二天下（十住）銀輪三天下性種性（十行道）道種堅德轉輪王，七寶金輪四天下（十向），歡喜菩薩轉輪王（聖種初地）。』

『若坐若立若經行處。此中便應起塔。一切天人皆應供養。如佛之塔。』：指初依人號如來。法華玄義人四依：圓教五品六根爲初依，十住爲二依，十行十向爲三依，十地爲四依。別教地前爲初依，一至五地爲二依，六、七地爲三依，八、九、十地爲四依。

文句云：『結此五品，前三人是聞慧，兼行六度思慧位，正行六度是修慧位，都是十信前耳。或云初隨喜品是入信心位，分一品爲兩心，五品卽是十信心，卽是鐵輪六根清淨位也。』

總之，解雖圓頓，事障未除，僅能圓伏五住，即觀行如來具縛凡夫，能知如來秘密之藏耳，若圓教利根，一念隨喜，初垢先落，乃至正行塵沙亦盡，即相似如來鐵輪王位，以上兩釋理須並存。

若以五品對前四信，初二品即一念信解，第三品即解其言趣，第四品即聞持供養，第五品即深信觀成，四、五無別，只於滅後加讀誦為第二品。初長文竟。

二、偈頌，分四：初頌第二品，二頌第三品，三頌第四品，四頌第五品。今初。

爾時世尊欲重宣此義。而說偈言。

若我滅度後。能奉持此經。斯人福無量。如上之所說。
是則為具足。一切諸供養。以舍利起塔。七寶而莊嚴。
表刹甚高廣。漸小至梵天。寶鈴千萬億。風動出妙音。
又於無量劫。而供養此塔。華香諸瓔珞。天衣衆伎樂。
然香油蘇燈。周帛常照明。惡世法末時。能持是經者。
則為已如上。具足諸供養。

一一、頌第三品。

若能持此經。則如佛現在。以牛頭栴檀。起僧坊供養。
堂有三十二。高八多羅樹。上饌妙衣服。牀臥皆具足。
百千衆住處。園林諸浴池。經行及禪窟。種種皆嚴好。

『牛頭栴檀』：摩羅耶山出栴檀香，名曰牛頭，若以塗身，沒入火坑，火不能燒，慈恩云栴檀樹似白楊。其質涼冷，蛇多附之。

三、頌第四品。

若有信解心。受持讀誦書。若復教人書。及供養經卷。
散華香末香。以須曼薝蔔。阿提目多伽。熏油常然之。
如是供養者。得無量功德。如虛空無邊。其福亦如是。

『須曼』華，此云善攝意華。『薝蔔』華，此云黃華。『阿提目多伽』華，此云龍舐華，又云善思夷華，其華形如大麻，赤華青葉，子可做油，亦可做香。

四、頌第五品。

況復持此經。兼布施持戒。忍辱樂禪定。不瞋不惡口。
恭敬於塔廟。謙下諸比丘。遠離自高心。常思惟智慧。
有問難不瞋。隨順為解說。若能行是行。功德不可量。
若見此法師。成就如是德。應以天華散。天衣覆其身。
頭面接足禮。生心如佛想。又應作是念。不久詣道場。
得無漏無為。廣利諸人天。其所住止處。經行若坐臥。
乃至說一偈。是中應起塔。莊嚴令妙好。種種以供養。
佛子住此地。則是佛受用。常在於其中。經行及坐臥。

釋分別功德品；初列五品，粗格量後四品功德竟。次釋隨喜功德品，廣格量初品功德。

隨喜功德品第十八

文句云：『隨者隨順事理，喜者度己度人。』所謂隨順開權顯實之事理，順理是實功德，順事是權功德。理依事顯故能度人，事依理成故能自度，度己有智慧，度人有慈悲，權實智斷合而說之，故曰：『隨喜功德品』。

佛陀久默斯要不務速說，如來出世四十餘年未顯真實，對七方便人不語妙諦，今得聞此，以凡夫心等佛所知，淨名云：『諸佛解脫當於衆生心行中求。』用所生眼同如來見，一眼具諸眼用。玄義引殃掘云：『所謂彼（九界）眼根，於諸如來常（即佛界，具足無減修（三諦圓融），了了分明見（照權實），乃至意根亦如是。』度己及人，故曰：『隨喜功德品』。

初品隨喜理解，雖然只能一念，度己度他，未有事行，恩不及人，但彼行淺功深，所獲功德，功蓋無學，初品如此，況後品，及信住行向地後心耶。外道不伏見愛，不及煖法人，二乘子果俱脫，猶被涅槃縛，通教修因雖巧，止除四住，別人知但中，其門仍拙，非佛所讚，皆不及圓教初品隨喜人。今舉觀行初心，以況極果，都勝諸教，正明圓住初後不二，故曰：『隨喜功德品』。

二、廣格量初品功德，分二：初問，二答。今初。

爾時彌勒菩薩摩訶薩白佛言。世尊。若有善男子善女人。聞是法華經隨喜者。得幾所福。而說偈言。

世尊滅度後。其有聞是經。若能隨喜者。爲得幾所福。

前已校量後四品功德，未說初隨喜品，故彌勒承機問出。

二答分二：初長文，二偈頌。初又二：初答內心隨喜人功德，二直明外聽法人功德。

初中五：初約展轉相教，舉最後人以顯初心之初，二格量本，三問，四答，五正格量。今初。

爾時佛告彌勒菩薩摩訶薩。阿逸多。如來滅後。若比丘比丘尼。優婆塞優婆夷。及餘智者。若長若幼。聞是經隨喜已。從法會出。

至於餘處。若在僧坊。若空閒地。若城邑巷陌。聚落田里。如其所聞。爲父母宗親。善友知識。隨力演說。是諸人等。聞已隨喜。復行轉教。餘人聞已。亦隨喜轉教。如是展轉至第五十。阿逸多。其第五十善男子善女人隨喜功德。我今說之。汝當善聽。

『及餘智者』：指未受四衆戒律，而宿有大智，聞能信解，亦可隨力演說，不論年長年幼也。

『展轉至第五十』：指後後漸劣於前前，意顯前四十九人皆有轉教功德，今第五十，但論一念隨喜，正當初品之初，今約此初品之初，一念隨喜而明功德，則後後不言可知。有解五十人，謂：『最初妙覺爲第十地人說，十地爲第九地人說，如是展轉至於十信。』旭祖說：『此欲顯法味漸薄，功德漸劣，不必約表法釋。』文句橫約諸教四衆，直約圓教數之，例：三藏有四門，一一門有四衆，更開沙彌、沙彌尼合六人（爲對數便不列式又摩那），四門則二十四人，約信行（鈍根憑他解）、法行（利根依自力）則四十八人，最初最後合五十人，通別四門亦如是。直約圓教數之者，昔教既有五十人，至今聞圓，皆被開顯，全成圓人，舉數無可以辨。如說大數是七，小數則成七四十九，並最後一人，以合其數，文句說：『最後一人但是自解，無教他德。』

二、格量本。

若四百萬億阿僧祇世界六趣四生衆生。卵生、胎生、濕生、化生。若有形無形。有想無想。非有想非無想。無足二足。四足多足。如是等在衆生數者。有人求福。隨其所欲娛樂之具。皆給與之。一一衆生。與滿閻浮提金銀瑠璃。碑磔碼碯。珊瑚琥珀。諸妙珍寶。及象馬車乘。七寶所成宮殿樓閣等。是大施主。如是布施滿八十年已。而作是念。我已施衆生娛樂之具。隨意所欲。然此衆生皆已衰老。年過八十。髮白面皺。將死不久。我當以佛法。而

訓導之。卽集此衆生。宣佈法化。示教利喜。一時皆得須陀洹道。斯陀含道。阿那含道。阿羅漢道。盡諸有漏。於深禪定。皆得自在。具八解脫。

在殼曰『卵』，如魚、烏龜、蛇之類。處腹曰『胎』，如龍畜人仙之類。煖氣曰『溼』，如蠶蠕合動之類。高易曰『化』，如轉蛻飛行之類。天但化生，人具四生而多胎生，修羅四生，地獄化生，鬼畜俱四。俱舍頌曰：『人旁生具四，地獄及諸天，中有唯化生，鬼通胎化二。』欲色二界是『有形』，無色界是『無形』，空處識處是『有想』，無所有處是『無想』，非想非非想處是『非有想非無想』。『無足』如鰍鱖之類，『二足』如雞、鴨之類，『四足』如犬、羊之類，『多足』如蜈蚣等類。『八解脫』：一、內有色想觀外色解脫，二、內無色想觀外色解脫，三、淨解脫身作證具足住，四、空無邊處解脫，五、識無邊處解脫，六、無所有處解脫，七、非想非非想處解脫，八、滅受想定身作證具足住。舊曰八背舍，再加八勝處，十一切處三法，爲離三界貪愛之出世間禪。大論曰：『背捨爲初門，勝處爲中行，一切處爲成就，三種觀足，卽是觀禪體成就。』

三、問。

於汝意云何。是大施主所得功德。寧爲多不。

四、答。

彌勒白佛言。世尊。是人功德甚多。無量無邊。若是施主。但施衆生一切樂具。功德無量。何況令得阿羅漢果。

五、正格量。

佛告彌勒。我今分明語汝。是人以一切樂具。施於四百萬億阿僧祇世界六趣衆生。又令得阿羅漢果。所得功德。不如第五十人。聞法華經一偈。隨喜功德。百分千分。百千萬億分。不及其一。

乃至算數譬喻所不能知。阿逸多。如是第五十人。展轉聞法華經。隨喜功德。尚無量無邊阿僧祇。何況最初於會中聞而隨喜者。其福復勝。無量無邊阿僧祇。不可得比。

先與世樂八十年，後與法樂證四果，不及初品一念隨喜功德，蓋此一念必當盡虛空界，盡未來時，普度一切，皆令成佛，最後功德，不離最初一念。

大論說：『人福（四洲）、天福（六天）、梵福（定散）、聖福（四果）、薩埵福（三菩提展轉相望）不及聞法華經初隨喜福。』

圓觀一念卽具十乘（觀不思議境、真正發菩提心、善巧安心止觀、破法徧、識通塞、道品調適、對治助開、知位次、能安忍、無法愛），理具事造非次第修中者可比，況世間財施小果耶。初答內心隨喜人功德竟。

二、直明外聽法人功德，分四：初自往、二分座、三勸他、四具德修行。今初。

又阿逸多。若人爲是經故。往詣僧坊。若坐若立。須臾聽受。緣是功德。轉身所生。得好上妙象馬車乘珍寶輦輿。及乘天宮。

二、分座。

若復有人。於講法處坐。更有人來。勸令坐聽。若分座令坐。是人功德。轉身得帝釋坐處。若梵王坐處。若轉輪聖王所坐之處。

三、勸他。

阿逸多。若復有人。語餘人言。有經名法華。可共往聽。卽受其教。乃至須臾間聞。是人功德。轉身得與陀羅尼菩薩共生一處

（一）。利根（二）智慧（三）。百千萬世終不瘖瘂（四）。口氣不臭（五）。舌常無病（六）。口亦無病（七）。齒不垢黑（八、九）。不黃（十）不疎（十一）。亦不缺落（十二）。不差（十三）不曲（十四）。唇不下垂（十五）。亦不褻（音減）

縮（十六）。不粗澀（音瑟）（十七）。不瘡疹（音軫）（十八）。亦不缺壞（十九、二十）。亦不高（音戈）斜（二十一、二十二）。不厚（二十三）不大（二十四）。亦不顰（音梨）黑（二十五）。無諸可惡（二十六）。鼻不匾匾（音梯）（二十七）。亦不曲戾（二十八）。面色不黑（二十九）。亦不陔（音俠）長（三十、三十一）。亦不窠（音娃）曲（三十二）。無有一切不可喜相（三十四）。唇舌牙齒。悉皆嚴好（三十五、三十六、三十七、三十八）。鼻修高直（三十九、四十、四十一）。面貌圓滿（四十二）。眉高而長（四十三、四十四）。額廣平正（四十五、四十六、四十七）。人相具足（四十八）。世所生見佛（四十九）聞法。信受教誨（五十）。

文中五十種德相，或一人具足，或一人各一，隨其功力，不必冀其全具。本文含六根清淨相似位以前之功德，『利根智慧』是意功德。『不瘡癩』是舌功德。『鼻修高直』是鼻功德。『見佛』是眼功德。『聞法』是耳功德。餘為身功德。又差、不齊。曲、歪齒。褻縮、短唇。眇、唇瘡。高斜、歪口。匾匾、平鼻。曲戾、歪鼻。窠曲、身陷而曲。係宿世業力報感之相。

前隨喜品是觀行位，今云自往、分座、勸他三種，未談理觀，是名字位，名字功德尚且如此，況觀行相似分證究竟耶。

四、具聽修行。

阿逸多。汝且觀是勸於一人令往聽法功德如此。何況一心聽說讀誦。而於大眾為人分別。如說修行。

初長文竟。

二、偈頌，分二：初頌內心隨喜功德。二頌外聽法人功德。今初。

爾時世尊欲重宣此義。而說偈言。

若人於法會。得聞是經典。乃至於一偈。隨喜爲他說。
如是展轉教。至於第五十。最後人獲福。今當分別之。
如有大施主。供給無量衆。具滿八十歲。隨意之所欲。
見彼衰老相。髮白而面皺。齒疏形枯竭。念其死不久。
我今應當教。令得於道果。卽爲方便說。涅槃真實法。
世皆不牢固。如水沫泡燄。汝等咸應當。疾生厭離心。
諸人聞是法。皆得阿羅漢。具足六神通。三明八解脫。
最後第五十。聞一偈隨喜。是人福勝彼。不可爲譬喻。
如是展轉聞。其福尚無量。何況於法會。初聞隨喜者。

『如水沫泡燄』：大品有十喻，一幻、二燄、三水月、四虛空、五響、六乾城、七夢、八影、九鏡像、十化。

二、頌外聽法人功德，分四：初超頌勸他、二頌自往、三頌分座、四頌具聽修行。今初。

若有勸一人。將引聽法華。言此經深妙。千萬劫難遇。
卽受教往聽。乃至須臾聞。斯人之福報。今當分別說。
世世無口患。齒不疏黃黑。唇不厚褰（音減）缺。無有可惡相。
舌不乾黑短。鼻高修且直。額廣而平正。面目悉端嚴。
爲人所喜見。口氣無臭穢。優鉢華之香。常從其口出。

二、頌自往。

若故詣僧坊。欲聽法華經。須與聞歡喜。今當說其福。
後生天人中。得妙象馬車。珍寶之輦輿。及乘天宮殿。

三、頌分座。

若於講法處。勸人坐聽經。是福因緣得。釋梵轉輪座。

四、頌具聽修行。

何況一心聽。解說其義趣。如說而修行。其福不可限。

初明初因功德以勸流通竟。

釋隨喜功德品竟。次釋法師功德品。

法師功德品第十九

『法師』：有受持、讀、誦、解說、書寫等五種自行化他之法師，及三軌宏經等義，如上法師品解。但法師品以法爲師，是助發之緣因，今品正顯持經之功德，以法師名通，故指彼文，申此品目。

『功德』：前品隨喜功德，謂五品中，初品之初功德，所謂五十人，今品功德，論五品之上，六根清淨內外莊嚴功德。六根皆有內外二嚴，如下文身根章中云：世間所有，皆於身中現爲內莊嚴，十法界一切色像以普現三昧而化外爲外莊嚴，身根既爾餘根亦然。眼等五根清淨爲外功德，意根清淨爲內功德。

若由五品入六根，則五師爲六根之因，初功爲極位之本。今泛約五品中隨行一事皆得淨於六根，指始顯終，故是舉果以勸，凡夫發心尚與妙覺畢竟不二，況今五品望後六根耶，故曰：『法師功德品』。

欲淨六根，須用五品修十乘觀法，或以讀修十觀，或以誦修十觀，或以解說修十觀，或以書寫修十觀。上根觀不思議境卽淨六根，破見思滌塵沙。中根繼之發菩提心，安心止觀，破法徧，識通塞，道品調適等五觀，卽淨六根，粗垢任運先落。下根須從對治助開，知位次，能安忍，無法愛等觀，入圓初住，眞因與果覺二無別，直至道場。

二、明初品果功德以勸流通，分二：初總列數，二別解釋。今初。

爾時佛告常精進菩薩摩訶薩。若善男子善女人。受持是法華經。若讀若誦。若解說。若書寫。是人當得八百眼功德。千二百耳功德。八百鼻功德。千二百舌功德。八百身功德。千二百意功德。以是功德莊嚴六根皆令清淨。

楞嚴經卷四：『世爲遷流，界爲方位，東西南北，東南西南，東北西北，上下爲界，過去未來現在爲世。方位有十，流數有三，世間祇目東西南北，上下無位（上下卽四方之上下），中無定方，（四隅之中，爲四方交接），

四數必明與世相涉，三四四三，宛轉十二（以三世涉入四方，三四成十二，以四方涉入三世，四三亦成十二）。流變三疊（第一疊——三四四三成十二。第二疊——即四方中之三世，每世各具十法界，則十二成一百二十。第三疊——即界界各具十界，則百二十成千二百。），一十百千（如世人稱十爲一十，百爲一百，千爲一千，舉整數略零數。），六根之中各各功德有千二百，復於其中克定優劣。』

根性平等，本無可揀，有情迷性分優劣，以千二百功德爲優，八百功德爲劣。『八百眼功德』：眼根見性功德，三分言功，一分無德（功德分數，前方與前二隅爲一分，左右兩方爲一分，後方與後兩隅爲一分。四方每方二百功德共成八百，四隅每隅一百功德，共成四百，合成一千二百功德。眼根只得三分之二，以後全暗，缺了一分。）『千二百耳功德』：周聽十方，動靜無邊際，以聲塵虛妄故。『八百鼻功德』：鼻則出息取氣，入息知香，出入少停之際，功用不顯，而缺中交四百功德故。『千二百舌功德』：靠舌宣揚，理無窮盡故勝，居取嘗味合知則劣。『八百身功德』：身能識於違順，但合時能覺，離中不知，離一合雙，三分缺一。『千二百意功德』：默容十方之處，三世之時，聖凡染淨之人，無不包容，時處人法，皆能盡其涯量邊際。此順迷情，故有八百千二不同。

小品云：『色淨故般若淨，般若淨故色淨，色淨五根淨，般若淨意根淨。』又云：『六自在王性清淨。』大經云：『如來一根，則能見色聞聲嗅香別味覺觸知法。』正法華云：『整足具六千功德，不論上中下。』法華論云：『凡人以經力故（助內觀解，發相似分真，普熏諸根。），得勝根用，雖未入初地，以父母所生眼，見大千內外。』此三經一論之文，約悟邊正顯六根清淨互用，內外莊嚴功德。

六根清淨是相似位，依瓔珞經五十二位，即十信心，按瓔珞經六輪配因位，當鐵輪位，銅輪十住，銀輪十行，金輪十向，瑠璃輪十地，摩尼輪等覺。仁王則曰十善大心。『常精進菩薩』：指十信（信、念、精進、慧、定、不退、回向、護法、戒、願）之第三心。

二、別解釋，分六：初眼根至六意根。今初。

是善男子善女人。父母所生清淨肉眼。見於三千大千世界。內外所有山林河海。下至阿鼻地獄。上至有頂。亦見其中一切衆生。及業因緣果報生處。悉見悉知。爾時世尊欲重宣此義。而說偈言。

若於大眾中。以無所畏心。說是法華經。汝聽其功德。

是人得八百。功德殊勝眼。以是莊嚴故。其目甚清淨。

父母所生眼。悉見三千界。內外彌樓山。須彌及鐵圍。

並諸餘山林。大海江河水。下至阿鼻獄。上至有頂處。

其中諸衆生。一切皆悉見。雖未得天眼。肉眼力如是。

玄義云：『父母所生眼卽肉眼，徹見內外彌樓山卽天眼，洞見諸色而無染著卽慧眼，見色無錯謬卽法眼，雖未得無漏，而其眼根清淨。若此，一眼具諸眼用，卽佛眼。』

『見於三千大千世界』：卽天眼。『亦見其中一切衆生業因緣果報』：卽法眼。『其目甚清淨』：卽慧眼佛眼。大經云：『雖是肉眼名爲佛眼。』相似佛眼故名爲清淨，具佛相似五眼故名爲莊嚴，猶是分段之身，故名：『父母所生眼。』頌曰：『天眼通非礙，肉眼碍非通，法眼能觀俗，慧眼了真空，佛眼如千日，照異體還同。』

偈中初三句具顯三軌，『若於大眾中』是如來室，『以無所畏心』是如來衣，『說是法華經』是如來座。三軌宏經，十乘具足，故得六根清淨。

六根有浮塵勝義見精三種，如云：眼如葡萄朵（明暗相形），耳如新卷葉（動靜相擊），鼻如相垂瓜（通塞相發），舌如初偃月（恬變相參），身如腰鼓頰（離合相摩），意如幽室見（生滅相續）。

是浮根四塵（色香味觸）循明暗動靜通塞恬變離合生滅諸有爲相，攬塵結根爲四大（地、水、火、風）勝義根，根塵互影，則有見聞覺知之見精，由斯根塵識心之六根爲生死涅槃之本，所謂元依一精明分成六和合。知見

（根性）立知（空有）卽無明本，知見無見（脫空有之縛）斯卽涅槃，一門深入，人一無妄，彼六知根，一時清淨。故阿那律無目能見，跋難陀龍無耳能聽，菟伽神女非鼻聞香，憍梵鉢提異舌知味，舜若多神無身覺觸，迦葉滅意能念。

二、耳根。

復次常精進。若善男子善女人。受持此經。若讀若誦。若解說。若書寫。得千二百耳功德。以是清淨耳。聞三千大千世界。下至阿鼻地獄。上至有頂。其中內外種種語言音聲。象聲。馬聲。牛聲。車聲。啼哭聲。愁嘆聲。螺聲。鼓聲。鐘聲。鈴聲。笑聲。語聲。男聲。女聲。童子聲。童女聲。法聲。非法聲。苦聲。樂聲。凡夫聲。聖人聲。喜聲。不喜聲。天聲。龍聲。夜叉聲。乾闥婆聲。阿修羅聲。迦樓羅聲。緊那羅聲。摩睺羅伽聲。火聲。水聲。風聲。地獄聲。畜生聲。餓鬼聲。比丘聲。比丘尼聲。聲聞聲。辟支佛聲。菩薩聲。佛聲。以要言之。三千大千世界中，一切內外所有諸聲。雖未得天耳。以父母所生清淨常耳。皆悉聞知。如是分別種種音聲而不壞耳根。爾時世尊欲重宣此義。而說偈言。

父母所生耳。清淨無濁穢。以此常耳聞。三千世界聲。
象馬車牛聲。鐘鈴螺鼓聲。琴瑟箏篴聲。簫笛之音聲。
清淨好歌聲。聽之而不著。無數種人聲。聞悉能解了。
又聞諸天聲。微妙之歌音。及聞男女聲。童子童女聲。
山川險谷中。迦陵頻伽聲。命命等諸鳥。悉聞其音聲。

地獄衆苦痛。種種楚毒聲。餓鬼饑渴逼。求索飲食聲。諸阿修羅等。居在大海邊。自共言語時。出於大音聲。如是說法者。安住於此間。遙聞是衆聲。而不壞耳根。十方世界中。禽獸鳴相呼。其說法之人。於此悉聞之。其諸梵天上。光音及徧淨。乃至有頂天。言語之音聲。法師住於此。悉皆得聞之。一切比丘衆。及諸比丘尼。若讀誦經典。若爲他人說。法師住於此。悉皆得聞之。復有諸菩薩。讀誦於經法。若爲他人說。撰集解其義。如是諸音聲。悉皆得聞之。諸佛大聖尊。教化衆生者。於諸大會中。演說微妙法。持此法華者。悉皆得聞之。三千大千界。內外諸音聲。下至阿鼻獄。上至有頂天。皆聞其音聲。而不壞耳根。其耳聰利故。悉能分別知。持是法華者。雖未得天耳。但用所生耳。功德已如是。

『伽陵頻伽』：翻美音鳥，此鳥本出雪山，在殼中能鳴。『命命』：彌陀經曰共命鳥，一身兩頭神識各異，報命則同，勝天王經曰，生生鳥。涅槃經曰，耆婆耆婆。『阿鼻地獄』：阿鼻此云無間，成論明五種無間（趣果、受苦、時、命、形），爲五逆業者報處。『梵天光音及徧淨乃至有頂天』：卽色界十八天，初禪三天（梵衆、梵輔、大梵），二禪三天（少光、無量光、光音），三禪三天（少淨、無量淨、徧淨）四禪九天（福生、無雲、廣果、無想、無煩、無熱、善現、善見、色究竟——有形界之頂）。

以眼例耳，耳亦有人天慧法佛等五，『父母所生耳』是肉耳。能聞『內

外』，是天耳。『聽之不著』是慧耳。『悉能分別知』是法耳。一時互聞卽佛耳。

三、鼻根。

復次常精進。若善男子善女人。受持是經。若讀若誦。若解說。若書寫。成就八百鼻功德。以是清淨鼻根。聞於三千大千世界。上下內外種種諸香。須曼那華香。闍提華香。末利華香。薈蔔華香。波羅羅華香。赤蓮華香。青蓮華香。白蓮華香。華樹香。果樹香。栴檀香。沉水香。多摩羅跋香。多伽羅香。及千萬種和香。若末若丸若塗香。持是經者。於此間住。悉能分別。又復別知衆生之香。象香。馬香。牛羊等香。男香女香。童子香。童女香。及草木叢林香。若近若遠所有諸香。悉皆得聞。分別不錯。持是經者雖住於此。亦聞天上諸天之香。波利質多羅拘鞞陀羅樹香。及曼陀羅華香。摩訶曼陀羅華香。曼殊沙華香。摩訶曼殊沙華香。栴檀沉水種種末香。諸雜華香。如是等天香和合所出之香。無不聞知。又聞諸天身香。釋提桓因在勝殿上。五欲娛樂嬉戲時香。若在妙法堂上。爲忉利諸天說法時香。若於諸園遊戲時香。及餘天等男女身香。皆悉遙聞。如是展轉乃至梵世。上至有頂諸天身香。亦皆聞之。並聞諸天所燒之香。及聲聞香。辟支佛香。菩薩香。諸佛身香。亦皆遙聞。知其所在。雖聞此香。然於鼻根不壞不錯。若欲分別爲他人說。憶念不謬。爾時世尊欲重宣此義。而說偈言。

是人鼻清淨。於此世界中。若香若臭物。種種悉聞知。
須曼那闍提。多摩羅栴檀。沉水及桂香。種種華果香。

及諸衆生香。男子女人香。說法者遠住。聞香知所在。
大勢轉輪王。小轉輪及子。羣臣諸宮人。聞香知所在。
身所著珍寶。及地中寶藏。轉輪王寶女。聞香知所在。
諸人嚴身具。衣服及瓔珞。種種所塗香。聞香知其身。
諸天若行坐。遊戲及神變。持是法華者。聞香悉能知。
諸樹華果實。及酥油香氣。持經者住此。悉知其所在。
諸山深險處。栴檀樹華敷。衆生在中者。聞香悉能知。
鐵圍山大海。地中諸衆生。持經者聞香。悉知其所在。
阿修羅男女。及其諸眷屬。鬥諍遊戲時。聞香皆能知。
曠野險隘處。師子象虎狼。野牛水牛等。聞香知所在。
若有懷妊者。未辨其男女。無根及非人。聞香悉能知。
以聞香力故。知其初懷妊。成就不成就。安樂產福子。
以聞香力故。知男女所念。染欲癡恚心。亦知修善者。
地中衆伏藏。金銀諸珍寶。銅器之所盛。聞香悉能知。
種種諸瓔珞。無能識其價。聞香知貴賤。出處及所在。
天上諸華等。曼陀曼殊沙。波利質多樹。聞香悉能知。
天上諸宮殿。上中下差別。衆寶華莊嚴。聞香悉能知。
天園林勝殿。諸觀妙法堂。在中而娛樂。聞香悉能知。

諸天若聽法。或受五欲時。來往行坐臥。聞香悉能知。
天女所著衣。好華香莊嚴。周旋遊戲時。聞香悉能知。
如是展轉上。乃至於梵世。入禪出禪者。聞香悉能知。
光音徧淨天。乃至於有頂。初生及退沒。聞香悉能知。
諸比丘衆等。於法常精進。若坐若經行。及讀誦經典。
或在林樹下。專精而坐禪。持經者聞香。悉知其所在。
菩薩志堅固。坐禪若讀誦。或爲人說法。聞香悉能知。
在在方世尊。一切所恭敬。愍衆而說法。聞香悉能知。
衆生在佛前。聞經皆歡喜。如法而修行。聞香悉能知。
雖未得菩薩。無漏法生鼻。而是持經者。先得此鼻相。

『須曼那華』：翻悅意華，其色黃白，高三四尺，四垂似蓋。『闍提華』：翻金鐵華。『末利華』：翻鬢，其華可作鬢。『薈蔔華』：翻金色華。大論云：黃華樹，樹形高大，華亦甚者。『波羅羅華』：翻重生華，又曰薰華。『多摩羅跋香』：卽藿葉香，此云芬香，或云性無垢。『多伽羅香』：卽零陵香，翻不沒香，或云根香。『和香』：卽百合香。『丸香』：餅香。『波利質多羅』：帝釋殿前圓生樹，其根莖枝葉能逆風薰五十由旬，順風百由旬。『拘鞞陀羅樹』：翻大遊戲地樹。『曼陀羅』：翻白團華，又名適意華。『曼殊沙』：翻小赤團華。『妙法堂』：又曰善法堂在忉利天。『小轉輪及子』：卽銀、銅、鐵輪王，王三三二天下，具足千子。『大勢轉輪王』：卽金輪王，王四天下，具三十二相，此洲人壽八萬歲時出世。『轉輪王寶女』：卽七寶（輪、珠、象、馬、主兵臣、主藏臣、玉女）之一。『鐵圍山大海』：圍繞鹹海區劃小世界之鐵山，須彌山爲中心，外有七山八海，第八海卽鹹海。『善男女』所生爲肉鼻，聞於大千『內外』爲天鼻，不染著卽慧

鼻，『不壞（鼻不為香臭所熏）不錯（又能分別遠近）憶念不謬』為法鼻，一時互用為佛鼻。

本節文明六根互用最為顯著，例如聞香『知貴賤』辨『宮殿』『華莊嚴』等句，即鼻有眼用。『讀誦經典』為人『說法』聞香悉能知，即鼻有耳用。『諸樹華果實及酥油香氣』，即鼻有舌用。『入禪出禪』，以將得初禪時生身中生八種感觸（動、痒、輕、重、冷、暖、澁、滑）。『五欲娛樂嬉戲』亦是觸法，即鼻有身用。『染欲癡恚心。亦知修善者，』即鼻有意用。鼻根既爾，餘根準例亦如是。

約迷情執見，鼻惟通息，更無他用，功用最劣，故云：八百。本節文廣明鼻根勝用者，正顯圓通妙性實無優劣。

四、舌根。

復次常精進。若善男子善女人。受持是經。若讀若誦。若解說。若書寫。得千二百舌功德。若好若醜。若美不美。及諸苦澀物。在其舌根。皆變成上味。如天甘露。無不美者。若以舌根。於大眾中有所演說。出深妙聲。能入其心。皆令歡喜快樂。又諸天子天女。釋梵諸天。聞是深妙音聲。有所演說。言論次第。皆悉來聽。及諸龍。龍女。夜叉。夜叉女。乾闥婆。乾闥婆女。阿修羅。阿修羅女。迦樓羅。迦樓羅女。緊那羅。緊那羅女。摩睺羅伽。摩睺羅伽女。為聽法故。皆來親近。恭敬供養。及比丘。比丘尼。優婆塞。優婆夷。國王王子。羣臣眷屬。小轉輪王。大轉輪王。七寶千子。內外眷屬。乘其宮殿。俱來聽法。以是菩薩善說法故。婆羅門居士。國內人民。盡其形壽。隨侍供養。又諸聲聞辟支佛菩薩諸佛。常樂見之。是人所在方面。諸佛皆向其處說法。悉能

受持一切佛法。又能出於深妙法音。爾時世尊欲重宣此義。而說偈言。

是人舌根淨。終不受惡味。其有所食噉。悉皆成甘露。
以深淨妙聲。於大眾說法。以諸因緣喻。引導衆生心。
聞者皆歡喜。設諸上供養。諸天龍夜叉。及阿修羅等。
皆以恭敬心。而共來聽法。是說法之人。若欲以妙音。
徧滿三千界。隨意卽能至。大小轉輪王。及千子眷屬。
合掌恭敬心。常來聽受法。諸天龍夜叉。羅剎毗舍闍。
亦以歡喜心。常樂來供養。梵天王魔王。自在大自在。
如是諸天衆。常來至其所。諸佛及弟子。聞其說法音。
常念而守護。或時爲現身。

『大小轉輪王』：王分大小，輪有四異。『毗舍闍』：持國天王所領之二部鬼（毘舍闍噉精鬼，乾闥婆尋香鬼）之一。

味有損益，故云：『其有所食噉悉皆成甘露』。若知味爲法界，方令其味變爲不死丹，況六根俱淨耶。佛世食前命弟子唱僧跋（三跋羅伽多）變不淨爲甘露，今改唱五觀，智者云：『食乃法之本』。

此舌根亦具餘根用，以清淨故，能徧知一切色聲香味觸法無亂無謬，雖無著而能分別，不同二乘之執空，雖分別而不壞諸根，豈同凡夫滯有。

五、身根。

復次常精進。若善男子善女人。受持是經。若讀若誦。若解說。
若書寫。得八百身功德。得清淨身。如淨瑠璃。衆生喜見。其身

淨故。三千大千世界衆生。生時死時。上下好醜。生善處惡處。悉於中現。及鐵圍山。大鐵圍山。彌樓山。摩訶彌樓山等諸山。及其中衆生。悉於中現。下至阿鼻地獄。上至有頂所有及衆生。悉於中現。若聲聞辟支佛菩薩諸佛說法。皆於身中現其色像。爾時世尊欲重宣此義而說偈言。

若持法華者。其身甚清淨。如彼淨瑠璃。衆生皆喜見。
又如淨明鏡。悉見諸色像。菩薩於淨身。皆見世所有。
唯獨自明了。餘人所不見。三千世界中。一切諸羣萌。
天人阿修羅。地獄鬼畜生。如是諸色像。皆於身中現。
諸天等宮殿。乃至於有頂。鐵圍及彌樓。摩訶彌樓山。
諸大海水等。皆於身中現。諸佛及聲聞。佛子菩薩等。
若獨若在衆。說法悉皆現。雖未得無漏。法性之妙身。
以清淨常體。一切於中現。

『唯獨自明了餘人所不見』：所謂如人飲水，冷暖自知。『彌樓山』：翻高山光山，或謂與須彌山一體。或謂別體。

『世界衆生，生時死時。上下好醜。生善處惡處。悉於中現。』是肉身用。『上至有頂。所有及衆生悉於中現。』是天身用。『聲聞辟支佛菩薩諸佛說法。皆於身中現其包像』是慧身法身佛身等用。

六、意根。

復次常精進。若善男子善女人。如來滅後受持是經。若讀若誦。若解說。若書寫。得千二百意功德。以是清淨意根。乃至聞一偈

一句。通達無量無邊之義。解是義已。能演說一句一偈。至於一月四月。乃至一歲。諸所說法。隨其義趣。皆與實相不相違背。若說俗間經書。治世語言。資生業等。皆順正法。三千大千世界。六趣衆生心之所行。心所動作。心所戲論。皆悉知之。雖未得無漏智慧。而其意根清淨如此。是人有所思惟籌量言說。皆是佛法。無不真實。亦是先佛經中所說。爾時世尊欲重宣此義。而說偈言。

是人意清淨。明利無濁穢。以此妙意根。知上中下法。乃至聞一偈。通達無量義。次第如法說。月四月至歲。是世界內外。一切諸衆生。若天龍及人。夜叉鬼神等。其在六趣中。所念若干種。持法華之報。一時皆悉知。十方無數佛。百福莊嚴相。爲衆生說法。悉聞能受持。思惟無量義。說法亦無量。終始不忘錯。以持法華故。悉知諸法相。隨義識次第。達名字語言。如所知演說。此人有所說。皆是先佛法。以演此法故。於衆無所畏。持法華經者。意根淨若斯。雖未得無漏。先有如是相。是人持此經。安住希有地。爲一切衆生。歡喜而愛敬。能以千萬種。善巧之語言。分別而說法。持法華經故。

『治世語言資生業等皆順正法』是人意淨，如寶積見屠子有省，樓子聞淫辭悟道。『六趣衆生心之所行心所動作心所戲論皆悉知之』是天意淨。

『四月』：西域歲分三際，謂雨際、熱際、寒際，四個月爲一際，四月表四諦。『一歲』：十二個月，卽十二因緣。『皆與實相不相違背』：是慧意淨。

『一月』：卽一乘，是菩薩意淨。『有所思量……皆是先佛經中所說。』：是佛意淨。

『聞一偈一句通達無量無邊之義』：以無量義原出一句，得一而知廣。『解是義已能演說一句一偈乃至一歲』：例九句談妙。如華嚴云：於一文字語言中，演說無邊契經海。『俗間經書』：卽五經諸史等。『治世語言』：卽調理陰陽安邦治國。『資生業等』：卽醫卜數命經營田疇。

按律中不許習學外道經書手筆。輔行云：若外學者，小乘爲伏外道，許十二時中一時習外。大乘初心菩薩一向不許。淨名云：若好雜句文飾者，皆是新發意菩薩。此六根淨位，以持經故，能皆順正法。『於衆無所畏』：如緣德禪師不怕死，殺人不眨眼的曹翰將軍也沒奈何。『安住希有地』：謂能持正法，其所處地位，與諸佛菩薩把手共修。各章末均曰『雖未得』句，正顯法師功德品但明相似六根功德。二明初品果功德以勸流通竟。釋法師功德品竟，次釋常不輕菩薩品。

常不輕菩薩品第二十

前分別功德品中『爾時佛告彌勒菩薩』起，歷隨喜功德品，法師功德品，暨常不輕菩薩品，共三品半文，均屬流通。初一品半，直明現在四信滅後五品，顯初品之因功德。法師功德品，但明相似六根功德，顯初品之果功德。常不輕菩薩品，明弘經人，現生後報六根清淨。後如來神力品、囑累品，顯果人自明弘經力用。藥王菩薩本事品、妙音菩薩品、觀音菩薩普門品，明分真人弘經功能。

文句云：『內懷不輕之解（此菩薩知衆生有五種佛性——正因佛性，通迷悟因果。緣、了佛性，從性對熏成修。果性，了因至果轉名菩提。果果性，緣因至果轉名涅槃。）』，外敬不輕之境（將解以歷人，彼亦如此。），身歷不輕之行（敬此境），口宣不輕之教（宣此語），人作不輕之目（昔毀者，以此目人，今以此目品。）。綜論衆生具有因果性，則五佛性皆在衆生，倘住因，則果性名因，在果則攬因名果，名雖互得，其法恒如。故佛言：若如實見，衆生即是佛，若分別賢聖，則有孰是孰非。

於前文句五文中，初二句是世界悉檀，後三句是爲人對治第一義，此因緣釋也。

約教者，四教有七種二諦（藏教——實有二諦。通教——幻有空二諦，兩種含中二諦。別教——顯中二諦，圓入別二諦。圓教——不思議二諦。），五種三諦（通教——別人通三諦，圓入通三諦。別教——別三諦，圓入別三諦。圓教——圓妙三諦。），藏通二教無三諦名，不詮中道佛性，通教僅有別圓所入之三諦，及兩種含中二諦。別教隔歷三諦，圓入別三諦，是點真顯中。唯圓教是圓妙三諦，中道佛性爲諸法所依，諸法相泯，卽俗皆真，諸法建立，卽真皆俗，今云：皆當作佛，具有五種佛性，卽是開顯之圓也。

本迹者，菩薩本已成佛，中間垂迹，獲現生後報，弘經流通，後文云，臨欲終時，具聞威音王佛說法華經，得六根淨，更增壽命，卽現報。命終之後，復值二千億佛，同號日月燈明，卽生報。以是因緣，復值二千億佛，同號雲自在燈王，復值千萬億佛，卽後報。

唐湛然尊者之法華文句記，以安樂行者始行弘經，與常不輕菩薩之流通弘經，其儀有別：『彼則安處法座隨問而說，此乃遠見四衆故往禮拜。彼則有所難問方乃爲答，此乃瓦石打擲猶強宣之。彼則常好坐禪在空閒處，此乃不專讀誦入衆中通。彼則深愛法者不爲多說，此乃被虛妄謗仍強稱揚。彼則初問云何讀此經，此乃但云流通作佛一句。彼則初修理觀觀十八空，此乃但懷一句作佛之解。彼則化佛親說詮虛空身，此乃虛空身說詮於化事。彼則夢中遠表當獲大果，此乃口宣當得佛因之教。彼則約解髻喻開二乘權，此乃約結緣表一乘之實。彼則以順化故存於軌儀，此乃以逆化故亡於恒迹。彼則列勝行法以取於人，此乃偏引往人以通勝法。』

觀心者，一念具三因五因佛性，迷之正因卽苦，了因卽惑，緣因卽業。悟者以性德三因爲果性，及果果性，轉三因成三菩提、三涅槃。

三、引信毀福罪證勸流通，分二：初長文，二偈頌。長文爲三：初雙指前品所說罪福。二、雙明往昔信毀果報。三、勸持。今初。

爾時佛告得大勢菩薩摩訶薩。汝今當知。若比丘。比丘尼。優婆塞。優婆夷。持法華經者。若有惡口罵詈誹謗。獲大罪報。如前（法師品）所說，其所得功德，如向（法師功德品）所說眼耳鼻舌身意清淨。

『得大勢菩薩』：卽大勢至菩薩，梵語——摩訶那鉢，侍彌陀右脇，主佛智門者。

二、雙明往昔信毀果報，分二：初明事本（通舉威音王佛以爲不輕事之本），二、明本事。初又二：初明有初一佛，二明次第二萬億佛。初中六：初時節，二名號，三劫國，四說法，五佛壽，六正像。今初。

得大勢。乃往古昔過無量無邊不可思議阿僧祇劫。

二、名號。

有佛名威音王如來。應供。正徧知。明行足。善逝。世間解。無上士。調御丈夫。天人師。佛。世尊。

『威音王佛』：乃空劫初成之佛，已前則為實際之理，故曰、威音那畔。
三、劫國。

劫名離衰。國名大成。

『離衰』：安忍寂滅，物我兩亡，永離憂惱。『大成』：唯以忍行，故無損有益。

四、說法。

其威音王佛。於彼世中為天。人。阿修羅說法。為求聲聞者。說應四諦法。度生老病死。究竟涅槃。為求辟支佛者。說應十二因緣法。為諸菩薩。因阿耨多羅三藐三菩提。說應六波羅密法。究竟佛慧。

先方便施三，後究竟佛慧顯一，悉與今佛同。

五、佛壽。

得大勢。是威音王佛。壽四十萬億那由他恒河沙劫。

六、正像。

正法住世。劫數如一閻浮提微塵。像法住世。劫數如四天下微塵。其佛饒益衆生已。然後滅度。

『閻浮提』：即南瞻部洲。『四天下』：即四大洲。初明最初一佛竟。
二、明次第二萬億佛。

正法像法滅盡之後。於此國土復有佛出。亦號威音王如來。應供。正徧知。明行足。善逝。世間解。無上士。調御丈夫。天人師。佛。世尊。如是次第有二萬億佛。皆同一號。

正、像法滅，佛乃出者，以衆生之種熟脫機緣所感也。初明事本竟。

二、明本事（別約最初威音王佛時不輕之事，於釋迦垂迹重復示現本行菩薩道之事。）
文爲三：初就本時雙標兩人名，二、雙明信毀之相，三、雙明信毀果報。今初。

最初威音王如來既已滅度。正法滅後。於像法中。增上慢比丘有大勢力。爾時有一菩薩比丘。名常不輕。

『增上慢比丘』：秉權教修行，不知位次，誤認四禪爲四果無聞比丘之流，所謂執方便（藏教）之方便（煖法爲藏教之方便），著小（四果）之小（四禪又是小中之小）。『常不輕』：對自滿者，下圓頓種，故以禮拜授記，作得度因緣，故以不輕之名對治，且不輕菩薩非內慢外恭，腹誹口譽之輩，並能尊法重人，故不生輕慢，行忍辱而成正覺。

二、雙明信毀之相，分二：初明信者之得，二、明毀者之失。今初。

得大勢。以何因緣名常不輕。是比丘凡有所見。若比丘。比丘尼。優婆塞。優婆夷。皆悉禮拜讚歎。而作是言。我深敬汝等。不敢輕慢。所以者何。汝等皆行菩薩道。當得作佛。而是比丘不專讀誦經典。但行禮拜。乃至遠見四衆。亦復故往禮拜讚歎。而作是言。我不敢輕於汝等。汝等皆當作佛。

『名常不輕』是人一，『凡有所見』是理一，『皆悉禮拜』是行一，『而作是言』是教一，此是自行四一。『汝等』是人一，『皆行菩薩道』是行一，『當得作佛』是證理一，詮此三一，卽是教一，此是化他四一。『汝等皆行菩薩道』：四念處是摩訶衍，煖法四禪並資實相，若知所行是菩薩道，則始終理等。『不專讀誦經典但行禮拜』：迹示初隨喜品之相，隨喜一切法

悉有安樂性，皆一實相，隨喜一切人皆有。三佛性，『讀誦經典』卽了因佛性，『皆行菩薩道』卽緣因佛性，『深敬不敢輕慢』卽正因性。又『不輕深敬』是如來座，忍於『罵詈』，是著如來衣，以慈悲心常行不替，是如來室。又『深敬』是意安樂，『不輕』是口安樂，『禮拜』是身安樂，此三與慈悲俱，卽願安樂，以法身慧命蘊藏於衆生身內八識田中，真經在人，不在紙墨文字，所謂人存政舉，故不輕禮人，不專讀經典，至云出家者，父母不拜，國王不禮，乃就遮戒而言。捨得曰：『無瞋卽是戒，心淨卽出家，我性與汝合，一切法無差。』此就性戒而說。

二、明毀者之失。

四衆之中。有生瞋恚心不淨者。惡口罵詈言。是無智比丘。從何所來。自言我不輕汝。而與我等授記。當得作佛。我等不用如是虛妄授記。

『生瞋恚心不淨』：明增上慢人不受教行人理四一。『罵詈』、『無智』：不受理一。『比丘』：卽受人一。『從何所來』：不受行一。『虛妄授記』：不受教一。所謂步步登高易，心心放下難。

如此經歷多年。常被罵詈。不生瞋恚。常作是言。汝當作佛。說是語時。衆人或以杖木瓦石而打擲之。避走遠住。猶高聲唱言。我不敢輕於汝等。汝等皆當作佛。以其常作是語故。增上慢比丘。比丘尼。優婆塞。優婆夷。號之爲常不輕。

『經歷多年常被罵詈』：顯不受開權顯實之教行人理四一。『避走遠住高聲唱言』：明不受開近顯遠本地之四一。『常作是語故』：結信者不休。『四衆爲作不輕名』：結毀者不止。

釋迦護善先以小化，故久默斯要不務速說。不輕禮拜，唱得作佛，不著佛求，不著法求，不著僧求，令聞者作當來得度之因緣，故強毒。

三、雙明信毀果報，分二：初明信者果報，二明毀者果報。初中二：初明果報，二、

結會古今。今初。

是比丘臨欲終時。於虛空中。具聞威音王佛。先所說法華經二十千萬億偈。悉能受持。卽得如上眼根清淨。耳鼻舌身意根清淨。得是六根清淨已。更增壽命二百萬億那由他歲。廣爲人說是法華經。於時增上慢四衆比丘。比丘尼。優婆塞。優婆夷。輕賤是人。爲作不輕名者。見其得大神通力。樂說辯力。大善寂力。聞其所說。皆信伏隨從。是菩薩復化千萬億衆。令住阿耨多羅三藐三菩提。命終之後得值二千億佛。皆號日月燈明。於其法中。說是法華經。以是因緣。復值二千億佛。同號雲自在燈王。於此諸佛法中。受持讀誦。爲諸四衆說此經典故。得是常眼清淨。耳鼻舌身意諸根清淨。於四衆中說法。心無所畏。得大勢。是常不輕菩薩摩訶薩。供養如是若干諸佛。恭敬尊重讚歎。種諸善根。於後復值千萬億佛。亦於諸佛法中。說是經典。功德成就。當得作佛。

信者論三報，六根清淨更生壽命是現報，命終值燈明佛是生報，復值二千億佛同號云自在燈王，乃至當得作佛是後報。『神通力』是身業淨。『樂說辯力』是口業淨。『善寂力』是意業淨。又『神通』：室也。『說辯』：座也。『善寂』：衣也。『於虛空中聞威音王佛先所說法華經』：於空中聞，表亡能所，絕影像。『二千億佛皆號日月燈明』、『同號雲自在燈王』：表融真俗，圓事理。日月、燈明、表三無差別智，相繼無窮；云自在燈王，表無礙妙智，潤覆無極。『是比丘』：於大通智勝佛時作菩薩沙彌說法華經，在日月燈時作菩薩比丘說法華經，足見然燈授記，王子覆講，皆是方便。

常不輕菩薩係釋迦垂迹，故聞威音所說法華經乃得六根清淨，乃至云來此娑婆世界八千返坐金剛華光王座，非生現生，不以果佛現身；非滅現滅，示同人法。

二、結會古今。

得大勢。於意云何。爾時常不輕菩薩。豈異人乎。則我身是。若我於宿世不受持讀誦此經。爲他人說者。不能疾得阿耨多羅三藐三菩提。我於先佛所。受持讀誦此經。爲人說故。疾得阿耨多羅三藐三菩提。

初明信者果報竟。

二、明毀者果報，分二：初明果報，二、結會古今。今初。

得大勢。彼時四衆比丘。比丘尼。優婆塞。優婆夷。以瞋恚意。輕賤我故。二百億劫。常不值佛。不聞法。不見僧。千劫於阿鼻地獄。受大苦惱。畢是罪已。復遇常不輕菩薩。教化阿耨多羅三藐三菩提。

文句云：『毀者得善惡兩果，謗故墮惡，聞佛性名毒鼓之力，獲善果報。』以因謗墮惡，必由得益，如人倒地，還從地起。

善惡兩果的形成，由思心所審慮決定發動，役使身口趨於善惡，所以說業力是平等的，如火燒物不分貴賤，運作是人，且其力甚大。地藏經說：『能敵須彌，能深巨海，能障聖道。』大論喻如債主逐人。既不因菩薩生謗墮苦，倘無善行亦必墮，蓋宿業雖能引牽，以具性空，現生果報仍可自己支配。

三、結會古今。

得大勢，於汝意云何。爾時四衆常輕是菩薩者。豈異人乎。今此會中。跋陀婆羅等五百菩薩。師子月等五百比丘。尼思佛等五百優婆塞。皆於阿耨多羅三藐三菩提不退轉者是。

『跋陀婆羅』：賢護菩薩之梵名，或云善守。思益經云：若衆生聞名畢竟得菩提。或云賢首，位居等覺，爲衆賢之首。『師子月』：正法華云：

『師子月等五百比丘比丘尼。』則師子月自是比丘。二、雙明往昔信毀果報

竟。

三、勸持。

得大勢。當知是法華經。大饒益諸菩薩摩訶薩。能令至於阿耨多羅三藐三菩提。是故諸菩薩摩訶薩。於如來滅後。常應受持讀誦。解說書寫是經。

依上所明，不惟信者，疾得成佛，毀者終得不退，故應勤習受持讀誦解說書寫五種法師之行。初長文竟。

二、偈頌，分二：初頌信毀果報，二頌勸持。初中二：初頌事本，二頌本事。今初。

爾時世尊欲重宣此義。而說偈言。
過去有佛。號威音王。神智無量。將導一切。天人龍神。所共供養。

二、頌本事，分三：初頌雙標兩名，二、頌雙明信毀，三、頌雙明因果。今初。

是佛滅後。法欲盡時。有一菩薩。名常不輕。時諸四衆。計著於法。

『計著於法』，卽被法縛，以是法不可示，言辭相寂滅故。中論云：

『諸佛說空法，本爲化於有，若有著空者，諸佛所不化。』文句云：『若定言諸法非有非無者，是名愚癡論，若失四悉檀意，自行化他，皆名著法，若得四悉檀意，自行化他俱無著也。』所謂刀輪害閻浮人，其罪猶少，有所得心說大乘者，其罪過彼。

二、頌雙明信毀。

不輕菩薩。往到其所。而語之言。我不輕汝。汝等行道。皆當作佛。諸人聞已。輕毀罵詈。不輕菩薩。能忍受之。

三、頌雙明果報，分二：初頌信者果報，二頌毀者果報。今初。

其罪畢已。臨命終時。得聞此經。六根清淨。神通力故。增益壽命。復爲諸人。廣說是經。諸著法衆。皆蒙菩薩。教化成就。令住佛道。不輕命終。值無數佛。說是經故。得無量福。漸具功德。疾成佛道。彼時不輕。則我身是。

『其罪畢已』：示同疾行之罪，故招打罵，以忍力故，畢罪根淨。

二、頌毀者果報。

時四部衆。著法之者。聞不輕言。汝當作佛。以是因緣。值無數佛。此會菩薩。五百之衆，並及四部。清信士女。今於我前。聽法者是。我於前世。勸是諸人。聽受斯經。第一之法。開示教人。令住涅槃。世世受持。如是經典。

初頌信毀果報竟。

二、頌勸持。

億億萬劫。至不可議。時乃得聞。是法華經。億億萬劫。至不可議。諸佛世尊。時說是經。是故行者。於佛滅後。聞如是經。勿生疑惑。應當一心。廣說此經。世世值佛。疾成佛道。

二、別說迹本兩門竟。〔本經大科有三：初通序迹本兩門，二別說迹本兩門（自別序迄安樂行品，是迹門開權顯實，自從地湧出品迄常不輕品，是本門開權顯實，從別序及方便品至授學無學人記，是正說段，自法師品至安樂行品是流通段。〕三流通迹本兩門。古判前二十品爲正宗分，此後八品爲流通分。

三、流通迹本兩門，共八品經，分三大段，初神力囑累兩品，明付屬流通。二藥王妙音觀音陀羅尼，妙莊嚴王共五品，約化他勸流通。三普賢勸發品，約自行勸流通。初中二，初神力品，明菩薩受命弘經，二、囑累品，明如來摩頂付囑。

顯明大師法集

釋常不輕菩薩品竟，次釋如來神力品。

如來神力品第二十一

文句云：『如來者，上（壽量品）釋竟，神名不測，力名幹用，不測則天然之體深，幹用則轉變之力大，此中為付囑深法，現十種大力（見下文），故名神力品。』神在於內，即體宗，力名幹用，即顯經用，佛陀別說迹本兩門，是口輪力用，今復身輪，現此十種神力，令眾流通迹本之教，故云體深力大。

今神力品明菩薩受命弘經，下囑累品明如來摩頂付囑。初又二：初長文，二、偈頌。初中三：初明菩薩受命，二、佛現神力，三、結要勸持。今初。

爾時千世界微塵等菩薩摩訶薩。從地湧出者。皆於佛前一心合掌。瞻仰尊顏。而白佛言。世尊。我等於佛滅後。世尊分身所在國土滅度之處。當廣說此經。所以者何。我等亦自欲得是真淨大法。受持讀誦。解說書寫。而供養之。

『一心合掌瞻仰尊顏』以上，是經敘敬儀。『而白佛言』以下訖文末，是發願弘經，分三節——一、時節，為佛滅後。二、處所，為分身等國。三、誓願，非但奉命益他，亦自欲得真淨大法，自他兼濟。『真淨大法』：實體名真，權用名淨，權實不二名大。

二、佛現神力，分二：初約所對總標。二、約所表正現。今初。

爾時世尊於文殊師利等。無量百千萬億舊住娑婆世界菩薩摩訶薩。及諸比丘。比丘尼。優婆塞。優婆夷。天龍。夜叉。乾闥婆。阿修羅。迦樓羅。緊那羅。摩睺羅伽。人非人等。一切眾前。現大神力。

『於文殊師利等』：文殊於過去日月燈佛時為妙光法師，教八王子，其第八曰然燈，今釋迦於然燈始發大心，故文殊等為迹中所化之眾。『舊住』：下方本化之眾，如地湧品，上行無邊行淨行安立行等四導師。『一切眾』：

從他方來及從分身佛來者，非指四衆八部也。

二、約所表正現，分十：初出舌相、二毛孔放光、三警（音馨）欬（音儻）（將語之狀）、四彈指、五地動、六普見大會、七空中唱聲、八遙歸命、九遙供養、十、十方通達如一佛土。今初出舌相，二毛孔放光。

出廣長舌上至梵世。一切毛孔。放於無量無數色光。皆悉徧照十方世界。衆寶樹下師子座上諸佛。亦復如是出廣長舌。放無量光。釋迦牟尼佛。及寶樹下諸佛現神力時。滿百千歲。然後還攝舌相。

『廣長舌』：三十二相之一，舌廣而長，柔軟紅薄，表誠實語，開三顯一、開近顯遠，皆不虛也。凡人不妄語感舌舐鼻，福德人覆面，三藏佛舌至髮際，今云『至梵世』出過凡聖之外。『一切毛孔放於無量無數色光，皆悉徧照十方世界』：放光徧照表權實境智理一，序品白毫東照表七方便初見一理，今本門既竟，放一切光照一切土，能令初心終於等覺，究竟佛慧，所謂通身毛孔遍體放光，周徧十方無處不明。『衆寶樹下師子座上諸佛亦復如是出廣長舌放無量光』：分身諸佛化道是同，故云亦復如是。『滿百千歲』：表橫該百界千如，豎極古今十世。百千歲、五十小劫、半日、一時，約機、約念、約處時差雖殊，破無明者，延促如幻，普天都是夢邯鄲，不須以神力使然。

三、警欬。四、彈指。

一時警欬。俱共彈指。是二音聲。徧至十方諸佛世界。

『警欬』：表教一，四十餘年未曾說實，今獲伸舒，無有遺滯。『彈指』：表人一，七方便人，隨喜同入圓位，增道損生，諸菩薩持眞淨大法，後世獲無上寶。

五、地動。六、普見大會。

地皆六種震動。其中衆生。天龍。夜叉。乾闥婆。阿修羅。迦樓羅。緊那羅。摩睺羅伽。人非人等。以佛神力故。皆見此娑婆世

界。無量無邊百千萬億衆寶樹下師子座上諸佛。及見釋迦牟尼佛。共多寶如來。在寶塔中坐師子座。又見無量無邊百千萬億菩薩摩訶薩。及諸四衆。恭敬圍繞釋迦牟尼佛。既見是已。皆大歡喜。得未曾有。

『六種震動』：表動六根令得清淨，亦表六番破無明。『皆見』諸佛及釋迦多寶並菩薩，表諸佛道同。前五干退席，三變被移，根未熟者，以神力故令彼遙見，爲未來得度之機一。

七、空中唱聲。

卽時諸天。於虛空中高聲唱言。過此無量無邊百千萬億阿僧祇世界。有國名娑婆。是中有佛。名釋迦牟尼。今爲諸菩薩摩訶菩薩。說大乘經。名妙法蓮華。教菩薩法。佛所護念。汝等當深心隨喜。亦當禮拜供養釋迦牟尼佛。

『空中』『唱言』表未來教一。

八、遙歸命。

彼諸衆生聞虛空中聲已。合掌向娑婆世界作如是言。南無釋迦牟尼佛。南無釋迦牟尼佛。

『南無』：或作那謨，納墓，譯歸命、敬禮、救我等，是向佛至心歸依信順之語，合掌稱南無，爲釋門歸敬儀。『合掌』：又名合十，表專一之敬禮法，吾國以拱手爲敬，印度以合掌爲敬，手本二邊，今合爲一，表不敢散誕，又十度一心也。『娑婆』：西域記曰：『索訶世界三千大千國土，爲一佛化儀。』法華文句二曰：『娑婆此翻忍，其土衆生安於十惡，不肯出離，從人名土。』悲華經曰：『雜會，九道共居。』『釋迦牟尼』爲刹帝利族，釋迦是姓，翻能，牟尼又稱文尼，翻寂，印度迦毘羅城主淨飯王之子，母曰摩耶，名呼悉達多太子，誕生於坡東嵐毘尼園，思耕農之苦，厭諸獸殘食，

觀生老病死之相，蒙遁世之志，後於正覺山菩提樹下成等正覺，此為化迹之佛，表未來人一。

九、遙供養。

以種種華香瓔珞幡蓋。及諸嚴身之具。珍寶妙物。皆共遙散娑婆世界。所散諸物。從十方來。譬如雲集。變成寶帳。徧覆此間諸佛之上。

『所散諸物』，『云集變成寶帳』，表萬善同歸，未來行一。

十、十方通達如一佛土。

於時十方世界通達無礙。如一佛土。

此表未來理一。下文云：『若我以神力』、『囑累』、『此經功德猶不能盡』，故十相前五正明現在流通本迹，後五總表未來不已。二佛現神力竟。

三、結要勸持，分四：初稱歎付囑，二、結要付囑，三、勸獎付囑，四、釋付囑。今初。

爾時佛告上行等菩薩大眾。諸佛神力。如是無量無邊不可思議。若我以是神力。於無量無邊百千萬億阿僧祇劫。為囑累故。說此經功德。猶不能盡。

二、結要付囑。

以要言之。如來一切所有之法。如來一切自在神力。如來一切秘要之藏。如來一切甚深之事。皆於此經宣示顯說。

『一切所有之法』：一切皆佛法，此結妙名。『一切自在神力』：例前放光動地，延促同時，八十小劫謂如半月，通達無礙俱八自在，涅槃經二十三（能示一身為多身，示一塵身滿大千界，大身輕舉遠到，現無量類常居一土，諸根互用，得一切法如無法想，說一偈義經無量劫，身遍諸處猶如虛空。）此結妙用。『一切秘要之藏』：例見寶塔，從地湧出等，處處皆顯實

相，此結妙體。『一切甚深之事』：因果是深事，例文殊明日月燈佛事、世尊說大通智勝事、提婆達多事、龍女成佛事、常不輕事、開權顯實事、廢迹顯本事等，此結妙宗。『皆於此經宣示顯說』：總結一經權實不二之妙教，唯四而已，撮其樞柄而授與之。

三、勸獎付囑。

是故汝等於如來滅後。應一心受持讀誦。解說書寫。如說修行。所在國土。若有受持讀誦。解說書寫。如說修行。若經卷所住之處。若於園中。若於林中。若於樹下。若於僧坊。若白衣舍。若在殿堂。若山谷曠野。是中皆應起塔供養。

如說修行，經卷所在七處分別，人及處皆應起塔供養，以處即菩提場，人即佛『白衣』：俗人之別稱，以天竺之婆羅門及俗人，多服鮮白之衣，以是沙門謂緇衣或染衣。

四、釋付囑。

所以者何。當知是處。即是道場。諸佛於此得阿耨多羅三藐三菩提。諸佛於此轉於法輪。諸佛於此而般涅槃。

前文說『經卷所住之處』，『皆應起塔供養』，因經典為如來智慧結晶，即如來法身慧命，故經典所在即是道場，阿含經云：佛出世唯四處起塔（生處，得道處、轉法輪處、入涅槃處。）『道場』為總，即釋一切皆妙名，『得三菩提』證於秘要之藏，釋妙體也。『轉於法輪』，說示自行本迹因果甚深之事，釋妙宗，『般涅槃』，非滅唱滅，神力自在，釋妙用。『得三菩提』是法身，『轉於法輪』是般若，『般涅槃』是解脫，三法成秘藏，佛住其中，即是塔義，即應供養。初長文竟。

二、偈頌，分二：初頌神力，二、頌結要勸持。今初。

爾時世尊欲重宣此義。而說偈言。

諸佛救世者。住於大神通。爲悅衆生故。現無量神力。舌相至梵天。身放無數光。爲求佛道者。現此希有事。諸佛警歎聲。及彈指之聲。周聞十方國。地皆六種動。以佛滅度後。能持是經故。諸佛皆歡喜。現無量神力。

頌神力中，僅頌前五，後五從略，前後二五，現未雖異，以前五現見，舉現例未。

二、頌結要勸持，分三：初頌稱歎，二、頌結要（兼釋付囑），三、頌勸獎。今初。

囑累是經故。讚美受持者。於無量劫中。猶故不能盡。是人之功德。無邊無有窮。如十方虛空。不可得邊際。

此總四法皆無邊際。長文說，此經功德猶不能盡，今頌是人功德無邊無窮，所謂互顯法妙人妙，人妙法妙。

二、頌結要兼釋四法，分四：初一切法，二頌自在神力，三頌秘要之藏，四、頌甚深之事。今初。

能持是經者。則爲已見我。亦見多寶佛。及諸分身者。又見我今日。教化諸菩薩。

『持是經』含一切法，『見我』、『及分身』是能化，『多寶佛』是能證，『諸菩薩』是所化。教菩薩，無二乘，不兼帶，故稱秘妙。

二、頌自在神力。

能持是經者。令我及分身。滅度多寶佛。一切皆歡喜。十方現在佛。並過去未來。亦見亦供養。亦令得歡喜。

『歡喜』：卽神力用暢。

三、頌秘要之藏。

諸佛坐道場。所得秘要法。能持是經者。不久亦當得。

同於諸佛得三菩提，證秘密藏之妙體。

四、頌甚深之事。

能持是經者。於諸法之義。名字及言辭。樂說無窮盡。
如風於空中。一切無障礙。於如來滅後。知佛所說經。
因緣及次第。隨義如實說。如日月光明。能除諸幽冥。
斯人行世間。能滅衆生闇。教無量菩薩。畢竟住一乘。

以一乘因果之宗，教化菩薩，即是轉法輪。二頌結要兼釋竟。

三、頌勸獎。

是故有智者。聞此功德利。於我滅度後。應受持斯經。
是人於佛道。決定無有疑。

『於佛道決定無有疑』：信斯經，即是道場，諸佛因此得菩提轉法輪入涅槃。初明菩薩受命弘經竟。

釋如來神力品竟。次釋囑累品。

囑累品第二十二

『囑』是能付，『累』是所付，如來適時而化，累及後代弘宣，示有謙詞之意。左傳云：『相時而動，無累後人。』

從如來聖旨言，『囑』是佛所付囑，『累』是煩爾宣傳。從菩薩敬順邊說，『囑』是頂受所囑，『累』是甘爾弗勞。倘授受合論，則『囑』是如來金口所囑，『累』是菩薩丹心頂荷。如下文云：『佛從法座起』，『右手摩無量菩薩頂』，授以『難得』之法，大眾『曲躬低頭合掌向佛』，具發聲音『如世尊敕當具奉行』，故名囑累品。

一、如來摩頂付囑，分二：初付囑，二歡喜。初中三：初如來付囑。二菩薩領受，三事畢唱散。初又三：初正付，二釋付，三誠付。今初。

爾時釋迦牟尼佛從法座起。現大神力。以右手摩無量菩薩摩訶薩頂。而作是言。我於無量百千萬億阿僧祇劫。修習是難得阿耨多羅三藐三菩提法。今以付囑汝等。汝等應當一心流布此法。廣令增益。如是三摩諸菩薩摩訶薩頂。而作是言。我於無量百千萬億阿僧祇劫。修習是難得阿耨多羅三藐三菩提法。今以付囑汝等汝等當受持讀誦。廣宣此法。令一切衆生普得聞知。

佛陀授道化他之『右手』，表權智善巧。菩薩自行受道之『頂』，表實智。伸手摩頂卽身付囑，權智臨實智卽意付囑，而作是言卽口付囑。佛親摩頂，菩薩三受，表法殷勤。

二、釋付。

所以者何。如來有大慈悲。無諸慳吝。亦無所畏。能與衆生佛之智慧。如來智慧。自然智慧。如來是一切衆生之大施主。汝等亦應隨學如來之法。勿生慳吝。

『有大慈悲』：如來室。『無諸慳吝』：如來衣。『亦無所畏』：如來

座。『佛之智慧』，取覺照邊，見畢竟空，卽一切智。『如來智慧』：取從性起修，從因至果，卽道種智。『自然智慧』：其體天然雙照不二，卽一切種智。

『如來是一切衆生之大施主』：室衣座三各具三智，三一相卽，三一互融，以此化他，則如來是大慈悲，無慳吝，無所畏，之大施主，以室無衣座則弘誓不普，衣無室座則法身不滿，座無衣室則惑破不周，此三軌弘經，三三之法，自應隨學。

三、誠付。

於未來世。若有善男子善女人。信如來智慧者。當爲演說此法華經。使得聞知。爲令其人得佛慧故。若有衆生不信受者。當於如來餘深法中。示教利喜。汝等若能如是。則爲已報諸佛之恩。

『佛慧』：爲根深利智者，直說開顯之法。『餘深法』：爲不堪者說析體次第餘法，助申圓實佛慧，卽善巧報佛之恩。

二、菩薩領受。

時諸菩薩摩訶薩。聞佛作是說已。皆大歡喜。徧滿其身。益加恭敬。曲躬低頭。合掌向佛。俱發聲音。如世尊敕。當具奉行。唯然世尊。願不有慮。諸菩薩摩訶薩衆。如是三反。俱發聲音。如世尊敕。當具奉行。唯然世尊。願不有慮。

『皆大歡喜』：意領受。『曲躬低頭』：身領受。『俱發聲音』：口領受。『如世尊敕』：領受大施主如來室。『當具奉行』：領受無慳吝如來衣。『願不有慮』：領受無所畏如來座。佛說三付，菩薩三受表法難得。

三、事畢唱散。

爾時釋迦牟尼佛。令十方來諸分身佛。各還本土。而作是言。諸佛各隨所安。多寶佛塔還可如故。

分身爲開塔故集，開塔事了，故令各隨所安仍還本土。多寶爲證經故來，今迹本兩門已訖，故須敬遣如故。

塔不重開，故分身去而不現，塔猶聽法，故閉而尚在。『如故』：表本覺之理無來去。

二、歡喜。

說是語時。十方無量分身諸佛。坐寶樹下師子座上者。及多寶佛。並上行等無邊阿僧祇菩薩大衆。舍利弗等聲聞四衆。及一切世間天人阿修羅等。聞佛所說。皆大歡喜。

『皆大歡喜』：文句云：『諸佛爲化他事遂故喜，菩薩爲自行得法故喜，說人（佛陀）清淨故喜，聞清淨法（妙經）故喜，聞法獲證故喜，現未得益故喜，三事具足，故大歡喜。』初明付囑流通竟。

釋囑累品竟，次釋藥王菩薩本事品。

藥王菩薩本事品第二十三

流通迹本兩門第二大段，共五品經文，約化他勸流通，分四科，初藥王品勗（旭）弘法之師，妙音觀音兩品勗受法弟子，陀羅尼品明咒護，妙莊嚴王品明人護。

觀藥王藥上菩薩經云：『昔名星光，從尊者曰藏聞說佛慧，以雪山上藥供養衆僧，願我未來能治衆生身心兩病，舉世歡喜號曰藥王。』大佛頂經云：『我無始劫爲世良醫，口嘗娑婆世界苦酸鹹淡甘辛等味，承事如來，了知味性，分別味因，從是開悟，如來印我毘季藥王藥上二菩薩名。』本品明月淨明德佛時，爲一切衆生喜見菩薩，捨身燒臂輕生重法，命殞道存，舉昔顯今，燒身身生，然臂臂復，故言本事品。

藥王燒身，是破俱生我執，燃臂是破俱生法執，論曰：『分別二障極喜無。』『二執俱生地地除』。即初地斷分別我法二執，二地至七地斷俱生我執，從八地至佛地斷俱生法執。『得現一切色身三昧』，即入八地爲三昧樂意生身，次妙音往來，爲覺法自性意生身，觀音普門則爲種類俱生無行作意生身。

初勗弘法之師，文爲四：初問、二答、三利益、四多寶稱善。今初。

爾時宿王華菩薩白佛言。世尊。藥王菩薩。云何遊於娑婆世界。世尊。是藥王菩薩。有若干百千萬億那由他難行苦行。善哉世尊。願少解說。諸天。龍神。夜叉。乾闥婆。阿修羅。迦樓羅。緊那羅。摩睺羅伽。人非人等。又他國土。諸來菩薩。及此聲聞衆。聞皆歡喜。

『宿王華』：明菩薩本事，取宿昔因華之意。初通問『遊化』，遊化必具十法界身，含俱智斷福慧三昧神通，所謂普現色身三昧。次別問『苦行』以逗所宜，遊化是利他，苦行是自利，然遊化亦苦行，苦行亦利他，總不出自他二利。稱『善哉世尊』：請答也。

二、答，分二：初但答苦行（遊化則指普現色身三昧，或指下二品。），二歎經。初中二：初明事本，二明本事。今初。

爾時佛告宿王華菩薩。乃往過去無量恒河沙劫。有佛號日月淨明德如來。應供。正徧知。明行足。善逝。世間解。無上士。調御丈夫。天人師。佛。世尊。其佛有八十億大菩薩摩訶薩。七十二恒河沙大聲聞衆。佛壽四萬二千劫。菩薩壽命亦等。彼國無有女人。地獄。餓鬼。畜生。阿修羅等。及以諸難。地平如掌。瑠璃所成。寶樹莊嚴。寶帳覆上。垂寶華旛。寶瓶香罏。周徧國界。七寶爲臺。一樹一臺。其樹去臺。盡一箭道。此諸寶樹。皆有菩薩聲聞而坐其下。諸寶臺上。各有百億諸天。作天伎樂。歌歎於佛。以爲供養。

『日月淨明德』：以正智觀照，破無明闇，淨治染垢之象。『八十億』、『七十二恒河沙』、『佛壽四萬二千劫』，憨山謂破七識染污無知習氣，顯八識圓明之體，本覺妙體不離四大根塵。『盡一箭道』：嘉祥云：『一箭道二里，或取射埽一百五十步等。』

二、明本事，分三：初佛說法，二修供養，三結會古今。今初。

爾時彼佛。爲一切衆生喜見菩薩。及衆菩薩。諸聲聞衆。說法華經。

『一切衆生喜見菩薩』：約過去修福慧，施財法，則衆生喜見。猶今之當機舍利弗。

二、修供養，分二：初現生供養，二次生供養。初中二：初修行得法，二作念報恩。今初。

是一切衆生喜見菩薩。樂習苦行。於日月淨明德佛法中。精進經行。一心求佛。滿萬二千歲已。得現一切色身三昧。

『精進經行』：卽不坐不臥之般舟三昧，長年坐定念佛之一行三昧，半行半坐定散一境平等持心之等持三昧。亦卽身論開遮、口論說默、意論止觀之四種三昧。『現一切色身三昧』：略稱普現三昧，如妙音觀自在現一切衆生色身之三昧。

二、作念報恩，分二：初三昧力供養，二燒身供養。今初。

得此三昧已。心大歡喜。卽作念言。我得現一切色身三昧。皆是得聞法華經力。我今當供養日月淨明德佛。及法華經。卽時入是三昧。於虛空中。雨曼陀羅華。摩訶曼陀羅華。細末堅黑栴檀。滿虛空中。如雲而下。又兩海此岸栴檀之香。此香六銖。價值娑婆世界。以供養佛。

『人是三昧』：三昧，本無出入，表示力用，故言入。『海此岸』：正法念經云：『妙高山內海此岸。』此岸卽南岸。『六銖』：二十四銖爲兩，言六銖卽一兩中四分之一。或云千二百黍，重十二銖，六銖則爲六百粒黍數。

二、燒身供養，分三：初燒身，二佛讚，三時節。今初。

作是供養已。從三昧起。而自念言。我雖以神力供養於佛。不如以身供養。卽服諸香。栴檀。薰陸。兜樓婆。畢力迦。沉水。膠香。又飲薔蔔諸華香油。滿千二百歲已。香油塗身。於日月淨明德佛前。以天寶衣。而自纏身。灌諸香油。以神通力願。而自然身。光明徧照八十億恒河沙世界。

『栴檀』：具名栴檀娜，譯曰與樂，出自南印度摩羅耶山。謂白檀能治熱病，赤檀能去風腫，皆是除疾身安之藥。『薰陸香』：梵名杜君嘔。如桃之膠，有香氣，西域記十一曰：『樹葉若棠梨』。夏天日炙，鎔滴沙中，在地有香，謂之薰陸。『兜樓婆』：卽苜蓿，楞嚴謂煎取香水，舊曰白茅香。『畢力迦』：譯苜蓿香，或云觸香，或曰丁香。『沉水』：出阿耨池邊，若燒如麻子大一丸，其香薰閻浮世界。『膠香』：松香，或是白膠香。『神通

力願』：明不以世火然身，依所得三昧起利他願，以智觀火，梵難思境，故使光明徧照多國。

二、佛讚。

其（八十億恒河沙世界）中諸佛。同時讚言。善哉善哉。善男子。是真精進。是真法供養如來。若以華香瓔珞。燒香末香塗香。天繒旛蓋。及海彼岸栴檀之香。如是等種種諸物供養。所不能及。假使國城妻子布施。亦所不及。善男子。是名第一之施。於諸施中。最尊最上。以法供養諸如來故。作是語已。而各默然。

『眞法供養』：文句云：『內運智觀，觀煩惱因果皆用空慧蕩之。又觀若身若火，能供所供，皆是實相，誰燒誰然，能供所供，皆不可得，故名眞法。』若不爾者，成無益苦行。

天臺四祖，陳隋智顛大師，於光州大蘇山，思師授以普賢道場，令修法華三昧，受持讀誦法華經，至『是真精進，是真法供養如來。』句，『默然』入定，親見靈山一會儼然未散，獲旋陀羅尼，人稱大蘇妙悟，爲東土小釋迦。

三、時節。

其身火然。千二百歲。過是已後。其身乃盡。

前服香油滿千二百歲，表用方便道淨界內十二因緣苦集，今火然身亦滿千二百歲，表用實智火，永盡界外十二因緣苦集。初現生供養竟。

二、次生供養分五：初生王家，二說本事，三往佛所，四如來付囑，五奉命任持。今初。

一切衆生喜見菩薩。作如是法供養已。命終之後。復生日月淨明德佛國中。於淨德王家。結跏趺坐。忽然化生。

二、說本事。

卽爲其父而說偈言。

大王今當知。我經行彼處。卽時得一切。現諸身三昧。
勤行大精進。捨所愛之身。供養於世尊。爲求無上慧。

說是偈已。而白父言。日月淨明德佛。今故現在。我先供養佛已。
得解一切衆生語言陀羅尼。復聞是法華經。八百千萬億那由他。
甄迦羅。頻婆羅。阿閼婆等偈。大王。我今當還供養此佛。

『一切衆生語言陀羅尼』：由得現一切色身三昧，而能隨類現身，隨機說法。『甄迦羅』：數量名，當千萬億。俱舍論十二，列五十二數，其中第十六曰『矜羯羅』，十八名『頻婆羅』，十九名『大頻跋羅』，二十名『阿菟婆』，二十一名『大阿菟婆』，連同頻婆羅、阿閼婆總三種，卽十六、十八、二十數。『頻婆羅』，或作頻跋羅，當於此方之十兆。『阿閼婆』又作阿菟婆，隨言數千兆，或曰萬載之數。

三、往佛所。

白已。卽坐七寶之臺。上升虛空。高七多羅樹。往到佛所。頭面禮足。合十指爪。以偈讚佛。

容顏甚奇妙。光明照十方。我適曾供養。今復還親覲。

爾時一切衆生喜見菩薩。說是偈已。而白佛言。世尊。世尊猶故在世。

『多羅樹』：極高者七、八十尺，體堅如鐵，葉長稠密，縱多時大雨，其葉陰處乾若屋下，但樹幹中斷，則不生芽。楞嚴六曰：『是一顛迦（極惡）消滅佛種，如人以刀斷多羅木，佛記是人永殞善根，無復知見。』『容顏甚奇妙』：讚佛報身。『光明照十方』：讚佛法身。

四、如來付囑。

爾時日月淨明德佛。告一切衆生喜見菩薩。善男子。我涅槃時到。滅盡時至。汝可安施牀座。我於今夜。當般涅槃。又敕一切衆生喜見菩薩。善男子。我以佛法。囑累於汝。及諸菩薩大弟子。並阿耨多羅三藐三菩提法。亦以三千大千七寶世界。諸寶樹寶臺。及給侍諸天。悉付於汝。我滅度後。所有舍利。亦付囑汝。當令流布。廣設供養。應起若干千塔。如是日月淨明德佛。敕一切衆生喜見菩薩已。於夜後分。入於涅槃。

『佛法』，通指一代所說。『阿耨多羅三藐三菩提法』：別指法華經。
五、奉命任持，分四：初起塔，二燒臂、三利益，四現報。今初。

爾時一切衆生喜見菩薩。見佛滅度。悲感懊惱。戀慕於佛。卽以海此岸栴檀爲積。供養佛身。而以燒之。火滅已後。收取舍利。作八萬四千寶瓶。以起八萬四千塔。高三世界。表刹莊嚴。垂諸旛蓋。懸衆寶鈴。

『栴檀爲積』：積草是焚身之具，此古佛所傳荼毘法。『高三世界』：卽高三千世界，以小千至初禪，中千至二禪，大千至三禪，高二者卽至第四禪。

二、燒臂。

爾時一切衆生喜見菩薩。復自念言。我雖作是供養。心猶未足。我今當更供養舍利。便語諸菩薩大弟子。及天龍夜叉等。一切大衆。汝等當一心念。我今供養日月淨明德佛舍利。作是語已。卽於八萬四千塔前。然百福莊嚴臂。七萬二千歲。而以供養。

前燒身爲自行，身盡人滅，故僅經千二百歲，今燒臂爲弘法，令物會三，故經七萬二千歲，如下文云：『今無數求聲聞衆……』』

三、利益。

令無數求聲聞衆。無量阿僧祇人。發阿耨多羅三藐三菩提心。皆使得住現一切色身三昧。

四、現報。

爾時諸菩薩。天。人。阿修羅等。見其無臂。憂惱悲哀。而作是言。此一切衆生喜見菩薩。是我等師。教化我者。而今燒臂。身不具足。於時一切衆生喜見菩薩。於大眾中。立此誓言。我捨兩臂。必當得佛金色之身。若實不虛。令我兩臂還復如故。作是誓已。自然還復。由斯菩薩福德智慧淳厚所致。當爾之時。三千大千世界。六種震動。天雨寶華。一切人天。得未曾有。

『金色之身』：前已得普現，即八相金色，位當妙覺極果。二修供養竟。三、結會古今。分二：初結會，二勸修。今初。

佛告宿王華菩薩。於汝意云何。一切衆生喜見菩薩。豈異人乎。今藥王菩薩是也。其所捨身布施。如是無量百千萬億那由他數。

二、勸修。

宿王華。若有發心欲得阿耨多羅三藐三菩提者。能然手指。乃至足一指。供養佛塔。勝以國城妻子。及三千大千國土。山林河池。諸珍寶物而供養者。

燒身然臂然指，大小開制，教意不同，小制結過大制令燒，律制燒身得偷蘭遮罪，然指得突吉羅罪。梵網第十六戒云：『若不燒身臂指供養諸佛，非出家菩薩。』楞嚴經卷六云：『能於如來形像之前，身然一燈，燒一指節，及於身上爇一香柱，我說是人無始宿債，一時酬畢。』中國在曹魏嘉平二年，有法時尊者，創受戒（中國人剃度始於魏文帝）三檀正授菩薩戒時，始然頂

香，卽其意也。初答苦行竟。

二、歎經，分三：初歎能持人，二歎所持法，三明持經福深。今初。

若復有人。以七寶滿三千大千世界。供養於佛。及大菩薩。辟支佛。阿羅漢。是人所得功德。不如受持此法華經。乃至一四句偈。其福最多。

七寶奉四聖，不如持一偈，法是聖師（前歎有法之人，今歎在人）

法。）能生，（發心由法爲生）能養（始終隨逐）能成（令滿極果）能榮（能應法界）故人輕法重。

二、歎所持法分二：初歎法體（通指一部），二歎法用（部內體宗用三，共有拔與等用）。今初。

宿王華。譬如一切川流江河諸水之中。海爲第一。此法華經亦復如是。於諸如來所說經中最爲深大。

『川流江河』：譬乳酪二酥四味教，『海』譬法華醍醐。『最爲深大』：說窮本地爲深，徧開一切最大。

又如土山。黑山。小鐵圍山。大鐵圍山。及十寶山。衆山之中。須彌山爲第一。此法華經亦復如是。於諸經中。最爲其上。

『土山』：卽土石諸山。『黑山』：俱舍論云，南洲從中向北，各有三重黑山。『鐵圍山』：繞小千界名小鐵圍，繞大千界名大鐵圍。『十寶山』：出華嚴二十一，菩薩十地因，譬大地有十寶山，一一皆云王，一雪山，集一切藥。二香山，集一切香。三軻黎羅山，集華。四仙聖山，集五通。五由乾陀山，集藥叉。六馬耳山，集妙果。七尼民陀山，集龍。八斫迦羅山，自在。九宿慧山，集修羅。十須彌山，集諸天。（具如止觀第五記）

文句云：『土黑鐵圍故非寶，十山雖寶，或一或二（俱舍云：前七金所成，蘇迷盧四寶，金或兼餘），神龍雜居，須彌四寶所成純天所住。譬餘教

說，能依十地四十心，或凡或賢或聖，說所依，或俗或真或中，是為卑下。此華經所說諦理，常樂我淨，如四寶所成，開示悟入者所依，是故此義，最為高上。』

又如衆星之中。月天子最為第一。此法華經亦復如是。於千萬億種諸經法中。最為照明。

星月俱於夜現譬權智，星多而小，又無虧盈，譬諸經所詮，隨情方便，各逗一機不得自在。月獨而大，又能盈虧，譬此經所詮，隨智方便，即實而權，照一切法最為明了。『月天子』：文句二下，名曰寶吉祥，勢至菩薩之化現。

又如日天子能除諸闇。此經亦復如是。能破一切不善之闇。

日出名晝譬實智，諸經不開三權顯一實，故不能破執三之闇，此經明權實相即無闇不破。『日天子』：文句二曰，異名寶光或寶意。為觀音菩薩之變化身。

又如諸小王中。轉輪聖王最為第一。此經亦復如是。於衆經中。最為其尊。

旭祖會義說：『三藏教如粟散王，三乘各別，通教如鐵輪王，三乘同位，別教如銅輪王，次第詮於真中二理，諸經隔偏之圓如銀輪王，頓詮三諦而不收彼定性二乘，此經開顯之圓，（以實相入真，決了聲聞法是諸經之王，實相入俗，一切資生事業不相違背，實相入中，諸法無非佛法。）如金輪王，北洲冰執，無我所者，亦歸統御。』

又如帝釋。於三十三天中王。此經亦復如是。諸經中王。

切利天，四方各有八天，帝釋居善法堂天，譬四教各有自行化他四門。

又如大梵天王。一切衆生之父。此經亦復如是。一切賢聖學無學。及發菩薩心者之父。

帝釋爲欲界主，大梵爲三界主，火燒初禪，水淹二禪，風颳三禪，歷成住壞空四劫，則由二禪光天（少光無量光光音），衆生有命盡者，以福德力化生初禪，卽大梵天王，繼來者爲梵輔梵衆，故大梵王，自指我是一切衆生之父，此乃妄計，非是實義。此經『爲一切賢聖學無學及發菩薩心者之父』：四教菩薩皆依實相而得成就，昔謂非子，開顯方知。

又如一切凡夫人中，須陀洹。斯陀含。阿那含。阿羅漢。辟支佛爲第一。此經亦復如是。一切如來所說。若菩薩所說。若聲聞所說。諸經法中。最爲第一。有能受持是經典者。亦復如是。於一切衆生中亦爲第一。一切聲聞辟支佛中。菩薩爲第一。此經亦復如是。於一切諸經法中，最爲第一。如佛爲諸法王。此經亦復如是。諸經中王。

辟支佛侵習氣故居聲聞上，明因位第一。餘經皆涉方便，所謂從聞思修方乃得悟，此經所詮實相，不雜方便，自然流入薩婆若海，故爲『諸經中第一』。能受持是經典者，係無功用道（別地圓住，或云七八二地，爲有功用無功用之分界。），故『於一切衆生中亦爲第一』。三乘皆屬因位，唯『菩薩爲第一』。『佛爲諸法王』，此經『是諸經中王』：諸經明佛寂場近成，此經明佛本地遠果，妙經統攝一代所說，卽是果第一。

前舉大海、須彌山、月、日、轉輪王、帝釋、大梵王、辟支、菩薩、佛、十喻顯尊妙。

二、歎法用。

宿王華。此經能救一切衆生者（總標與拔）。此經能令一切衆生。離諸苦惱（別明拔苦）此經能大饒益一切衆生。充滿其願（別明與樂）。如清涼池。能滿一切諸渴乏者。如寒者得火。如裸者得衣。如商人得主。如子得母。如渡得船。如病得醫。如闇得燈。如貧得寶。如民得王。如賈客得海。如炬除闇。（上十二譬，喻

圓與拔）。此法華經亦復如是。能令衆生。離一切苦。一切病痛。能解一切生死之縛（總結與樂拔苦）。

二、歎所持法竟。

三、明持經福深，今二：初明持全經福，二明持此品福。今初。

若人得聞此法華經。若自書。若使人書。所得功德。以佛智慧籌量多少。不得其邊。若書是經卷。華香瓔珞。燒香末香塗香。旛蓋衣服。種種之燈。蘇燈油燈。諸香油燈。蒼蔔油燈。須曼那油燈。波羅羅油燈。婆利師迦油燈，那婆摩利油燈供養。所得功德。亦復無量。

『婆羅羅』：翻重生華。『婆利師迦』：翻雨時華，或云夏生華。『須曼那』：玄奘曰善稱意花，其色黃白，四垂似蓋。『那婆。摩利』：那婆雜華，摩利鬘華。『蒼蔔』：云金色華，或云黃華。

二、明持此品福，分二：初格量二屬累。今初。

宿王華。若有人聞是藥王菩薩本事品者。亦得無量無邊功德。若有女人。聞是藥王菩薩本事品。能受持者。盡是女身。後不復受。若如來滅後。後五百歲中。若有女人。聞是經典。如說修行。於此命終。卽往安樂世界。阿彌陀佛。大菩薩衆。圍繞住處。生蓮華中寶座之上。不復爲貪欲所惱。亦復不爲瞋恚愚癡所惱。亦復不爲憍慢嫉妬諸垢所惱。得菩薩神通。無生法忍。得是忍已。眼根清淨。以是清淨眼根。見七百萬二千億那由他恒河沙等諸佛如來。是時諸佛。遙共讚言。善哉善哉。善男子。汝能於釋迦牟尼佛法中。受持讀誦。思惟是經。爲他人說。所得福德。無量無邊。火不能焚。水不能漂。汝之功德。千佛共說。不能令盡。汝今已

能破諸魔賊。壞生死軍。諸餘怨敵。皆悉摧滅。善男子。百千諸佛。以神通力。共守護汝。於一切世間天人之中。無如汝者。唯除如來。其諸聲聞辟支佛。乃至菩薩。智慧禪定。無有與汝等者。宿王華。此菩薩成就如是功德智慧之力。若有人聞是藥王菩薩本事品。能隨喜讚善者。是人現世口中。常出青蓮華香。身毛孔中。常出牛頭栴檀之香。所得功德。如上所說。

『後五百歲』：依毘尼母論直列五百，第一百年解脫堅固，第二百年禪定堅固，第三百年持戒堅固，第四百年多聞堅固，第五百年布施堅固，若單論五百猶在正法。大集經有五五百，前四同前，第五五百，則值末法之初，鬪爭堅固。『如說修行於此命終。卽往安樂世界』：如說修行卽依經立行，爲淨土因。圓伏五住卽生同居淨土，若淨六根則生方便淨土，若破無明卽生實報淨土，亦復分證寂光。『那由他』：名義云，當此方之億、兆、京、秭、垓、攘、溝、潤、正、載數中之構。『青蓮華』：梵語優鉢羅，其葉修廣，青白分明，有大人目，楞嚴曰：『如來青蓮華眼』又羅什滅後，塔前湧青蓮華一枚，啓塔視之，華從舌根生，是譯法華經之驗。『諸魔』：卽五陰魔。『生死軍』：卽死魔。『餘怨敵』。卽煩惱魔加天子魔爲四魔。

二、囑累。

是故宿王華。以此藥王菩薩本事品。囑累於汝。我滅度後。後五百歲中。廣宣流布於閻浮提。無令斷絕。惡魔魔民。諸天龍夜叉。鳩槃荼等。得其便也。宿王華。汝當以神通之力。守護是經。所以者何。此經則爲閻浮提人病之良藥。若人有病。得聞是經。病卽消滅。不老不死。宿王華。汝若見有受持是經者。應以青蓮華。盛滿末香。供散其上。散已。作是念言。此人不久。必當取草坐於道場。破諸魔軍。當吹法螺。擊大法鼓。度脫一切衆生老病死海。是故求佛道者。見有受持是經典人。應當如是。生恭敬心。

『取草坐於道揚』：藏教果頭佛，坐木菩提樹下，以生草爲座，成劣應身。通教坐七寶菩提樹下，以天衣爲座，現帶劣勝應身，別教坐蓮華藏世界，七寶菩提樹下，大寶華王座，現圓滿報身。圓教究竟登涅槃山頂，以虛空爲座，成清淨法身。『不老不死』：須依觀解，不老是樂，不死是常。品中初問二答竟。

三、利益。

說是藥王菩薩本事品時。八萬四千菩薩。得解一切衆生語言陀羅尼。

四、多寶稱善。

多寶如來。於寶塔中。讚宿王華菩薩言。善哉善哉。宿王華。汝成就不可思議功德。乃能問釋迦牟尼佛如此之事。利益無量一切衆生。

初藥王品勗弘法之師竟，約化他勸流通中第二，勗受法弟子有兩品。一妙音品、二普門品。下釋妙音品。

妙音菩薩本事品第二十四

釋迦如來放肉髻、白毫二光，照東方八萬億世界，過此有國名淨光莊嚴，佛名淨華宿王智如來，妙音菩薩自彼世界，與八萬四千菩薩，共來靈鷲山，時雨七寶蓮華，百千音樂自鳴，會中華德菩薩問佛，此妙音菩薩植何善根，有此神力，佛言過去有雲雷音王佛，此時妙音菩薩以十萬種伎樂及八萬四千寶鉢供養之，因而今生淨華宿王智佛國，得現一切色身三昧，於一切世界現三十八種身，說法度生，故曰：『妙音菩薩本事品』。

旭祖曰：『藥王品但明本行，不明遊化，普門品但明遊行，不明本行，今品則俱明之。又藥王、普門兩品由問故說，今由光召故說，彼此互彰互顯，圓行非謂有優劣。』

品文分六，初放光東召，二、奉命西來，三、十方弘經，四、二土得益，五、還歸本國，六、闡品進道。今初。

爾時釋迦牟尼佛。放大人相肉髻光明。及放眉間白毫相光。徧照東方百八萬億那由他恒河沙等諸佛世界。過是數已。有世界名淨光莊嚴。其國有佛。號淨華宿王智如來。應供。正徧知。明行足。善逝。世間解。無上士。調御丈夫。天人師。佛。世尊。爲無量無邊菩薩大衆。恭敬圍繞。而爲說法。釋迦牟尼佛白毫光明。徧照其國。

『大人相』：八十種好中以百福功德成一相，三十二相從下向上展轉以肉髻相爲勝。『肉髻』：表圓極妙果。『白毫』：表中道妙因。

先放肉髻相光，次放白毫相光，意顯妙音果後行因，與文殊、不輕、藥王、觀音、普賢等同。

佛陀有緣弟子布滿十方，召東（妙音）說西（觀音）者，表東方是始，西方是終，聖不煩文，舉一蔽諸，但言東西，南北四維準知，況印度法華積至八里，安知無十方咸集文耶。『淨光莊嚴』：五住盡寂光顯。『淨華宿王

智如來』：淨二障，行無染，智無著。

二、奉命西來，分二：初發來之緣，二正明發來。初中五：初經家敍德，二、被照辭佛，三、彼佛寄誠，四、菩薩受旨，五、先現來相。今初。

爾時一切淨光莊嚴國中。有一菩薩。名曰妙音。久已植衆德本。供養親近無量百千萬億諸佛。而悉成就甚深智慧。得妙幢相三昧。法華三昧，淨德三昧。宿王戲三昧。無緣三昧。智印三昧。解一切衆生語言三昧。集一切功德三昧。清淨三昧。神通遊戲三昧。慧炬三昧。莊嚴王三昧。淨光明三昧。淨藏三昧。不共三昧。日旋三昧。得如是等百千萬億恒河沙等諸大三昧。

『妙音菩薩』：證實相，起智用，位當九地，得現一切色身三昧（如幻三昧），正是覺法自性性意生身。『甚深智慧』：即智慧莊嚴。文列十六三昧，即福德莊嚴。『妙幢相三昧』：圓道妙定實相妙體高顯無上。『法華三昧』：因果不二，權實不二，本迹不二。『淨德三昧』：離三惑垢，證本淨性。『宿王戲三昧』：權智照機盈虧巧現。『無緣三昧』：平等大慈，不緣假名，不緣實法。『智印三昧』：一心三智即一切法。『解一切衆生語言三昧』：十界語言，並是因緣生法，無非空假中，一切即一，一即一切。『集一切功德三昧』：住一三昧，一切三昧功德悉入其中。『清淨三昧』：六根清淨，互用自在。『神通遊戲三昧』：自在化物，遊諸世間，幻事普攝。『慧炬三昧』：平等大慧，普照昏衢。『莊嚴王三昧』：性具萬德緣了融通。『淨光明三昧』：三智圓淨，照法無遺。『淨藏三昧』：一念淨心，含攝萬德。『不共三昧』：七方便人，所不能入。『日旋三昧』：實智照理而無所住。此十六種三昧與法華三昧名異體同，爲法華三昧之相。

二、被照辭佛。

釋迦牟尼佛光照其身。即白淨華宿王智佛言。世尊。我當往詣娑婆世界。禮拜親近供養釋迦牟尼佛。及見文殊師利法王子菩薩。

藥王菩薩。勇施菩薩。宿王華菩薩。上行意菩薩。莊嚴王菩薩。藥上菩薩。

三、彼佛寄誠。

爾時淨華宿王智佛。告妙音菩薩。汝莫輕彼國。生下劣想。善男子。彼娑婆世界。高下不平。土石諸山。穢惡充滿。佛身卑小。諸菩薩衆。其形亦小。而汝身四萬兩千由旬。我身六百八十萬由旬。汝身第一端正。百千萬福。光明殊妙。是故汝往。莫輕彼國。若佛菩薩及國土。生下劣想。

文句云：『佛身與理相稱，不得見卑小而忌其尊嚴，此約如來座爲誠。師旣施權，弟子亦隱其實，此約如來衣爲誠。依報國土皆正報所感，勿覩依報而忽正報，此約如來室爲誠。』應身化儀，示迹說法之處，不出佛身化境國土，故座衣室三，誠衆爲弘經之軌。

四、菩薩受旨。

妙音菩薩。白其佛言。世尊。我今詣娑婆世界。皆是如來之力。如來神通遊戲。如來功德智慧莊嚴。

『如來之力』：總推功於佛力，不敢生下劣想。『神通遊戲』：脫珍御弊，長者之身不改，是忍辱衣。『功德莊嚴』：是慈悲室。『智慧莊嚴』：是諸法空座。

五、先現來相，分六：初遣蓮華，二、文殊問，三、釋迦答，四、文殊請見，五、釋迦推功多寶，六、多寶命來。今初。

於是妙音菩薩。不起於座。身不動搖。而入三昧。以三昧力。於耆闍崛山。去法座不遠。化作八萬四千衆寶蓮華。閻浮檀金爲莖。白銀爲葉。金剛爲鬚。甄淑迦寶以爲其臺。

『閻浮檀金』：西域有河，近閻浮樹，其金出於河中。『甄叔迦』：寶石名，譯曰赤寶。

二、文殊問。

爾時文殊師利法王子。見是蓮華。而白佛言。世尊。是何因緣。先現此瑞。有若干千萬蓮華。閻浮檀金爲莖。白銀爲葉。金剛爲鬚。甄叔迦寶以爲其臺。

妙音求見文殊，足見文殊位高（放鉢經說，文殊爲諸佛之師），文殊見華不識，示爲大眾請問。

三、釋迦答。

爾時釋迦牟尼佛。告文殊師利。是妙音菩薩摩訶薩。欲從淨華宿王智佛國。與八萬四千菩薩圍繞。而來至此娑婆世界。供養親近禮拜於我。亦欲供養聽法華經。

四、文殊請見。

文殊師利白佛言。世尊。是菩薩種何善本。修何功德。而能有是大神通力。行何三昧。願爲我等說是三昧名字。我等亦欲勤修行之。行此三昧。乃能見是菩薩色相大小。威儀進止。惟願世尊以神通力。彼菩薩來。令我得見。

五、釋迦推功多寶。

爾時釋迦牟尼佛。告文殊師利。此久滅度多寶如來。當爲汝等而現其相。

文殊雖問妙音修何功德，行何三昧，意在請見，下文因華德重問，乃答功德三昧，推功多寶者，應是多寶昔日弟子。

六、多寶命來。

時多寶佛告彼菩薩。善男子。來。文殊師利法王子。欲見汝身。

初發來之緣竟。

二、正明發來，分七：初與眷屬經歷，二、敍相登台，三、問訊傳旨，四、請見多寶，五、釋迦爲通，六、塔中稱善，七、問答往因。今初。

於時妙音菩薩。於彼國沒。與八萬四千菩薩。俱共發來。所經諸國。六種震動。皆悉雨於七寶蓮華。百千天樂。不鼓自鳴。

妙音昔奉雲雷音王佛八萬四千寶鉢，今得『八萬四千菩薩』相隨，昔奉十萬種伎樂供養雲雷音王佛，今得『百千天樂不鼓自鳴』。

二、敍相登台。

是菩薩目如廣大青蓮華葉。正使和合百千萬月。其面貌端正。復過於此。身真金色。無量百千功德莊嚴。威德熾盛。光明照耀。諸相具足。如那羅延堅固之身。入七寶臺。上升虛空。去地七多羅樹。諸菩薩衆恭敬圍繞。而來詣此娑婆世界耆闍崛山。

言爲心聲，眼爲心門，一行禪師曰：『欲知天上意，須向雲中索，要明心裏事，須辨眼中神。』其相唐裴度（晉國公）云：『七尺之身，不如一尺之面，一尺之面，不如三寸之鼻，三寸之鼻不如一點之心。』『和合百千萬月』：狀其目之精光。

三、問訊傳旨。

到已。下七寶臺。以價直百千瓔珞。持至釋迦牟尼佛所。頭面禮足。奉上瓔珞。而白佛言。世尊。淨華宿王智佛。問訊世尊。少病少惱。起居輕利。安樂行否。四大調和否。世事可忍否。衆生易度否。無多貪欲。瞋恚。愚癡。嫉妬慳慢否。無不孝父母。不敬沙門。邪見。不善心。不攝五情否。世尊。衆生能降伏諸魔怨。

否。久滅度多寶如來在七寶塔中。來聽法否。又問訊多寶如來。安隱少惱。堪忍久住否。

『貪欲瞋恚愚癡慢』：鈍使。『嫉妬慳』：隨煩惱。『邪見』：利使。『五情』：即五識。『諸魔』：即煩惱與陰魔。

四、請見多寶。

世尊。我今欲見多寶佛身。惟願世尊。示我令見。

五、釋迦為通。

爾時釋迦牟尼佛。語多寶佛。是妙音菩薩。欲得相見。

六、塔中稱善。

時多寶佛。告妙音言。善哉善哉。汝能為供養釋迦牟尼佛。及聽法華經。並見文殊師利等。故來至此。

稱善，即相見，不須開塔。

七、問答往因。分二：初問，二答。今初。

爾時華德菩薩白佛言。世尊。是妙音菩薩。種何善根。修何功德。有是神力。

『華德菩薩』：以萬行因華莊嚴三德。妙音是淨德夫人後身，華德乃妙莊嚴王後身，本是宿世大善知識，故今為問，顯其功德。

二、答。

佛告華德菩薩。過去有佛。名雲雷音王。多陀阿伽度。阿羅訶。三藐三佛陀。國名現一切世間。劫名喜見。妙音菩薩於萬二千歲。以十萬種伎樂。供養雲雷音王佛。並奉上八萬四千七寶鉢。以是因緣果報。今生淨華宿王智佛國。有是神力。華德。於汝意云何。

爾時雲雷音王佛所。妙音菩薩。伎樂供養奉上寶器者。豈異人乎。今此妙音菩薩摩訶薩是。華德。是妙音菩薩。已曾供養親近無量諸佛。久植德本。又值恒河沙等。百千萬億那由他佛。

『雲雷音王』：雲表蔭物，雷表動物。『多陀阿伽度』：譯如來。『阿羅訶』：譯應供。『三藐三佛陀』：譯正徧知。『國名現一切世間』：謂三世間皆從此國流出。『劫名喜見』：謂衆生皆愛樂。二、奉命西來竟。

三、十方弘經，分二：初正明現身說法，二問答所住三昧。今初。

華德。汝但見妙音菩薩。其身在此。而是菩薩。現種種身。處處爲諸衆生。說是經典。或現梵王身。或現帝釋身。或現自在天身。或現大自在天身。或現天大將軍身。或現毗沙門天王身。或現轉輪聖王身。或現諸小王身。或現長者身。或現居士身。或現宰官身。或現婆羅門身。或現比丘比丘尼。優婆塞優婆夷身。或現長者居士婦女身。或現宰官婦女身。或現童男童女身。或現天龍。夜叉。乾闥婆。阿修羅。迦樓羅。緊那羅。摩睺羅伽。人非人等身。而說是經。諸有地獄。餓鬼。畜生。及衆難處。皆能救濟。乃至於王後宮。變爲女身。而說是經。華德。是妙音菩薩。能救護娑婆世界諸衆生者。是妙音菩薩。如是種種變化現身。在此娑婆國土。爲諸衆生。說是經典。於神通變化智慧。無所損減。是菩薩以若干智慧。明照娑婆世界。令一切衆生。各得所知。於十方恒河沙世界中。亦復如是。若應以聲聞形得度者。現聲聞形而爲說法。應以辟支佛形得度者。現辟支佛形而爲說法。應以菩薩形得度者。現菩薩形而爲說法。應以佛形得度者。即現佛形而爲說法。如是種種。隨所應度。而爲現形。乃至應以

滅度而得度者。示現滅度。華德。妙音菩薩摩訶薩。成就大神通智慧之力。其事如是。

示三十四凡身，四聖人身，結成十法界六道。旭祖曰：『此菩薩以難思力隨類通經，物覩其迹，不測其本，但甘其味，勿擇其形。』『天大將軍』：散脂修摩，北方毘沙門天王八將之一，所轄二十八部，巡遊世間賞善罰惡者。有稱韋紐，南天王八將之一，有三州護法宿願，非韋馱天將。『毘沙門天王』，又云多聞天王，為北方之護佛法者，腳下踩二夜叉鬼。

二、問答所住三昧，分二：初問，二答。今初。

爾時華德菩薩。白佛言。世尊。是妙音菩薩。深種善根。世尊。是菩薩住何三昧。而能如是在所變現。度脫衆生。

二、答。

佛告華德菩薩。善男子。其三昧名現一切色身。妙音菩薩住是三昧中。能如是饒益無量衆生。

三、十方弘經竟。

四、二十得益。

說是妙音菩薩品時。與妙音菩薩俱來者。八萬四千人。皆得現一切色身三昧。此娑婆世界無量菩薩。亦得是三昧。及陀羅尼。

『三昧及陀羅尼』：體一而用異，寂用為三昧，持用名陀羅尼。又色身變現名三昧，音聲辨說名陀羅尼。又舌根清淨名陀羅尼，餘根清淨名三昧，故此語言與色身但是身口之異，豈可現身不能說法。又三昧從定，陀羅尼從慧，即不思議之定慧。今約二土言之，俱來菩薩，是淨土人，福勝於智，故但得三昧，此界菩薩，是穢土人，忍智力強，故兼得總持。

五、還歸本國。

爾時妙音菩薩摩訶薩。供養釋迦牟尼佛。及多寶佛塔已。還歸本土。所經諸國。六種震動。兩寶蓮華。作百千萬億種種伎樂。既到本國與八萬四千菩薩圍繞。至淨華宿王智佛所。白佛言。世尊。我到娑婆世界。饒益衆生。見釋迦牟尼佛。及見多寶佛塔。禮拜供養。又見文殊師利法王子菩薩。及見藥王菩薩。得勤精進力菩薩。勇施菩薩等。亦令是八萬四千菩薩。得現一切色身三昧。

六、闍品進道。

說是妙音菩薩來往品時。四萬二千天子。得無生法忍。華德菩薩。得法華三昧。

『得無生法忍』：開佛知見，得妙法之體。『得法華三昧』：增道損生，得實相之用，天子先已根淨，今悟圓因，華德是當機，得益較深，故知正宗流通皆有種熟脫益。

釋妙音品竟，次釋普門品。

觀世音菩薩普門品第二十五

『觀』：是能觀之智，卽一心三智。『世音』：是所觀之境，卽十法界機。『菩薩』：如往釋。『普』：徧也。『門』：能通。

釋此品題，有通有別，通有十雙，別有五隻。

十雙者：一、人法（觀世音是人，普門是法。）二、慈悲（觀世音者大悲拔苦，普門者大慈與樂。）三、福慧（觀世音爲智慧莊嚴，智能斷惑，明時無暗，普門者，福德莊嚴，福能轉壽，如珠兩寶。）四、真應（觀境一如，契於法性實相，卽法性身，從真起應，普門示現，卽應化身。）五、藥珠（觀世音譬藥樹王，徧體愈病，普門譬如意珠，隨意所取。）六、冥顯（冥感三毒七難皆離，二求兩願皆滿，顯應目覩三十三聖尊容。）七、權實（觀音隨自意是實，普門隨他意爲權）八、本迹（觀世音不動本際，普門迹任方圓。）九、緣了（觀世音爲了因，普門是緣因。）十、智斷（觀世音是智德，普門是斷德。）。

五隻者——『觀』：析色入空觀，卽色卽空觀，從析觀乃至圓觀，卽析觀是實相，乃至次第觀亦實相，今簡析體次第唯論一心，所謂觀若不圓門不稱普。二『世』：有爲三界世，無爲二涅槃世，生死涅槃二邊世，實相境之不思議世。三『音』：人天是諸惡莫作衆善奉行之機，二乘是厭畏生死，欣尚涅槃之機，菩薩是先人後己，慈悲仁讓之機，佛是等觀無礙人，揀卻諸音之機，唯取佛音之機而設應。四『普』：緣實相，任運修，道前方便，道後入，五住盡，不起滅定現諸威儀，不爲定縛，以一妙音，稱十界機，俱令解脫曰普。五『門』：從假入空，從空出假，各有壅通之相，中道非空假，雙照空假正通實相名門。

此品猶是普現三昧化他流通，所謂聖種類身一時俱現，乃得種類俱生無行作意生身之象，因觀音大士與此方有緣，故智者大師別說玄義及義疏各二卷，玄義亦作五重；謂人法爲名，靈智合法身爲體，感應爲宗，慈悲利物爲用，流通醍醐味爲教相。

普門品 文爲二：初問答，二、聞品功德。初中二：初長文，二、偈頌。長文有兩番

問答，初番爲二：初問，二答。今初。

爾時無盡意菩薩。卽從座起。偏袒右肩。合掌向佛。而作是言。
世尊。觀世音菩薩。以何因緣。名觀世音。

『爾時』：說東方妙音菩薩竟，再說西方觀世音之時。兩品皆有初聞之時，卽世界，皆有隨應而說，卽爲人，皆有答問得三昧由，卽除疑，皆有聞品得益不同，卽得道。『無盡』：大品明空則無盡，大集約假明八十無盡門，淨名約雙非之中，明無盡，此用三經三觀釋無盡。『意』：無盡屬境，意是觀，卽一心三智，觀一境三諦，境隨智空，智觀多境之俗，意卽法界中道，故言能觀心性名上定，此約三智三諦釋意。『偏袒右肩』：此方以袒爲慢，彼邦以袒爲敬，且右表執奉爲便。『而作是言』：大經云：具二莊嚴（定慧）能問能答。

二、答，分三：初總答，二、別答，三、勸持名答（大佛頂經所明十四無畏）。今初。

佛告無盡意菩薩。善男子。若有無量百千萬億衆生。受諸苦惱。
聞是觀世音菩薩。一心稱名。觀世音菩薩。卽時觀其音聲。皆得
解脫。

文意有四：一人數（『無量百千萬億衆生』），二遭苦（『受諸苦惱』），聞名稱號（『聞是觀世音菩薩。一心稱名。』），四、得解脫（『皆得解脫』）。『苦』：有多人受一苦，一人受多苦。『聞』：分四教聞慧，聞、聞聞、不聞聞、聞不聞。『一心稱名』：有事一心，謂念念相續不起雜想，理一心，謂了知此心，非自他共，亦非無因，體是法界，卽四教思修二慧。

二別答，分三：初約口業機明應（七難），二約意業機明應（三毒），三約身業機明應（二求）。初中二：初明七難，二結歎。初又七：初火難、二水難、三羅剎難、四刀杖難、五鬼難、六枷鎖難、七怨賊難。今初。

若有持是觀世音菩薩名者。設入大火。火不能燒。由是菩薩威神力故。

果報火，下從地獄，上至初禪。惡業火，下從地獄，上至非想。煩惱火，下從地獄，上至等覺，皆論機應。

二、水難。

若爲大水所漂。稱其名號。卽得淺處。

果報水，下從地獄，上至二禪。惡業水，通三界。煩惱水，通九界，並論機應。

三、羅剎難。

若有百千萬億衆生。爲求金銀瑠璃。碑礫碼碯。珊瑚琥珀。眞珠等寶。入於大海。假使黑風吹其船舫。飄墮羅剎鬼國。其中若有乃至一人。稱觀世音菩薩名者。是諸人等。皆得解脫羅剎之難。以是因緣。名觀世音。

此羅剎難亦是風難。果報羅剎在欲界，惡業羅剎徧三界，煩惱羅剎通九界，各論機應。

四、刀杖難。

若復有人。臨當被害。稱觀世音菩薩名者。彼所執刀杖。尋段段壞。而得解脫。

刀杖難又曰王難。果報刀杖在地居，惡業刀杖徧三界，煩惱刀杖通九界。五、鬼難。

若三千大千國土。滿中夜叉羅剎欲來惱人。聞其稱觀世音菩薩名者，是諸惡鬼。尚不能以惡眼視之。況復加害。

鬼難例前羅刹可解。

六、枷鎖難。

設復有人。若有罪若無罪。杻械枷鎖。檢繫其身。稱觀世音菩薩名者。皆悉斷壞。即得解脫。

在手曰『杻』。在足曰『械』。在頭曰『枷』。連身曰『鎖』。果報枷鎖在欲界，惡業枷鎖遍三界，煩惱枷鎖通九界。

七、怨賊。

若三千大千國土。滿中怨賊。有一商主將諸商人。齎持重寶。經過險路。其中一人作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏施於衆生。汝等若稱名者。於此怨賊。當得解脫。衆商人聞俱發聲言。南無觀世音菩薩。稱其名故。即得解脫。

奪命名『怨』。劫財名『賊』。果報怨賊在欲界，惡業怨賊遍三界，煩惱怨賊通九界。

七難即表衆生身中之七大，火即火大，水即水大，風即風大，刀杖枷鎖即地大，大千界表空大，羅刹怨賊表識大，衆生迷此六大之性，枉受果報惡業煩惱，菩薩解此四大皆如來藏，所謂性火真空，性空眞火，性水眞空，性空眞水，與水火渾成一體，一一即空假中，自既解脫，不受燒溺，故能令他解脫。初明七難竟。

二、結歎。

無盡意。觀世音菩薩摩訶薩威神之力。巍巍如是。

『巍巍』：高顯藐。功超九界故高，名彰三土故顯。初約口業機明應（稱名故）竟。

二、約意業機應（常念故）分二：初明三毒，二、結歎。今初。

若有衆生多於淫欲。常念恭敬觀世音菩薩。便得離欲。若多瞋恚。常念恭敬觀世音菩薩。便得離瞋。若多愚癡。常念恭敬觀世音菩薩。便得離癡。

事貪瞋在欲界，癡通三界。理三毒通三乘，大悲菩薩觀此貪瞋癡等煩惱卽空故離凡夫三毒，卽假故離二乘三毒，卽中故離菩薩三毒，究竟歸於無差別。

二、結歎。

無盡意。觀世音菩薩。有如是等大威神力。多所饒益。是故衆生。常應心念。

二約意機明應竟。

三、約身業機明應。分二：初明二求，二、結歎。今初。

若有女人。設欲求男。禮拜供養觀世音菩薩。便生福德智慧之男。設欲求女。便生端正有相之女。宿植德本。衆人愛敬。

求男求女，爲夫婦同願，唯女人較誠求。男女表定慧，欲界有慧無定，是狂男；無色界有定無慧是癡女，四禪定慧均平，如福德男端正女。藏通二教，慧不能破無明，定不能育嗣中道，別地圓住眞明慧發無緣慈成，定慧具足，男女相滿。

二、結歎。

無盡意。觀世音菩薩。有如是力。若有衆生。恭敬禮拜觀世音菩薩。福不唐捐。

『唐捐』：卽虛棄，有的禮拜而不得男女者，係由機淺，或由命數，所謂雖曰人事，豈非天命，因兒女無債（還債、討債）不來，夫妻無緣（善、惡緣）不聚，但禮拜之福終必不失。二別答竟。

三、勸持名答，分三：初勸持，二、格量，三、結歎。今初。

是故衆生。皆應受持觀世音菩薩名號。

『觀世音』名號，具足三千性相，百界千如，三諦妙理圓收頓漸偏圓權實妙智，受之一心，持之於恒，則功德自不可思議。

二、格量。

無盡意。若有人受持六十二億恒河沙菩薩名字。復盡形供養。飲食。衣服。臥具。醫藥。於汝意云何。是善男子善女人。功德多不。無盡意言。甚多。世尊。佛言。若復有人。受持觀世音菩薩名號。乃至一時禮拜供養。是二人福。正等無異。於百千萬億劫。不可窮盡。

眞如實際，一多無性，本自平等，法身一體一，故唯觀音。應身用多，故說六十二億。占察經云：『能聞我名，卽聞十方佛名。』且利根視五味皆成醍醐，鈍者則乳酪迥異。

三、結歎。

無盡意。受持觀世音菩薩名號。得如是無量無邊福德之利。

以上明衆生顯機爲境，法身靈智冥應，初番問答竟。

次番亦二：初問，二答。今初。

無盡意菩薩白佛言。世尊。觀世音菩薩。云何遊此娑婆世界。云何而爲衆生說法。方便之力。其事云何。

『云何遊』：是問身。『云何說』：是問口。『方便云何』：是問意，卽問聖人三密，隨緣適應，三輪不思議化。

二、答，分三：初別答，二、總答，三、勸供養。今初。

佛告無盡意菩薩。善男子。若有國土衆生。應以佛身得度者。觀世音菩薩卽現佛身而爲說法。應以辟支佛身得度者。卽現辟支佛

身而爲說法。應以聲聞身得度者。卽現聲聞身而爲說法。應以梵王身得度者。卽現梵王身而爲說法。應以帝釋身得度者。卽現帝釋身而爲說法。應以自在天身得度者。卽現自在天身而爲說法。應以天大將軍身得度者。卽現天大將軍身而爲說法。應以毗沙門身得度者。卽現毗沙門身而爲說法。應以小王身得度者。卽現小王身而爲說法。應以長者身得度者。卽現長者身而爲說法。應以居士身得度者。卽現居士身而爲說法。應以宰官身得度者。卽現宰官身而爲說法。應以婆羅門身得度者。卽現婆羅門身而爲說法。應以比丘尼優婆塞優婆夷身得度者。卽現比丘尼優婆塞優婆夷身而爲說法。應以長者居士宰官婆羅門婦女身得度者。卽現婦女身而爲說法。應以童男童女身得度者。卽現童男童女身而爲說法。應以天龍。夜叉。乾闥婆。阿修羅。迦樓羅。緊那羅。摩睺羅伽。人非人等身得度者。卽皆現之而爲說法。應以執金剛神得度者。卽現執金剛神而爲說法。

『應以』：答其問方便力。『現身』：答其問遊。『說法』：答其問口。文列三十三身，十九說法，文有開合，義無增減。『若有國土衆生』：含實報方便同居三土，十法界機。觀音爲過去正法明如來，以菩薩身助釋迦弘化，曾現面然。

二、總答。

無盡意。是觀世音菩薩成就如是功德。以種種形遊諸國土。度脫衆生。

『成就如是功德』：結前十九說法。『以種種形』：總顯三十三身。

三、勸供養，分二：初勸，二受旨。今初。

是故汝等。應當一心供養觀世音菩薩。是觀世音菩薩摩訶薩。於怖畏急難之中。能施無畏。是故此娑婆世界。皆號之爲施無畏者。

『施無畏』：從德受名。

二、受旨，分六：初奉命、二、不受、三、重奉、四、佛勸、五、受已轉奉、六、歎結。今初。

無盡意菩薩。白佛言。世尊。我今當供養觀世音菩薩。卽解頸衆寶珠瓔珞。價值百千兩金而以與之。作是言。仁者受此法施珍寶瓔珞。

『頸』：表中道。『解』：表行捨。『百千』是十萬，表十地各有萬德。

『瓔珞』：大集經云：『戒定慧陀羅尼以爲瓔珞，莊嚴法身。』『法施』：淨名曰於食等者於法亦等，亦卽於法平等於財亦等，所謂財法二施等無差別。

二、不受。

時觀世音菩薩不肯受之。

無盡意奉命供養，觀音未得釋迦同意故不受，表法則不受三昧。

三、重奉。

無盡意復白觀世音菩薩言。仁者愍我等故。受此瓔珞。

無盡意爲四衆施，請觀音愍而受之。

四、佛勸。

爾時佛告觀世音菩薩。當愍此無盡意菩薩。及四衆。天龍。夜叉。乾闥婆。阿修羅。迦樓羅。緊那羅。摩睺羅伽。人非人等故。受是瓔珞。

此顯菩薩爲物故施，亦應爲物故受。

五、受已轉奉。

卽時觀世音菩薩愍諸四衆。及於天龍人非人等。受其瓔珞。分作二分。一分奉釋迦牟尼佛。一分奉多寶佛塔。

法施舉體作事理二因，奉法報二佛，表趣二果。

六、歎結。

無盡意。觀世音菩薩有如是自在神力。遊於娑婆世界。

初長文竟。

二、偈頌（羅什未譯，續高僧傳云，偈是闍那掘多所譯。）

大科分三：初雙頌兩問，二、雙頌兩答，三、雙頌兩勸。今初。

爾時無盡意菩薩。以偈問曰。

世尊妙相具。我今重問彼。佛子何因緣。名爲觀世音。

初句歎佛德，次句雙含二問，後二句別顯初問。

二、雙頌兩答，分二：初頌總歎行願，二、別頌兩答。今初。

具足妙相尊。偈答無盡意。汝聽觀音行。善應諸方所。
弘誓深如海。歷劫不思議。侍多千億佛。發大清淨願。

初二句，經家敘辭，次六句佛正答。『汝聽』：攝聞思修。『觀音行』：一心三智觀十界音，度一切苦厄，爲利他行。『善應諸方所』：不動而遊垂形三土，觀三十二應。『弘誓深如海』：發菩提心，緣無作四諦，橫該十界，豎徹三諦，廣且益深。

二、別頌兩答，分二：初頌前答，二頌後答。初中二：初頌總答，二頌別答。今初。

我爲汝略說。聞名及見身。心念不空過。能滅諸有苦。

『聞名』：是口輪機。『見身』：是身輪機。『心念』：是意輪機。

『諸有』：指二十五有。

- 二、頌別答，分二：初頌七難，二頌三毒二求。初中十二：初頌火難、二頌第二水難、三加頌墮須彌難、四、加頌墮金剛山難、五、超頌第七怨賊難、六、追頌第四刀杖難、七、追頌第六枷鎖難、八、加頌咒詛毒藥難、九、追頌第五鬼難、十、加頌惡獸難、十一、加頌蛇蠍難、十二、加頌雷雨難。今初。

假使興害意。推落大火坑。念彼觀音力。火坑變成池。

『念彼觀音力』：以三觀智，念三諦音，境智一如，能所雙亡，感應道交，心力無窮。

- 二、頌第二水難。

或漂流巨海。龍魚諸鬼難。念彼觀音力。波浪不能沒。

- 三、加頌墮須彌難。

或在須彌峯。爲人所推墮。念彼觀音力。如日虛空住。

- 四、加頌墮金剛山。

或被惡人逐。墮落金剛山。念彼觀音力。不能損一毛。

『金剛山』：須彌是帝釋所都，金剛爲鬼子之宅，長阿含云：『三千大千世界復有大金剛山繞大海水，金剛山外復有第二大金剛山，二山中間窈窈冥冥，復有八大地獄，日月威光所不能照。』

- 五、超頌第七怨賊難。

或值怨賊繞。各執刀加害。念彼觀音力。咸卽起慈心。

- 六、追頌第四刀杖難。

或遭王難苦。臨刑欲壽終。念彼觀音力。刀尋段段壞。

- 七、追頌第六枷鎖難。

或囚禁枷鎖。手足被杻械。念彼觀音力。釋然得解脫。

八、加頌咒詛毒藥難。

咒詛諸毒藥。所欲害身者。念彼觀音力。還著於本人。

『還著於本人』：念咒役使鬼神往殺對方，而對方有福德所護，不可殺時，鬼神回頭必殺役使者。

九、追頌第五鬼難。

或遇惡羅刹。毒龍諸鬼等。念彼觀音力。時悉不敢害。

十、加頌惡獸難。

若惡獸圍繞。利牙爪可怖。念彼觀音力。疾走無邊方。

十一、加頌蛇蠍難。

虵蛇及蝮蠍。氣毒煙火然。念彼觀音力。尋聲自迴去。

十二、加頌雷雨難。

雲雷鼓掣電。降雹澍大雨。念彼觀音力。應時得消散。

以上正頌七難，加頌五難，共十二難，皆可約果報惡業煩惱六道四教釋之，所表亦不出六大，須彌金剛是地大，雷電是火大，雹雨是水大，獸蛇咒詛是識大。總之，一切依正皆是觀音妙色妙心，衆生不識，如閻中觸寶，自傷其身。初頌七難竟。

二、頌三毒三求。

衆生被困厄。無量苦逼身。觀音妙智力。能救世間苦。

『無量苦』：三界內外皆有三毒，皆求男女定慧之苦。初頌前答竟。

二、頌後答分二：初正頌示現。二、加頌顯機顯應。初中三：初明身業普應，二明意業普觀，三明口業普說。今初。

具足神通力。廣修智方便。十方諸國土。無刹不現身。

種種諸惡趣。地獄鬼畜生。生老病死苦。以漸悉令滅。

『神通力』：一念三千空假中全體妙用。『廣修智方便』：實智照權。上文以『非人』二字含三途，今列其名，十界一心中具，而心中之生老病死四相，藉念觀音之力，『漸悉令滅』。

二、明意業普觀。

真觀清淨觀。廣大智慧觀。悲觀及慈觀。常願常瞻仰。
無垢清淨光。慧日破諸闇。能伏災風火。普明照世間。

『真觀』：空觀。『清淨觀』：假觀。『廣大智慧觀』：中觀。『悲觀』：下同生心。『慈觀』：上同佛心。『常願』：上合十方諸佛同一慈力。『常瞻仰』：下合六道眾生同一悲仰。『無垢清淨光』：證此一心三觀，故發無垢清淨光明。『慧日破諸闇』：發光猶慧日，明顯暗隱。『災風火』：初禪火災，二禪水災，三禪風災。『普明照世間』：世間成住壞空屬相，其性不變。

三、明口業普說。

悲體戒雷震。慈意妙大雲。澍甘露法雨。滅除煩惱燄。

現身說法曰『悲體』。身教警衆靠戒德，故曰『戒雷震』。興慈運悲，覆物如雲，曰『慈意妙大雲』。法雨普潤衆生心田，能使身心清涼，如諸天甘露服之不死，曰：『澍甘露法雨，滅除煩惱燄。』

二、加頌顯機顯應。

諍訟經官處。怖畏軍陣中。念彼觀音力。衆怨悉退散。

『諍訟怖畏』：是顯機，亦論果報惡業煩惱。『念彼觀音力』：是顯應。『衆怨悉退散』：仍屬冥應。二、雙頌兩答竟。

三、雙頌兩勸，分二：初頌前番勸持名，二頌後番勸供養。初中二：初明境智深妙以勸常念，二明感應難測以勸勿疑。今初。

妙音觀世音。梵音海潮音。勝彼世間音。是故須常念。

『妙音』：卽權而實。『觀世音』：卽實而權。『梵音』：契本性淨。『海潮音』：契十界機。『勝彼世間音』：權實不二，自他不二，勝於緣理斷九也。

二、明感應難測以勸勿疑。

念念勿生疑。觀世音淨聖。於苦惱死厄。能爲作依怙。

疑去則念成，念成則二死可脫，觀音與我常相左右，以自性觀音爲怙恃，所謂夜夜抱佛眠，朝朝還共起。

二、頌後番勸供養。

具一切功德。慈眼視衆生。福聚海無量。是故應頂禮。

『慈眼視衆生』：卽以佛眼平等看衆生，人人有佛性，個個可成佛。『頂禮』：卽二業供養。初問答竟。

二、聞品功德，分二：初持地歎證，二經家述益。今初。

爾時持地菩薩。卽從座起。前白佛言。世尊。若有衆生聞是觀世音菩薩品自在之業。普門示現神通力者。當知是人功德不少。

『持地菩薩』：楞嚴云：『毘舍如來摩頂調我，當平心地，則世界地一切皆平，我卽心開，見身微塵，與造世界，所有微塵等無差別，悟無生忍，聞諸如來，宣妙蓮華，佛知見地，我先證明，而爲上首。』既悟地大本如是藏，則七難三毒二求乃至十法界身皆如來藏，故能證此品功德。

『自在之業』：謂於七難三毒二求得大自在，皆是菩薩現身說法處，所謂染淨不二。『普門示現』：現十界身方便說法。『功德不少』：聞品功德，已自不少，況受持讀誦書寫，如說修行者。

二、經家述益。

佛說是普門品時。衆中八萬四千衆生。皆發無等等阿耨多羅三藐三菩提心。

『無等等』：無上菩提無與等者，得此理已，等一切法，皆成無上。又究竟佛果無與等者，而初發心（圓住）便與等之，所謂發心究竟二無別。約化他勸流通中第二勸受法弟子竟。

釋普門品竟，次釋陀羅尼品。

陀羅尼品第二十六

『陀羅尼』：翻總持，持惡不起，持善不失（世界），又翻遮持，能持善（爲人）能遮惡（對治）遮邊惡，持中善（第一義）。

新譯曰：眞言。神咒乃諸佛心印，爲五不翻之一（秘密不翻——如神咒。多含不翻——如婆伽梵，具六義，自在熾勝端嚴名稱吉祥尊貴。此方無不翻——如閻浮樹。順古不翻——如阿耨菩提。尊重不翻——如般若。）或是鬼神王名，故能降伏鬼神（世界）。或如軍中口令，唱使相應（爲人）。或是密語治惡，如『無親往他國，欺誑一切人，粗食是常事，何勞復作瞋。』（對治）或是諸佛密語，如王索、仙陀婆，羣下不曉，唯有智臣知之，洗時奉水、飲時奉器、食時奉鹽、遊時牽馬。仙陀婆一語，卽含多用（第一義），陀羅尼亦爾，祇是一法徧有諸力，病癒（世界）罪除（對治）善生（爲人）道合（第一義）。

陀羅尼咒，衆經用法不同，或專治病，如那達居士療痔等；或專護法，如此文；或專用滅罪，如方等；或通用治病滅罪護經，如請觀音；或云大神咒（破煩惱）、大明咒（破無明）、無上咒（因滿）、無等等咒（果圓）。

化他勸流通共有五品文，前藥王品勗弘法之師，妙音觀音兩品勗受法弟子，此陀羅尼品明咒護，下妙莊嚴品明人護。咒護又爲四：初問持經功德，二、答甚多，三、請以咒護，四、聞品得益。今初。

爾時藥王菩薩卽從座起。偏袒右肩。合掌向佛。而白佛言。世尊。若善男子善女人。有能受持法華經者。若讀誦通利。若書寫經卷。得幾所福。

二、答甚多。

佛告藥王。若有善男子善女人。供養八百萬億那由他恒河沙等諸佛。於汝意云何。其所得福。寧爲多不。甚多。世尊。佛言。若

善男子善女人。能於是經。乃至受持一四句偈。讀誦解義。如說修行。功德甚多。

三、請以咒護，分五：初藥王、二、勇施、三、毗沙門、四、持國、五、羅剎女。初中四：初請、二說、三歎、四印。今初。

爾時藥王菩薩。白佛言。世尊。我今當與說法者陀羅尼咒。以守護之。卽說咒曰。

二、說。

安爾。曼爾。摩禰（音你）。摩摩禰。旨隸。遮梨第。賒（音奢）咩（音米）。賒（音奢）履多瑋（音尾）。羶（音山）帝。日帝。日多履。娑履。阿瑋娑履。桑履。娑履。叉裔（音異）。阿叉裔。阿耆膩（音義）。羶帝。賒履。陀羅尼。阿盧伽娑娑。簸（音播）蔗毗叉膩。禰毗荊。阿便哆（音朵）邏（音羅）禰履荊。阿亶（膽）哆波隸輸地。歐究隸。牟究隸。阿羅隸。波羅隸。首迦差。阿三磨三履。佛陀毗吉利婁（音姪）帝。達磨波利差帝。僧伽涅瞿沙禰。婆舍婆舍輸地。曼哆邏。曼哆邏叉夜多。郵樓哆。郵樓多橋舍略。惡叉邏。惡叉治多治。阿婆盧。阿摩若。那多夜。

三、嘆。

世尊。是陀羅尼神咒。六十二億恒河沙等諸佛所說。若有侵毀此法師者。則爲侵毀是諸佛已。

四、印。

時釋迦牟尼佛。讚藥王菩薩言。善哉善哉。藥王。汝愍念擁護此法師故。說是陀羅尼。於諸衆生。多所饒益。

二、勇施，分三：初請。二、說。三、嘆。今初。

爾時勇施菩薩白佛言。世尊。我亦爲擁護讀誦受持法華經者。說陀羅尼。若此法師。得是陀羅尼。若夜叉。若羅刹。若富單那。若吉蔗。若鳩槃荼。若餓鬼等。伺求其短。無能得便。

『夜叉』：翻捷疾鬼。『羅刹』：翻食人鬼，二部是北方毘沙門多聞天王所領者。『富單那』：此云臭餓鬼，主熱病鬼。『吉蔗』：此云所作，卽起尸鬼。『鳩槃荼』：陰如冬瓜，行置肩上，卽魘魅鬼。

二、說。

卽於佛前而說咒曰。

痤（音ノチメ乙）隸。摩訶痤隸。郁枳。日枳。阿隸。阿羅婆第。涅隸第。涅隸多婆第。伊緻柅（音匿）。韋緻柅。旨緻柅。涅隸墀（音池）柅。涅犁墀婆底。

三、歎。

世尊。是陀羅尼神咒。恒河沙等諸佛所說。亦皆隨喜。若有侵毀此法師者。則爲侵毀是諸佛已。

三、毘沙門，分三：初請、二說、三歎。今初。

爾時毗沙門天王護世者。白佛言。世尊。我亦爲愍念衆生。擁護此法師故。說是陀羅尼。

『毘沙門』：卽北方多聞天王。

二、說。

卽說咒曰。

阿梨。那梨。菟那梨。阿那盧。那履。拘那履。

三、歎。

世尊。以是神咒。擁護法師。我亦自當擁護持是經者。令百由旬內。無諸衰患。

四、持國，分三：初請、二說、三歎。今初。

爾時持國天王在此會中。與千萬億那由他乾闥婆衆恭敬圍繞。前詣佛所。合掌白佛言。世尊。我亦以陀羅尼神咒。擁護持法華經者。

『持國』：即東方天王。主乾闥婆、毘舍闍二部。

二、說。

即說咒曰。

阿伽彌。伽彌。瞿利。乾陀利。旃陀利。摩蹬耆。常求利。浮樓莎柁。頰（音惡）底。

三、歎。

世尊。是陀羅尼神咒。四十二億諸佛所說。若有侵毀此法師者，則為侵毀是諸佛已。

五、羅刹女，分五：初列名同請、二說、三歎、四誓、五印。今初。

爾時有羅刹女等。一名藍婆（翻結縛）。二名毘藍婆（翻離結縛）。三名曲齒。四名華齒。五名黑齒。六名多髮。七名無厭足。八名持瓔珞。九名皋帝。十名奪一切衆生精氣。是十羅刹女。與鬼子母。並其子及眷屬。俱詣佛所。同聲白佛言。世尊。我等亦欲擁護讀誦受持法華經者。除其衰患。若有伺求法師短者。令不得便。

害人之鬼，無甚於羅刹女，鬼子母，今誓護持，足見王興守在四夷，佛道備而防在魔外。

二、說。

卽於佛前而說咒曰。

伊提履。伊提泯。伊提履。阿提履。伊提履。泥履。泥履。泥履。泥履。泥履。泥履。樓醯（音兮）。樓醯。樓醯。樓醯。多醯。多醯。

三、歎。

寧上我頭上。莫惱於法師。若夜叉。若羅刹。若餓鬼。若富單那。若吉蔗。若毗陀羅。若犍馱。若烏摩勒伽。若阿跋摩羅。若夜叉吉蔗。若人吉蔗。若熱病。若一日。若二日。若三日。若四日。若至七日。若常熱病。若男形。若女形。若童男形。若童女形。乃至夢中。亦復莫惱。卽於佛前而說偈言。

若不順我咒。惱亂說法者。頭破作七分。如阿梨樹枝。
如殺父母罪。亦如壓油殃。斗秤欺証人。調達破僧罪。

犯此法師者。當獲如是殃。

『毘陀羅』：赤色鬼。『犍馱』：黃色鬼。『烏摩勒伽』：黑色鬼。

『阿跋摩羅』：青臉鬼。『熱病』：如瘟疫瘡鬼之類。『阿梨樹』：枝若墮地，自然破爲七斤。『壓油』：西國壓油擣麻使生蟲，然後合壓之，汁多而肥，爲殺業之尤。『殺父母、破僧』：五逆之三。『斗秤欺証人』：輕出重入。此盜業之尤。

四、誓。

諸羅刹女說此偈已。白佛言。世尊。我等亦當身自擁護受持讀誦修行是經者。令得安穩。離諸衰患。消衆毒藥。

五、印。

佛告諸羅刹女。善哉善哉。汝等但能擁護受持法華名者。福不可量。何況擁護具足受持。供養經卷。華香瓔珞。末香塗香燒香。旛蓋伎樂。然種種燈。蘇燈油燈。諸香油燈。蘇摩那華油燈。菴蔔華油燈。婆師迦華油燈。優鉢羅華油燈。如是等百千種供養者。臯帝。汝等及眷屬。應當擁護如是法師。

『酥摩那華』：卽須曼那華。『婆師迦』：卽波利師迦。『優鉢羅』：卽青蓮華。『臯帝』：晉譯何所者，爲無所不具之義故獨呼。三、請以咒護竟。

四、聞品得益。

說是陀羅尼品時。六萬八千人。得無生法忍。

釋陀羅尼品咒護竟。次釋妙莊嚴王本事品。

妙莊嚴王本事品第二十七

昔佛末世，有四比丘，於法華經極生殷重，於是結契山林，志欣佛慧，幽居日積，衣糧單罄，其一人云，吾等四窮，尚不存身，法當安寄，君三人者，但以命奉道，我一人者，捨此身力，誓給所須，三人得展其誠，功圓事辦，其一人者，數涉人間，屢逢聲色，難可護持，偶逢王出，愛彼光榮，隨念受報，著欲而有邪見，人中天上，常得爲王，三人得道，會而議云：我免籠樊，功由此王，但非愛鈎，無由可拔，一人可爲端正婦，二作聰明兒，兒婦之言，必當從順，婦者妙音菩薩是，昔二子者，今藥王、藥上二菩薩是，昔時王者華德菩薩是，此妙莊嚴王因緣本事。

本爲四大菩薩，迹示一凡三聖，引導彼時眷屬及衆生。

觀心者，於諸見不動，而通達正見，統御無外，名妙莊嚴王。

約化他勸流通中第四明人護，分六：初明事本、二雙標所化能化、三明能化方便、四明所化得益、五結會古今、六闡品悟道。今初。

爾時佛告諸大衆。乃往古世。過無量無邊不可思議阿僧祇劫。有佛名雲雷音宿王華智。多陀阿伽度。阿羅訶。三藐三佛陀。國名光明莊嚴。劫名喜見。

二、雙標所化能化。

彼佛法中。有王名妙莊嚴。其王夫人。名曰淨德。有二子。一名淨藏。二名淨眼。是二子有大神力福德智慧。久修菩薩所行之道。所謂檀波羅密。尸羅波羅密。羸提波羅密。毗離耶波羅密。禪波羅密。般若波羅密。方便波羅密。慈悲喜捨。乃至三十七品助道法。皆悉明了通達。又得菩薩淨三昧。日星宿三昧。淨光三昧。淨色三昧。淨照明三昧。長莊嚴三昧。大威德藏三昧。於此三昧。亦悉通達。

王是所化，夫人及二子是能化，文中別顯二子功德。『大神力』：是如來衣。『大福德』：是如來室。『大智慧』：是如來座。六度加方便爲七度，倘於權慧開出方願力智則爲十度，今但云方便，卽攝餘三。圓教十度四等三十七品，並是無作稱性妙道，非正非助。今標七種三昧皆是隨用立名，其理不異。『淨三昧』：圓離三垢。『日星宿三昧』：實智如日，權智如星宿。『淨光三昧』：性淨發光。『淨色三昧』：普現色身。『淨照明三昧』：性淨光明照了諸法。『長莊嚴三昧』：示現莊嚴長時不滅。『大威德藏三昧』：十力威德含攝諸法。

有云：妙莊嚴王，表佛性不覺起妄，淨德夫人，表佛性具萬德，淨藏淨眼，表淨藏識淨法眼始能王自在。

二、明能化方便，分三：初時至，二論議，三現化。今初。

爾時彼佛欲引導妙莊嚴王。及愍念衆生故。說是法華經。

雲雷音宿王華智佛，雖常宣正法，但對法華開顯，仍俟機熟方說。

二、論議。

時淨藏淨眼二子。到其母所。合十指爪掌白言。願母往詣雲雷音宿王華智佛所。我等亦當侍從親近。供養禮拜。所以者何。此佛於一切天人衆中。說法華經。宜應聽受。母告子言。汝父信受外道。深著婆羅門法。汝等應往白父。與共俱去。淨藏淨眼。合十指爪掌白母。我等是法王子。而生此邪見家。母告子言。汝等當憂念汝父。爲現神變。若得見者。心必清淨。或聽我等往至佛所。

三、現化。

於是二子念其父故。涌在虛空。高七多羅樹。現種種神變。於虛空中。行住坐臥。身上出水。身下出火。身下出水。身上出火。

或現大身滿虛空中。而復現小。小復現大。於空中滅。忽然在地。入地如水。履水如地。現如是等種種神變。令其父王心淨信解。

『七多羅樹』：等於四十九仞，一仞八尺。『現種神變』：經文有十四變化。

三明能化方便竟。

四、明所化得益，分十：初信子伏師，二白母求出家，三重催見佛，四敍歎功德，五俱詣佛所，六佛授王記，七出家修行，八稱讚二子，九佛述行高，十讚佛自誓。今初。

時父見子神力如是。心大歡喜。得未曾有。合掌向子言。汝等師爲是誰。誰之弟子。二子白言。大王。彼雲雷音宿王華智佛。今在七寶菩提樹下。法座上坐。於一切世間天人衆中。廣說法華經。是我等師。我是弟子。父語子言。我今亦欲見汝等師。可共俱往。

王昔信受外道，所覩邪變，不過或一或二，狹而且陋，今見子所作，歎未曾有，信其子而伏其師，故問師是誰，我亦願見。

二、白母求出家。

於是二子從空中下。到其母所。合掌白母，父王今已信解。堪任發阿耨多羅三藐三菩提心。我等爲父已作佛事。願母見聽。於彼佛所。出家修道。爾時二子欲重宣其意。以偈白母。

願母放我等。出家作沙門。諸佛甚難值。我等隨佛學。

如優曇鉢華。值佛復難是。脫諸難亦難。願聽我出家。

母卽告言。聽汝出家。所以者何。佛難值故。

父王已信，宮中八萬四千又熟，二子功圓，佛難值故，母聽子隨佛出家。

三、重催見佛。

於是二子白父母言。善哉父母。願時往詣雲雷音宿王華智佛所。親近供養。所以者何。佛難得值。如優曇鉢羅華。又如一眼之龜。值浮木孔。而我等宿福深厚。生值佛法。是故父母當聽我等。令得出家。所以者何。諸佛難值。時亦難遇。

『一眼之龜』：譬難遇，龜魚兩眼看物，既云一眼。所見非正，邪見者在生死海，值於佛法一乘浮木實諦之孔甚難。

四、敘歎功德。

彼時妙莊嚴王後宮八萬四千人。皆悉堪任受持是法華經。淨眼菩薩。於法華三昧久已通達。淨藏菩薩。已於無量百千萬億劫。通達離諸惡趣三昧。欲令一切衆生離諸惡趣故。其王夫人。得諸佛集三昧。能知諸佛秘密之藏。二子如是以方便力善化其父。令心信解。好樂佛法。

『法華三昧』：攝一切法歸一實相。『離諸惡趣三昧』：九界三惑爲能趣，二種生死爲所趣，圓道正定能離之，卽二十五王三昧。『佛集三昧』：三德密藏，佛集其中，唯佛行處。

五、俱詣佛所。

於是妙莊嚴王。與羣臣眷屬俱。淨德夫人。與後宮采女眷屬俱。其王二子。與四萬二千人俱。一時共詣佛所。到已。頭面禮足。繞佛三匝。却住一面。爾時彼佛爲王說法。示教利喜。王大歡悅。爾時妙莊嚴王及其夫人。解頸眞珠瓔珞。價值百千以散佛上。於虛空中。化成四柱寶臺。臺中有大寶牀。敷百千萬天衣。其上有佛結跏趺坐。放大光明。爾時妙莊嚴王作是念。佛身希有。端嚴殊特。成就第一微妙之色。

『成就第一微妙之色』：猶龍女讚佛微妙淨法身具相三十二。已悟色之實相，故佛旋與授記。

六、佛授王記。

時雲雷音宿王華智佛。告四衆言。汝等見是妙莊嚴王。於我前合掌立不。此王於我法中作比丘。精勤修習助佛道法。當得作佛。號娑羅樹王。國名大光。劫名大高王。其娑羅樹王佛。有無量菩薩衆。及無量聲聞。其國平正。功德如是。

七、出家修行。

其王卽時以國付弟。與夫人二子。並諸眷屬。於佛法中出家修道。王出家已。於八萬四千歲。常勤精進。修行妙法華經。過是已後。得一切淨功德莊嚴三昧。

八、稱歎二子。

卽升虛空。高七多羅樹。而白佛言。世尊。此我二子已作佛事。以神通變化。轉我邪心。令得安住於佛法中。得見世尊。此二子者。是我善知識。爲欲發起宿世善根饒益我故。來生我家。

九、佛述行高。

爾時雲雷音宿王華智佛。告妙莊嚴王言。如是如是。如汝所言。若善男子善女人。種善根故。世世得善知識。其善知識。能作佛事。示教利喜。令人阿耨多羅三藐三菩提。大王當知。善知識者。是大因緣。所以化導令得見佛。發阿耨多羅三藐三菩提心。大王。汝見此二子不。此二子已曾供養六十五百千萬億那由他恒河沙諸佛。親近恭敬。於諸佛所。受持法華經。愍念邪見衆生。令住正見。

『善知識』：有外護同行教授。『能作佛事』：此為外護善知識。『示教利喜』：此為教授善知識。『所謂化導令得見佛』：此為同行善知識。

『令人三菩提』：此則實際實相善知識。總之，善知識者，須說行一致，看破放下為大因緣。

十、讚佛自誓。

妙莊嚴王即從虛空中下。而白佛言。世尊。如來甚希有。以功德智慧故。頂上肉髻。光明顯照。其眼長廣。而紺青色。眉間毫相。白如珂月。齒白齊密。常有光明。脣色赤好。如頻婆果。爾時妙莊嚴王。讚歎佛如是等無量百千萬億功德已。於如來前。一心合掌。復白佛言。世尊。未曾有也。如來之法。具足成就不可思議微妙功德。教戒所行。安隱快善。我從今日。不復自隨心行。不生邪見憍慢瞋恚諸惡之心。說是語已。禮佛而出。

外欽佛德，內革己心，深達實相，冰水同一濕性。『頻婆果』：此云相思果，色丹而潤。

五、結會古今。

佛告大眾。於意云何。妙莊嚴王。豈異人乎。今華德菩薩是。其淨德夫人。今佛前光照莊嚴相菩薩是。哀愍妙莊嚴王及諸眷屬故。於彼中生。其二子者。今藥王菩薩。藥上菩薩是。是藥王藥上菩薩。成就如此諸大功德。已於無量百千萬億諸佛所。植眾德本。成就不可思議諸善功德。若有人識是二菩薩名字者。一切世間諸天人民。亦應禮拜。

六、聞品悟道。

佛說是妙莊嚴王本事品時。八萬四千人遠塵離垢。於諸法中。得法眼淨。

『法眼淨』：所見清淨，非小乘初果位。

二、約化他勸流通竟。

釋妙莊嚴王本事品竟。次釋普賢勸發品。

普賢菩薩勸發品第二十八

『普賢』：梵語必輸颯陀，大論觀經皆譯徧吉，此經譯爲普賢。普卽徧義，賢卽吉義。

楞嚴云：『我用心聞，分別衆生，所有知見，若於他方恒沙界外，有一衆生，心中發明普賢行者，我於爾時乘六牙象，分身百千，皆至其處，縱彼障深，未得見我，我與其人，暗中摩頂，擁護安慰，令其成就。』『勸發』：戀法之辭，遙在彼國，具聞此經，始末既周，欲令自行化他永永無盡，故自東自西，具四悉壇因緣而來勸發。

文云：『我爲供養此法華經故，自現其身，若見我身，甚大歡喜。』
（世界悉壇）『已見我故，轉復精進，卽得三昧及陀羅尼。』（爲人悉壇）。
『得是陀羅尼故，無有非人，能破壞者，亦復不爲女人之所惑亂。』（對治悉壇）。『三千大千世界微塵菩薩，具普賢道。』（第一義悉壇）。

上流通文爲三：神力囑累二品舉經力大，正明付囑流通。藥王下五品，舉菩薩化道力大以勸流通。今品舉普賢誓願力大，以勸流通。文爲四：初發來、二勸發、三述發、四發益。初又三：初上供、二下化、三修敬。今初。

爾時普賢菩薩以自在神通力。威德名聞。與大菩薩無量無邊不可稱數。從東方來。所經諸國。普皆震動。雨寶蓮華。作無量百千萬億種種伎樂。

『自在』：理一。『神通』：行一。『威德』：人一。『名聞』：教一。又『自在』：常也。『神通』：樂也。『威德』：我也。『名聞』：淨也。

又神通故動地，淨力故雨華，樂力故奏伎。

華嚴約所證自體說，普賢依眞而住，此經約迹所從，故云『從東方來』。總之，眞性外無國土，國土外別無眞性可住。

二、下化。

又與無數諸天。龍。夜叉。乾闥婆。阿修羅。迦樓羅。緊那羅。摩睺羅伽。人非人等。大眾圍繞。各現威德神通之力。

前列眾具四德，今略無自在名聞，但舉二攝二，當知所隨皆法身也。又與大菩薩是示現實功德，與八部是示現權功德，權實並具，四德兼備為上供下化二意。

三、修敬。

到娑婆世界耆闍崛山中。頭面禮釋迦牟尼佛。右繞七匝。

『七匝』：表信住行向地等妙七位圓行。

初發來竟。

二、勸發，分二：初請問勸發，二、誓願勸發。初中二：初問，二答。今初。

白佛言。世尊。我於寶威德上王佛國。遙聞此娑婆世界說法華經。與無量無邊百千萬億諸菩薩眾。共來聽受。惟願世尊當為說之。若善男子善女人。於如來滅後。云何能得是法華經。

此文既在流通之末，故願聞之言，雙請正宗及流通。

二、答。

佛告普賢菩薩。若善男子善女人。成就四法。於如來滅後。當得是法華經。一者為諸佛護念。二者植眾德本。三者入正定聚。四者發救一切眾生之心。善男子。善女人。如是成就四法。於如來滅後。必得是經。

普賢雙請正宗流通，佛亦以四法雙答，先答正宗，又此四法，即開權顯實。『諸佛護念』：是開佛知見。『植眾德本』：是示佛知見。『入正定聚』：是入佛知見。『發救一切眾生之心』：是悟佛知見。倘能遠惡從善返迷還正，開權知見，顯佛知見，則為『諸佛護念』。若佛知見開，則般若照

明是『植衆德本』。亦是『入正定聚』。不取不捨，即是『救一切衆生』。

此四法開迹顯本，唯三軌唯四安樂，答其流通。『發救衆生心』：是人如來室。『入正定聚。佛所護念。』：是著如來衣。『植衆德本』：是坐如來座。又『發救衆生心』：是誓願安樂。『入正定聚』：是意安樂。『植衆德本』：是口安樂。『諸佛護念』：是身安樂。『必得是經』：是經爲實相，如藥王得此而然身；妙音得此而光召；觀音得此而普應；妙莊得此而轉邪；普賢得此而勸發。初請問勸發竟。

二、誓願勸發分二：初誓願護人，二誓願護法。初中六：初攘其外難，二教以內法，三覆以神力，四示近因，五示近果，六總結勸。今初。

爾時普賢菩薩白佛言。世尊。於後五百歲濁惡世中。其有受持是經典者。我當守護。除其衰患。令得安隱。使無伺求得其便者。若魔若魔子。若魔女。若魔民。若爲魔所著者。若夜叉。若羅刹。若鳩槃荼。若毗舍闍。若吉蔗。若富單那。若韋陀羅等。諸惱人者。皆不得便。

『韋陀羅』：主厭禱鬼，此翻善妙。

二、教以內法，分三：初行立讀誦，二、若坐思惟，三、七精進。今初。

是人若行若立。讀誦此經。我爾時乘六牙白象王。與大菩薩衆俱詣其所。而自現身。供養守護。安慰其心。亦爲供養法華經故。

二、若坐思惟。

是人若坐。思惟此經。爾時我復乘白象王。現其人前。其人若於法華經。有所忘失一句一偈。我當教之。與共讀誦。還令通利。爾時受持讀誦法華經者。得見我身。甚大歡喜。轉復精進。以見我故。卽得三昧。及陀羅尼。名爲旋陀羅尼。百千萬億旋陀羅尼。法音方便陀羅尼。得如是等陀羅尼。

『旋陀羅尼』：旋假入空。『百千萬億旋陀羅尼』：旋空入假。『法音方便陀羅尼』：二爲方便入中道。

三、三七精進。

世尊。若後世後五百歲濁惡世中。比丘比丘尼。優婆塞優婆夷。求索者。受持者。讀誦者。書寫者。欲修習是法華經。於三七日中。應一心精進。滿三七日已。我當乘六牙白象。與無量菩薩而自圍繞。以一切衆生所喜見身。現其人前而爲說法。示教利喜。亦復與其陀羅尼咒。得是陀羅尼故。無有非人能破壞者。亦不爲女人之所惑亂。我身亦自常護是人。惟願世尊。聽我說此陀羅尼咒。卽於佛前。而說咒曰。

阿檀地。檀陀婆地。檀陀婆帝。檀陀鳩舍隸。檀陀修陀隸。修陀隸。修陀羅婆底。佛馱波羶禰。薩婆陀羅尼阿婆多尼。薩婆婆沙阿婆多尼。修阿婆多尼。僧伽婆履叉尼。僧伽涅伽陀尼。阿僧祇。僧伽婆伽地。帝隸阿惰僧伽兜略。阿羅帝波羅帝。薩婆僧伽地三摩地伽蘭地。薩婆達摩修波利刹帝。薩婆薩埵樓馱舍略阿菟伽地。辛阿毗吉利地帝。

二、教以內法竟。

三、覆以神力。

世尊。若有菩薩得聞是陀羅尼者。當知普賢神通之力。若法華經行闍浮提。有受持者。應作此念。皆是普賢威神之力。

四、示勝因。

若有受持讀誦。正憶念。解其義趣。如說修行。當知是人行普賢行。於無量無邊諸佛所。深種善根。爲諸如來手摩其頭。

『行普賢行』：同未來佛得脫。『深種善根』：於過去佛所種。『手摩其頭』：為現在佛所熟。

五、示近果。

若但書寫。是人命終。當生忉利天上。是時八萬四千天女。作衆伎樂而來迎之。其人即著七寶冠。於采女中娛樂快樂。何況受持讀誦。正憶念。解其義趣。如說修行。若有人受持讀誦解其義趣。是人命終。為千佛授手。令不恐怖。不墮惡趣。即往兜率天上彌勒菩薩所。彌勒菩薩。有三十二相大菩薩衆所共圍繞。有百千萬億天女眷屬而於中生。有如是等功德利益。

但能書寫近生忉利，具五法師能生兜率，若發淨願則可生四種安樂土。否則隨其五品功成生兜率。『天女眷屬』：乃侍從慈氏者，非同忉利之欲樂。

六、總結勸。

是故智者。應當一心自書。若使人書。受持讀誦。正憶念。如說修行。

初發願護人竟。

二、誓願護法。

世尊。我今以神通力故。守護是經。於如來滅後。閻浮提內。廣令流布。使不斷絕。

二、勸發竟。

三、述發。分二：初先述護法，二述護人。今初。

爾時釋迦牟尼佛讚言。善哉善哉。普賢。汝能護助是經。令多所衆生。安樂利益。汝已成就不可思議功德。深大慈悲。從久遠來。

發阿耨多羅三藐三菩提意。而能作是神通之願。守護是經。我當以神通力。守護能受持普賢菩薩名者。

普賢護法，釋迦兼述護人。

二、述護人，分五：初述第二，教以內法。二述第四，示勝因。三述第五，示近果。

四述第一，攘外難。五述總結勸。今初。

普賢。若有受持讀誦。正憶念。修習書寫是法華經者。當知是人。則見釋迦牟尼佛。如從佛口聞此經典。當知是人。供養釋迦牟尼佛。當知是人。佛讚善哉。當知是人。為釋迦牟尼佛手摩其頭，當知是人。為釋迦牟尼佛衣之所覆。

受持讀誦正憶念如說修行得見釋迦，從佛口聞經，佛讚手摩衣覆，況普賢因中乘六牙白象，所教忘失章句及陀羅尼護耶。

二、述第四，示勝因。

如是之人。不復貪著世樂。不好外道經書手筆。亦復不喜親近其人。及諸惡者。若屠兒。若畜豬羊雞狗。若獵師。若銜賣女色。是人心意質直。有正憶念。有福德力。是不為三毒所惱。亦不為嫉妬。我慢。邪慢。增上慢。所惱。是人少欲知足。能修普賢之行。

廣舉因中無諸過惡，少欲知足修普賢行。

三、述第五，示近果。

普賢。若如來滅後。後五百歲。若有人見受持讀誦法華經者。應作是念。此人不久當詣道場。破諸魔眾。得阿耨多羅三藐三菩提。轉法輪。擊法鼓。吹法螺。雨法雨。當坐天人大眾中師子法座上。

普賢。若於後世。受持讀誦是經典者。是人不復貪著衣服臥具飲食資生之物。所願不虛。亦於現世得其福報。

『當詣道場』：必成遠果，不止忉利兜率之近果。雖不貪著四事，『亦於現世得其福報』，何止命終生天耶。

四、述第一攘外難。

若有人輕毀之。言汝狂人耳。空作是行。終無所獲。如是罪報。當世世無眼。若有供養讚歎之者。當於今世得現果報。若復見受持是經者。出其過惡。若實若不實。此人現世得白癩病。若有輕笑之者。當世世牙齒疏缺。醜唇平鼻。手腳繚戾。眼目角眊。身體臭穢。惡瘡膿血。水腹短氣。諸惡重病。

佛陀廣示毀者之罪，令知過必改，不相惱亂。『無眼』：壞正法故。『得白癩病』：無功德莊嚴。『繚戾』：卷曲狀。『角眊』：瞳子不正。『臭穢』：無法身香。『水腹』：空腹高心。『短氣』：浩氣不充。

五、述總結勸。

是故普賢。若見受持是經典者。當起遠迎。當如敬佛。

三、述發竟。

四、發益，分二：初闡品益，二、闡經益。今初。

說是普賢勸發品時。恒河沙等無量無邊菩薩。得百千萬億旋陀羅尼。三千大千世界微塵等諸菩薩。具普賢道。

旋陀羅尼是初地位，具普賢道，是十地位。

二、闡經益。

佛說是經時。普賢等諸菩薩舍利弗等諸聲聞。及諸天龍人非人等。一切大會皆大歡喜。受持佛語。作禮而去。

此中仍稱聲聞者，乃是經家存其本位，或以佛道聲，令一切聞。此經以文殊發始，普賢成終，契文殊之妙智，入普賢之行門。

（講於福嚴佛學院，十方叢林書院，法輪講堂）

跋語

中國佛教分禪、淨、律、密、台、賢、識、論八大宗，及俱舍、成實兩派。

天台宗以法華爲宗骨（爲實施權、開權顯實、由施廢開、顯本末究竟等。），以智論爲指南（一心止觀所由出），以涅槃爲扶疏（追說追泯融會顯實），以大品爲觀法（三止三觀）。

智顛大師尊龍樹爲高祖，居天台山，創宗於前五代陳隋間，說三大部（法華玄義、法華文句、摩訶止觀），九祖唐荆溪湛然爲作疏記。五小部（觀經疏、光明玄、光明疏、觀音玄、觀音疏），十七祖宋四明法智爲之作疏。三十一祖明清靈峯藕益智旭大師，融會性起緣起性具之說，四十三祖民國諦閑古虛建觀宗（以三觀爲宗），繼之者四十四祖寶靜今德，力興台學，顯明忝爲佛隴真傳第四十五代，受觀宗法乳，一脈相傳，雖福薄慧淺，但決志弘傳教觀，不暇自我嚴飾，所說秉宗，會歸尊祖，曾依經解義述有法集流通，就教於高明。

茲以法華講座圓滿，謹循玄義文句，節取大綱，錄旭祖會義分科，名爲直解，未敢竄入己意，略縮玄籤妙樂浩繁之歎，以符講法華者莫善於台宗之譽。

民國七十三年元月十九日

顯明念法識於觀宗別院（佛隴）

法華經讚（七卷）

一、能仁現瑞。彌勒疑詳。文殊爲衆廣宣揚。古佛放毫光。三請法王。爲演妙蓮香。（南無法華會上三稱下同）。

二、如來喻說。三界爲家。火宅門外布三車。諸子競紛華。長者欣誇。授記果無差。

三、三根普潤。弟子蒙恩。化城虛設莫爲真。再觀智勝因。十六王孫。八面證金身。

四、五百弟子。記證金仙。多寶佛塔湧其前。樂說起根源。爲法求賢。聽演妙蓮詮。

五、曼殊起告。擁護真詮。堅持四法得安然。地湧衆多千。阿逸重宣。壽量廣無邊。

六、彌勒啓問。較量經因。六根清淨見天真。不輕禮常存。爲法燃身。供養淨明尊。

七、妙音觀音。救苦尋聲。淨藏淨眼轉邪心。普賢行願深。四法常欽。萬古永爲箴。



日期：二〇二〇年八月十五日
版本：2020.08.15
網址：<http://www.forlong.us>

